

國家文物局

清代傳記叢書



明文書局印行

清代傳記叢刊・綜錄類⑦  
周駿富輯

# 國朝耆獻類徵初編

(二)

卷一  
四〇至  
四六

(清)

李

桓輯



明文書局印行





國朝耆獻類徵初編卷百四十目錄

郎署二

侯抒慄

王士祿

劉必顯

廖玉

王澧

孔允樾

羅為廣

張吾瑾

何訥

丁澎

劉體仁

郭士環

鳴爾鳴圖

王壘

王永命

李振藻

黃貞麟

周士儼

劉果

趙增

黃開運

李溥

葉封

廖聯翼

國朝耆獻類徵初編卷百四十郎署二目錄

皇朝通志卷一百一十一

霍之瑄

補錄

王士祿

丁澎

國朝耆獻類徵初編卷百四十

通奉大夫前署江西巡撫江西布政使司布政使湘陰李桓輯

郎署二

侯抒慤

公諱抒慤字爾謨姓侯氏別號古渠其先居晉始祖遷汴復遷襄遂爲襄城人數傳至邦奠生二子長抒憚有學行次卽公公性謙退仁愛能容物雖倉猝未嘗見疾言遽色嗜學刻苦一字一句必求心得不爲涉獵之習塾師田起龍先生嘗以偉器目之順治乙酉以鄉試副車選拔入成均戊子舉於順天王辰成進士例授知縣公曰吾學未成恐不足父母斯民願得廣文一席稽典籍以資

經濟不逮具疏請因授河南府儒學教授公力倡二程之學多士蔚興人以比湖州歷八年繡衣使者兩上其事爲河南最 朝廷嘉之 賜絹一匹當內擢會有言進士教職必親民事始得升京職者當事者遂遷公爲山東濰縣知縣人皆爲公扼腕公獨曰數年所學正於此見濰富饒甲山左公治清苦不以一錢入私囊時匿旗下逃亡者謂之窩主法當流邑奸民多誣富室爲窩主每發輒破人產公廢寢食百計開釋民賴以安五年升戶部主事加一級 賜錦緞二匹以旌其廉 上方屬意公欲大用之而公竟卒時康熙庚戌也先是以外官入莅部署者皆以土物餽遺當事公獨無有人多銜之已而見其冬月衣舊緋臥無裊褥客邸蕭條有

貧士所不堪者乃其嗟嘆贖金市羊裘爲公禦寒計公事兄抒憚如父或督過婉容俯受人有犯者不與校過輒忘之尤重族黨其自晉來者公厚遇之一與居襄城者等

李來章曰憶公自洛遷濰過里門余方垂髫往賀公公握手問所學意良厚周旋恂恂退讓不以長者自居易所謂謙謙君子公眞其人與子嘗嘆自學術不明士習澆薄往往以詖譖機械爲長平居矜傲桑梓多不能堪況一旦乘風雲而得志者乎如公厚德誠後進之楷模云

右傳李來章撰

侯公諱抒憚字爾謨號古渠河南襄城人始祖自晉遷汴自汴遷

襄城累傳至公父奠邦生二子公仲子也公少負至性孝弟愿謹  
十二能文章比長湛深經術恥世儒空疏之學順治戊子登賢書  
壬辰成進士故事進士謁選人例得大令公曰吾學未成不可父  
母斯民子產云學而後入政未聞以政學者也具疏以請遂改河  
南府教授洛自兵燹後學校廢矣公至闢講堂日與生徒發明二  
程之旨穿穴經史旁搜掌故以資吏事秩滿以卓異第一遷濰縣  
知縣濰富饒稱劇邑公行次白浪河顧左右曰吾爲令當與此水  
同其清矣治濰五年人服其廉時嚴匿逃之禁奸民多鈎黨以破  
人產公立置之法大賈郭某陷於訟薦紳爲之請者以十數公閉  
閣不與通及對簿事卒得白郭以千金餽峻拒之同年某爲萊州

守移書徵責公伴爲莫解復曰濫竽作吏曠職懷慚苟有可以報  
朝廷愛百姓者教之敢不惟命守意沮思中傷公會巡撫劉公  
芳獨特膺薦公擢戶部主事以去公之治濰也原本經術蓋自河  
浴橫經皋比談道時已基之矣公質羸善疾入郎署轉劇踰年卒  
公幼嗜讀書明季寇躡中原重以饑饉項郟汝鄧之間千里無絃  
誦聲公擁書如故家貧躬耕挂書牛角上且耕且讀人笑其迂獨  
其師田公起龍奇之公成進士田與同榜云

論曰公幼孤受學於兄抒憚事之甚謹令濰日抒憚語公吾家世  
清白若以一錢歸吾不復東視若矣故公以廉介特聞兄之教也  
抒憚以學行爲經師晚年居柏泉山著採山效曾十三願諸書學



者稱爲柏泉先生戶部公以循吏顯柏泉以文學傳夷門監者之  
後固多賢者哉

右傳田雯撰

王士祿

王士祿山東新城人刑部尙書士禎之兄順治九年進士清介有  
守篤於友愛自少能文章工吟詠以詩法授諸弟咸有成就而士  
禎遂以風雅爲海內宗仰始舉禮部投牒改官選萊州府教授尋  
遷國子監助教擢吏部主事遷員外郎康熙二年充河南鄉試正  
考官以磨勘呈吏議逮下獄久之得雪免官時士禎方任揚州推  
官兩親皆就養士祿因南遊往省遂移權杭州歷覽湖山之勝居  
數年再起補吏部員外郎頗持正學士張貞生御史李棠先後建  
言下吏議力直之人以爲難未幾又坐免母歿歸飲食不入口者  
數日竟以毀卒年甫四十有八其爲文條鬯芊蔚絕去雕飾詩則

幽閒澹肆極乎性情之所之而一歸於正所著有讀史蒙拾然脂  
集表餘堂詩存十笏山房辛甲上浮諸集

右 國史館本傳

子友王子西樵先生居母夫人喪以康熙癸丑七月二十二日疾  
卒於家年四十八葬於某山之原季氏戶部郎中貽上士禎次其  
行事屬碑而表之書凡五六至君諱士祿字子底濟南之新城人  
雅好爲詩多記覽遇事成書有然脂集司勳集前後共若干卷爲  
人清真簡遠望之翛然於父母兄弟之間至性獨絕其中子子其  
外油油嘗抱膝不謁貴人士之後進布衣一言之善必爲之獎成  
故天下慕義不名其官而稱之曰西樵先生始舉禮部薄吏事投

罷改官得教授萊州三年遷國子助教公卿奇其才擢吏部考功  
主事明年遷稽勳員外郎典河南解試故事有司繩尺取熟輒穩  
順不敢涉古文一字謂之中式君獨摘簡一變其卑弱又不以通  
所司責人人或惡之撫拾下吏具三木賴叔弟士祐殫力囊餽得  
不死竟坐免官是時季氏推官揚州兩尊人就養君欣然南遊省  
覲間移權西湖汗漫忘返既家食八年會 上與天下更始朝議  
還主司註誤者官君迫母命強起補考功員外郎而季氏復入爲  
禮部遷戶部接邸聯騎文采照耀天下目之新城二王久之君坐  
察議事奪三級未行而母訃至慟哭屢仆絕識者以死孝憂之竟  
以毀卒君於詩獨愛孟襄陽嘗吟曰自從舉世矜高調誰識襄陽

孟浩然其於諸書綜擇折衷獨有義例嘗病廿一史冗駁乖舛三國志並列爲非謂宜廢陳氏而用謝陞季漢書做晉書例列魏吳爲世家去宋齊梁陳魏北齊周七書而用李延壽南北二史其宋遼金用柯維騏宋史新編合之十二史既正史體復省繁複擬上書不果又謂坊本子貢詩傳申公詩說並僞書李維楨序行津逮祕書收之皆誤也爲辨甚詳有功經學甚大在考功時議沈副使荃无妄得還秩張學士貞生李御史棠先後建言下吏議並力直之此數人者皆卓有聞於世者也其持清議多若此而年不稱德士大夫多爲流涕元配張氏再娶王氏二子曰啟演啟浣父與敕貢士 誥封禮部儀制司員外郎母孫 封宜人祖官浙江右布

政使象晉曾祖戶部左侍郎贈尙書之坦世爲明顯族君初不  
事浮屠拘幽時做蘇長公齋戒寫佛氏書旣卒口體作異香經三  
日此蓋儒者所不道戶部以爲實錄云系之銘曰

瑯琊之裔世有名迹維公挺生舉體遐逸窟穴詩書萍蓬絳冕出  
則巨源退則中散有美壖篋更鳴遞嘯展矣達生疇云死孝有盡  
者年不朽者壽馭風冷然逝將誰偶

右墓碑施閏章撰

康熙十二年七月前吏部考功清吏司員外郎節孝王先生卒於  
家蓋以毀故也其毀奈何先是先生在京師聞母孫太宜人訃設  
位於堂晝夜擗踊投地絕而復蘇勺水溢米不入口者數日先生

素患羸親故或私愛之有曹君某者遺書以解先生先生曰不孝當此大故越在千里凡先宜人附身之具俱不獲用其誠信況敢言祿養乎不孝竊深悔之悔大則痛深今日之悲蓋有不及無過也由是遂病既奔喪歸中夜哀號家人悉不忍聞枕席皆辨辨血漬也病益革醫或謂心血盡耗矣惟豬肝可以補心先生拒之曰吾甯守禮以斃勿越禮以生也蓋距太宜人小祥未二旬而歿遺命朝夕奠惟設白粥清水舍酒脯家人從之親知哀先生之以孝死私諡節孝先生享年四十有八禮曰節哀順變也君子念始之者也若先生之循循守禮未始無節而願抱羸疾以訖於歿雖謂之不幸可也夫豈滅性者比與禮曰父母之喪仁者可以觀愛焉

知者可以觀理焉彊者可以觀志焉孝子悌弟貞婦皆可得而察焉然則先生之孝友仁知備見於此矣欲觀先生者舍此奚適哉先生諱士祿字子底自號西樵山人舉順治壬辰進士爲人清介有守自少以文章名尤工於詩晚歲益潛心六經其論僞詩傳有曰近世所傳子貢詩傳申公詩說皆僞也明有鄞人豐道生好撰僞書自言其家有魯詩世學一書傳自遠祖稷實自撰也又作詩傳託之子貢以爲張本而所謂世學者若相與發明蓋以世學之視傳猶毛傳鄭箋之視序不有本也尋有妄人依旁詩傳別撰詩說其體類小序其說與豐氏盡同惟篇次小異道生敘詩傳源流又詭其所從出云魏正始中虞喜奉詔摹石而宋王子韶開河得



之其說最支離而同時諸公無覺之者郭子章刻之於楚李維楨  
爲序亦不一致疑惟道生同郡周應賓著九經考異辨之特詳然  
微周氏其僞亦灼然也凡古書源流存亡眞贋漢藝文隋經籍降  
及鄭通志馬通考諸書可從而按也漢書儒林敘諸家授受尤悉  
并無一言及子貢詩傳者考虞喜傳亦無奉詔書石經事獨申公  
爲得詩漢志魯故二十五卷說二十八卷隋志明言亡於西晉安  
得至今猶存耶且其卷數亦不合所謂說者殆卽毛氏故訓之流  
必不效小序體也至詩傳世學之僞穿鑿掩覆痕迹宛然如詩傳  
篇目於鄭故問校童一篇則出麥秀一篇云良諫用狂狡云云而  
世學則取貧子麥秀一歌爲此篇首章蓋以兩詩皆有彼狡童兮

一語故牽合也詩傳於鄭又闕東門之輝一篇於王風別出唐棣一篇而世學則取論語唐棣之華四語爲此篇首章蓋以唐棣有豈不爾思室是遠而之句而東門首章有其室則邇其人甚遠次章復有豈不爾思語故牽合也又好影借春秋時事爲說如陳風因小序株林一篇爲刺陳靈淫夏姬事遂以墓門爲泄冶刺靈公防有鵲巢爲內子憂泄冶澤陂爲國人傷泄冶其他異說尤多率取春秋事與詩語相附會其義之善而與毛鄭異者又特暗竊諸家非有所受也此書本不足以欺後世然凌濛初作傳詩適家竟躋傳於序之右以爲端木長於西河鄒忠胤作詩傳闡亦往往據傳以攻序而姚氏詩疑問引傳說與序等遂若詩傳果出于貢之

手者竊恐後世惑之故著其槩云先生撰述甚夥此一篇尤善至於官閥世系具載其同產弟胎上所作年譜中

汪琬曰予與胎上同舉禮部又與先生同榜進士後先官京師相好也羣居酒次胎上議論風發而先生獨恂恂不妄措一詞固知其篤行君子人云始予以疾請告先生趨視子疾眷眷不忍別去且和子遮字韻詩以相贈至今弄其迹篋衍中願先生已不復可見矣故爲傳之如右

右傳汪琬撰

王士禛字子底自號西樵山人舉順治壬辰進士爲人清介有守自少以文章知名尤工於詩與弟東亭阮亭並馳聲藝苑海內聞

人稱紉論交時號三王既登第就萊州府教授尋遷國子助教擢  
吏部考功員外郎癸卯典河南試旋以磨勘權吏議下獄鍛鍊久  
之無所得得昭雪則跳身之吳越偕諸名士爲六橋三竺之遊銀  
甲彈箏金魚換酒泛月坐花逾時忘返識者歎爲神仙中人焉嗣  
仍以原官補用踰年聞母訃晝夜擗踊投地絕而復蘇勺水溢米  
不入口者數日既奔喪歸中夜悲號卒以哀毀成疾枕席皆辨辨  
血漬也蓋距太夫人小祥未二旬而沒親知哀其以孝死也私謚  
節孝先生云西樵少穎悟率諸弟讀書家塾授以詩法諸弟漸次  
成名而阮亭尤稱白眉竟以詩雄壇坫海內翕然宗之閩人林古  
度論次其集推季木爲先河謂家學門風淵源有自然季木贍而

肆踴厲風發固自別有門庭且時代較遠而西樵嘗題孟襄陽詩曰魚鳥雲沙見楚天清詩句句果堪傳一從時世矜高唱誰識襄陽孟浩然足徵其微旨所寄漁洋詩格正復不離其宗華路藍縷哲昆實首庸焉此如東漢配天之業固歸光武而傾身結客實齊武王之首發其端也西樵性簡易豪宕作香奩詩自序云情至之語風雅埽地然不過使我於宣尼廡下無分耳蓋其託興如此當磨礪之獄解扁舟南下阮亭時爲維揚司李迎於秦郵相見持之而泣西樵都不及患難時事直取一巨編置前曰弟視吾詩境地較前差進否人歎其放達生平撰著最夥阮亭取坡公語評其詩曰出新意於法度之中寄妙理於豪放之外準古論今其亦無溢

美爾矣世咸目爲定評云

右小傳鄭方坤撰

維康熙十二年癸丑七月二十二日吏部考功司員外郎新城王西樵先生以母喪毀卒於里第春秋四十有八鄉人私謚曰節孝先生嗚呼哀哉公於乙巳歲省其弟今戶部阮亭明府於揚州官署子時適至遂定交焉嗣後不數相見然詩筒往來惓惓如也聞公之訃私爲之慟而未能束芻以弔越三年乙卯阮亭寓先生年譜命作誄詞子未有以應督之再三而終不能忘也今丁巳冬子復至揚州與諸君子遊輒談及二王事距先生歿蓋已五載而與先生別官署則十有三年矣登文選樓眺平山堂紅橋諸勝風景

依然而其人已往然俯仰之間先生之鬢眉杖履猶若髣髴在焉  
寒冰日落不勝思舊之感爲歔歔久之因思古人交友生則有贈  
荅之什死則有祭挽之詞予旣老且病又以疎懶廢言不惟無以  
報戶部之命竊恐先生望我於九京也乃重取年譜閱之見先生  
之學問文章卓犖如此世必有傳之者獨其哭母而死孝行最烈  
君子表微可無述乎誄以章德爲不愧矣其辭曰

瑯琊之先肇基始興江左烏衣奕葉雲初本支繼別載啟新城司  
徒司馬蟬聯簪纓亶降先生岐嶷異質弱不好弄殽核典籍賈誼  
升堂相如入室阿大中郎豈云儔匹 王朝鼎建網羅俊乂弱冠  
射策巍然高第宜直承明讀書中祕眾女謠詠蛾眉是棄諸公袞

袞吾子高篤乞教東萊臯堂垂鱸海水汨沒遠望成連時醉番鉢  
富有詩篇既入國子竊比昌黎左經右史朝鹽暮齋迨銜 詔命  
馳傳山西唐宮獻弔畫壁畱題爰陟銓曹允協眾望庶幾古人清  
通簡當出典文衡權奇善相曲高和寡動而得謗人憂北寺公詠  
西臺金經細字繡佛長齋諸天指掌萬物澄懷受福王母一笑歸  
來始也羈囚厥操拘幽既也遠遊遂賦上浮星言南省至止揚州  
兄及弟矣墟篋唱酬昔從乃祖學書吳下今視爾季鳴琴官舍三  
山踞春五湖消夏摩津寶鼎流連玉笋二泉亭畔六橋隄邊酒旗  
曲院歌扇樓船客攜烏帽詞寫紅牋公時最樂一飲千年幡然倦  
游歸與十笏自傳西樵高致突兀生埋草堂沒畱石碣豈同深源



書空咄咄慈親勸駕 天子賜環久返野服重點朝班桂蠹愈棘  
松柏霜寒直道再黜還我東山白雲悠悠子舍將老何期北堂忽  
隕談草孺子之泣銜恤如擣雞骨支牀魂魄遂杳嗚呼哀哉公在  
倚廬如依母膝號動几筵血漬枕席告母三篇情辭悽惻地下相  
從死孝罔極嗚呼哀哉聞公易簣口吐妙香梅檀蓮華竟體芬芳  
豈辭東堂而往西方眾香國去三車翔翔論公學問首定經史十  
二爲表十三爲裏其辨詩傳亦裨四始然脂集成彤管備矣讀公  
文章古風洋洋絕妙好辭花間草堂八分程邈正體歐陽惜乎絕  
筆大雅云亡位不副才年不酬德浮生有涯令名無斃節以一孝  
孝思維則堪康禽忠曠世齊式僕忝石交明冥異路千里屋梁三

年尺素笑貌如存  
琴樽非故何日驅車  
哭君邱墓嗚呼哀哉

右誄尤侗撰



劉必顯

康熙庚申春二月江南督學使者請城劉君木齋以繼母孫宜人  
憂去官居喪以易戚稱禫除後督學君宜出補觀察其弟進士君  
弼了亦應就選人長一縣皆以太翁奉政公春秋高不忍去朝夕  
承歡極盡志物之養十三年不少懈於是兩孝子之名聞天下壬  
申秋奉政公以壽終里第兩君慎終之禮大小咸備既葬督學持  
所自草父若母行狀及今少司農王阮亭先生所爲墓銘屬貞文  
其隧道之碑貞以契家子分不得辭然讀志狀信史也何能加故  
仍撫其意而論次之曰公諱必顯字微之一字西水其先徐州碭  
山人自處士公諱福者徙山東之諸城家焉數傳皆力田孝弟至

大父諱思智始以文學補邑庠生父諱通亦邑庠生後以公貴  
贈文林郎行人司行人母王氏 贈孺人公生而臞膚不藏骨一  
準隆然望其肩宇知非常人甫能言文林公抱之立門外邨鄰有  
富而豪者吞嚙里人殆徧文林公獨不爲下適盛謙從而過呼公  
小字戲焉公觸其忌直斥之豪大沮去文林公陽謝其人而心竊  
異公矣稍長出就外傳授之書讀一再過卽成誦十二歲從叔祖  
某讀書遠邨塾中多邨豎惟知撻撻嬉戲殊無切磋益公歎曰辭  
親遠出期上達耳若然何必去鄉井爲哉獨正襟危坐讀書不輟  
諸豎百計誘之弗顧也家貧苦無書可讀文林公游戚黨間閱古  
今文字遇心賞者輒錄之舊紙或書掌肱閒歸而授公繕寫讀之

緣此學日以富十九歲補府庠生歲試以經書三藝拔第一爲十  
四城冠甲子以第六人舉於鄉時公文譽久著士林指數皆謂當  
立陞上第乃困頓公車幾三十載又倔彊成性恥事干謁遂至家  
徒四壁立或勸以祿仕公愀然曰嘻豈知我者哉余性傲急且無  
宦情惟思得進士二字啟牖後人耳以青袍致台鼎非其好也自  
是坎珂百罹終不廢讀遂登順治壬辰進士 殿試二甲授行人  
司行人旋捧 詔偏沅時滇黔未靖兵將多驕悍李本深爲甚公  
惡之弗與接意頗怏怏開讀後卽擬返棹適金陵馬生謀署柳州  
同知撫軍袁公許之而俾出金爲公壽問資所從來則其友人質  
妻孥於營將得之者公曰汝以利債累友朋能自飲冰茹蘗乎汝

去爲廉吏卽我拜當事之惠矣擲金令還之營將聞風亦納金而捐其息公竟垂橐歸將行人射雀誤中兵家穉子一軍盡甲譟於行署子之父喘汗崩奔急止之曰射者誤也死者數也劉使君豈縱僕傷人者哉與之金市斂具亦不受所至爲人信服如此旣復命又使粵東其立心行事一如使偏沅時維揚聞母赴一慟而病扶掖返里祥除之官則有秦中 諭祭之役中途晉戶部河南司主事擢固山司理市兒有齋產投身旗下者其兩弟家亦饒主人將並沒其產而奴其人案將定公不從或以利害懾之亦弗爲動其家竟完亡何監督通州中南倉地處脂膏未嘗以毛髮自潤運舟某者鄉人也以無核棗及銀后爲餉公訝曰故人宜知我

乃反以此相汙邪弁曰可不須后棗爲鄉味似無害公曰凡自外  
人者皆非義也立卻之事竣繡衣使者察覈尉薦之甲辰出榷蕪  
關改立進單之法賈舶便之尋假歸里門惟聚子孫一堂教以耕  
讀不及世事也已酉以督學官京師迎養邸中復補戶部原司旋  
晉廣西司員外郎僅逾月語督學曰本無宦情爲汝所誘至此老  
病恐曠厥職其趣俶裝勿久溷汝也公歸而家益落唯大木數百  
存海州界中時南服不靖征進須船公欲以巨材百條捐造嫁艫  
時木價日翔計直三千餘金已具疏達銀臺矣當事以不由外題  
非例未徹 御覽值總漕帥公奉 敕修雲臺神宇竟以之助殿  
工焉以此曉公報 國之志 朝野未嘗或聞也其他助昏嫁恤



喪葬贖女童以完人骨肉出國粟以周人困乏公施濟旣博且令  
子姓踵行之其爲德於鄉里者又二十年而終則康熙三十一年  
八月二十七日也距生萬厯二十八年十一月二十二日得年九  
十有三公仕自文林郎累遷至奉直大夫戶部廣西清吏司員外  
郎以子督學君貴 封奉政大夫刑部四川清吏司員外郎加一  
級於卒之歲十一月十五日大葬於邨北之新阡以鄭孫兩宜人  
耐焉公初娶於徐有首疾其家以是辭昏公堅持大義弗許于歸  
後以靜好著聲人謂庭式復見今日不及五載而卒再娶鄭宜人  
壬午癸未閒兵躡二東宜人避地百里至膠西之孝衍邨時烽火  
四接道路洶懼一聞謠語遽爾投緹蓋其素稟守身之訓故慷慨

仗節若是其易實未嘗羅鋒刃受迫逼也暨娶孫宜人系出名家與公齊眉一德長幼尊卑調劑具宜狀稱自宜人來嬾公之家道滋殖生息日繁科名仕宦亦駸駸向盛是其於公真稱良偶矣公出身儒家長舉進士晚登三事寵命疏榮孫曾繞膝壽考令終人謂既醉五福總萃於公之一身其得於天者似爲獨厚而不知其平生所遭亦非盡出亨途也嘗其少也食貧攻苦淹頓場屋及薦賢書已踰壯歲未幾而時際改革寇盜蝟發鼠竊豕突捲地滔天於是太贈公以罵賊死鄭宜人以全節終公攜嬰負穉竄身南北乃於播蕩之餘益厲堅定之志不泯散以隨時弗見遷於異物以讀書教子爲能事以積德制行爲眞筌險夷一節百折不回卒能

父子奮身聯刷上第列戟相望家門巋然若督學君者則又於  
國名忠於家稱孝海內人士以之爲職志者非公之德足格天才  
能燾後烏能致此哉公生丈夫子四楨貢生考授從六品果己亥  
進士江南提學道僉事癸乙丑進士葉太學生女二適進士王文  
煌貢生單務裔孫男八紹輝丁巳舉人紳燦太學生綸炳諸生縉  
炤繼燦絃燿綬煇縵燦皆幼孫女八曾孫男七塾壘壘壘壘壘壘  
會孫女五昏嫁詳志狀中銘曰

九僊奇秀不減雁宕篤生者誰公實不讓策我驥足筮仕 中朝  
經文緯武旋幹斗杓蕩節星輶不辱君命敷典擾民芒寒色正忠  
信所昭風愛郁然廉隅自飭玉粟冰堅惟公之妻如芝三秀以節

以才揚輝中冓有播有穫曰有子姓食報詩書縣縣之慶忠貞世  
濟踐修厥猷惟 帝念功綸綍汝醕金管漆書照耀堂斧長夜重  
泉皎如日午松楸鬱鬱亦載 國恩捧筆作頌永奠墓門

右墓碑銘張貞撰



廖玉

春王正月之三日時方遘令甲新禧往來不通一刺忽廖生通恂  
衰麻造天咫堂以其先人簡齋公新故來告兼持行實句銘予嘆  
曰異哉當獻椒稱慶之辰廖生不以不祥爲忌諱而擗踊哀乞情  
見乎詞觀其孝思之誠號泣之慟能以不文辭耶公姓廖諱玉字  
田生別號簡齋始自遠祖諱謙起家汴梁宰文水有惠政卜居於  
邑之東溪傳廿一世至少渠公諱堅是爲公王父子三 贈文林  
郎位我公諱廷棟其季也是爲公父積德昌後稱鄉祭酒初艱於  
嗣禱峽之玉笥山乃生公因以玉名公甫離襁謹飭無兒態長就  
外傅沈潛力學補弟子員旋食餼殿撰晉卿劉公謂讀書如廖君

他日必當遠到性孝友位我公捐館殯蕭寺公廬其側三年後八  
上副車不第順治九年 恩薦 廷試當擢縣令出學士厚庵曹  
公門時曹公留心正學經其拔識者實繁有徒獨以公緘默恪醇  
有儒者風叩以所藏咸中窳紫嘗偕子言及豫章學者輒以公爲  
可造就及謁選得粵東永安永安新增邑處復瀾菁林中有負嶠  
患公力請諸兵憲分師招徠遂願就撫至釋難民數千餘邑故多  
山田又毒草叢生服立斃燹後版圖散軼以阡陌訟者日見告甚  
且刁民乘閒借人命唆之爲利有司亦爲所惑公悉心清釐舉民  
閒頃畝數目授受鱗次證以各子戶印契詳注一冊開卷井然百  
姓無敢懸揣搆爭端者閒有借田土小忿以輕生告輒訊鞠反覆

由是人心感悟風稍衰息且嘆人文寥落新會主靜之學無復講  
明爰重修紫金書院及學宮集諸生肄業月課季程親加校閱沐  
其教者皆知孔顏造就之力居多後因錢糧有爲上司撥用部款  
不及奏銷歲參議褫隨經撫軍憐其冤爲之疏辨復職得補高陽  
高陽地僻事簡與永安稍異公深喜謂與甯靜之性相宜且曰南  
北風氣不一吾所以父母斯民之心則何可不一加意撫字一以  
前所以治永安者治之勸輸勸讀外行所無事以邑誌歲久版蝕  
近徼未備爰徵諸文獻校訂付梓又圈占區雜旗佃頗煩調劑且  
地畝經歲輒更賦役乘除爲地方累公上遵 功令下順輿情每  
朝使至同親歷田閒惟公惟均不欲偏累小民雖拂朝使意不恤



也又念水滂爲患爲築欽隄指畫估計民不費力隄工告成耕耨無憂若其廉以守官箴慈以綏民生蓋行之兩邑如一邑持之八載如一日云俸深當遷 上復廉知其能擢儀曹未幾以邑人投充一案誑誤解任時長安凡以被議降革者往往自陳辨復公獨以傳舍視官謂處分皆 朝廷之恩何容自辨行李蕭然惟作故鄉之想然使稍假之年安知無爲公白冤如前粵東撫軍者而公則已蛻骨長逝矣仕籍之難莫難於作吏非 功令之責成則上司之追求而公獨能奉公惟謹務殫厥心不求援於人而人亦諒之且既奪職後復有代爲辨白者非其一腔至誠有以感人哉嗟乎是不可以不傳公生明萬曆丁未十月三十日戌時卒於今康

熙庚戌十二月十七日卯時享年六十有四禮部儀制司主事前  
以 覃恩敕封文林郎配李氏 贈孺人繼娶王氏男三長迪忱  
邑庠生娶北埠劉諱元貞女次迪恂貢監生娶麻塘周諱惟崇女  
次迪愷尙幼女三長適邑廩生趙諱廷樑次適山原羅諱貞師蚤  
世次適山東淄陽令蕭諱法何次男孫男四長曰孟駿聘劉殿撰  
孫官生諱洧女曰仲林曰季賓迪忱出曰琴生迪恂出孫女二迪  
忱出其生可紀其逝可銘銘曰

操刀使割枳棲塵擁割以牛刀惟儒者勇錯節小心如盈斯捧舒  
卷浮雲簿書非允冀北嶺東垂涕文冢

右墓誌銘張貞生撰

國朝平定縣志卷之二

三

王澧

公姓王氏諱澧字楚先別字蘭陔吳之常熟人曾祖有德祖先龍世以隱德重鄉里父中恬先生曰俞登明崇禎癸未進士知餘姚縣餘姚二子公次居長少就學外塾同學富人子持梁刺齒肥公方貧窶并日而食夷然不屑也文譽顧日起母周安人謂中恬先生曰公小時視兒子今日何如先生徐笑曰似不如也中恬先生老於公車壬午署六合縣教諭流寇躡安廬閒淮東震驚公渡江省侍因下帷金陵鷲峰寺是秋舉鄉試明年癸未與中恬先生同舉禮部初公鄉試名第與中恬先生同至是成進士榜又同時人異焉順治九年以巡撫周中丞薦除行人司行人兩奉使江西河南

以廉慎稱十四年分校順天鄉試明年舉禮部者七人方是時南  
北科場議大起同事者率不免公孤潔自持卒超然是非之外遷  
工部營繕司主事會設專官采木塞外乃以公往木產朵顏三衛  
地蒙古諸部落散處其間東自一片石西迄潮河川邊城千有餘  
里高山穹谷長松茂林虧蔽天日其隘口有三曰桃林曰潘家曰  
古北終明世無輪蹶跡順治初商人始請出塞伐木供內地之用  
工部購其巨者以備大工一株不啻二百餘金 廷議以爲非計  
特設滿漢司屬各一員 子敕印專往采辦而禁商人毋出關官  
旣册設無掌故可稽公躬歷山險擇其近溪澗可開場者數十所  
計材木之巨細人夫之多寡道理之遠近以定工費絲分縷析著

爲章程歲省水衡錢亡算十七年改都水司主事權稅南新關多  
市猾飛而食肉率以漏木稅爲詞訟牒旁午關使者亦利之爲冠  
蓋餽遺地公慨然曰卽如是萬金入寶容之橐而善良破千家之  
產矣吾不爲也自是雀鼠頓絕是時閩方用兵十八年郎將軍帥  
所部三萬人駐杭屯江濟薪蒸匱乏闕取商木公力言將軍下令  
厲禁軍中肅然亡敢犯康熙元年使竣還 朝旋有治河南旺之  
命遷屯田司員外郎尋晉刑部浙江司郎中異時泉關分司爲  
優游吏隱之地使者每歲三月巡行有泉十七州縣高坐行署中  
召吏受成命循故事而已公曰泉源興廢河漕攸係使者受 命  
於朝敢自暇逸乎單騎徧歷諸泉履巉巖窮幽官水繁路紆無弗

至視其源之通塞流之疏滯而從事焉往往佳泉殊境猿鳥路絕  
居人有老死不識軒蓋者見公來皆驚詫聚觀以爲異三載搜廢  
泉若干浚新泉若干排其支速其匯使岱畎之水涓滴皆入運河  
於是漕艘便利東南歲漕四十萬石銜尾抵通潞無愆期者公之  
功爲多四年報命入京師始莅西曹甫旬日平反死罪一人立  
斬者五人物論翕然而公以兩尊人皆年七十遂堅歸養之志歸  
五年連居內外艱終制起補雲南司郎中遇恩詔加一級未幾  
復以病乞歸歸十七年乃卒公性孝友祖母戴順治中被旌而  
綽楔未立餘姚之歿也以屬公公泣受命及葬落成告几筵而後  
行待弟漢恩義兼至漢署溧陽教諭有疾公挾良醫晝夜倍道視

之轉愈而公病作遂以不起居家有禮法朔望日子弟勝衣以上  
以次揖拜規重矩疊儼若朝典族子欲粥先坐宰木以完官逋公  
聞之代完逋仍償其直木得不伐凡族之婚嫁喪葬皆取辦於公  
無滯色尤篤故舊聞座主之喪爲位而哭盡心喪之禮江西朱生  
者座主子也年三十貧未授室公力任之比公之歿朱已抱孫乙  
卯僑寓任城適常熟舊令鍾某子以訪故人漂泊逆旅公慨然曰  
奈何使吾邑侯子流落至此分客裝資之行歸田後時邀致二三  
老友相羊山水閒以爲娛樂親故造門雖鶉衣百結與講鈞禮其  
厚德類如有司重其行誼鄉飲酒禮五爲大賓其歿也祀於鄉  
校君子以爲宜公生以萬厯丙辰卒以康熙三十一年壬申得年



七十有七配徐安人子三人世棐奕堂世傑孫十三人曾孫四人

銘曰

皮山之松九九爾寢孔安尙湖之水湜湜爾神游息生為典型沒祭於社來者矜式過車斯下

右誌銘王士禎撰

孔允楹

順治十年八月庚寅禮部儀制司員外郎孔允楹奏臣辦事署中  
偶聞廢后一事不覺悚然及見馮銓等奉 聖諭內有故廢無能  
之人一語更爲驚駭竊思天子一言一動萬世其仰況我 皇后  
正位三年未聞顯有失德特以無能二字定廢嫡之案何以服  
皇后之心且何以服天下後世之心臣考往古如漢之馬后唐之  
長孫后敦樸儉素皆能養和平之福至於呂后武后非不聰明穎  
利然傾危社稷均作亂階今 皇后不以才能表著自是天姿篤  
厚亦何害乎爲中宮而迺議變易耶設 皇后必不諧 聖意亦  
可倣舊制選立東西二宮其襄內治若夫廢 后一節千古典禮

皇朝實錄卷之四十一 郎署二

卷

所在一時風化攸關實有驚人耳目者且 皇上親政以來天下  
以爲堯舜復生今復有非常之舉傳之聖子神孫豈開國之主所  
宜有耶誠思 皇上天下之父 皇后天下之母父有出母之議  
爲人子者卽心知母過尙不免涕泣以諫況絕不知母過之何事  
又安忍緘口嚴父之側而不爲母一請命乎臣忝承聖裔兼任禮  
官安敢存畏斧鉞願身家之心一念孤忠伏乞 聖鑒下諸臣議  
九月癸巳朔諸王貝勒及大臣內院九卿詹事科道等遵 旨會  
議禮部尙書胡世安等及儀制司員外郎孔允樾所奏實係典禮  
常經 皇上冊立 皇后之詔祇告 天地 宗廟並上 昭聖  
慈壽恭簡皇太后徽號以昭慶典旣已 詔布天下禮難輕易伏

乞 皇上仍以 皇后正位中宮卽命禮臣考據典禮選立東西  
兩宮則本支日茂 聖德益光誠可爲萬世法矣得 旨朕納后  
以來緣志意不協另居側宮已經三載從古廢后遺議後世朕所  
悉知但勢難容忍故有此舉著議事諸王貝勒大臣及會議各官  
再議具奏漢官諸臣規諫其意固在愛君然必須眞聞確見事果  
可行朕自聽從若全無聞見以必不可從之事揣摩進奏欲朕必  
從冀免溺職之咎非所以盡職也孔允樾奏內云未聞顯有失德  
不知母過何事等語如果知無過之處著指實具奏丙申孔允樾  
奏臣奉 旨指實回奏伏念小臣雖在輦轂之下一歲之中除 郊  
祀 朝見得以仰觀 天顏餘亦無由覲 聖況 皇后居深宮之

中其有過無過非惟人臣不及知亦人臣不敢知但臣守有祖訓  
惟知事君如事父痛念父母偶有不諧已屬人倫之變爲人子者  
若再順言母過以重父之怒此不待問而知爲逆子矣臣前奏一  
則曰未聞失德再則曰不知母過亦不過仰冀 君父動悔悟之  
機開慈母一遷善之路以自附於幾諫之義而其費無有他慮也  
臣恐天下謂 皇上容保萬邦而不能容一 后後世責臣等義當  
匡贊而不能匡一 母是以既奉 嚴綸之後冒死陳奏臣今日可以  
對 皇上異日可以對臣祖要亦惟此一念耳今 聖諭內有云  
從古廢后遺議後世是 皇上曉然於古今之大倫又云諸臣規  
諫意在愛君是 皇上又洞白諸臣之苦心 聖明在上臣復何

言惟有席彙待罪靜聽處分而已報 聞

右東華錄王先謙編

頁	目	次	年	月	日	時	分	秒	分	秒

三

羅爲廣

羅爲廣字西溪四川南充人順治甲午舉人康熙十年授孝豐知縣值歲荒禁革煩苛蠲賑饑民存活無算公餘集士子講明理學性謹嚴人無敢以私干者豐人咸德之後以行人致仕

右述聞謔瑤錄





張吾瑾

張吾瑾字石仙四川金堂人順治乙未進士性純孝母疾篤昕夕  
禱神請以身代授山東夏津令轉行人司均以廉幹稱致仕歸因  
都江堰爲金堂水利請於當事修三伯洞古埭里人賴之

右述聞謚瑤錄

臣等謹將所奏各款  
恭摺具陳  
伏乞  
聖鑒  
訓示  
謹奏

三

何訥

予以順治十二年乙未舉禮部同籍四百人三十年間迴翔臺閣  
布列中外者項背相望彈指五十年而凋落殆盡存者遂不及十  
人莊生云子惡乎知悅生之非惑耶子惡乎知惡死之非弱喪而  
不知歸者耶雖然死生亦大矣古之達人尙不能忘情於此故子  
誌同年銘三何公之墓而不知涕之何從也公諱訥銘三其字一  
字公韓世爲蘓州崑山人曾祖天衢貢士官淮安府學教授孝行  
載郡誌祖其智諸生父爾昇貢生舉賢良母歸孺人夢麟而生公  
少爲名諸生中順治十一年甲午鄉試明年中會試 賜同進士  
出身授太原府推官賢良公可書官箴十六字以授公曰戴星視

事指水明心官品一朝人品百代公頓首受命榜諸座右出入誦  
之應州知州某以傲忤上官論劾獄具矣公憐其無罪原之平陽  
人被盜胠篋而疑其叔叔翼人且無以自明而姪巨猾也與舞文  
吏關通證成其罪制府下公覆讞得其情力平反之未幾獲盜時  
武定李文襄公爲巡按御史雅重公俾從按諸郡有疑獄輒以屬  
焉署太原府事清白著聞十七年庚子充武鄉試同考官是年大  
計吏舉卓異會江南奏銷事起公名注籍中去官文襄洎制府白  
公如梅將合疏題兩公念父母春秋高急歸養力辭去之日士民  
遮道攀車百里不絕公歸拜家慶二親老壽兄弟和樂忘其遷謫  
小築東河之偏蒔花藥種松竹爲賢良公菟裘地賢良公樂而安

焉丙午丁未連遭內外艱喪葬皆稽古禮己酉服除同年官京朝  
者數趣入都公絕意榮名堅臥不應又十年己未同里葉文敏公  
司寇相國二徐公復敦趣之又二年辛酉始罷勉一出遂獲牽復  
補順天保定縣知縣縣爲九河下流歲苦水潦戊辰秋恆雨西山  
水溢霸保爲壑公胼胝薰垂以爲民先築長隄百里外夜騎而馳  
馬驚逸墮水幾殆父老皆爲感泣畿內旗民雜處多雀鼠之爭聽  
者往往抑民以徇旗公獨矯之設荆條以儆旗人之終訟者邑賦  
額纔千七百金歲有逋欠公以其羨代完正供纖毫不以自私上  
官稔其廉正屢檄攝霸州固安縣事至是保定巡撫于公成龍尤  
深知之通州有未決大案特以公往與部使者會鞠不崇朝而案

定 駕幸畿南 駐蹕貓兒灣 頒賜雁脯甲子庚午再爲順天  
鄉試同考試官所拔悉名士耆宿令保定十三載甲戌始內擢刑  
部浙江清吏司主事乙亥遂以疾請急歸時公通籍四十年矣歸  
七年考終是爲康熙三十九年八月初四日距其生萬曆庚申二  
月二十六日得年八十有一配朱氏 封孺人孝慈儉勤與公齊  
眉相莊如一日生天啟壬戌九月十三日終康熙三十一年壬申  
八月初五日年七十有一公自爲誌墓其詞甚悲子男子四人亮  
建前卒哀掄皆太學生子女子三人一適葉滂一適郁世偉孫男  
六人肇元肇駿肇龍景濟景萊肇麒以康熙某年月日葬某阡哀  
掄書來請銘銘曰

湛盧純鉤光如列星過時而用不如發硎脫匣一試尙無罅行引  
年拂衣鄉之典型壽考終命梁木以傾玉山茗亭澱湖渺冥後有  
圖牒觀吾此銘

右墓誌銘王士禎撰



日本銀行券  
五圓

三

151-066

丁澎

丁君名澎字飛濤號葑園浙江仁和人順治十二年進士官禮部  
郎中少有儁才與弟景鴻濛並稱三丁吳梅村贈詩有兄弟文章  
入選樓之句早歲有白燕樓詩流傳吳下士女爭採摭以書衫袖  
婺州吳器之贈詩云恨無十五雙鬟女教唱君家白燕樓其爲時  
傾倒若此初與同里陸圻柴紹炳毛先舒孫治張綱孫吳百朋沈  
謙虞黃昊陳廷會諸君稱西泠十子通籍後與宋荔裳施愚山張  
譙明周金山嚴灝亭趙錦帆酬唱日下又號燕臺七子後以事牽  
累謫居塞上者五年卜築東岡躬自飯牛吟嘯自若所作詩語多  
忠愛無怨誹之意其所養可知矣著有扶荔堂集

右事略李元度撰

劉體仁

公猷客鳳陽一日同友人蘇茂游過龍興寺訪老衲流連竟日始  
別蘇歸邸夢公猷來笑吟詩云六十年來一夢醒飄然四大御風  
輕與君昨日龍興寺猶是拖泥帶水行覺而異之忽聞剝啄聲則  
公猷僕人至云已坐脫矣

右漁洋詩話張維屏錄

按劉公河南潁川衛人順治十二年進士官吏部考功郎有蒲庵集



郭士璟

余於丁丑之秋至揚州始識郭君元鈺好古力學能世其家發聞於時者也時余旋返江南心怏怏恨未拜見其家工部公越三年而復來則工部已卽世逾小祥矣郭君偕其兄元鈺過予手行述一通拜且泣言曰某兄弟將以月日葬先府君有期矣惟是墓中文不可無託願先生賜之言以不死吾先府君余瞿然謝不敏語之曰子之先君子司教毘陵已赫然聲績聞於四方後雖不究其施而所居職必稱其行事宜書之史冊何假余言爲君兄弟再拜固請余感君之良誠又念今之名公鉅卿及立言之家林立君皆不往求而下徵於余之窮老而無所遇者君豈其有所持擇耶於

是卽其所述最其大要曰公諱士瓌字飲霞一字眉樞先世陝西之涇陽人祖諱紹讓遷揚州以業饘致饒衍父諱茂英始爲儒歲貢生 贈奉直大夫母韓氏 贈太宜人生子六人公其次也少無師卽從奉直公授學經傳史記百家言莫不誦習日課十數紙輒盡年十八尙未操觚作制舉文公之外家尊宿皆曰甥偉然成人不能與童子試不如棄去宜人亦甚恚謂諸長者言良是奉直曰毋遽姑試之遂舉論語弟子二字命占一破題奉直遂驚喜謝諸尊宿曰不復他徙業矣自是爲文向所記誦益然溢出數千言立就揚之有司校士者爭相賞識太守馮君拔公居首者三補邑弟子員益博綜於古文加詭奇恣肆甫落紙爭傳寫以去四方名

流之遊於揚無不過郭氏者公角立傑出聲稱籍甚順治甲午舉於鄉明年成進士釋褐常州府學教授升國子監助教尋遷工部屯田司主事出督九江關稅歸而老於家公性高亢不耐吏事卑屈教授之職以請得之公之至常也講諸上官皆長揖自以忝士子師不應俯首屏息從僚吏跪拜上官雅知公不相繩也順治十七年海寇大作民鳥獸散守欲戢眾期公至廣場閱武爲守禦狀公曰閱武不足戢眾唯聚諸散職有妻子歸家者卽追之反旋出令云賊已靖無虞不爾諸當事孰不欲全家保妻子者若必他適當籍其名後不令入眾乃定公則暗部勒壯健授甲以備事定無有知者上官皆才公之爲遇疑事輒送具獄屬公公謝越俎不獲



已爲一讞決則文符速遣眾咸服公明允太守崔君某清慎愛下  
緩於催科以徵調不副例當落職公爲手作示揭四門以爲民得  
官如崔公不可以有二今且罷去爾等其何依今與諸父者約設  
櫃四門欲畱賢使君則隨其力各委輸焉日未暮投匭者輒足崔  
公以此獲久於常數載嘗歲大稔倉困無儲有司惶遽甚公造守  
請蠲賑自某始繼諸職司更出帖約郡之凡席豐者共任事榜曰  
某氏司某廠某日有不實逮者饑民挈老幼往就食其家於是饑  
者得濟十八年巡撫某憤其所屬士大夫之通糧者彙爲籍疏上  
之悉將褫革名曰奏銷自搢紳先生多陷密網士子有至空庠者  
常之士數百人皆挂籍中公夜叩府聽事搥其鼓請見太守請按

三日不發旦卽榜示通衢許以三日內補輸數百人無不保全者  
公之教士以厚人倫勵實學爲先課試之文皆有本源口講手畫  
底於有成者甚眾脩脯之入半就裁抑其不可廢者蓄之爲學宮  
計棧棟一新舊無尊經閣特爲刱建中貯四部書招才良之士授  
餼以資誦說如是者六年乃升補國子職卽以造就常者造就之  
其遷工部也部中事多猥瑣未嘗漫署紙尾琉璃黑窯二廠專司  
瓦墁歲發帑若干奸吏上下其手鋪戶侵蝕不報工積逋至數十  
萬圉圖充塞官吏死亡相繼弊不能清時朝議修 天壇欲擇司  
官之能董其事者尙書以公對積弛旣久重以 園丘大事 命  
下同列多縮舌公怡然自若部吏有最黠者飽其囊且不訾前此

司官皆與抗禮共酒食玩若家人會來謁卽叱役縛而笞之計其  
逋責不盡償不釋由是一切用擊斷伍伯持梃棒夾立呼暑聲紛  
然數月略得所逋之數乃督陶者日臨事溽暑當畫窯中煙燄眩  
目炙肌體欲裂汗如醃漿足植不得立甚則出暴烈日中少憩以  
爲快弊無所容而工勤於作未三歲告竣公所爲人莫能測而及  
其成皆大愕及椎關九江地故荒於兵居是職者率不半稅而罷  
公不尙綜覈至卽遣發曰吾第不名一錢耳報課之日數溢於前  
人公是時年近懸車還至揚遂不欲復出州縣以逗畱轉申上官  
竟致被劾 朝命寬之得解職歸老公恬於榮利胥次灑然及遇  
事奮發雖明習吏治者弗能過其於忠孝尤天性也在常迎養奉

直盡志與物伯兄士琦後公舉於鄉其得雋之前與諸叔季同讀  
書於常公寶相討論磨切焉於是奉直心滋樂後在都奔奉直喪  
三千里不輟泣繼之以血嘗痛太宜人之不逮養輒言發淚俱三  
十八年春 皇上巡閱河工公時已得偏痺疾歛歛曰老臣舊官  
工部曾草治河一議未及上今遂不能隨河伯爲前驅稍稍據其  
一得命元鈺曰汝能爲我賦詩當獻之 行在白老臣不能匍匐  
狀元鈺如公言敬往 聖問宣慰 賜以御筆曰泉石怡情元鈺  
拜舞捧以歸公命扶曳再拜感激出涕至秋病漸劇遂以不起公  
生於萬厯四十八年十月二日卒於康熙三十八年八月十六日  
享年八十元配倪氏繼吳氏俱 封宜人副室某氏子二人涪府

庠生元鈺歲貢生女三人一適宮鴻營一適羅綺年俱國子生一  
適庠生吳文燁孫三人孫女八人公有集凡十卷尤長於詩初喜  
效李昌谷晚趨平易乃以劉長卿爲宗余旣不及識公辱與公之  
子友按其行述合之鄉評皆信乃次第其詞爲之銘且因公之行  
事而有感於余心也銘曰

吾之先君及吾仲父友愛絕倫文場掉鞅出入必攜習業必均徵  
輸之額挂以毫末竟褫其衿湮鬱侘傺吾先君子大命早淪叔則  
稍延憤歎末路卒以不振乃知吾公保全多士豈特功名士苟有  
爲毋曰官卑而志不行廣文檣散鼓勵大眾式遏寇氛遡公筮仕  
以迄投簪咸策其勳眾拜稽首歌公之德請勒貞珉公曰毋然昔

人致戒立碑刻文公不近名而行孰掩逾久彌存我作銘辭納之  
幽寤以訊于春

右墓誌銘張雲章撰

按篇中郭公長子元鈺後敘子二  
涪府庠生或涪卽元鈺之庠名歟

Vertical text on the right edge of the page, possibly a page number or title, oriented vertically.

Small vertical text or mark on the right edge of the page.

鳴爾鳴圖

方順治甲午乙未閒 天子銳意文治嚮用甲科一時滿漢射策之士咸爭自鍊礪以得與於制舉爲榮而其時登進士第者亦往往負盛名躋顯秩蓋 國家樂育涵濡之久而人才之應會而連茹者有如此其盛也戶部員外郎納喇君以文學政事聞於朝列余未及訂縞帶交每以爲愧既卒之明年君之弟侍讀公察庫以墓石之文屬余余不敢辭按君姓納喇諱鳴爾鳴圖世居葉赫祖某父鳴爾麻石君生而魁吾偉岸稍長慷慨有大略性嗜書史博綜旁覽每考證一事必鉤索其原委本末如蘇子瞻讀書法蘭閣功令開滿洲制科踴躍自奮曰 朝廷張八紘以網士而甘廢棄爲



科目外人可乎倪首爲制舉義稟經酌雅儼然埒於老生宿儒甲午鄉試登賢書乙未成進士起家兵部他赤哈哈番未幾晉職方司主事當是時滇黔楚粵之間方有事兵革其他山陬海澨小醜竊發者又不時見告親藩宿將重鎮相望一切進止機宜或羽書奏請下所司區畫或廟算未決詔樞臣詳酌方略君雖爲主政而識議侃侃擘肌中理能時佐司馬之不逮比奏入輒當上旨次第允行以故諸曹郎皆引重焉康熙八年晉戶部貴州司員外郎司所專覈者諸踏關權之政也自甲辰乙巳後關政屢變始遣分司繼歸有司繼又視稅額多寡酌遣六曹郎及地方官分攝其事閏一歲上其數於戶部部覈殿最輒以額外奇羨爲稱職受

茲任者竭澤取盈君獨語諸同官曰權稅贏民氣削矣與其剝民而益稅毋甯抑稅以利民是後諸路考覈咸得其平君胥中包孕今古洞達大體故其立言斷事不同於斗筲筐篋之智悻悻自見者如此方六年春君業以才品遷戶部矣會枋政首修郊興大獄君坐同族牽連廢錮迄 天子躬親大政奉 詔復職始得再官戶部以 覃恩加一級君感念 朝廷燭幽拔滯之仁冀早夜竭心力以圖報設天少假以年則其魁名碩望當益加赫奕而卒止於此是則可悲也已君生於天聰九年某月某日卒於康熙九年七月某日年三十有八子二人長郎圖次石圖俱廕生以某年某月某日葬君於某原銘曰

緊惟葉赫族蕃且昌歸命真龍一衍厥祥掇拾科第不振前光耶  
名畜跡鶴峙鳳翔口贊軍樞手畫帑藏弗忝乃職惟才則良哲人  
云萎吾道之傷鎖石埋辭用示不忘

右神道碑張玉書撰

王堦

公諱堦字宜兄世爲沂州人相傳晉太保睢陵元公裔也始興之後蕃於江左其散在故土者世代遠不可考明宏正閒槐亭公彬始以儒術起家爲廣文官生心齋公之屏領嘉靖丙午鄉薦是爲高祖王父之屏生錫勇錫勇生納陞納陞生如升則公考也公年十三補州學生遭明季大亂總兵官閻某公姑之夫也方鎮淮陰往依之嘗從閻追賊於邳州之邢家樓賊脅居民拒守旣破賊閻怒將盡誅其俘公曰民多賊少倉卒被脅非得已也槩誅之將失民心乃下令曰外來流民罪當赦其趨左賊悉趨左於是按誅之而釋居民之被脅者活數百人亂定歸里益發憤下帷受知竟東

道蔣君鳴玉提學道戴君京會遇以國士甲午舉省試明年乙未  
舉禮部戊戌 殿試在高等 世祖章皇帝親簡庶常公在選中  
以應對失次黜落歸丁外艱居亡何山東有賊于七之變妄男子  
飛章告密遂褫公章服酷吏鍛鍊周內幾與大獄會楚人吳升東  
來爲登州推官力雪之事得白猶未牽復也公無意仕進躬耕課  
讀於桑梓利害如痼瘵之切於己戊申山東地大震沂尤甚他邑  
公與郡人前戶部侍郎宋公之普指困以倡好義者得糧數千石  
比戶計口而給元旦露處弗恤也又力白監司徐君惺請蠲請振  
沂人無死徙者艾山龍女祠相傳甚靈異旱魃爲虐公輒率里人  
齋禱數有驗晚構靜山園憩寂其中嘗夢神人衣冠甚偉來謁曰

公素急桑梓當豫謀之詎可自逸於此覺而異之未幾霍雨河魚  
大上民多仇離公歎曰神告我哉爲書上監司李君煒請獨振又  
條議救荒事宜皆施行全活無算其爲德於鄉如此宋楊二大姓  
以鼠雀搆難奸人抵巇以爲利公憤之力爲排解遂釋怨爲婚媾  
人尤多之歲壬子伏 闕上書理前事得 旨牽復應內閣中書  
舍人試丁巳秋再行鄉試充順天同考官得王喆生以冠解額後  
入翰林尋以母病告歸自是不復出矣公少業制舉甚工劉君魯  
檜者於公爲外兄弟公力琢磨玉之於成遂舉進士旣老益獎進  
後學不衰自扞義館以來學者又告有司立義學於右軍祠聘單  
父進士盧君爲諸生師助之脰脯其誨人不倦如此甲子長孫者

臣應順天試遂魁一經人謂有天道云公之事親也視於無形聽於無聲其侍范張兩太君疾也不櫛不矧禱於天乞以身代其居喪也哀禮無不足者故州閭稱其孝叔如式少客江淮迎歸爲謀居止完室家以慰王母如幾避兵南徙不返奉季母嫁幼妹皆身任之族兄埃流離滇雲四十載爲辦裝趨歸又置田宅以娛其老嘗買一女子舉止不類人奴他日其父至自禹城曰亂離相失二十年矣已適人乎曰已受聘其夫猶未他娶也公惻然義之立使攜歸完其夫婦處親族鄉黨率有恩義故遠近稱其仁晚志養生之術恆與子姓言將以己已長至後拜辭墳墓入西山屆期召親知告別又二日更闌呼水盥沐畢入小寢端坐而逝嗚呼其亦近

乎達生者矣公卒妾傅氏年十九不食三日從容自縊置側內外  
宗族集者數百人咸驚歎流涕公之教於家者可知也生以明天  
啟癸亥卒以康熙二十八年己巳得年六十有七官內閣中書舍  
人子十人佩瑄佩瑀佩璠佩琚佩珣佩璋佩琳佩瑞佩珂女  
四人李新枝全世璉孟暉李某其婿也孫十二人者臣某某系之  
銘曰

先生不隱亦不仕爲德於鄉稱善士公侯之後必復始睢陵卽邱  
延厥嗣沂水艾山觀最屬有道之碑庶無媿

右墓誌銘王士禎撰



圖書集成醫部全錄卷一百四十一

五

王永命

王永命字九如山西臨汾人順治舉人知遷安縣以興學校絕菑  
甚勸農事爲務邑人稱之擢行人病歸永命事父母孝居喪寢甚  
枕塊者三年以孝子旌著有懷堂等集

右述聞謹瑤錄



李振藻

始余從蔚州魏先生游得交李公父子其後公之子旭升今給諫君以文字及吾門因益知公平生甚悉後久不見時時從給諫君問安否無何以訃至給諫君爲狀謁銘於予按狀李氏十世祖自孝義遷蔚累世以武功顯然多厚重隱德至父太公敦行仁義好善樂施尤稱長者遂大積於厥躬以造其家公生而早慧爲博士弟子員食餼上庠數踰省門試不利於有司以選拔貢太學省其父歸里中魏先生方謫官家居以古儒者學行自任倡道其鄉公旣天質沈摯近道聞魏先生講說益淬礪於問學家禮譜牒近世所弗急者公皆服習而修舉之選中書舍人內閣地深嚴闕機密

國朝清獻公傳卷之四十一  
公恪勤盡其職毋怠毋洩遷戶部雲南司主事會用兵於滇賊壘  
未拔郭郭甫定封疆之吏以人未就業請免夏稅以蘇民或言士  
馬供億必資近境議不可免公爭於 廷卒如公議宣屬順懷安  
蔚衛頻年苦水沙壓衝民屯田有司請捐其賦議不決公盡言無  
諱卒寔其說督理右翼興平倉奸人窟穴其中弊不可究詰前後  
繫訟纍纍彌歷年歲人憚其役公則精心釐畫潔身犯艱大猾屏  
跡晉廣東司員外郎攝四川司事蜀自兵後歲賦日耗議者令增  
賦日急公曰養殘黎如養劇病宜急培其元氣疾疢彌年而重以  
很厲之藥鮮不斃矣今惟責大吏招徠流遺田闕賦增毋俟重督  
於是議寢遷刑部山西司郎中榆次民段某奸黠誣祁縣范某謀

不軌公得其情黜者服上刑而無辜皆釋會 命重臣清刑獄公檢  
爰書可矜宥者司得八十六人雲中饑多掠賣人子女公察其僞  
券爲斷還者甚眾公所歷官其事蹟皆此類公純孝友悌行於家  
施於族黨比閭皆足爲世表儀旌人之善成人之名保人之孤復  
人之產終身汲汲如營己私衛守備何君出倉粟賑饑未及上請  
而病以歿法當坐侵欺籍孥公力白得免蘭谿丞徐喆舊有貸於  
公徐後罵賊死公急遣使持其券焚而弔之儉歲盡出所積粟散  
施遠邇以爲常至若建社學設義冢築垣堡諸鄉大夫之所得爲  
者無不爲事不可殫悉公雖謹厚樸直而天懷坦逸寄託高適自  
爲郎出守黔中以缺裁不赴林居徜徉泉石詩酒以自陶寫嘗過

龍門觀太華適吳越芒屨竹杖有灑然出塵之思卒之日猶驅款  
段尋舊所釣遊處歸而與家人論文談藝日夕不倦至夜分而形  
神離矣康熙三十四年六月二十日也春秋六十有八予嘗聞蔚  
州歿而有異雲氣覆其冢上其爲天人無疑今公無疾化去其騎  
箕尾歷星辰而亦與天遊乎公之子六人昉辰行人司司副旭升  
壬戌科進士戶科給事中與余有文字之知者也暉吉貢生暉亨  
甲戌科進士翰林院庶吉士映乾光祿寺典簿曙畿廩生女一適  
太學生劉彛孫十四人嗚呼公之所得於天全於人者如此此公  
可以無憾而世或謂天之報施善人或不盡然者然觀於公亦  
庶幾可以明於天人之故矣公諱振藻字天葩號約齋初配史恭

人繼配沈恭人銘曰

蔚州宿學不可捫寒松晚節今彌尊流風百世尚可敦名家清切  
連高門韋相傳經遺後昆范公幕下羅瓊璠少翁堯夫堪等倫矯  
矯介復何騰掀隴西世業堪重論維桑仙李深蟠根仲也耿耿登  
星垣季也詞館初高騫其餘頭角皆軒軒咸池迭奏如篋壘公胡  
不樂歸精魂隴岡樵牧無敢誼

右墓誌銘陳廷敬撰



四庫全書  
卷一百一十一

黃貞麟

嗚呼維天生才實難生才而使之得盡其才尤難固有抱英偉夙  
落之姿高明幹濟之識足以謨弼 朝宁綏理生民少展焉而卽效  
乃造物者始或揚之中或盤錯顛蹶之究竟摧阻而隄塞之俾斯  
世斯民不獲霑若人之澤此吾所以流涕太息於吾師卽墨黃公  
也公諱貞麟字方振家世居卽墨爲望族代有聞人曾祖諱兼善  
祖諱宗曉皆好學有隱德父諱擇以子貴 贈奉直大夫伉直重  
氣節公生而穎異讀書一過輒成誦爲文早有奇慧天性孝愛純  
篤九齡時遇曾祖母之喪哭踊甚哀人咸異之年十九祖與父相  
繼逝悲號不已水漿不入口者三日幾至滅性母太宜人撫之曰

吾所以爲未亡人者惟爾在耳爾兩世一身而獨不愛身乎乃勉  
食粥甫闕又遇王母喪毀瘠皆如前蓋自幼齡多遭亂離旋罹凶  
憫復被侵侮公所以處之者誠孝以盡哀經紀以成禮巽順以避  
禍荼苦以自勵思所以承先人之志而大其家惟日孜孜於學年  
廿五舉孝廉冠其經次年成進士越六年授鳳陽司理司理綜一  
府大刑獄有平反之責讞決每連及佗郡且一省有大案撫按每  
令司理中賢明者鞠之職任至重公奉母太宜人之官跪而請曰  
何以教兒太宜人曰汝知人言刑官不可爲此何謂也對曰兒知  
之矣死者不可復生斷者不可復續彼繫而前者孰非人之子若  
弟少有不得其實能無隱痛耶古云得其情尚哀矜勿喜況未必

得其情耶太宜人曰兒能常守此言吾無慮矣公決獄至慎持法  
至平率多所矜宥歲大旱聞郡守令虔禱弗應公曰得無有沈冤  
未雪株累未寬陰陽之氣鬱而不舒乎立剖諸大案三日而雨蒙  
城懷遠天長盱眙四縣子矜逋賦者各百餘人令咸速之獄獄隘  
諸生無置足地公聞之謂令曰彼逋賦者皆未驗其實忍令殪死  
於獄乎悉還其家及訊則或舞文吏妄爲注名或誤報或續完悉  
得原而釋之河南優人朱虎山遊食太和縣髮長數寸土人范之  
諫與魯姓爲仇誣以藏故明宗室謀不軌株連多人形於章奏公  
覈其蓄髮情狀察兩姓相仇備得其實以聞卒釋無辜而罪告者  
天長有盜劫銀鞘獲其渠扳直隸江浙河南山左山右諸省之人

其眾公卽日審鞠盡屬仇誣皆請豁釋壽春營弁請於公曰某受累有年逋盜止欠一人坐一人則某無累矣公曰人命至重功名至微吾不能從爾以此易彼也潁州民吳月邪教惑眾仇首之公勸皆愚民無知止坐吳月及爲首數人餘皆省釋有水姓者捕人索之不遂坐以吳月黨逐至新蔡而殺之新蔡鄉人不知其爲捕卒率眾救護捕飾殺人罪並誣其村爲吳月之黨聞於撫鎮發兵圍之盡繫其眾至鳳陽公廉得其實坐捕罪而盡釋新蔡人此數者皆上聞於朝而公毅然行之其理枉而活人之多類如此及其令鹽山也公曰令者邑之父母古人慈愛鞠育若其子然吾悉用古人法治之當無有不感而化者地愈瘠民愈苦益宜盡乃心

立保甲守望之法以弭盜清里役之包丁以除民害行勸賞之條  
寬逋逃之累勸民埋葬以移風易俗爲己任鹽之民蒸蒸丕變戴  
公如神明愛公如父母去鹽數十年尙有言之而垂涕者公之言  
驗矣入爲戶部管倉務釐奸剔弊爲同事所累而罷歸歸奉母太  
宜人備極孝養雖高年猶如孺子慕生平自歎鮮兄弟同氣之親  
惟一女弟耳所以撫之者甚厚以恩誼恤鄉里以公直持議論以  
詩書道德教子孫以端嚴方正立坊表英自癸卯秋爲公門下士  
奉色笑聆訓誨者三十餘年睹公丰采英毅談國家事洞若觀火  
待朋友以肝膈相示絕無城府性樂獎勵人才訓子若孫最嚴肅  
以故皆克有取太宜人歿時年八十有一公亦六十有一泣血不

自勝寢苦塊不避寒溼因成疾營贈大夫太宜人合葬拮据勞苦  
踰年遂不起嗚呼公一代偉人而功名事業不克副其才其學豈  
非天哉傳曰積善之家必有餘慶積矣而未發則所蘊崇者益厚  
是在後嗣矣公生於庚午年八月一日享年六十有五卒於甲戌  
年十二月四日元配孫宜人子七人大中美中鴻中理中位中敬  
中爽中大中敬中舉孝廉美中舉明經餘皆博士弟子皆以文學  
有稱於時諸孫及女嫻族詳於家譜以康熙三十五年丙子十月  
十二日葬於臨青之陽銘曰

淮水之濱嶽嶽正人東海之浹恂恂君子宅彼崇岡世德其昌千  
古是觀門人之誄

右墓誌銘張英撰

按黃公順治十五年進士仕  
至戶部山西清吏司主事





周士儼

徵仕郎工部司務加二級周公竹嬾與余同里處洞庭南服長衡  
煙火相望也其官京師又天涯比鄰晨夕與數公修軀齎顏和氣  
緩性色不形喜怒復健飯無疾年及花甲猶然精粹未艾庚申冬  
忽思歸里謀於余余驚曰公何遽及此湖南久困兵荒歸隱無地  
曷暫浮沈薄祿藉以優游公默然行意遂緩迄辛酉秋又以請假  
告余復慰止之而公意決絕當局者方念公久勞未遷欲畱之遲  
牒不下公忽忽若病不旬日竟卒於旅子方恨知公未深也公嗣  
君澗聞訃奔都門過予里囑吾兒禹書乞爲誌銘而公之伯兄士  
儀亦惓惓致書相委士儀博學篤行隱君子也箸史貫暨詩若文

行世余不覺愧懼恐其言之不副又竹嬾生平交名公卿安用子  
淺淺之言淵又請不已禮云知生而不知死弔而不傷知死而不  
知生傷而不弔予於竹嬾悉知其生死得無言乎按公諱士儼字  
若思號竹嬾楚之衡州酃縣人其先汝南以國爲氏其居酃者始  
祖榮宗任江西南昌少府傳至希堯郡諸生希堯生道國道國生  
錫我以選拔官學博錫我生祉祉子八公其三也早慧記悟俱敏  
文筆犀利儔輩折角年十五補諸生屢試高等督學高彙旃塘牧  
遊劉陟岫諸先生皆拔之冠軍會兵革淪草莽者十有五載本  
朝定鼎公始復理故業試輒報罷戊戌乃得選拔入成均爲司成  
章子儀陳學山楊地一諸公所賞識同時肄業爲文字交者先後

捷去崇爵厚秩相望而公僅得祕書選見知曲沃衛公久之晉祕  
書典籍直誥敕撰文歷俸七載偶以隻字註誤鐫級歸里庚戌臺  
中李公某始疏公冤還公故物公終不欲自白彰人過量移國子  
學正乙卯晉工部司務遇 覃恩父母封如其官公守職清慎橐  
無長物恆思急人之急戚里遠至接引周恤不幸病且卒者糾同  
心與殯葬其居鄉爲梓里興除利弊如條滌粵鹽蘇商民之困戚  
里咸受其庇其生平大槩類是公生於天啟壬戌九月十三日寅  
時歿於康熙辛酉八月念五日亥時享年六十娶唐氏早卒繼劉  
氏前戶部郎中劉享甲季女又卒再娶明經歐陽珠次女側室林  
氏洪氏子六人長淵衡陽縣學廩生次漣鄆縣學廩生次夢齡業

儒俱歐陽氏出次灞業儒次涓次某葬某山爲之銘曰  
厥才何豐厥遇何裔世浮其名公探其實縣縣之裔是謂繼德勒  
石垂聲庶幾不忒

右墓誌銘王岱撰

劉果

劉果字毅卿山東諸城人順治戊戌進士康熙三年任太原推官  
修文廟立義學引汾水溉太原榆次諸縣田分水先後胥有次第  
民以不爭交城盜傅青山等據葫蘆峪授計交令趙吉士平之富  
人訟產餽黃金五百兩假黃鼠以進峻卻之尋改河閒知縣才識  
敏練著能聲八年 駕幸河閒問民疾苦父老以果治狀奏 召  
見襄之擢刑部主事修 大清律於條例異同多所訂正丁內艱  
歸遂不復起弟榮順治丁丑進士仕至四川布政使所在以廉能  
稱

右述聞謹瑤錄



趙增

趙增山西汶上人順治戊戌進士授山西安邑知縣再補福建閩縣時閩寇初平增力求綏輯拊循備至旋擢兵部督捕主事以安靜爲本株連之累一蘇

右述聞謀瑤錄

國朝書林類攷刀品 卷五十九 國署二



皇朝通志卷之九

三

黃開運

黃開運四川內江人順治戊戌進士流寇至內江恣行殺戮開運  
團結鄉勇襲之斬獲無算賊懼走邑賴以全累官直隸定州知州  
轉刑部郎中獻決明允多所平反上官倚如左右手

右述聞謔瑤錄

四庫全書  
卷一百一十一

三

李溥

李溥字富澤河南鄆城人順治閒成進士任陝西三原令時流賊初平餘黨未殄溥繕城陣練鄉勇捍禦甚備九年春賊破縣西王堡據嵯峨山溥率兵搗其巢盡殲之邑賴以甯歷官戶部郎中

右述聞謚瑤錄



葉封

葉封黃陂人順治十六年進士除福建延平府推官缺裁改河南登封縣知縣遷西城兵馬司指揮田雯宋犖輩咸與唱酬薦試博學鴻儒報罷及銓授工部主事而封已卒年六十有五封家武昌之樊湖以漁釣自娛泊宦遊嵩陽詩益雅健可誦王士禎嘗點定其棗廬集又取其嵩山諸詩爲嵩遊集序而刻之他著有嵩志二十一卷復旁求漢唐以來碑版文字爲嵩陽石刻集記二卷辨證精博人比之劉敞薛尚功云

右 國史館本傳

吾友楚葉君井叔以康熙丁卯五月一日卒於家將易簀顧謂子

道復曰我卽死必奚先生蘇嶺狀吾行王先生阮亭誌吾墓石庚午道復舉於鄉公車至京師來謁泣將治命且授蘇嶺之狀予諾之而未暇以爲癸酉冬又至再拜申前請曰父命也非先生言無以慰地下乃感亡友之意而序之按狀君諱封先世王氏籍浙西之嘉興父錦林公諱長青嗣於中表葉翁始氏葉錦林二子伯王守字正則君次也崇禎末錦林自高要丞遷黃州衛經歷巡撫都御史何公騰蛟才公檄攝黃陂令時賊張獻忠陷黃陂民流竄城覆于隍公安輯萬方民稍歸城亦完固舉最遷知永明縣未赴殉節死陂人德公畱占籍焉久之徙居武昌縣痛父死官守奉母至孝母歿家益貧讀書益自刻苦所居在樊山下黃岡王宗伯澤

去以翰林里居月夜泛舟樊湖聞有書聲出菰蘆中先悲惋而後  
怡悅如懶瓚之在衡山者覺有異曰必井叔也迹之果然順治丁  
酉舉於鄉己亥成進士康熙癸卯除延平府推官君自爲諸生固  
窮至是冰檠自矢吏畏而民愛之俗爲一變延有巨猾善持官府  
短長吏不敢問君按誅其魁餘皆屏息靖南王駐閩旗丁肆虐八  
郡君繩以法不少貸其不畏強禦如此而矜慎折獄每斷一重囚  
中夜執筆踟躇不忍下前後減殊死罪二十八人他郡有冤者皆  
願得君讞之漳州有大姓同室鬪終訟不已君決以片言訓以友  
恭遂相持泣下爲兄弟如初嘗曰古者刑以弼教吾敢以鉤距爲  
能事哉未幾裁理官改知登封縣其在登封也勸開墾革火耗平



徭役厚儲侍息爭訟禮學校興教化一切以經術治之登封治嵩山下有虎患君齋三日移牒於神引咎自責自是患絕縣距河五百里歲派河夫民費不貲胥吏夤緣爲奸利君條十事上之巡撫佟勤僖公鳳彩納其言疏改民夫爲官雇鄰郡悉歌詠之嵩陽書院舊祀二程子其側有宋崇福宮故址廢且久君稽史籍得司馬文正公以下會以宰執領宮使者凡十有二人爲主祠之時其祭祀選博士弟子有文行者講肄其中又置田若干畝以爲俎豆飲食之需自爲之記手葺嵩志二十一卷又旁搜漢唐以來碑版文字別爲石刻集記二卷辨證精博人比之劉原父薛尚功焉己酉爲同考官甲寅滇逆變作禁旅四出踐踏旁午羽檄沓至君勞心

撫字事集而民不知乙卯遷西城兵馬司指揮指揮號俗吏清流  
率恥爲之君一以清靜爲治暇卽與其僚莆田林君堯英賦詩相  
倡和今刑部侍郎田公雯都御史宋公榮前國子祭酒曹君禾故  
給事中王君又旦吏部郎中顏君光敏輩相與推輓風雅大興予  
嘗評次爲十子詩海內談士以爲口實戊午有旨中外官舉博  
學鴻儒以備顧問君與焉是時諸號爲名士高蹈邱園者率婉  
顏卑詞望走朝貴之門伺闈人喜怒以爲欣戚君獨處委巷雀羅  
在戶明年卒報罷需次補部主事歸里壬戌再至京師未幾又歸  
往來杯湖退谷之間自號退翁君性澹泊無紛華之好惟嗜讀書  
尤精爾雅說文訓故工於篆隸其自登封入爲兵馬指揮也介其

宗人文敏公方藹以詩贄于子終卷告之曰君延平以前詩未也  
嵩山諸詩格高韻絕不減古人當別爲專集以行之爲之序而傳  
之於是諸君子交引重名動薦紳閒矣君之放歸又嘗寄己未庚  
申之作及郢中懷古詩二十篇屬予論次其風格益高凡予所不  
可君應手竄改或竟刻削不自愛惜虛懷善下交遊中罕見其比  
所著嵩山詩集嵩山志嵩陽石刻集記己庚詩郢中懷古詩皆予  
所論次辛壬詩則自廣陵寄予未及卒業而君死矣悲哉又以韻  
書譌舛編輯刊正未成書而病且革謂道復曰吾母終時求一縑  
素不可得斂我當以布衣又曰喪葬一遵家禮勿事浮屠勿惑風  
水語畢而逝及部授工部虞衡司主事君己前歿生以天啟癸亥

十二月十六日得年六十有五元配張氏 封宜人與君共貧賤憂  
患有壹德先九年卒君命予誌其墓君知登封遇 覃恩 敕授  
文林郎官兵馬司指揮奉 恩詔加一級 誥授奉直大夫妻  
封孺人再 封宜人子男子五道復康熙庚午舉人道臨候選州  
同知道謙道恆道豫子女子二人適王一鯤楊廷燕孫男三人德  
潤德潛德溥以某年月日葬某阡系以銘曰  
本整叟解巾仕用經術飾吏事延津劍緱山笙鑿臣心如水清翔  
儒林泳文苑給筆札開東觀暨于田志獲禽詭而遇非我心歸去  
來樊山下釣洞中招退者歸去來兜率天畱遺蛻此山邊

右墓誌銘王士禎撰

The image shows a large rectangular frame with vertical lines, possibly a table or a page from a document. The frame is mostly empty, with some faint markings on the right side. The markings appear to be a vertical column of text or symbols, possibly a page number or a title, but they are too faint to read. The frame is defined by a thick black border on the left and bottom, and a thinner border on the top and right.

廖聯翼

廖聯翼字雲升湖南衡陽人順治己亥進士授孟津知縣有惠政康熙初大軍進剿吳逆孟津當其衝民不知兵以勞擢中書舍人右沅湘耆舊集小傳鄧顯鶴撰

衡陽廖聯翼由進士知孟津縣到官卽廉得茲况伏法縣人畏服值旱蝗捐俸賑饑全活甚眾擢內閣中書

右述聞誌瑤錄

匡輿記 卷之九

三

霍之瑄

霍之瑄字玉官山西馬邑人順治己亥進士授柳州府推官以缺  
裁改范縣知縣皆有治績范人祠之擢中書舍人假歸蠲金爲馬  
邑贅東城焉

右述聞謠瑤錄





國朝耆獻類徵初編卷百四十補錄

郎署二

王士禛

西樵先生既歿之三年將葬母弟阮亭先生士禛爲立隧道之碑  
屬江都汪懋麟書其陰嗚呼先生之官閱世系文章孝義雜見於  
碑銘傳贊而爲之詞者又皆海內賢士大夫懋麟復何言願余受  
阮亭先生知因託交於先生也久追憶聚散離合升沈疾痛生死  
之際迄今十有五年中間相與登臨飲酒歌詩爲日無幾而憂傷  
頽頹出苦語相慰勞者固十常八九甫追隨於東華北門以立名  
砥節期勉獎藉曾幾何日月而先生棄余余復連遭大故涕淚於

江潭寥寂之鄉每披先生遺文竊以爲今天下名士求先生似者  
百千無一也先生之學與行人能言之余最以爲莫可及者惟其  
守當典鄉試河南磨勘獄起中先生者以毛髮之疵下詔獄是  
時死生在呼吸余計偕京師爲之惴恐食不能下咽而先生一委  
於命終日晏坐鈔經賦詩卒得無事以出而放跡於江淮吳越  
凡六七年不問生計服御如寒人及再司銓曹職任考功是職也  
專司罪罰能禍福人內外之吏稍違令甲卽可重輕其罪而先生  
一持以公門絕請謁退食時偕二三故人論文講道茗粥一設庭  
戶蕭然嗚呼非天下之至有守者其孰能之耶余又見其在考功  
無罪而奪級同時被謫者數人獨先生恬然如平時日與余輩攜

酒坐古松茂樹樂且忘返若先生者其心真不以富貴貧賤爲榮  
辱一罷再罷不得一日抒其所學遂俛焉以歿此余之所以不能  
無悲也方先生聞母夫人之喪日夜哭不止余覩其貌瘠聆其聲  
日啗切切然慮之豈意竟死於孝耶而世之論者猶或執禮經爲  
先生惜過矣嗚呼節孝之謚私也責公也表先生之行也孝不可  
沒石不可磨也

右碑陰記汪懋麟撰

士禎序述計東之言曰三王並著詩名東亭之才詎肯作蜂腰哉  
然自是士禎篤念友于存此標榜之詞耳其實士祿不及士禎士  
祿不及士祿天下之公評也



國朝耆獻類徵初編卷百四十補錄

郎署二

丁澎

丁蒞園名澎杭之仁和人也世宰天方教戒飲酒而蒞園顧嗜酒  
飲至一石貌益恭言益謹人咸異之詩賦古文詞自少年未道馬  
卽名播江左其後仲弟景鴻季弟濬皆以詩名世目之曰三丁然  
香奩豔句四方聞秀尤喜讀蒞園詩家有攬雲樓三丁讀書處也  
客乍登樓蒞園伏案上疑晝寢迫而視之方觀書目去紙僅一寸  
客嘲之曰卿去丁儀凡幾輩嗣此得短視名延陵大姓遣一姬姬  
能詩素誦蒞園句誓曰主人令吾自擇配願得如丁卽足矣陽羨

吳某詭以葑園意請納姬姬許之丁有侍兒小字冬青主謳善鼓琴主婦不悅將遣府吏納千金聘爲婦里媪知其詐不以告久之延陵姬登舟泣曰吾旦夕冀事丁郎爲幕府始入掖庭緣已矣方扣舷欲墮水冬青忽至延陵姬道故冬青亦泣曰吾故主人翁相對嗚不止護騎以告葑園廢寢食者屢日郎比部與施大參愚山朱觀察荔裳嚴黃門顯亭輩稱燕臺七子詩名滿京師吏人竊其贖換鵝炙龜下養思染指不獲明日訟於庭葑園復賜吏人鵝炙時葑園猶守天方教同舍郎故以豬肝一片置匕箸吏人以告獲免上方冊立西宮念無媼典禮者調入東省兼主客主客卽古典屬國也貢使至必譯問主客爲誰廉知公能詩以豹皮美玉賂

吏人吏人竊葑園詩贖之歸國長安搢紳以爲榮畧入東省侍郎  
李公爽堂從東出葑園從中入瞳目相視侍郎遣駟卒問訊葑園  
偕同官趨謝侍郎笑曰是君耶吾知君短視奚謝爲葑園退而笑  
曰吾短視與詩名等蒲居東崎嶇三千里郵亭驛壁讀遷客詩大  
喜后車妾亦喜曰得非聞中朝賜環 詔耶葑園曰 上聖明賜  
我遊湯沐邑出關遷客皆才子此行不患無友久之渡遼海望長  
白諸山土人以魚爲飯糧盡餒而噉孺子妾慰勞之曰卿有友必  
簞食迎若葑園笑曰恐如卿言當先以酒療吾渴至靖安卜居東  
岡躬自飯牛與牧豎同臥起然暇輒爲詩詩益溫厚無遷謫態國  
子藩公聞其名欲枉見葑園遲不往一日乘牛車入城車上執周



易粹遇藩公節低頭讀易不及避藩公歸語陸子淵曰吾今日得  
遇葑園先生矣子淵問故藩公曰此間安有車上讀書傲然不顧  
若此人者乎必葑園無疑也嗣此西園飛蓋必延葑園飲酒賦詩  
禮爲上客然初至時亦困甚塞上風刺人骨秋雨雪山川林不帶  
白玉妝河冰合常不得汲樵蘇不至五日爨無烟取蘆粟小米和  
雪齧之日晡山鬼遙嘯饑颺穴語忽聞扣門聲翩然有喜童子從  
隙窺之虎方以尾擊戶葑園危坐自若臘盡無錢與遷客磨墨市  
上書春聯兒童婦女爭以錢易書後至者不得怏怏去居東凡五  
遷家日貧詩曰富登臨眺覽供其筆墨作歸斯軒記以寓意友人  
林璐聞之曰卿歸矣曩日邯鄲道上呂仙祠卽盧生授枕處也仕

官過者疾馳去以避不祥卿與中州試停車徐步入道人方坐蒲  
團不起卿異之索筆題壁日向翁乞取還鄉夢畱待凌雲化鶴飛  
之句得非詩識耶貽書報葑園惘然悟又一年始歸果如林生言

右外傳林路撰



國朝書獻類徵初編卷百四十一目錄

郎署三

裴表

李模

曹玉珂

邱元武

曹貞吉 朱玉

蘇金鉉

侯元業

楊蘊

張燕翼

楊兆傑

王復衡

郭居鼎

張宸

蔡騁 曹首望

卜陳彝

秦敬傳

錢芳標

任辰旦

汪懋麟

陳玉璫

陳宗石

補錄

陶之典 劉迪

陶之典

劉迪

國朝百獻類徵初編卷百四十一

通奉大夫尚書江西巡撫江西布政使司布政使湘陰李桓輯

郎署三

裴表

吾邑自孟雲浦先明德後蓋多君子云其窮而在下者得二人焉  
曰邱方山裴華池方山以文無害爲掾吏清節聞於後世而華池  
亦終於文學其爲人多忠孝大節嘗率眾保聚拒賊仁而有勇者  
也又得哲嗣蘆院先生顯揚其遺緒學者得以稱述之不倦予少  
時嘗誌華池之墓於今二十有五年而蘆院卒於里門易簀時謂  
其子虹曰吾生平學不求名汝曹若不沒吾行事則莫若同邑呂

子之知我深也其訃而屬銘焉嗚呼先生往矣其嘉言嫩行蓋不勝書書其大者以嘉惠來學俟諸史氏是後死者之責也敢不承命先生諱表字九章居蘆院里因以爲號系出唐晉國公度後明初諱成者爲先生始祖自聞喜遷河南之新安世有涓德六傳至高祖洲以德行賜儒官曾祖光前諸生祖椿以孝友稱父翰芳字華池以諸生 贈奉直大夫兵部員外郎祀於鄉娶高氏生先生繼黃氏生褒先生自兒時動中儀則事父母定省不踰時出入必告侍大母疾無間蚤夜及長與弟褒友愛彌篤先生旣遊庠序隨父館澠池得悉讀曹月川集乃嘆曰一代眞儒也弗是之學亦虛生耳明末避難山中躬汲爨以奉親愉婉承順猶日三復月川請

國朝丁酉舉於鄉己亥成進士自是學日進然簡  
穆多營人或易之初不謂先生能官也初授粵西貴縣知縣時逆  
藩倡亂道塞或沮其行先生曰甫爲人臣而卽以趨避爲自全計  
謂所學何卒往抵粵東肇慶從總制議軍儲以圖恢復會粵西盡  
陷乃之吉安道中數遇賊祕其符以智得脫開府佟公雅重其節  
槩代咨部得改授江南溧陽溧陽稱劇邑難治豪黨繁有徒令至  
卽陷以利因挾其短長不則市逋逃姦盜以中之鮮有解免者或  
爲先生難之先生曰昔人以盤錯別利器事無難願力行何如耳  
旣至吏果以千金進先生誓而卻之將置諸法吏泥首謝乃已因  
摘發邑中豪猾及漕弁之數爲奸利者前其魁百姓安堵歲旱勸



富室出粟或躬詣其家爲陳說利害人無不立應者復泣請於兩  
憲奏免額稅前後三萬餘金設糜全活者以億計其他善政率類  
此政成被 召命以丁太宜人艱歸讀禮時益潛心孝經日取先  
明德所著義疏尋繹之欲集爲成書未就服闋授兵部督捕主事  
在官逋逃無株連者督儲通州卻餽遺漕運如期庚午貳江南典  
試得人爲盛晉武選司員外郎尋以足疾假歸在籍十餘年乃終  
時康熙四十三年九月十七日也距生於天啟壬戌得壽八十有  
三配韓宜人邑善人韓惟新女子男四虹峴嶸峻女一娶嫁俱詳  
狀中孫七紹祖縉祖緒祖繹祖繩祖纘祖統祖曾孫七人凡三世  
彬彬文學稱其家兒也先生之學自慎獨而力行仁孝根心順達

而不窮既私淑曹正夫月川尋其墜緒復矩步於孟雲浦先明德之芳躅以儉居德以禮善俗喪致哀祭致誠履信攜謙恂恂若不能言然賦性剛介有一介不取之操以故有志必爲爲必成雖位不酬德其設施亦略見於世矣其在兵曹也有故人以五百金越例求官先生曰予不忍自汙而忍汙故人乎求者慚而退同邑陳心齋先生以書勸講學先生辭曰某自度平生爲所不爲欲所不欲者多矣復何敢然嗚呼自聖言微而講義繁好名者咸奔走如鶩甚者恃其資力自託於坐忘頓悟滕口說而遠事情宜乎儒效日疏而謠詠者眾也若先生所謂不言而躬行者乎韓孝廉君翼次其年譜謂先生爲眞學術信夫子侍教先生久亦備有志於學

矣而志不強立遂穫落無成先生之屬子銘也繁豈重吾言俾知  
所謂學者在此不在彼耳卜於明年月日葬先生於方山祖阡而  
以韓宜人耐銘曰

先生之德柔惠且直教起於家政施於國人擷其華我落其實羣  
飲爾和罔不克溢惟恭則壽乃甯爾室山蘊百靈水鍾百脈以利  
其孫子世象厥德後有願學者視此銘石

右墓誌銘呂履恆撰

李模

李模字洪範號闕庵河南邙縣人天姿穎異家貧力學能文章順治丁酉領河南鄉貢己亥舉進士授真定府武強縣知縣武疲邑仍歲荒旱而舊例正供外按丁起差歲費民金萬餘兩模愾然太息曰民不堪命矣甫下車卽革去又府廳修公署費皆取之屬縣民模復言於上罷之立碑著爲令康熙八年春模念民新被水災請緩徵上官不可模曰吾不能虐民以希上官也寢其令比歲終亦無逋賦十二年畿南大旱武強武邑獻縣饒陽四邑災尤甚竊民相率詣富家名曰貸粟而實劫之人心洶洶變生且不測模知常平倉有積穀四百石而文移往來非踰月不得請則民斃久矣

卽下令諭民來取穀乃申院自劾復以四邑民被災尤劇狀請救甚力巡撫公世德大加稱賞發金四千兩分振四邑尋以聞於朝得旨近畿三府免民租之半而四邑盡蠲升刑部主事員外郎提牢者四遇重囚冬必令溫飽夏必令清涼每言人卽犯大辟未必無可矜疑者令獄未具而先死囹圄不惟情可矜疑者冤不得伸卽應死之人不死於法而死於獄吏之凌窘尤可恨同官服其言容城孫韻雅徵君之季子也以呈誤繫獄獄中非有資不能居板房韻雅貧模命擇板房與之每見必詢其飢寒後事雪學者聞而義之升禮部郎中出爲廣西提學僉事至家疾卒

右傳王登魁撰

曹玉珂

康熙十六年丁巳三月二十有六日 敕授文林郎中書科中書  
曹公歿於官越七年癸亥公諸子葬公祖阡余哭公臨其穴公子  
柝格集泣請余銘余技淚而嘆曰禹疏與余爲同門友昔贈余詩  
云吾與子同門同氣無以異可以知余兩人之交矣嘗謂余曰夤  
州滄溟稱至交滄溟死夤州爲之銘吾長子十二年子且爲吾誌  
墓矣余遜謝嗚呼孰意公果先我而逝乎追憶昔言良足悲矣然  
吾公而不誌則余之罪也夫因隕淚而爲之誌公諱玉珂字禹疏  
號陸海一號緩齋少時性頗急太贈公戒之緩因以爲號亦韋弦  
之佩遵父教也先世晉洪洞人九世祖榮禮公者徙秦富平縣爲

國朝書牘卷之十一  
始祖歷四傳祖清官太醫院院判生教諭公思讓教諭公二子長  
公汝葵次公汝菊兄弟皆鄉薦人稱雙璧汝葵公知蜀慶符縣爲  
公會祖生壽官公垣公大父生太贈公鉦公父也以公貴 贈文  
林郎公顏堂曰四世文林益統馳封四世云太贈公娶王 封太  
孺人實生公公魁梧偉岸風度凝整少穎書過卽成誦弱冠督學  
閔公奇之入庠試輒優壬午房考吳公賞其文云與楊維斗伯仲  
亟薦元以主試者不合而擯甲申逆闖陷北都悲憤棄諸生逃匿  
深山中爲農氓焚帖括舉子業示不復事博稽羣書殫心於古學  
搜先秦史漢八大家百家子書及漢魏三唐詩讀之頃刻數千言  
其爲文究秦漢八家之精而出之以清遠其爲詩會漢魏三唐之

神而出之以幽潔然今人之詩文學古者不類矣則規規摹擬之襲古而愈戾於古公學古而不襲古而不戾於古乃儷於古而自成一家言詩與文皆傳誦於世 國朝定鼎關內憲使呂公慕公名延之西席勉入鎮安庠甲午舉於鄉與余同門余稔公名久此日始識公握手依然昆仲也已亥公 賜進士出身例授推職值裁缺改授壽張縣尹壽山左疲敝邑也自古有河患金陵口決水隄七載荒亡過半然天下有司之難難於賦役刑名而山左賦逋刑繁又多逃人盜賊累其難尤甚公撫凋敝綏流亡復業者十八九墾荒七百餘頃壽原額七千增踰萬戶口爲之充實邑有運河淺夫工食往皆派里甲公雇役不派一夫及時旱荒民艱食河工



派柳三千株百姓驚散公泣請豁免其詭隱丁糧累民歷年不清者皆釐其弊除之自是不扑而樂輸賦役不足爲公難也其於刑名也識獄矜慎反覆務得其隱陽穀有婦孀節撫孤翁老突以痰亡其女利婦產誣以殺屢訊坐婦凌遲公與鄰邑會審公曰胡知毒也作云投銀簪色變公命易簪投之色不變叱曰前簪假耳故色變此何等罪而草草如是耶釋冤婦作驚服台郡頌神明以是凡鄰邑大獄不決者各臺必俟公識其明允類如是捕逃甯盜之法則嚴保甲不爲虛文選練總以消其萌優鄉約以化其俗嘗誦歐陽公求生不得之言不妄用一刑桴鼓不驚而盜賊息矣逃人株連九家公察解數十起不株一人是逃盜二大事皆無足

爲公難者邑多前賢古蹟公皆爲之碑銘傳記修邑乘紀其山川  
風物備文獻之徵一切興革利弊靡不舉其殷勤撫字惟靜以安  
人不爲紛擾而已公自奉儉素飲冰茹檠無絲毫取於民撫軍劉  
公芳燭巡兗郡懸牌署門云愷悌宜民廉潔第一一時稱爲知人  
以故 丙石中祕合邑尸祝泣送者絡繹數百里如失慈母公有甯  
別士民詩載之集中公少失怙事母以孝聞令壽時署中建如鏡  
開迎養太夫人太夫人老憚遠涉堅不赴任公不攜家畱魏孺人  
諸子侍養獨居署七年止以少子自隨及任中祕例不可請日夜  
西望而泣丁巳太夫人入袞堅意圖終養將伏 闕陳情而病作  
醫藥罔效易質時無一語及家事昏瞶中猶嘖嘖呼太夫人不絕

口以至於亡所志不遂有遺憾於九京矣公嗜書壽署建琴亭政暇讀書其中在中祕日手一帙與諸名公倡和疊疊不倦平生雅善臨池摹古搨名帖如其真尤好名篆圖章收聚法物古器覈鑿以自娛所著有緩齋初集緩齋雜詩石倉詩大河志終華仙蹟志傳於世公善養生術每及參同悟真諸書嘗謂余曰吾有延年之學不可令我獨爲不死嗚呼公竟死哉公生於萬曆丁巳卒於康熙丁巳葬華原祖阡公之自罷諸生也其志願所期固老死巖穴中矣及出而登高第爲名宰讀中祕書聲華滿天下乃詠歌感慨多鬱抑沈結之懷瞻念山林飄飄有出世志而親老懷歸以官卑宦貧隱忍蹉跎以至於死死之日宦囊蕭然衾棺不備良可傷也

及余哭君之堂靈前菜羹冷落八旬老母垂白扶杖而出茅屋數椽妻子衣食不給嗟嗟所謂有道君子古之廉吏者非耶公生爲太贈公卜地華原之邱闢七十畝手植柏五百株其志願何恢恢大也乃不克大用於世而官與位皆不副其才與德夫何積之厚而用之嗇耶雖然公治績垂史冊文采著後世天之篤厚君子者意在斯乎昔臯州傅子鱗云無涯之知結爲大年日月經天光采異常余於禹疏亦云銘曰

守道而巖居富貴非所願兮起而爲吏勳則爛兮發石渠之藏文則絢兮嗚呼謂公之不遇兮而遇則庶幾謂公之遇兮而遇則微器則大兮時則違天錫內美兮而數則奇是則足以悲噫嘻微公

國朝... 卷一百一

吾誰與歸

右墓誌銘楊端本撰

邱元武

邱公名元武字龍標諸城人其更字慎清則其先公所命祖致大官父仕至知縣慎清少穎拔異常兒歷世貴顯爲人側目知縣公及慎清幾陷死獄用貨財得脫於難隨中己亥科進士初授撫州府推官慎清年少雄職不無傲岸葉公與予時或借他語規諷慎清頷其意奉教惟謹記慎清於署中建一齋閣頗壯麗知予當以他事過撫州卽日遣散工徒同官問其所以慎清曰誠恐髡公見而罵我蓋謂予也其虛懷如此繼奉令裁缺改黔之施秉施秉民夷雜處非人所居不二年升工部都水司主事戒行有期值雲貴變起遂陷於賊亂定始得歸築室涓水之上自傷緣命之窮日賦

詩見志其五七言之至者遂達於精微近遂聞已死慎清有女無  
子鬼而有知不能不於諸昆弟是望也

贊曰護牆之艾若或濡之當門之蘭若或鋤之詭辭攝令古則有  
之君無悼也命實司之

右傳黎士宏撰

曹貞吉 朱玉

曹貞吉字升六又字實庵安邱人順治庚子解元官禮部員外登望海樓云尊前忽覺來三島此外猶聞更九州花朝得舍弟過江消息云花明故國初唳鳥人渡空江欲暮潮人競傳之有朝天集珂雪集宋牧仲荅實庵書曰每念足下奇人黃山奇境必有不朽之篇爲山靈增重讀紀游諸什此山名作寥寥向推虞山今被實庵壓倒矣弟申吉字澹餘順治乙未進士官貴州巡撫王士禎曰二曹兄弟齊名中丞淪沒異域未見其止祭告湖南有句云雪花飛過洞庭去愁對斑斑湘竹林又朱玉字元式崑山人出土禎門下後官國子博士有句云秋雨茂陵人獨臥西風汾水雁還來土



國朝詩集卷之四  
禎爲祭酒題其後云茂陵秋雨深深夜愛爾哦詩四壁秋多少長  
安苦吟客瘦羊博士擅風流

右文獻徵存錄錢林撰

蘇金鉉

濮州有純孝之君子曰兵部督捕主事蘇君君諱金鉉字耳鼎始  
祖曰克明三傳爲兵部尚書穀源先生祐與祐同出者曰天民州  
庠生天民生淞指揮僉事淞生盍禮部儒官盍生光頤曹州訓導  
光頤生埈字如藩君之父也 封承德郎兵部職方清吏司督捕  
主事母鞏氏子三君長也生而穎異數歲訓導公抱置膝上口授  
易卽成誦補博士弟子員試輒第一順治庚子舉於鄉旋丁母鞏  
艱以孝聞服闋銓署壽光教諭壽光古樹灌之國士多秀異而風  
習儉競君正己率之爲立條約務敦士行抑奔競正文體會歲歉  
諸生逋賦者眾縣令請以君督之君曰某職教士非催科也卒辭

之請生有鬪爭者夜進縑十五純君力卻之而不平其訟士爲感泣  
遷靖海衛教授其教如壽光內遷國子助教甲子奉 上諭纂太  
學通志君屬筆爲多辛未遷兵部職方清吏司督捕主事甫而月  
卽以終養請告子時爲侍郎畱之至再不可時承德公年餘八十  
矣語不甚可辨惟君能知其意行授杖坐奉席抑搔浣濯躬爲之  
承德公臥牀上君臥牀下三年如一日也癸酉庶母劉病歿承德  
公亦耄且病君侍湯藥日夜憂戚衣不解帶目不交睫凡一載心  
力交瘁竟先承德公二日而歿濮之人皆稱君爲純孝云先是宗  
人有以良田千畝贈君者君笑而辭之曰君無傷惠我無傷廉其  
祖產之在濮者悉推與兩異母弟自置鄆西田輒又分給之皆先

意承志以順承德公也嗚呼內行如君安得不以純孝聞哉君生於某年月日卒於某年月日配羅氏子三人法緯法簡法將以某年月日葬於某阡法緯千里涕泣來請銘銘曰

箕山蒼蒼濮水湯湯回環扁祕君焉永藏千秋萬歲式其閭者必曰純孝之鄉

右墓誌銘王士禎撰

臣等謹將奏摺  
卷一百一十一

十一

侯元斐

君姓侯氏杞人諱元斐字友召人稱之曰兔園先生以辛丑進士  
知湖州德清縣擢中書科中書舍人外艱卒於家卒十有三年其  
子方曾請某爲其墓之銘以藏於廟按狀君高祖諱于趙都察院  
右都御史巡撫山西曾祖諱應瑜以鄉薦知泰安州歷鄖陽知府  
而諱邦甯者其祖諱體異者其父俱邑庠生父 封文林郎德清  
縣知縣君性至孝當明末造寇亂舉家竄徙時年十五常懷乾餼  
供親祖母卒客邸父母同患癘疫君雪涕經營調護流離險艱備  
至久之復歸里郭外皆土寇城中斗米錢二千君日率兩弟採柳  
絮挑菜甲雜糠爲食而父母甘旨未嘗缺未幾 大清兵渡河中

原悉歸附杞始安堵然家中落於是教授鄰邑爲養而以不能時  
奉大父母色笑輒爪其胷胷痕血縷縷不絕見者悲之君生於  
天啟丁卯稍長日誦千言時生計窘封君嗜飲每夜篝燈一君撥  
火執罌侍封君且飲且授君書曰吾與若祖晚年惟視若若不力  
學更誰望乎於是君益刻厲十一歲應童子試不售文爲里中傳  
誦後輾轉他鄉戎馬未嘗廢學年十七補弟子員 鼎革後舉辛卯  
鄉薦辛丑成進士己酉除知德清縣於是始得祿以養乃居官八  
年善政不可勝紀而家無餘資庚戌秋淫雨害稼君籲上官請命  
中丞范公承謨按覈之君力陳請淚應聲落災民數萬號泣動地  
范公歎曰侯君眞民父母也卽令陳救荒策乃條三事以上一曰

信庫金通羅平穀價二日折蠲糧稅免流亡三日輸穀納監以富民養貧民范公一一奏請乃復請發米千石勸民輸米二千石煮粥食饑者又發平價米八千一百石分極貧次貧給符驗羅范公亦發賑米九百二十石凡活九萬二千三十五人於是民困大蘇次年又苦旱君爲文以禱旬日甘露降於禾如漿大雨霑足而壬子蝗災復以全荒請蠲折如庚戌兩年共免四萬餘金糧六千餘石邑人至今頌之范公之撫浙也馭下嚴明不稍貸初覈災傷時守令無敢發一語癸丑君以歲饑復請發米千八百石錢四百萬賑之分守嘉湖道參議某以范公檄稍覈屬吏微服入德清見其給賑寂然無譁饑民悉得實惠去歸白范公公曰吾固廉其賢也



檄他邑爲法而手書勞之其見重如此初德清居霅水上當天目下流設斗門版牘隄塘備瀦洩久不治易浸涸而人丁詭寄俗健訟多盜漕胥汎兵勢族恣奸害君修水道清編審講鄉約嚴保甲革漕弊抑豪強風俗丕變又念賦重民貧課民蠶桑屆期市杭扇數千手書勸農桑字從一二輿隸徧往驗之所至婦子爭出筐以視勞以肩情者薄治之蠶利遂倍於昔當是時君再迎封君及曹孺人就養署中而王父以年高不得往封君孺人至卽旋返君每以不獲事奉拊膺飲泣欲乞休范公督閩去志益決屢請會滇閩叛兩浙所在竊發君募鄉勇修弓矢械礮晝夜訓練太湖寒山賊蜂起剽劫獨不敢入德清界久之以計閒其黨降之餘散去而禁旅

南下供億繁君如期立辨里閤晏然無擾制府武定李公之芳賞  
謂諸將軍曰侯德清真奇才也甲寅夏君大父卒訃聞慟幾絕欲  
歸不得丙辰告休文一月三上遂移中書科中書舍人以歸未抵  
舍封君訃音又至君搶地泣血袖淚朱殷勺水不入口披髮跣行  
數十里號哭入郭門觀者莫不隕涕君數年來積勞成疾至是哀  
毀逾禮遂不起君得年五十二元配李氏 封孺人子二長方曾  
甲子舉人次京曾庠生女三適某某孫四某某君爲人平易不立  
崖岸而正直不可干以私初莅德清徵漕糧吏以例金進杖之去  
散還民間刻石永禁壬子分校浙闈檄未下有以賄請者叱之去  
及居家厚於宗族故舊造福鄉里善難枚舉卒之日無親疏莫不

同聲痛悼公之賢蓋可知矣銘曰

吁嗟侯君孝稱純幼遭閔凶勤且辛雲溪之水流清淪移孝作忠  
何振振殫心乃職瘵乃身毀以滅性成其仁彼蒼不憖遺哲人我  
銘斯石志不泯

右墓誌銘王源撰

楊蘊

君諱蘊字公含號漪青別號空五姓楊氏世爲諸城人元時有以翰林顯者其遠祖也曾祖光采祖于墀皆有隱德父宗儒君其次子也五歲患痞忽一道士造門曰家有患痞兒耶吾能療之太翁抱之出道士摩其腹汨汨作聲良久曰愈矣不受直而去歲壬午大清兵東下居民逃避山海間太翁抱之入東山中道失君所在鐵騎至殺傷無數日暮君自巖隙出語人曰鐵騎未至時兵刃之氣不堪聞故匿去耳年十九舉於鄉辛丑成進士授陝西安定縣知縣安定僻在窮荒一城如斗大居亂山中租賦一千七百餘耳君至一切舊例悉屏之官貧訟簡庭無敲扑晨夕坐聽事吏拱

立左右肅然若學舍君故好神仙術日與族兄水心究心黃白之事其神情澹遠別有所注不可得而窺也安定故出佳石退食後惟轉硯及筆洗而已壬子科分校得牛映奎等皆一時知名士邑舊無登第者君萃諸生於別館督課之文教乃興防弁驕橫白晝撻人於市禁之不少戢君恚甚移文總鎮即日劄革之當是時王輔臣反關中所在郡邑多陷沒土寇吳光大受賊劄約降君偵知聞道趨督撫請兵晝夜疾馳誤墮崖傷兩股道遇邢盧二生昇入其家別館所儲士也閱五月始能起至榆祿謁觀察高君詳申督撫爲題請蒙 旨復任時光大亦敗遁丙辰六月復還安定父老歡迎徧山谷戊午擢內閣中書貧不能自給僑寓故人寄饗殮焉

甲子丁內艱服闋有終焉之志乃芒鞋竹杖野服泛淮陽登虎邱探禹穴會稽諸名勝歸則與石民壺石水心及余爲人外之交時時以孝友助其子弟不與聞戶外事鄉黨化之乙亥二月染痰疾至七月漸劇長君嘉譽妻王氏割股以進君至夜豁然平明喜曰吾病已愈八九矣其妻孺人語之故君驚心慟哭立吐之遂不起以九月初七日卒得年六十君修髯偉幹賦性沖和無疾言遽色雖久在仕籍不以富貴撓心草堂囊牖泊如也子男二人長嘉興次嘉謨女子三人皆爲士人妻乃系之銘曰

君之成名最早而位不踰乎郎官任一邑不爲不久而日用頻涉於飢寒蕭然出塵者其素年僅及下壽而殫嗚呼命也歎不晦者

其心歷千載而與白雲常新者殆其性歟

右墓誌銘李澄中撰

張燕翼

張燕翼字安仲湖北江夏人順治會試乙榜官禮部司務究心理學言動以禮士人奉爲楷模市井稱羨望而知爲從張先生遊嘗有以金見寄者其人已歿訪其孤還之

右述聞謚瑤錄



--	--	--	--	--	--	--	--	--	--

楊兆傑

楊兆傑字又仁湖北江夏人順治間舉人康熙初授大理府推官治獄多所平反擢兵部主事條奏節允費清盜源及請裁提督文武兼制申議楚糧皆練達中機宜安南王黎維禱逐都統莫元清疏寓雲南北傑往諭之初至維禱殊簡傲兆傑引禮切責維禱懼出郊迎

右述聞謨瑤錄



王復衡

嗚呼余誌岸圃先生之墓而深有慨也自昔有大德者不必食厚報享遐齡者不必獲令名而先生兼之世豈復有是人哉謹按先生諱復衡字山公別號岸圃姓王氏本太原之世也自周迄秦而與瑯琊別族東漢彥方公始居太原之祁九世而爲晉北中郎將藍田侯坦之二十世而爲梁征東將軍僧辨游歷唐宋傳代久遠名德相接史不勝書明初有金吾正千戶福二者以佐命功世襲錦衣占籍儀徵垂四百年於茲矣由金吾公而下七世爲文學公諱昆是先生曾王父也王父明經公諱世輪以儒行顯考諱業濟文譽尤優太學生 贈內閣中書始遷於江都先生少穎異好學

早遊庠序聲動一時順治末貢入太學康熙中授內閣中書先生  
第邀 恩例爲親榮不復求仕進家法修整爲一郡所推子孫旣多  
莫不攻苦窮經謹厚制行去時習遠矣而科第森然並起第二子  
誥以進士入翰林督學四川卓有名績官至司經局洗馬兼修撰  
銜得 封如其官先生初無溢色也敦篤內行長姊適車氏夫死  
於兵姊矢節不二先生迎於家事之盡禮年九十餘乃終季姊適  
林浪遊不歸先生亦迎姊且教育其子二十餘年如一日居喪致  
哀歲時祭享必誠必敬年彌高而彌不倦焉尤好施與宗黨中貧  
者周之病者醫療之死者棺斂殯葬之戚友或以孤幼相託者  
先生力爲護持遇患難則以身任之務安全而後已至於修葺祠

廟前嬰救生請中有觸卽行不計其費雖棄產弗恤也儀徵有排  
年里長一事爲民大患且十餘年蓋他邑所倚辦於公者茲獨取  
諸里民名項猥雜科斂橫溢其始治故明里長之號日益而歲新  
之相呼曰五股差徭一曰徵二曰解三曰漕米四曰鳳米皆正供  
也每當其時上自長吏下逮胥史與卓於常額外恣攫貨賄人人  
視爲固有五曰雜派則大兵大役奔命送迎及送柳河工茫無定  
數隨事取足而已計通邑十四里歲出萬五千餘金貪吏喜於自  
肥其或稍知修飭者以備非己作時久勢重非力所及豪強積蠹  
又從而堅持之上官有問則曰民便之也屹如功令不可動搖萬  
姓嗟咨比戶離析先生仁結於心義形於色會海內底定政化翔

治大吏皆以廉能自見於是痛切言之無少顧忌隨牒往復首尾  
五年中間事勢紆曲或巧避其名而陰存其實則申訴益力至於  
再四必得當而後止積弊洗然乃立石縣署之前絕其芽孽到今  
四十餘年省民間金錢近百萬邑之老幼恆對其石而泣下嗟乎  
世風日漓矣登仕路者徒知財利耳孰有優閒林墅從容琴酒而  
有目不測之謗損無限之貲以爲民請命如先主者求之古人豈  
能數數然哉天乃報以遐福得壽八十有六歲康強無疾有子十  
一人孫男三十有四人曾孫男二十有九人五世孫男二人女稱  
是婚嫁莫非望族蓋並世所希有也先生生於故明崇禎庚辰正  
月十八日卒於雍正乙巳十二月十七日以雍正己酉某月某日

與本配盧恭人合葬於某地余久客江南屢遊二邑飽聞先生大德又與先生第三子文範第九子文奎以詩結契今二君不遠二千里請爲先生誌余竊自惟比之蔡中郎之於郭有道反有愧色何者文不足也然不可以已則因狀次述而系之銘曰

總其祖武爲德於鄉復覩彥方子孫盛多邁荀之龍競步江東天豈難謀仁必有後太上不朽大江盤迴永奠斯土以名萬古

右墓誌銘趙執信撰





郭居鼎

郭君居鼎福建海澄人由歲貢歷官戶部郎中幼失怙恃哀慕終其身兄居昌因亂相失跋涉尋求凡二年行數千里遇於贛挈以歸分產共之邑五都海塘決漂室廬亡算捐千金興築邑人立石紀焉雍正初入祀鄉賢

右事略李元度撰



張宸

張宸字青瑀江南華亭人官部郎汪鈍翁序青瑀詩謂其長於臺閣體梅村先生推許之然官不越郎署年不及耄期甚爲惋惜

右 國朝詩別裁集小傳沈德潛撰



禁駟 曹首望

國初掌文衡者閒用舉人出身人員不必皆甲科也康熙二年癸卯兵部主事禁駟充雲南鄉試正主考五年丙午戶部主事曹首望充廣西鄉試正主考皆以拔貢典試尤爲渥典首望兄鼎望是科以刑部員外郎典試湖廣

右紀聞陳康祺撰

按曹公鼎望見是編守令四



卜陳彝

往歲余佐禮部見學校弛廢人材皆窳一切制度文爲闕略未備  
思欲挽近時之弊以興賢育才討論禮制稍復古初佐 聖天子  
文治萬分之一而同志者寡獨同年溧陽王君曰曾爲儀制司郎  
中其爲人清修苦節練習典故爲言某事當罷行司官某不任職  
吏某某舞文當罪具有條理王郎中將遷去秀水卜君由武昌知  
縣入爲儀制司主事清操一如王郎中屬棄皆自操筆如素習者  
吏畏憚不敢犯一日余同太宰陳公直 內廷出日已晡過署更  
衣卜君猶治事不倦陳公歎曰安得此人爲吏部郎及吏部缺浙  
江人君當與選余與同官竇推轂焉而未嘗不重惜其去也君爲



吏部益有聲顧其勞悴愈甚家貧無兼裘每日五鼓趨朝日旰乃返飲食失節驟中寒疾京師乏良醫投藥輒不效逾七旬竟不起歿之日邸舍無斗米百錢余捐兩月俸借其親黨助之始得就殮也君歿之明年爲康熙二十九年春二月余方請告南還孤子彭年扶柩將行以志銘請因據狀志其大略俾刻而藏焉君諱陳彝字聲垓別號簡庵明洪武初始祖居嘉興之北鄉其後析縣爲秀水人曾祖大有嘉靖丁未進士起家無錫知縣歷雲南尋甸知府兄弟三人皆成進士有聲績祖曰謀清流知縣考兆龍 贈文林郎妣伍太安人君早孤太安人督之嚴未冠爲博士弟子事太安人能盡孝順治十七年舉鄉試康熙三年會試中式 賜二甲進

士出身君成進士十年乃謁遷得洛川縣縣爲鄜延邊境正賦不滿萬金以給榆林鎮戍歲餉所徵米粟則給宜君營兵食營去縣百八十里給不以時且多所耗費侵蝕君至則如數先期給發兵將喜過望未一年滇黔叛西陲寇盜蝟起君乃練鄉勇設關險晝夜登瞭巡警邑以無事是年十二月王輔臣叛於甯羌殺經略大臣延安震動明年柳溝將李思膺定邊將朱龍俱叛州縣多失守朱龍叛兵徧洛川君親乞師宜君營將楊某楊先以運米德君乃提兵千人與君偕來有頃賊圍城君登陴拒守而令楊出城奮擊賊夜遁去君與楊約爲兄弟椎牛饗士極歡乃罷是時賊多誘民縛長吏降者獨洛川人喜助君守曰我父母也太安人訃至士民

詣上官請留君涕泣固辭不許墨纒從事者七月及大將軍圖海  
擬定平涼始得請服闋補武昌縣時滇黔未平楚北軍行孔道殫  
心供億如洛川時以其閒爲民請命如免派歸巴運夫腳價二十  
三萬有奇免鐵稅及煙酒雜稅又蠲大兵養馬草束無協濟他郡  
言皆懇切上官感君意悉從其議居武昌八年舉卓異擢禮部余  
素聞君名見除目謂王郎中曰可惜君俸當遷卜主事今來助君  
矣君勤於簿書每一事至司卽日與同官酌議具草事大小無畱  
滯稟性淡泊勵操守一切私餽悉屏不受與人言則藹然和煦不  
欲立崖岸以釣名譽其於堂官極恭謹遇事不可必反覆力爭從  
其言乃已其待余尤厚見余與時齟齬卽悄然懷隱憂余故於君

之死有餘痛焉君年六十有二娶於陳陳卒不再娶子二長卽彭年太學生陳出次彭頤庶子出孫男五孫女一彭年等將以某月日葬於某原銘曰

展如之人云何亡祿以我迂愚致爾頻顛不見世人庸庸後福清修娉節內省無惡秩秩儀部粲粲銓司早入晚出盡瘁於斯廉儉正直其能勿思銘爾德行子孫識之

右墓誌銘徐乾學撰

康熙二十八年冬十一月辛亥奉直大夫吏部驗封清吏司員外郎秀水卜君以疾卒於官年六十有二鄉人交哭於牖下慮無以斂啟其篋無銖兩金錢視其盎無升斗粟發其笥惟朝衣一襲餘

皆以付質庫其空乏如是嗚呼斯可謂廉也已君諱陳彝初名之儀字聲垓別字簡庵曾祖知雲南尋甸府事大有祖知福建清流縣事曰謀考 贈文林郎兆龍妣伍太安人以苦節 詔建坊表閩君少孤奮志於學未冠補秀水縣儒學生員時東南士子各結文社歃血盟誓以攻不附己者雖懿戚密親至互相詬詈君獨集里中善詩者共酬和不樹黨也順治十七年舉省試康熙三年會試中式 賜進士出身十二年除陝西洛川知縣洛川李自成鄉里人多習爲寇君至練鄉民勇者各有長使之守望明年春聞吳三桂反行之益力是年冬王輔臣叛甯羌殺經略莫洛延安震驚又明年春柳溝帥李思鷹殺韓城知縣以叛定邊副將朱龍亦

叛洛川民愈恐君匹馬詣宜君營乞師於參將楊某僅得兵三百  
人賊軍猝至君登陣固守賊以計誘洛川民使縛長吏以降眾皆  
曰我父母也不可城以是獨全未幾丁母憂歸服除補武昌知縣  
凡八年以卓異舉入爲禮部儀制司主事調吏部稽勳司主事遷  
今官娶陳氏先卒 贈安人子二彭年彭頤孫男女六人君卒踰  
旬而彭年適至哀毀盡禮扶君之柩以歸葬於某阡陳安人耐焉  
噫今之號爲廉吏者布衣糞食所識窮乏者力拒之又或訐發人  
贈遺以爲自進之計以寡則不取以多則取之惡在其能廉也君  
口未嘗以廉自矜而能處膏脂不潤或疑其才有所短夫豈然哉  
是嘗率敝劫之民卻方張之寇保彈丸之城而報最於盤錯之地

者也蓋其取與之介正其誼而有所不屑焉吾故特書之表於其墓

右墓表朱彝尊撰

秦敬傳

秦舍人敬傳字公麟六世祖榮江西人服買來京師其後遂爲京師人曾祖神隆慶辛未進士歷官長沙知府仁介有聲祖宗伊明經歷思南府同知父元同博學湛性命之旨負才不遇學者私謚爲簡節先生舍人幼穎異識度不羣性孝友家貧甫弱冠以家計自任拮据甘旨奉親歡聘妹者四兩治親喪悉備禮不以累兄弟爲人倜儻嶽嶽不可羈控勇敢多智略談諧雄辨睥睨一世人有急則毅然出爲排解力護持之死生禍福不稍恤孫某者布政使子舍人妹婿也夙無行與舍人有隙鬪賊陷都城孫爲賊獲索金十萬不得繩其腦孫謬曰吾有金數萬匿內兄秦生所得秦金卽



得時舍人居鄰賊賊果繫舍人舍人至見孫輾轉哀號睛突出寸許遽呼曰渠實有金付我釋渠卽有金賊喜釋之顧舍人曰金安在舍人笑曰安所得金賊怒曰若適言有金誑寸磔矣舍人復笑曰非誑也實有金顧危城中我貧士土垣敗牖數萬金匿何所我蓋受而藏諸百里之外公請釋之去身在過十日無以獻鼎鑊惟公命賊渠共十八人方擁婦人飲酒噴曰此秀才亦邁爽然曰而公烏能待而以十日三日可舍人卽曰三日可賊大喜於是徑縱孫去而與舍人飲酒大醉期三日後納金毋爽舍人歸念計無所出惟罵賊死耳俄道逢一賊從百許人呵而過顧見舍人大呼曰若非秦郎邪今安往視之則故孫氏家奴從賊爲裨將者下馬握

手慰勞舍人泣告以故奴問十八人名曰此妄耳此甚微何得索人金郎君毋恐卽引與見一賊魁請令往縛十八人者悉斬之首繫懸閭門外舍人乃得脫舍人爲文縱橫奇宕灑然新警絕俗名重庠校及鼎革益貧文益高俗人多不識試益不利癸卯始登賢書甲辰成進士丁未授內閣撰文中書舍人而仲子蕃信武會試殿試俱第一舍人以宿學久鬱諸生間一旦登仕籍公卿莫不折節下之子又顯達而舍人篤念故舊坐上貧交不絕待而舉火者數十人有一友獨不至久之聞其僻處委巷中時歲暮懷金訪之巷外屏輿從徒步入叩其門破席障之風凜冽雪凍不可立老嫗出應門蓋友他出嫗友母也舍人歡然入拜母問勞良久出金

爲母壽待其友不至薄暮始返其篤於友義如此子四人俱賢蓄  
信尤英異喜韜鈴射命中嘗適野見角射者立觀之射者見其少  
易之顧曰子能射否荅曰主臣援弓剡注參連無虛發射者大驚  
蓄信笑曰此何足異顧童子偶懷胡桃命取一置標上矢發桃應  
茲碎凡碎數十桃眾投弓羅拜曰君神人也由是名大著而孝義  
有父風授蔚州參將五年聞舍人疾閒行一日夜馳四百里歸省  
侍湯藥未幾舍人卒舍人初負用世之才人皆望其大用舍人亦  
自負乃官不足以展其才不數載竟鬱鬱以疾終識者惜之初舍  
人六世祖與妻楊氏奉母來京師旋卒赤貧楊至孝苦節抱幼子  
磨麥操作以養姑嘗以雪頰面倍極艱苦撫子成立名祿卽舍人

高祖而其後乃益繁昌人以爲秦氏之興蓋有自云

王源曰舍人與予兄汲公爲忘年交予方五六歲舍人數至于家談讌竟日夕滿引長歌悲嘯其丰神至今猶記憶之以舍人之才眞所謂豪傑之士也而不竟其用惜哉庚辰予寓秦氏古藤書屋舍人之子若孫出其狀誌請予立傳而以予所聞舍人軼事皆狀誌所未詳者然則舍人之生平固未盡也况其生平之未見於行事者乎

右傳王源撰



錢芳標

錢芳標字棣齋江南華亭人康熙丙午舉於鄉官中書舍人雲間詩派陳黃門後以古淡整飭爲宗舍人綺麗而不佻駘宕而有則詩格又爲一變矣

右 國朝詩別裁集小傳沈德潛撰



仕辰旦

任公名辰旦字千之待庵其號也世蕭山人幼奇慧與同邑毛奇齡王先吉韓日昌學同師稱四傑俱以文名而公才行高出諸人右順治丁酉舉於鄉從外氏籍曰韓燦丁未成進士復今姓名丙辰除江南上海縣知縣縣故稱難治當吳淞之委負海多豪猾戶十餘萬歲租不下四十萬漕復半之前令九人皆累繫獄公至勤聽斷自奉儉約如諸生視百姓如家人子弟催科以時不大用鞭扑百姓感其仁輸將恐後新令撤海濱防軍公慮其乘閒至剽民財也密請將軍行期故邀軍主歡飲宣言期須稍緩次日將軍忽下令促卽行公厚具牛酒道上勞軍軍毋敢遷延他顧居民帖然



黃龍浦爲吳淞巨口營建閘屢圯兩岸築塘費不貲工訖不就公  
做浙之爲梁者命匠先範石於陸連比若長隄第其次入水募善  
泅者暗記累水中悉合矩度於陸廣左右護隄東水就閘水不橫  
溢閘始固公性稍迂月必書所行事告城隍神有疑獄嘗占夢剖  
決發姦摘伏民驚爲神公政聲日著當遷督撫以公擅文名舉應  
博學鴻儒報罷歸故職乃破例不論逋賦以劇縣良吏特薦 聖  
祖可之行取入都癸亥補工科給事中公感 知遇連上五疏請酌  
蘇松賦額以遂民生預籌經費以貽良法慣用人以肅紀綱覈廉  
貪以飭吏治酌藩司護印以重憲職言皆切直遷兵科掌印甲子  
典湖廣鄉試時稱得人丙寅內轉改大理寺丞丁內艱歸遂不出

年七十卒於家有介和堂集行世又所著言近錄一卷門人湘潭陳鵬年爲公典試時所得士傳其學初公與毛奇齡齊名奇齡文學冠海內於士友少與可獨敬公作上海縣集課記自翰林歸蕭山又爲公作行狀謂公生平才行不愧古人云子孫皆能世其家孫元文以進士教授嘉興與余善

右傳齊召南撰

康熙三十一年十月一日原任大理寺寺丞任君卒於家距生明天啟三年五月廿日年七十矣子與君同年生俗例年七十遇生辰親朋攜酒榼相饌謂之賀壽君久厭俗例避不納且囑子踵其事子方避賀間會同邑周先生爲子同館前進以通政使司通政

使死受 朝祭子歸渡作行擯便過君而君已病癰五日坐起握子手於牀備訊子行禮狀言詞慷慨據案接穀核一如常時又五日而訃音至承重榮登等搢踊哭拜使西渡乞狀謂登等昏迷不能出一言且棘遠無記憶卽記憶亦不具先生先大夫良友同生同里閉同學同官於 朝又同時歸田其知先大夫莫先生若也古有狀以良友者先生忍不出一言爲先大夫狀子聞之哭於寓亭遂索筆拭淚稍述其槩君諱辰旦字待庵世居蕭山東門外近祖元禮當元明之際豁達有大志嘗破產任俠結天下豪士天下豪士爭歸之會青田劉基以行軍參謀受浙江行省左丞鐵里帖木爾之聘征海喪師乃奉其母遁蕭山而自投劾去遂與元禮訂

刎頸交一時名賢陰以舍養來從游者如東陽王禕河東張翥西  
江揭傒斯東嘉高明臨川危太樸皆前後相過及高帝龍興始幡  
然退耕於野辭諸路辟召散其財以濟難民難民稱之爲長者任  
氏長者任氏凡八傳而君生君父贈公生四子君其長也幼慧與  
子並總羈就里門學學師令角讀出漢賈生治安疏讀之各五過  
各不誤一字中書舍人王先吉舉人韓日昌嘗偕君與子同受書  
於子伯兄仁和教諭東壺公公每坐講必左右視曰此四傑也會  
國變江東民徒合方馬軍抗王師君族人有封爵於軍者與子家  
保定伯合武甯侯王君軍西陵君嘗與子詣行間覘事必敗去之  
君父贈公已破產從西陵歸貧且死而君竄馬谷與子所匿坑相

近顧道梗不能從賴 王師東渡得歸里乃從故明諸生籍應試順  
治丁酉以第四人舉於鄉先是君母韓太君以君 封孺人待贈  
恭人者吉安推官韓公女也君以外氏籍名韓燦附紹興學至是  
以韓燦名謁公車門值 朝議改八比取士易策論丁未會試以  
策論中式 殿試成進士遂奉 旨復姓改今名授江南松江府  
上海縣知縣上海故難治戶甲十萬歲所入田丁租稅不下四十  
萬而漕復半之民田產木棉不給漕粟每賣棉買粟以填漕舟其  
在冬及春凡四閱月棉梗未釋土而漕舟二百餘遮浦而下其帖  
追簿比如疊浪之發而君調以意不緩不迫絕追比諸費加以喫  
咻民雖苦輸將而不至於困值新令撤海濱防軍慮軍發時必乘

間剝民財君密請將軍預懷令符之趨行者故邀軍主飲請展其  
期次日忽下令促之行且盛具牛酒以勞前軍軍乃拮鐮釜帳棧  
及馬匹械杖不給毋敢遷延他顧者吳淞江者禹貢三江之一也  
受具區之水而下注於海關則溢涌多水患前此中丞馬君行省  
幕君以疏潛入請而可之且復建牖於黃龍浦口以啟以閉而牖  
成而圯屢矣君力任修築謀於邑之曉事者皆云修必盛冬伺水  
稍卑減急築兩塘辱其中乾之然後量楨石而加累採焉然而用  
稍若干用木石若干斟酌之爲塘然後用牛車若干桔槔若干夫領  
夫役若干既窳若干伍伯督視與差押監課若干然且互寒無幾  
時春水將至儻度臘不就則前工盡隳從來建牖其坐糜金錢而

率無成以是也君乃倣浙之爲梁者命匠先範石於陸第其甲乙  
牝牡之而以次入水然後募善泅者暗理石而累堞其中一如陸  
地所範者短長合窾不築塘不戽水不下箝榭傍作剡柱而上覆  
之以橫梁且壘石作埂鱗布牖下如階級然廣左右護隄而約束  
就牖使水無橫溢而又善下其經畫若此君初到日以廉稱身衣  
木棉履疏履棧馬不食豆日買米二百錢屋腐不葺臺使嘉其廉  
將薦之至是服其多才能且富經術會 天子右文設制科招天  
下有學之士使彙送於公車門擇俟 親試名爲博學鴻儒科臺  
使以君薦入京 賜宴於體仁閣下呈卷而忽以數限復故官臺  
使乃特破例請謂是官清廉有治行徒以蘇松多逋賦例不令薦

則是劇縣無遷官矣夫循例而薦者庸人也破常格而使進用者  
良吏也臣竊謂逋賦可償良吏不可失疏入 上遽可其請不循  
例乃 召取以科員用康熙癸亥授工科給事中當是時君深感  
聖恩思竭蹶報稱而無所恃意者身爲言官惟盡其言職卽足  
當矢效之地乃連上五疏言過急切 上嘉其梗直優容之大抵  
君以廉進本破格而君謂獎廉者當用爲例又身苦繁賦親見蘇  
松租額溢於他郡思欲爲比較使江南諸郡地力戶口勢相倣者  
稍爲均一又當爲縣時苦軍興之費無可設法遂謂設法非長策  
其云覈廉貪酌賦則籌經費皆其平時所欲告而勢不能者會  
天子神聖功成治定念四海遼闊撫字者幾三十年而不一周知



其地則綏要四訖何自通浹因用廷臣言先省南服而不設掌較不具扈壘不辦宮城柱極及壇壝禮覲儀仗不譙訶民眾此眞王通所云虞舜一歲巡五嶽而國不費民不勞者子時備史職因撰司賓荅問辭一破俗儒拘牽之見而君過忠愛有所指陳於上  
前 上復容之既遷兵科掌印給事中會甲子賓興 欽點湖廣正主考得解士宋如辰等六十三人先是君任上海時值丁巳鄉試司使辟君爲房官其所拔解若今省中劉國黻等皆名士至主文亦如之丙寅內轉改授大理寺寺丞方謀省觀而太夫人遽謝世遂奔喪歸湖撫張君以事敗其爲副使時曾分守吾浙有能名故當廷推詢保薦於諸鄉間而君應曰善至是以牽誤削籍嘗讀

君疏有請酌裁兵利弊者其略謂兵冗奉裁得以覈實數而杜虛糜載戢載囊豈不甚善然而裁不盡散散不盡插皆足爲害夫遁遙河上固屬可虞乃以游手之人而一旦使失其職飢寒切膚務爲攻剽此其所係匪細事也向者屯田汝蔡既有成說今拋荒之土所在都有請查官兵若有裁而未散散而未插者著督撫察明檄行有司撥給荒田資以牛種俾之耕墾三年以後償還所給六年起科賣刀買犢皆爲良農不兩利乎又有請酌藩司護印者其略謂督撫均封疆重臣其體統同故督撫員缺可互相護印若有撫無督其應用何官署理須奉 旨定奪以明鄭重近巡撫偶缺藩司遽自取印符升堂排闥甚非體也夫藩司雖應升巡撫之官

然不得升本省巡撫者所以防其彌縫任內事也其所管錢糧及  
謬妄事體平時皆申詳巡撫方得施行今一旦縮巡撫之篆申詳  
之官卽允詳之官可乎且藩司與屬吏較爲親切因緣甚便萬一  
乘勢市恩與逞威脅眾將行私叢弊無所不至矣今竊計各省惟  
直隸山東山西河南四處無總督耳其有總督者雖道里遼遠不  
難兼攝若山東河南或照前部議令總河帶管至直隸山西則見  
有長蘆河東御史可權宜也其經畫明哲且諳於大體如此君性  
孝友而峻於遇物不屑屑言貌其視親串情甚摯而外近落落且  
有不假以色者以故愛者多卽嫉者亦不少少以文名自通籍後  
卽殫思吏治不暇及卽偶及之亦棄去所著詩文有介和堂集各

一卷君嘗入東華執子手曰子與王內史及君四人同受書於東  
壺先生之門三人皆通籍而韓君亦領解此盛事也今韓君先死  
內史猶家食惟子與君各登朝而予主封駁君以善文職詞翰  
可謂相副然兩君何如矣子嘗聞其言傷之今子年七十內史王  
君亦厭世卽子邑京朝官一時共事惟君與周先生及子三人而  
兩年之間兩人皆先我而逝獨煢煢一老猶黯然搦筆而爲之狀  
悲可知已君父某以贈如君官母韓太君封孺人初娶蔡繼  
丁卽子友大聲君女也大聲與君爲忘年交旣而愛其才妻之以  
女曰樂廣衛玠未嘗非友也子六華衡恆岱崧海華早卒以其子  
榮登承重卽拜使乞子狀者孫六長卽榮登次崙介和葵寰女二

女孫七諸所娶所嫁所聘所許嫁皆名族

右事狀毛奇齡撰

任千之名辰旦浙江蕭山人順治十三年進士康熙初授上海知縣清苦自厲敏於聽斷月必書所行事告城隍神有疑獄禱於神神輒以夢告以意推驗悉得實民家失火方大風千之至拜伏泥中祝曰天欲吾長是方耶請滅火不然吾有謝去耳頃之風愈盛而火遽息異時縣徵漕追逮鬻鬣敲扑無虛日千之削木爲版有應速者書其姓名使都亭長召之卽應期至於是爭先輸納嘗詣倉隸人曳筮者徒手至呼之則寄筮中塗酒家知其不常用也吳淞江黃龍浦爲入海要道去浦口三里先建閘資蓄洩尋圮巡撫

慕公檄縣修治故事修閘必築壩竭水費不啻千之募浙匠做浙地爲梁法度基廣狹約丈尺伐石識石甲乙下之水使善洄者屑之悉中程卽故址疊石爲門廣左右護隄東水就閘十月而工成民不病役上海沒水田六千餘畝賦額未除輸者率破家前官履勘虛實貿亂至是以慕公請得旨覆勘于之喜曰是吾志也日往來泥沙中蓬首垢足按魚鱗舊冊履畝量釐其荒者閱二月悉白費皆自辦俸不足出銀釧棉布償之籍上得減除額徵有差康熙十八年舉博學鴻儒放還故官復以良吏薦入爲工科給事中論事切直改大理寺丞丁母憂歸以前廷推事註誤落職老於家

右述彭紹升撰

按是篇述任公甲科謨當從傳狀

康熙間三逆削平 詔以詞臣曹禾請封禪疏付廷議時張文貞  
相國秉筆徑請停止蕭山任寺丞干之方官六科亦上言封禪僅  
見司馬相如書不足慕效又云巡狩載虞典古諸侯各均其國天  
子巡所守以協同議禮制度今天下一家巡狩之禮亦可不舉

右紀聞陳康祺撰

汪懋麟

汪懋麟江蘇江都人與汪楫同有詩名時稱二汪康熙六年進士授內閣中書尋薦舉博學鴻儒科以持服不與試服闋以主事候補左都御史徐乾學復薦懋麟遂以刑部主事入史館充纂修官討論嚴密撰述最多懋麟學持正而才通敏其爲中書時楚人朱方旦挾邪說傾動公卿懋麟獨作辨道論詆之學士熊賜履見其文與之定交及居刑曹勤於職事聽斷矜慎雖強禦不顧也城南武某以一車一馬販米於南花園宿董之貴家之貴利其貲殺之以車載屍鞭馬曳之他去武父得屍於道得車馬於劉氏之門訟諸官謂劉殺其子懋麟曰殺人而置其車馬於門非理也乃微行



縱其馬馬至之貴門駭躍悲鳴衝戶以入懋麟收之貴訊鞫得實  
寘於法其發奸摘伏率此類旋罷歸銑關謝賓客晝治經夜讀史  
日有程課銳意成一家言甫三年遽以疾卒著有百尺梧桐閣集  
二十六卷

右 國史館本傳

嗚呼天之子人才能果將推其餘以被之天下乎抑扞塞屯閉之  
以使不得用其遂已乎 國家之以爵祿官人固將亨其道以利  
濟生人乎抑姑試之而姑已之使不免於憂患戚嗟而終於無所  
成乎若吾友汪君季角之生也其稟於天也良厚而又嘗以其所  
學應有司之求連舉於禮部矣然年僅四十有九位至於郎署其

施也不廣其志也未竟計其生平之所得獨其名在耳則夫名也者非夫人之所以自窮而以文辭得名者尤其所以窮之具乎以天之賦君之厚 國家之知君者亦不可謂晚而其所以傳君者止此則意者文辭之工尤人之所不易得君之豐於此而嗇於彼非不幸也嗚呼是足以銘君也已汪氏其系新安數遷渡江爲揚州人曾祖諱某祖諱某至父某生子五人君行第五君之好古文辭也自其離成童時已篤志經史康熙二年鄉試中式又四年成進士得釋去舉子業考授內閣中書年少也職閒無事益發憤讀書常攜筆硯就閣中校讐或月夜循殿階行吟誦聲聞直廬爲文藝王荆公得其峭潔而君之所自許也於詩尤得力始嘗出入於

漢魏六朝以及唐人猶爲未足以盡風雅之變乃合杜韓蘇陸四家詩爲一集及宋諸家詩無不研鍊揣摩疲精力於斯余嘗駁之宋詩第博其旨趣足矣不足學君執其說益堅子亦不能難也然君詩自取材於經史其於宋人所見爲佻巧傷雅俚率無蘊藉者君洮滌揀汰率變其體格而新之他人學之者不能及也君文之最有名於時者爲辨道論是時妖人朱方旦被逮至京旋出獄妄爲人言禍福走者如鶩君辨之略曰 國家幸太平無事得此輩以資談諧玩弄足矣今傳者崇奉太過或謂孔氏復生或謂大禹再見甚謂移檄玉皇則祈雨立應不惟上侮聖人亦且獲罪天地此亦士大夫之過也且京師奸邪雜處易於動搖萬一 朝廷震

怒問以妖言惑眾之罪吾不知山人安所逃死文出吾師孝感熊  
公掌翰林聞之卽往訪其邸與之定交而返君爲中書三年請終  
養在道聞母喪已復丁外艱服未闋適 朝廷詔中外舉博學鴻  
儒薦者以公名上不果試己未舍弟起監修明史所特薦纂修者  
七人君與焉君在館討論嚴密撰述最多旣補刑部江西司主事  
兼管纂修君雖好學如不及特盡心於吏事有武某者以一車一  
馬販米南花園宿於董之貴家董殺而取之貴明日載屍車上鞭  
馬縱之去至劉氏門止焉其父謂劉殺其子也訴之坊吏鍛鍊成  
上於部君視之曰劉殺人而以車馬置諸門乎白尙書請緩獄三  
日自步行南城外縱所獲馬馬至之貴門跳躍悲鳴直奔入其庭

中則所載米囊猶存也一訊而服海戶某故兇悍王氏兄弟五人與鬪懼不勝拉殺其病弟誣之罪人皆以其素兇也信之君庶間鄰人既得實有二人稱親王使者來取囚曰王輿夫也君曰是犯國法宜死卽王輿夫當啟奏二人懼而逸去時尙書蔚州魏公器重君卽君所定彙輒不復議雖天子亦知之屢訊其名一日出金箋命侍臣能書者書唐詩進擇其工者爲屏風君書在二十四幅選中眾且謂不日當召見改官侍從忽有以蜚語陷君者中旨問九卿皆睥眄不知罪狀所擬坐且不測幸天子寬仁詔下奪官而已君歸後杜門不入州府日坐其所謂十二研齋者朝課經夜課史將沛然大發之於文所作史論甚夥暇則布袍

芒屨散步田野閒從里老談話終不及世事然其抑齋無聊之衷  
遇物輒觸往往見之歌詩旣而悔之猶不能自禁至其所鬱而未  
發者人不得而知也以是竟夭其天年以康熙二十七年四月十  
八日卒君諱懋麟別號蛟門季角其字性剛激不能阿邑流俗人  
遇知己傾肝腑向之盡切磋之道孝於二親太公得君最遲及見  
其貴奉養至九十三云與兄叔定少同學友愛尤篤叔定流涕爲  
余道其臨沒口占二絕句其一云惡夢虛名久未閒孤雲倦鳥乍  
還山半生心事無多事只在儒臣法吏閒蓋君充纂修未授史職  
爲吏西曹非其好其齋志以沒而情見乎詞如此聞者無不悲之  
君所著百尺梧桐集八卷詩十六卷詩餘一卷行世旣死叔定又

集其遺彙十餘卷藏於家配張氏子一兼女八一適進士程文正  
一適胡期恆方伯存仁子也餘皆許字士族君既沒而方伯莅吳  
經紀其後事間兼曾聘某氏否曰未也卽流涕以少女許之兼之  
以狀謁予銘也僅數歲嶮然衰經對余哭泣執禮如成人君之所  
詒庶其在此銘曰

君昔權厝在平山堂左攀文正右挹歐陽二公峩峩與爲頡頏有  
封若斧卜爾永藏生鬱不舒沒吐其芒魂兮其歸往來蜀岡

右墓誌銘徐乾學撰

君汪氏諱懋麟字季用後更號蛟門故蛟門之名獨著其先徽產  
越國公裔也繼徙浙徙揚遂著籍江都曾祖某祖某父諱如江年

逾大耋以齒德重鄉里有五男子君次第五幼穎異殊常兒與兄  
耀麟同受經長安王巖築夫之門築夫宿儒工古文通經學君得  
其指授爲多順治庚子辛丑間予爲揚州李官識君儔人中補諸  
生康熙二年舉鄉試又四年成進士與同年生陳蔚明玉璫沈康  
臣詹范顏修來光敏齊名都下公卿倒屣迎致之以推擇爲內閣  
中書舍人君固嗜書每入直襖被外攜書卷自隨公事畢輒鉛槧  
雜誦或行吟陞楯閒丙夜不輟由是學日益博詩文日益有名居  
三年繼丁內外艱居喪盡禮戊午天子思得鴻博之儒備顧問  
於是兵部尙書宛平王公工部尙書海甯陳公交章論薦君以未  
終制力辭服闋需次部主事會左都御史崑山徐公復以君名與



李公清曹公溶黃君虞稷同薦於朝先是己未鴻博之舉選入翰林者五十人至是李曹二公辭不至君僅以主事入史館充纂修官著史傳若干篇補崇禎實錄又若干卷時人稱之尋補刑部仍直史館君才通敏不敢託史事自佚聽斷矜慎雖強禦不顧也南城武某以一車一馬販米於南花園宿董之貴家董利其費殺之夜以車載尸鞭馬曳之他去武父得尸於道得車馬於劉氏之門訟之官謂劉殺其子君曰殺人而置其車馬於門非理也乃微行南城外縱其馬馬至之貴門輒跳躍悲鳴衝戶以入君卽令收之訊得竄賣之貴於法劉得釋都人爲作馬訟圖賦詩張之王某兄弟五人與海戶鬪自殺其病弟而訟海戶於官君微行察之其

鄰曰鬪則有之殺人則未也至王某門其家籠鵝忽羣鳴延頸如有所訴君立逮弟妻訊之具以告某遂自伏既具獄忽二人稱親王使者直前謂某隸籍府中君怒曰吾爲刑官爲朝廷守法耳必索之當奏聞二人者氣奪去其奉公守法皆此類也君既負文望在西曹又能於其官爲尙書蔚州魏公所器當宁亦知其名一日禁中出宣德紙百幅命翰詹諸臣及羣僚書進擇其尤者廿四幅爲御屏君書與焉人謂且晚且進用亡何罷歸初君爲舍人楚人朱方且挾其術遊公卿間惑其說者至擬諸大禹孔子君獨作辨道論詆之以爲妖妄學士孝感熊公見其文造虛定交焉君詩才票姚跌蕩其師法在退之子贍兩家而時出新意

古文尤喜王介甫晚歲為文章隋刻近之君稱詩蓋下與今刑部  
侍郎田公綸霞今巡撫都御史宋公牧仲前國子祭酒曹君頌嘉  
湖廣按察使丁君澹汝故給事中王君幼華吏部郎中顏君修來  
工部主事葉君井叔今禮部郎中曹君升六刑部郎中謝君千仞  
相唱和時號十子歸田後鍵戶謝賓客盡治經夜讀史日有程課  
將銳志誓述成一家之書而惜其遽病以死也歐陽文忠平山堂  
傳數百年毀為浮屠之居君言於太守金君力修復之前堂後閣  
上祀歐公其下雜植花竹梧桐楊柳前賢遺蹟一朝而復其風流  
好事如此越國之後多家於揚舊無專祠君鳩其族搆越國公祠  
而以開國公配歲時饗祀合族於此人謂君知禮意焉君篤師友

好獎引後進爲立名譽如今翰林編修顧君圖河吉士史君申義  
皆是也旣得疾彌留令洗硯磨墨嗅之復令烹佳茗以進自謂香  
沁心骨口占二絕句云云大笑呼奇絕而逝實康熙二十七年四  
月十一日也年止五十所著詩文集合二十四卷行於世一子曰  
業

漁洋山人曰予居揚州得汪生眾人中時弱冠耳與其論詩家流  
別甚晰生嘗戲謂王門弟子升堂者眾矣至於入室或難其人懋  
麟未敢多讓其序子詩歷舉漢儒說詩四家授受源流而願居鄭  
康成謝曼卿之列其重師傳若此子愧不能當也嗚呼君之名固  
已顯於天下矣使其不死當必有進於是者而君竟已矣悲夫

右傳王士禎撰

懋麟成康熙六年進士授內閣中書楚人朱方旦恃邪說傾動公卿懋麟獨著辨道論力詆其妄後再論薦以刑部主事入史館充纂修官討論嚴密所撰述最多吏才允通敏城南武某以一車一馬販米於南花園宿董之貴家之貴利其貨殺之以車載尸鞭馬曳之他去武父得尸於道得車馬於劉氏之門訟諸官謂劉殺其子懋麟曰殺人而置其車馬於門非理也乃微行縱其馬至之貴門跳躍悲鳴衝戶以入懋麟卽令收之貴訊鞫得實寘於法其發奸摘伏率此類一時驚以爲神旋坐事罷歸鍵關謝賓客晝治經夜讀史日有程課銳意成一家言甫三年遽以疾卒懋麟性孝友

文詞峭刻摹王安石詩法韓愈蘇軾時出新意在都門與德州田  
雲商邱宋犖等相倡和號十子受業於新城王士禎而才氣縱橫  
視士禎爲別格益都趙執信與士禎不合嘗譏懋麟欲借以攻士  
禎然懋麟詩頗少剪裁執信所言亦正中其病也

右傳朱琿撰

汪懋麟江都人字季角後更號蛟門故蛟門之名獨著自成童時  
已篤志經史旣釋褐推擇內閣中書年少職閒乃益肆力於詩古  
文詞峭刻豪宕一掃公家言歲戊午膺博學鴻儒舉以未終制力  
辭久之再論薦乃以刑部主事充纂修官討論嚴密所撰著最多  
吏才尤明敏發奸摘伏一時驚以爲神一日禁中出宮箋百幅

命羣僚書擇其尤者二十四幅供御屏用蛟門與焉眾謂旦  
晚當召見且改官無何竟坐事罷歸歸三年遽以疾卒其臨歿絕  
句云惡夢虛名久未閒孤雲倦鳥乍還山半生心事無多事祇在  
儒臣法吏閒蓋君充繁修未授職官西曹雅非所好而又未竟其  
用彌留嗷嗷誠心憤乎其言之也爲文慕王荆國而其所研鍊揣  
摩也於詩尤自喜嘗大會名士於都城之祝氏園酒半揚觴言欲  
盡祧開元大庠諸家獨尊少陵爲鼻祖而昌黎眉山劍南而下以  
次昭穆語悉數未可終崑山徐健庵先生獨抗論與爭謂宋詩頽  
放無蘊藉不足學學之必損風格君子一言以爲知奈何用偏詞  
取快一時辨難誼叟林烏皆拍拍驚起輸攻墨守未審誰雌雄也

然蛟門之贈徐詩固云走也肆狂縱蘇陸閒披瀉對君慚冠裳短  
衣不掩髀往往奉良誨磨治到磔瓦豈非士各有志固不冑帆隨  
湘轉人云亦云而服善虛懷未嘗不渙然冰釋而怡然理順也輕  
材淺夫又何足以語此

右小傳鄭方坤撰



臣等謹將... 奏

三

陳玉瑾

王暉今世說稱玉瑾每讀書至夜分兩眸欲合輒用艾灼臂蓋亦苦學之士又稱其爲詩文旬日之間動至盈尺則貪多務博可知

右四庫提要張維屏錄

按陳公字廣明號椒峯康熙六年進士官中書舍人有學文堂集



陳宗石

陳宗石字子萬世居宜興祖子廷爲東林名宿父貞慧清標峻節  
又爲復社巨魁值鉤黨之餘家道中落宗石年甫十四入贅商邱  
侯氏遂家焉故自號寓國少尙氣節好任俠有一代信陵之目與  
伯兄維崧才名相埒遊太學一時名公卿皆折節下交合肥龔尙  
書贈詩有秦川公子飄零其三尺龍泉未遇時徐東海則有與君  
傾蓋爲兄弟欲買黃金鑄信陵之句以是時名益振願連試不遇  
援例選黎城丞當王征不庭轉餉數萬崎嶇數千里兼程護行先  
時以達論功擢安平縣知縣以文學飾吏治豪右屏跡而心勞撫  
字至有老嫗攜穉躋堂願一識好官面者時湯斌巡撫江南嘗舉

以厲下曰爲官若陳安平可謂三不負矣旋擢戶部主事相國方  
倚爲重逾年假歸刊先集課子讀書子二履中履平皆登仕籍有  
賢聲

右傳查岐昌撰

國朝耆獻類徵初編卷百四十一補錄

郎署三

陶之典

陶之典字五徽湖南甯鄉人明翰林院待詔汝簡子順治辛丑拔貢授安親王府教習擢內閣中書性沖淡動履端方工詩古文耄猶好學兼精醫術著有冠松巖集子二烜字奉長以廩生入太學考授州同充王府教習慷慨負大志見義勇爲熅字天石康熙中拔貢授教諭不就兄弟皆工詩時有二難之譽

右傳李元度撰

三才圖會卷之十一

--	--	--	--	--	--	--	--	--	--

國朝耆獻類徵初編卷百四十一補錄

郎署三

劉迪

劉迪字梅潭，閩中人。康熙丁未進士官吏部郎中。梅潭以丁卯科主浙闈試，得於潛名士伍涵芬作解首士論，翕然

右。國朝全蜀詩鈔小傳，孫桐生撰。



四  
十  
月  
多  
不  
天  
氣  
四  
十  
一  
日

國朝耆獻類徵初編卷百四十二目錄

郎署四

顏光敏

何觀

朱軫裔

簡斑

胡正笏

白夢龍

陳瑄

顧貞觀

王詔

陳時臨

施端教

李來章

顧鐔

郭遇熙

房嵩

周綸

楊汝楫

靳弼

唐崇勳

馮廷樞

崔甲默

孫淦

邊修

施燾  
黃天球

孔尙任

施何牧

國朝耆獻類徵初編卷百四十二郎署四目錄

黎大觀

楊國聲

章欽允

謝重輝

宋元徵

汪森 曾孫孟錫

張丙厚

鄒世任

譚尙箴 韓楷

宋聚業

補錄

孔尙任

弟尙勉

國朝耆獻類徵初編卷百四十二

通奉大夫前署江西巡撫江西布政使司布政使湘陰李桓輯

耶署四

顏光敏

顏氏望曲阜自路回父子事孔子孔子弟子受業身通者七十有  
七人顏居其八回雖天其子孫特蕃由漢迄今多以忠孝文學著  
路傳六十六世曰胤紹崇禎中知河閒府事城破自焚其子伯璟  
鄉人私諡孝靖先生彝尊嘗表其墓者也伯璟娶朱氏鎮國中尉  
某之女兗州破日爲邏卒所驅以刃劫之不前及刃擊臂臂折罵  
不已乃殺之牆下歷四日復活君朱出也生崇禎十三年正月甫

三歲亦陷亂軍中乳母孫抱之得出九齡工行草書十三嫺詩賦  
旋補四氏學生員以副榜入國子監康熙二年舉鄉試六年成進  
士除國史院中書舍人會 天子幸太學加恩四氏子弟之仕於  
朝者遷君禮部儀制清吏司主事明年充會試同考官出監督龍  
江關稅既還京師尋調吏部稽勳清吏司主事奔父喪歸服除補  
驗封清吏司主事加一級歷本司員外郎遷驗封司郎中 封奉  
政大夫未幾轉考功司郎中充一統志纂修官康熙二十五年九  
月晦以疾卒年止四十有七君長身廣頰早慧好讀書折衷羣儒  
言自出新義其於大學章句持論尤蘄蘄詩媿漢魏南北朝唐宋  
元明諸家之長有集若干卷又述音正音變訓蒙文釋家訓若干

卷獨不信浮屠星命之說嘗曰軀體猶炭也神氣火也火傳於炭然後能爲功願其勢漸消而不可止則生氣之鼓盪也夫炭當風則易燼扇之則立燼置之密室覆以灰則後燼要未有不燼者然則謂人可長生者妄也謂死有時不可先不可後者亦妄也君子以爲篤論雅善鼓琴精騎射蹋鞠旁通句股訣尤耽山水西登太華循伊闕南浮江淮觀濤錢塘沂三衢凡所游歷必命畫手爲圖得金石文恆懸之屋壁性孝友勤於睦族居鄉以禮讓人立朝遇政事侃侃不阿有一善未嘗自矜也君諱光敏字遜甫更字修來別字樂圃妻孔氏 封宜人子肇雍國子監生女子四人俱配士族君卒之明年肇雍以君之喪歸卜葬於曲阜將發叩舞尊之門

杖苴請銘彝尊與君交二十年矣君之葬銘何敢辭系曰  
生乎陋巷之里歿乎宣武之坊葬乎侍郎之林祭乎復聖之堂年  
逾強仕不爲天也秩以大夫不爲小也吾銘君藏久而有考也

右墓誌銘朱彝尊撰

顏光敏字修來別字樂圃曲阜人爲復聖夫子之裔孫祖胤紹崇  
禎中知河間府城破自焚樂圃甫三歲亦陷亂軍中乳母抱之得  
出九齡工行草書十三嫺詞賦旣連取科第官近侍旋自儀部擢  
銓曹願銳意著述激揚風雅思成一家言以抗衡於韞退荔裳西  
樵阮亭諸公之間曹升六舍人田子綸戶部寶左右之東國風流  
霑句海內今所傳長安十子詩者是已新城公嘗語人曰吾鄉邇

來英絕當讓此人獨步致詞殊鄭重惜乎驥足初騁而飛光忽道  
年甫四十七而玉折蘭摧以死也不然使天而假之十年或二十年  
出新意於法度之中寄妙理於豪放之外其格律計益大進則當  
漁洋鷹揚虎視之秋以彼其才縱未克鞭策羣雄主盟中夏亦豈  
肯低心下首以千里而畏人哉樂圃善鼓琴精騎射蹋鞠旁通句  
股訣尤耽山水獨不信浮屠星命之說嘗曰軀體猶炭也神氣猶  
火也火傳於炭然後能爲功顯其勢漸消而不可止夫炭當風則  
易燼扇之則立燼置之密室覆以灰則後燼要未有不燼者然則  
謂人可長生者妄也謂死有時不可先不可後者亦妄也君子服  
其篇論樂圃詩無專刻予從十子詩略中鈔若干首五言原本三



謝七古在李頎杜甫之間近體秀逸深厚出入錢劉計甫草謂以此鼓吹休明卽孔顏世室中之樂府琴瑟也當時咸以爲知言云

右小傳鄭方坤撰

何覲

何覲山東曹州人康熙丁未進士年十二父死兵難覲哀憤欲自縊門客勸以宗嗣大義且母在乃扶櫬奉母歸里于戈搶攘中色養備至官至內閣中書舍人

右述聞謹瑤錄

國朝文獻通考卷之...

四

朱軫裔

晉太沖左氏蜀都賦曰江漢炳靈世載其英繁古瑰璋卓犖之士  
多產於坤維 國家聲教遐宣才彥淬發時則有若遂甯張文端  
公以訐謨亮節胡贊瀆熙爰暨大司空李公之質貌偉量少司馬  
李公之華貫膚使胥號兩川四路望迺若用循良懋績克配卿宰  
而可以編列華陽之志成都之正續丙丁古今載記者爲嘉定南  
城兵馬司指揮使待贈太常寺少卿洛山朱公公以康熙己卯卒  
於邯鄲之旅舍寔嘉定己山之阡又十有五年癸巳而誥嗣知彭  
澤縣映蓀今太常寺少卿曙蓀胥舉於鄉曙蓀雋第一遂成進士  
人翰林又十有八年而曙蓀以侍讀遷奉常督山西學政瑩域神

道錄典肆宜爰考次公行狀暨于鄉漢瞻張君謨傳謹表於墓以  
誌當世宗工傑士之碑神道者曰公諱軫裔字三瞻洛山其自號  
四川嘉定州人也先世居楚麻城按明升庵楊先生祖繇麻城徙  
蜀今張文端公祖亦繇麻城徙猶之漢揚子雲祖揚侯偪於晉六  
卿而南徙巫山江陽暨郫也高祖九華宦子鄉華亭縣曾祖夢麒  
宦雲南蒙自縣偕兄宦醴泉縣夢祥同時致政歸祖寔州學生養  
繼母孝事兄華陰尹官恪甚號漢嘉宿望儒父祚遠明崇禎壬午  
舉於鄉 國朝以文資 贈文林郎景甯知縣母徐氏 贈太孀人文  
林公性至孝父茂才公病嘗糞而味甜背人悲泣至地是時公生  
甫數歲謹識之比茂才公卒文林公哀毀病且棘闔室惶駭公時

年九歲泣撫徐太孺人手曰大人疾當無恙兒嘗糞味不甜也家人胥竒其早慧而又嘉其至行夙成此傳所謂齊庾黔婁嘗泄利之孝也先是華陰公子祚增崇禎庚辰雋進士司理襄陽府比文林服闋而病愈壬午試復雋將以計借道省之而是歲十二月賊張獻忠陷襄陽司理公自刎死妻宋孺人暨二子繡紘蹈井死文林北行斷請卹猝被賊執脅授偽官復大罵不屈死此則唐顏氏從崑弟常山平原之忠也公年十二補博士弟子員十三餽於庠而是歲文林計至明年獻忠自襄陽陷湖南遂入蜀按籍來徵兄綸新代公死公固不肯以頭觸地曰請先死綸佯許之而給公往迎外祖樞比歸綸業行三日矣此則漢孔氏襄融兄弟爭死之義

也公追綸不克逮斬自引決以謝兄家人胥督過曰是無益且若獨不聞伍子胥事乎公業無可柰何迺易姓名走匿父友所潛棲東坡書院且讀書且哭父友亦相對哭而稚弟復失走山簪虎射窟九月始遇之遂偕遁大邑之霧中山 國家平巴蜀獻忠伏誅鹽亭公乃出試復補博士弟子康熙己酉舉於鄉甲寅滇逆警按搢紳籍授偽官公復遁霧中窮崖閒無可蹤趾乃獲免因著采苓歌謠以見志此又蜀先正漢費貽譙元之節也公性慈恕而才殊敏練甲子銓注浙江處州府之景甯縣景甯僻左由閩耿逆蹂躪後蒿萊盈城戶不越五百連賦例令族鄰代輸公收爲官圖復業者受田應餉餘胥召墾俾輸租於官而官自輸正賦景甯民始蘇

公莅事恆經月不筭一人會屈行取期制撫首議及公而縣有大  
辟案二置諸法始克符例公疑而不忍遽報曰吾終不草菅民命  
以速升遷也歲稔請出常平粟上官允出三存七公盡散以貸民  
比後謝縣事代更者用此難之民間爭出粟還倉而贏二百七十  
石有奇以繕學宮公嘗同考甲子浙江試號得人尤加意景甯士  
啟學祠明倫堂文昌閣捐修闕壯景甯士民胥懷之歲癸酉大稔  
嘉禾同穗者連畝上官趣上其事公聽民刈之而牘報曰治民在  
德不在異上官有不悅公者猝至縣勘倉庫虛實耗羨多寡既知  
其額不缺而廉有餘乃大愧服去公莅景甯嘗喟然歎曰治民如  
良醫之治病去客邪易而復元氣難比十有五年墾荒墜數百頃



郊莖來歸者數千戶城中戶且盈千而景甯之元氣始復戊寅南城命下民遮道攀車不克前久之乃獲發此則史乘諸賢所爲傳循吏而錄名臣者而公以治縣請克綜之以焜耀於先正王溫縣巖長安之後故曰循良懋績也公在南城莅民如在景甯時甫三月輒引年御史臺固留之訖不克奪先是公走邯鄲道嘗題呂公祠曰合與先翁緣不受世網縛比歸至邯鄲無疾輒召二子屬曰必葬我嘉定且曰棺勿求美衣勿求備所以志吾痛也遂卒年七十說者謂符詩識叶道機云公以康熙二十七年覃恩膺封贈如彝典以六十一年今上御極覃恩晉贈儒林郎翰林院檢討雍正元年復以聖祖仁皇帝升祔覃恩晉贈大夫今待

贈中憲大夫太常寺少卿配余氏 贈孺人晉太孺人又晉恭人  
繼周氏 封孺人晉 贈太孺人又晉恭人胥有婦德子二映蓀  
曙蓀也餘詳家狀嗚呼蜀西南奧區漢嘉襟帶二江九頂四峰烏  
尤青衣實偕三峽互峙其磅礴鬱積之氣今朱氏業盡鍾之而公  
嘗棲江源霧山復沐浴嘘噲於青霞嶂明月池海馬石之奇秀故  
其毓質也彌粹而其爲時宣力以克配名世之卿宰也遇彌艱政  
績亦彌瘁勩以憇若彭澤世傳清白奉常使踐詞苑纂升庵少海  
之文繼以內職監榆塞恢余青神張銅梁之略旣復班講讀司禮  
樂造士覈典以晉而上紹劉文簡楊文忠席文襄趙文肅陳文端  
文憲之烈偕并研遂甯二相參列爲三而錫羨揚休奕葉且未之

有艾吾知當益推本於公謂岷江始發羊膊嶺玉輪坂萬里終瀉  
東洲鎮岷峨二嶽之蟠環數千里而鐵豹康延瓦屋紫山其脈絡  
尙有可指可尋者然則太沖蜀都賦之說豈不信哉豈不信哉予  
爰首舉之用表公墓而俾文麀牲之石者尙有考焉

右墓表儲大文撰

簡斑 胡正笏

簡斑字中文湖南邵陽人祖而廉祀鄉賢父文灝並以行誼著斑舉康熙己酉鄉試第一吳逆之變僞檄促招前科舉人敘用斑遇迹深山不與世接者五年吳逆平又三年赴會試有權貴愛其才欲招致門下斑嚴拒之以是不中第久之補內閣撰文中書旋假歸不復出家居率族人建宗祠置祭田興義學又建念祖堂祀而廉而廉蓋以理學名於時欲子孫無忘其教也晚年絕迹城市知府王組慕其賢舉鄉飲正賓始一出應之從弟斌通道訓導後有胡正笏字於朝湘潭人康熙甲午舉人知新平縣苗出劫掠正笏率兵禽斬首惡釋其餘調知永平申報稅課羨餘上官嘉其廉擢

刑部主事治獄多所平反以老乞歸卒年八十九

右傳李元度撰

白夢簡

白夢簡字仲調江南江甯人康熙庚戌進士官大理評事夢簡少與兄夢鼎俱崇尚志節罹黨獄幾不免時有二白之目及居官多所平反都御史魏象樞亟稱之庚戌補行福建鄉試夢簡爲考官得士極盛

右述聞謔瑤錄



陳瑄

公諱瑄字仲宣號修六高郵人其先遷自浙之黃巖九傳而至公  
公生而莊嬉戲不同常兒及長善爲文有聲貴序中來學者日益  
眾公願不以文自意抗懷古昔每慕范文正先憂後樂之義故復  
號范庵以自明其志弱冠失怙奉母孝不忍頃刻離己酉與弟蒼  
侶公同舉於鄉庚戌成進士榜未發忽憶母遂僦車歸渡黃河聞  
捷音或勸之北旋爲 廷對計公弗顧甲子謁選得四川遵義縣  
遊義於古爲播州地公以柳子厚欲以柳易播爲夢得之有老親  
也因具牒吏部陳乞終養格於例不得請時縣苦兵燹之後數十  
年井穡未復公親履田閒延見鄉老勸課農桑與民休息蜀中舊



有採柎之役牽糶捫葛側足萬山閒命不絕者如綫益以憲檄催  
呼吏胥苛擾合郡苦之遵義尤甚公爲條其利害力請於大中丞  
姚公疏入報 可其害遂革今范庵詩集中採木免木之歌是也  
亡何以太孺人艱歸邑父老子弟號哭遮道至萬人擁不得行服  
闋補浙江昌化縣值歲饑山盜伏莽晝擾村市將及倉庫公以儒  
士服官甫下車卽躬糶弓矢摧芽折槩一方以甯又山僻之地異  
端蠶起轉相扇惑其眾數萬公單車造焉諭以禍福咸叩頭乞死  
罪旬日之內黨與盡空無一人權於法者於是賢司牧之聲載路  
矣大中丞遂甯張公以上考特薦擢刑部主事每當讞決朝服焚  
香告天原情定辟多所平反大司寇以下皆諮焉隨擢本部員外

郎監通州大西倉逾年擢戶部郎中度支出入一乘至公無所回  
互 天子聞而嘉之 賜御書太白五言詩一章有白鷺下秋水之  
句蓋況之也公褻身以廉退食尚書郎署無兼味所乘肩輿帷幕  
之敝幾不足以蔽風雨其立身梗槩與范文正相彷彿位雖卑朝  
望屬焉凡兩遇 覃恩累授奉直大夫年四十有六卒於官死之  
日囊橐蕭然無以爲殮舉朝歎其清白充會試同考二鄉試同考  
一所得皆知名士撰述有居官要覽讀律佩觿註釋蜀道紀遊諸  
書藏於家

論曰子自童子時聞外大父行事甚悉其清風茂節追配前人雖  
列高位亦何忤焉惜乎未罄厥施而死也然方其兩宰劇邑所居

民富所去見思豈非豈弟君子之遺範耶史冊所稱循吏公其近  
之矣

右傳夏之啓撰

顧貞觀

顧貞觀字華封江蘇無錫人以舉人官祕書院典籍才調清麗尤善填詞爲人儁爽篤古誼初契吳江吳兆騫兆騫成甯古塏貞觀灑涕要言曰必歸季子納蘭成德者與貞觀交而相國子也雅善兆騫貞觀作金縷曲二詞示成德寄成所成德讀之悉力處辦贖緩相國爲之地兆騫卒得生入關兆騫旣歸言塞外多暴骨貞觀卽募僧心月者斂金徧歷戰場收瘞之貞觀自少名諫東南慎交社晚構積書巖於惠山祖祠之旁著有纏塘詩一洗綺靡之習子統均字璠公幼聰俊最工五言詩

右傳秦源撰

吳兆騫以科場事謫甯古塔貞觀與太傅明珠之子侍衛成容若  
爲友懇侍衛救之未卽許貞觀作金縷曲二闕以寄兆騫侍衛見  
之泣曰山陽思舊之作都尉河梁之什並此而三矣此事三十六  
百日中弟當以身任之貞觀曰人壽幾何請以五載爲期侍衛告  
之太傅兆騫遂以辛酉入關其詞云季子平安否便歸來死生萬  
事那堪回首行路悠悠誰慰藉母老家貧子幼記不起從前杯酒  
魑魅擇人應見慣總輸他覆雨翻雲手冰與雪周旋久淚痕莫滴  
牛衣透數天涯依然骨肉幾家能敵比似紅顏多命薄更不如今  
還有只絕塞苦寒難受廿載包胥承一諾盼烏頭馬角終相救置  
此札兄懷袖又云我亦飄零久十年來深恩負盡死生師友宿昔

齋名非忝竊只看杜陵窮瘦曾不減夜郎僂憊薄命長辭知己別  
問人生到此淒涼否千萬恨爲兄剖兄生辛未吾丁丑其些時冰  
霜摧折早衰蒲柳詞賦從今須少作畱取心魂相守但願得河清  
人壽歸日急緡行成彙把空名料理傳家後言不盡觀頓首貞觀  
有彈指詞三卷

右感舊集補傳張維屏錄

顧貞觀字華峯江南無錫人康熙壬子舉人官中書著有積書巖  
集梁汾臨歿時自選詩一卷授門人杜雲川太史雲川付梓人以  
傳不滿四十篇皆味在酸鹹外者前輩嗜古淡不自足如此

右 國朝詩別裁集小傳沈德潛撰



王詔

王君詔字徽山有氣槩康熙十三年大兵南征以禮部精膳司員外郎管參領事在順承郡王軍前是時守臣帥臣望風奔竄已成燎原之勢 天子赫然斯怒出禁旅授鉞親賢往討之推轂以行頓兵不進 神謀廟算違命不宣以致蠢茲小醜經年乃得蕩定王君憤之十五年某月密疏言戡亂爲王者之師神速實兵家之要未聞元兇鴟張置而不較連年坐守糧匱兵疲而能克敵制勝者也大兵於十三年三月抵荊州時常德澧州猶然未失鼓行而前則湖南一帶指顧可復計日可直擣賊巢而計不出此卽不然而屯兵息馬據其要害則長江已爲我有彝陵岳州兩路賊難兼



顧技無所施不攻自潰而計又不出此再不然而乘其初至無備  
渡江據其南岸以爲可攻可守之計亦不致賊兵之深溝高壘急  
難動搖我軍之披堅執銳日夜防拒也而計又不出此禍首不除  
羣盜皆逞今用兵之處不下數十地屢出大兵不下數十萬糜大  
司農金錢以鉅萬萬計雖廣開事例猶然不給且楚地爲出米之  
鄉往時斗米率三四十錢今斗米百三四十錢矣是米價三倍於  
昔也車船夫役取辦於民間旣困追呼重疲轉運弱者溝壑強者  
潢池矣恐將來之從而叛者不止耿精忠孫延齡王輔臣楊來嘉  
諸兇逆也且軍中馬匹倒斃者十之五六士卒死亡者十之二三  
其存者亦復銳氣全銷羸病相半萬一三軍解體時勢堪虞此臣

所以仰天泣血痛心疾首者也臣父子食祿三十餘年臣又身編  
戎伍不敢避嫌隱忍 陛下罪其越位違例加之斧鑕固所甘心  
儻 陛下鑒其赤忱請得統一旅爲諸將先驅不幸死於疆場猶  
勝坐以待斃臣亂民之剗刃於腹也臣誠愚昧不知忌諱瀝血上  
陳伏乞 宸斷敕諸大將軍剋期進討不得仍前逗畱濟師策應  
信賞必罰鼓勵士眾庶幾蕩平可期疏上朝士皆爲之咋舌謂獲  
罪且不測 聖天子嘉其忠直下詔切責諸將帥剋期滅賊於是  
兇渠困殪諸方漸次削平嗚呼提將之符觀望不前者獨何心哉  
身在行間者知其事勢不過搔首長歎而已孰敢言哉孰敢言哉  
彼夫處臺諫謀議之列者而莫之言是誠人之所難言也故節略

其疏存之亦以見 聖世喜聞讜言以收蕩平之效云

右書事徐乾學撰

陳時臨

先大父贈公自丙戌後同里所還往者祇一二遺老陳大息先生年長於大父所稱兄事之友也六息先生四子職方居第三先君亦嚴事之職方諸子其仲叔二君尤與子善不幸早死職方歿二十年而其婿董生政乞余爲埏道之文泣然者久之職方諱時臨字二咸一字責庵少承家學又以陳編修怡庭爲師得聞證人書院之教甲寅三藩之變周總制有德知其才辟置幕府有功楊撫軍雍建薦之敘功授湖南城步縣知縣部下有紅苗最難撫職方曲意安輯之以六息先生喪奉棺歸廬墓三年除服知河南汝陽縣職方之爲吏也和平淳厚簡易得民深鄙世俗武健嚴酷之徒

汝陽喪亂之後風俗大壞民不知喪禮職方爲斟酌古今所可通行者而衰經聚飲之風以息楊埠有支河久淤職方通之庚寅河北大水職方遽以便宜開倉賑給而後上聞時謂有汲長孺之風河北盡食蘆鹽獨汝甯食淮鹽蘆商欲爭而并之職方謂蘆鹽計口而授不問其所需之多寡以額給之是厲民也吾不能爲河北盡革蘆鹽之害而反徇蘆商之欲以害境內乎力爭之而汝甯諸縣皆蒙其庇時徐文敬公潮撫河南亟稱之於是前後撫藩諸大吏皆以爲循吏高令久任報最者數矣而數畱之遂在汝陽二十餘年而職方之子諒與民相安於無事者亦二十餘年如一旦朱靜軒者柳堂先生之子也職方以世講盡委以簿書錢穀之務歲

贈以千金靜軒故有承平公孫之習託身依人非其志每見西風  
漸急輒思其細君治裝歸及度歲過寒食尙遲遲未肯出門職方  
使至敦促始不得已赴之計其在幕中不過半年職方於其曠廢  
身爲任宄劇一切不以爲忤及其至也亦日喜濯花賦詩否則鬪  
葉子直待漏下始挑鐙稍爲了案牘職方黽勉危坐以待左右多  
咄咄不以爲然而主客始終無厭射然遇有非僻則未嘗不苦口  
相告一日聞靜軒歸頗與里巷狎邪之徒飲博千里貽書規之靜  
軒作長歌謝過且以志感先君嘗聞而歎曰責庵之位未至奇章  
靜軒之才遜於杜牧然其交道則無媿矣職方買秦人爲妾至而  
詢之則已有夫乃移文至陝召其夫其夫至以無力償直叩頭乞

免職方曰吾不責汝直且當爲汝了姻事並贈以行李之資而去  
戈大令心源之入都應償公費以數千計告急於職方罄其積年  
俸糶之餘以助之自職方筮仕以來所得廩祿歲以給宗族親友  
之貧者死喪嫁娶無不向汝陽來請皆量其差等而周之故其入  
爲樞曹也宦橐蕭寥臨行之日百姓攜老載弱相送者數十里逾  
年以病請告遂歸歸而家日落未幾時四壁枵然不改其樂一  
日太守來通謁猝不能具襲衣乃謝之太守有所白徑登其聽事  
職方遣人四出假襲衣良久乃得出見嗚呼自睦婣任郵之教既  
衰有以骨肉至親不相顧者當職方盛時待以舉火者數十家垂  
老不能自爲衣帛食肉之謀至使傾身障籠之夫竊議前此之勤

施爲過是則可爲太息者矣職方之歸也連喪其才子卽仲叔二君也於是晚景益焦萃雍正六年十月十八日卒生於順治三年十二月九日年八十有三曾祖某祖某父六息先生某 贈如公官配某氏 贈安人繼某氏子四孫八女一卽適董生者葬於某山之某原自余年十四爲諸生職方甫從京師歸盛有所獎許已而以奔走衣食不得握衣常拜牀下方卒時陳南皋嘗屬予以銘而遽巡未及今重理舊聞而詮次之不禁累晞於三世之交情也其銘曰

本仁心成善政暮年坎壈訝天道之溟滓苟可傳何足病

右墓誌銘全祖望撰



A large rectangular table with 10 empty vertical columns and a thick black border. The table is oriented vertically and contains no text or data.

151-290

施端教

游天下士大夫同姓之能言者五六人其來官於宣而狎遊莫如故司訓匪峩先生匪峩爲人好文學人有贈之言者裒集不遺一字積爲大帙其所誦贈人皆手自書尤喜集唐人成句爲詩切情指事脗合渾成工若已造多至累數寸不倦爲宣城訓導以此餽郡邑長吏上學使者皆禮重之劄刷氏滿官舍用薦爲范縣則載版以行又遷而爲司城亦然京師名人游士酬接煩促所善翰林編修沈公荃同姓侍御史維翰尤亟推引朝貴日聯車騎就取其書悉脫贈不取一錢又時時觴客坐是耗官俸盡而是時君已老矣余嘗入其署視所殺青牆立而山積輒調之曰君倦於副墨矣

獨不儲十一歸買田邪卽歸如捆載何君笑曰公勿憂吾歸載是爲一莊矣逾三年而君歸不果卒於官實康熙甲寅年二月七日也年七十二君初娶 贈孺人陳氏亡子繼宋 封孺人生二子于國子朝皆未婚而夭及君卒宋孺人挈喪載書版以歸立姪孫自重嗣子國將葬於盱山之原二女長適同郡廩生周伯士次適宣州衛湯九一乙卯八月使伯士來請銘君訓宣城好獎名士嘗葺治學宮在范縣九年噓枯起瘠累牘蠲虛糧二千餘石民賴稍甦奏績當 內召拘限資格遷東城兵馬司累功加三級又貧亡援故久不調卒坐外郡盜案免官君考 贈承德郎諱天民祖竹岡翁諱用遠祖自吳興徙嘉定有官博士泗州者遂家泗之雙溝母

李孺人簡經師使受業故君承其流亦以好詞客終其身著有唐詩韻匯五十卷集唐十三卷六書指南嘯閣文集等書君諱端教字匪峩生明萬厯癸卯七月十七日以明經高等起家云銘曰官不達數之奇修何闕後罔遺所篤嗜爭纂述篇籍繁懼亡軼生於泗葬於泗魂來歸脉銘記

右墓誌銘施閏章撰

國朝書目考

卷四十一

三

李來章

李來章名灼然以字行號禮山襄城人生有神識方就傅自知勤學不假督率有工匠集庭中斷石輾轉弗合來章過之曰去宿土當自合是卽吾學人心道心之謂也識者聞而異之年十五補邑博士弟子員與同志聯文會窮經讀史閒爲詩古文詞每出羣輒驚服以爲天授才然非其好也一日讀近思錄獨有會心歎曰作聖命脈盡在於是無事他求矣乃益潛心爲性命之學介灤水趙寬夫御眾走謁夏峯孫鍾元徵君會二曲李徵君中孚來襄招魂葬父來章與襄其事中孚約爲兄弟益以正學相砥礪初李氏世以學術風節爲中州人倫望在明成宏朝有大司農謚恭靖諱敏

者來章之六世從祖也史列名臣傳其曾大父諱繼業嘉靖己卯  
舉人爲東鹿令有惠政著首身錄見中州道學編明季流寇坡襄  
城有諸生恥迎降投泮池死則其世父光閻也來章緬懷祖德慨  
然以光復先緒爲己任而於經濟之術時畱意焉康熙乙卯以禮  
經第七人舉於鄉公車遇中牟冉永光覲祖傾蓋談心以擔荷斯  
道爲期勉抵京師與安陽許酉山三禮學受業於蔚州魏庸齋象  
樞有欲除妄念莫如立志之語因作書紳語略歸與張仲誠沐柘  
城寶靜庵克勤往來講貫又謁睢陽湯潛庵斌於京邸庚午登封  
耿逸庵介與冉永光招同講學嵩陽書院幾二載溪邊亭上隨處  
體認所見益親所造益遠嗣是朱太守璘聘主南陽書院嚴立學

規著達天錄評點二程朱子之文以教學者古文大振謝歸修葺紫雲書院讀書其中學者多自遠而至紫雲書院者恭靖公束鹿公講學地也癸未筮仕得粵東之連山地本窮荒又甫罹猺亂後時雖就撫猶疑懼弗靖來章莅任召耆老詢疾苦首革無藝之徵招流勸墾治民事神次第舉行因念猺雖異類亦有人性惟當推腹心以待之乃深入巢穴親與設誓盟心宣布 朝廷威德講聖諭撰三字歌延師訓其弟子諸如焚妖書平物價禁搶掠解仇忿慰勸誥誠行之三年革面回心民猺一家又勸建連山書院日進民猺之秀者親爲訓教誦讀之聲徧徹窮山深箐中制撫大吏交獎之曰忠信篤敬蠻貊可行不其信而有徵乎己丑行取上官



同車者以實者名 卷四十二  
考語謂有文翁化蜀之風壬辰補兵部武選司主事榮已出監督  
倉場事本繁劇捷足者爭先自爲地來章恥爲規避計而例當奉  
差之同官某日以母老請歸養向之嘸泣來章心惻遂身任之適  
前任以侵欺被劾謀自脫百計脅制終不爲受代言 上諭大臣  
舉真實學問之人少司馬田從典李先復少司寇王企靖舉來章  
留心正學人品質實兼通古文詞奏甫上而來章於差滿得替後  
已南歸及 命下引 見倉場又以盈餘報部議敘乃具牒苦辭  
不就遂以優遊終老來章內行醇篤自治刻厲義所當爲不避險  
艱母嘗病目來章每夙興親舐之目爲復明讓產與弟至身無所  
歸流離播遷而怨悔不形嘗謂欲爲聖賢須從慎獨作起著衾影

錄一言一動逐日備書省愆計過時若帝天之臨而自述生平深以學未幾於聞道行未臻於感格爲憾以康熙六十年五月初八日終於許州之邈莊得壽六十有八歸葬紫雲山陰先隴所著有禮山園文集詩集達天錄彙影錄南陽書院學規紫雲連山兩書院志連陽八排風土記嶺海拾遺京華見聞錄隨筆錄其若干卷子二人夢鱗夢龍能以文行世其家

彭始搏曰予向忝充 三朝實錄總裁館中諸君欲借才兵部專任責成公引曾南豐監修五朝國史事力辭不就及予歸田道過邈許而公已歿矣時哭之以詩嗣君鱗以傳請子誼不容辭遂爲序次梗槩如此云

右傳彭始搏撰

襄城李先生諱來章初名灼然以字行號禮山明恭靖公後裔生而穎異自知向學初授書卽日記千餘言年十五入邑庠時更制以策論試士邑前輩傅夢翁太守評其策云侃侃鑿鑿足覘胸中經術儲蓄必爲名臣李氏自恭靖公後世以理學著稱中州先生爲肖雲先生曾孫於書無所不讀詩古文詞一學卽工旣而一切棄去專心於濂洛之書以興復先業爲己任就學於輝邑孫夏峯徵君與盤屋李二曲以正學相砥礪康熙乙卯舉於鄉復受業於魏庸齋象樞之門庸齋有欲除妄念莫如立志之語因作書紳語略復與睢州湯潛庵柘城寶靜庵上蔡張仲誠往來簡札剖析經

旨凡所持論總以不背先儒有益世用爲主嘗謂近思錄一書爲  
周孔眞命脈學者不從此入手皆斷港絕流欲求入道難矣與登  
封耿逸庵中牟毋蟬庵講學於嵩陽書院發明程朱之旨時孫夏  
峯徵君與耿誠齋諸人講學於輝之百泉書院兩河相望一時稱  
盛焉己朱太守璘聘主南陽書院作達天錄及南陽書院學規士  
習爲之日上旋以母老謝歸增修紫雲書院讀書其中學者多自  
遠而至筮仕得廣東之連山瘴煙蠻雨獐獐雜居先是排獐負險  
跳梁提督殷化行討之反爲所乘事 聞遣將分道會勦始就撫  
距公莅任甫隔歲耳聞者皆爲先生慮先生曰獐雖異類亦有人  
性者當推誠待之乃倣王文成公遺意日延耆老詢疾苦招流亡

勸之開鑿薄其徵賦復深入犵穴爲之置約延師務以至誠相感  
動勸建連山書院著學規日進邑人訓教之而犵民之秀者亦知  
向學誦讀之聲徹巖谷制府中丞交獎曰忠信篤敬蠻貊可行信  
有徵矣己丑行取上官考語謂有文翁化蜀之風壬辰補授兵部  
武選司主事監梓北新倉革運官餽遺差竣引疾歸田相國從典  
少司馬李先復少司寇王企靖交章以真正實學可資大用保薦  
奉 旨徵召先生力以疾辭遂不出嘗謂欲爲聖賢須從慎獨作  
起著袁影錄年六十有八卒於家陳大中丞榕門以先生與孫夏  
平馮潛庵張敬庵耿逯庵卅蟬庵西靜庵張起庵爲中州理學八  
先生增祀許州七子祠道光十四年栗樸園中丞題請列祀河南

鄉賢祠部議遵 旨以理學真傳褒之著書四十餘種其行世者  
有禮山園文集及連陽八排風土記洛學編云

右學案唐鑑輯

同治元年庚子春

三

顧鐔

雍正二年八月癸酉中憲大夫大理寺丞仍正四品服俸致仕顧公以疾卒於石門縣里第正寢孤子濂遠宦四川聞訃旋里既治喪矣明年七月辛丑卜葬公於本邑芝邨西獨字圩先期素冠素衣詣同年友海甯查慎行之門涕泣而言曰濂無狀萬里孤蹤一官需次再乞養親不得終天之恨負疚靡涯唯是先大夫一生嘉言嫩行以及出處大節皆足爲朝野矜式而懸綽之石未有銘辭敢固以請余惟古來賢公卿既沒其名行政業紀載表揚之者類出同時巨公之手名位輩行不相上下其言庶幾信而足徵今某於公以詞館則後進晚生以年誼則通門子姪抑且媿鄙無文自



揣何能爲役所以不敢終辭者既辱孝子之命至於再至於三而自歸田以後竊望公之後塵者十有三年於茲矣吾里與石門相距僅百里及公強健時未獲一問起居奉杖几相從於雲泉風壑之旁由今思之雖悔莫及爰據行述而爲之辭曰公諱鐔字詩城一字栗巖姓顧氏系出祝融歷六朝爲吳中望族其諱政者則石門遷祖也四傳至封行人司諱文昌字明寰篤行耆德樂善好施鄉黨依爲惠聖公之王考也生子五行人次居三公之考也諱朱字某前明崇禎壬午舉人癸未進士甲申選授行人司年方弱冠磊砢多大略同朝鄉先達倪鴻寶劉念臺兩先生咸器重之時南北鼎沸奉差清餉兩浙毫髮不爲家計南都潰慷慨欲引決有以

老親在堂勸阻之者乃從閒道歸入 本朝二十餘年而歿兩遇  
覃恩以公貴加 贈徵仕郎翰林院庶吉士再 贈文林郎山  
東道監察御史母朱氏吳氏沈氏並 贈孺人沈孺人從贈公於  
革命播遷之餘順治丙戌九月初三日生公於吾邑之后墩里頭  
角岐嶷顧盼與凡兒異贈公拊而喜曰必此子也大吾門者稍長  
就外傳習爲制舉之文稟承庭誥學日益專業日益精願不利於  
小試贈公歿後六年始補博士弟子員康熙戊午本省鄉試第二  
人明年聯捷南宮改翰林院庶吉士時年三十四矣散館補山東  
道監察御史巡視北城豪右爲之斂跡每遇大案三法司會審屬  
公裁宅者居多以吏部銓注不如法特疏糾劾部臣大恚恨力詆

公擬降四級調用賴 聖明在上命再議鑄級畱任又條陳濱海之利宜弛禁以業平民繼掌鼓應事閱條例應駁者多鮮得上聞疏請減科條以達下情雖格於部議論者躉之己巳掌京畿道巡視長蘆鹽課革除積弊屏絕苞苴先後在臺中七八年直聲大著凡所條奏家不畱棄科鈔部案可放而知也壬申八月內升京堂借補大理寺丞仍支正四品俸廷平司天下奏當公益研精律例辨析疑似援史證經上下數千百年酌劑異同而洽於今制聽者心服焉甲戌移病旋里家居者五年迨己卯起補原官明年八月遂以原品致仕年甫五十有五自解組後未嘗以一牘干當事當事咸器重敬禮之恭遇 聖祖仁皇帝兩度南巡公與在籍臣僚

隨例迎謁 先帝不能忘舊臣 恩賜墨刻御書孝經手卷又  
賜宸翰唐人詩朱子詩兩幅公於中摘取二字自號荊屋山翁人  
益以此知公內斷於心無復出山經世意矣所居城西老屋數椽  
兩板常掩客或過叩索應門僮不得遇春秋佳日步行出郭蔬町  
稻隴逢田夫里叟舊所識者款語相勞苦如家人童穉旁立亦問  
知爲某氏子善氣迎人見者忘其爲達官也公天資樂易而器宇  
凝重長身修髯素少疾病安恬頤養年彌尊而德彌邵優游林下  
者凡二十五年一旦無疾捐館舍聞者咸太息或至流涕古所稱  
鄉先生歿而可祭於社者非公其誰歟湖公平生孝友於家庭悃  
睦於戚黨承前而啟後美不勝書自丙午丁贈公之艱治喪甫畢

痛先世未克葬與伯叔謀襄大事時歲方祲或有難色公曰禮非不懸棺之窆且今之殯宮先祖築室觀稼處也存之所樂歿之所安撤屋以葬不亦可乎既葬果吉壤贈公著春秋本義未竣公編次續成合經文梓行於世兄弟五人公居長綜理家政壯者爲禮聘成婚幼者爲延師督訓一妹既長具資裝嫁之皆出一手所營辦其後既貴猶時時量力佽助自少至老未嘗分彼此也沈太孺人歿時其母猶在及卒公爲合葬於外祖墓舅氏無後復爲耐葬墓旁歲時親往展省其篤於一本如此奉己純約無聲色玩好之娛祿入少豐誼存推解宗黨嫺親靡不分霑以故家無贏餘盎中之槩不爲旬月計衣裘鮮潔者常在子錢家處之恬如也少所嘗

受業師周恤其後人無吝情無德色鄉會座主居址不問遠邇遇喪必躬哭諸寢初結文社十餘輩於邑中其後或出或處或存或歿餽問唁慰備極情文其子弟有所能則獎成之無所能必爲道先世舊事以誠意戒勉感動之其篤於師友故舊如此其教子孫也讀書課文而外輒舉少年函丈所聞或朋好贈言以相示嘗曰吾平生所學得諸過庭爲多今亦樂與汝輩共語耳孺目染不見其益當有時而悟也未第以前專精舉業帖括家奉爲金科玉律至治經必會萃諸儒之說辨析異同而求其至當嘗言不得聖賢立言之旨雖泛濫不可謂通經平居問荅偶舉一義羣疑盡釋推其緒餘子孫皆興於學又喜讀朱子通鑑綱目手緝二十一史凡

數過好學深造老而不衰與人交多恩而寡怨或有負之者公不與校後來謝懽如初不訐人之惡以示直不飾己之行以悅人子弟有微過亦不以疾言遽色相加徐析情理令自思之改則止下逮左右使令笞扑怒罵終身亦不數見其大度有容天性然也前後立朝十六年家居之日倍之自以蒙被 國恩奉職日淺長子濂旣成進士行當謁選意在侍養不忍遠離公促之就道曰吾投閒不能爲 國效力汝可不成吾志耶歷任自邑宰晉部曹所至勛以清慎勤三字繼奉分發四川補用之 旨時西陲方宿重兵公詒書告誡勿以勞瘁爲辭勿以晨昏爲念及聞大捷額手北向曰老臣之望此久矣而今而後庶慰 宸衷西顧之懷乎其居江湖

而不忘 君國又如此卒時享年七十有九配溫氏 誥封恭人  
文學叔子公諱良之女前癸未進士殉難寶忠公諱璜之姪女先  
二十年卒今合葬焉子二長濂康熙癸酉科順天舉人已丑科進  
士行取主事題補四川巴州知州初室沈氏繼室尤氏次溥戊子  
甲午副榜庚子科舉人娶吳氏先卒女三長適太學生溫廷奏次  
適太學生許大任次適歲貢生鍾處厚孫男七孫女二曾孫男一  
曾孫女一銘曰

緬公初終垂八十年靡疾維人樂全者天爲克家子爲邦國賢爲  
黃髮叟爲玉籍仙秉茲全德康甯壽考羣望攸歸靈光一老雖滿  
百齡人以爲少胡乘箕尾遽辭塵表余初游學識公京師道德之





郭遇熙

郭遇熙字駿臣河南新鄉人父士棟孝友端方學以濂洛關閩爲宗遇熙登康熙己未進士兄弟同居數十載迨析爨田宅盡讓諸兄弟謁選授廣東從化令卓著循聲擢刑部主事卒

右述聞謚瑤錄

國朝考月表卷之二

三

房嵩

房舍人名嵩字申公竟之東阿人先世不顯父諱拱極明經貢於  
朝仕順治中爲山西猗氏知縣以不能事上官去今康熙初起爲  
江南青浦知縣又不合於其大吏吏橫甚侵其帑且數萬不勝憂  
憤竟卒於官而吏責帑於其家舍人時爲諸生與母董弟崐坐是  
不得歸舍人自計罄其家不足以償而父未葬母老弟弱有以身  
殉耳詣大吏請使母與弟歸爲計而獨留質吏喜聽之崐乃得奉  
喪攜家以歸初青浦公元配以張繼室以陸皆無子早卒董側室  
也實生舍人青浦公再繼室以王生崐又卒董乃爲媵及是獨與  
崐歸無難色久之無以償吏促舍人歸鬻貨產舍人則以問葬青

浦公如禮而身往返聽追訊適病癰於家勢甚殆追者至門舍人奮然曰行也董母哀之而不之止室人泣於前曰叔盍代諸子不畏死乎舍人曰弟也何代遂行至江南則大吏已得罪向所侵帑朝命悉責使償由是舍人得無事以歸病亦愈遂使媚督家政獨發憤力學媚善治生家日起多所增置爲別籍舍人成進士以母命析箸則舉青浦公所遺者聽弟擇之既定復有所易已舍人乃取其餘不問所別爲籍者子弟及僮僕輩見舍人與媚不立文字每屏人語窺之相泣也蓋不忍析焉既官京師迎母奉養甚至獨憶媚媚亦闕園結亭於魚山之麓待兄歸老竟不果癸酉奉使河南以疾卒於開封之官舍返柩於家未幾媚與董母皆卒舍人二

子帽五子

趙執信曰余與舍人交最深方其出使也余家居晝夢舍人來別自道死狀以後人爲託相與哭乃覺已而果然其於朋友也不以死自聞況其在兄弟之間乎董夫人不難舍人之畱不阻舍人之力疾行舍人夫人出也非是母不生是子信哉余過東阿哭舍人於寢弔其孤問諸其宗族鄉黨如一口嗚呼難矣舍人文章科第官位及他行義世有傳者余獨論所知於其母子兄弟之間者如此以風諸其家

右傳趙執信撰

按房公康熙十八年進士



周綸

周綸字鷹垂茂源于隨父客京邸已有名董含董俞田茂遇諸人俱重之康熙十八年歲貢 廷試第五名授國子監學正爲新城王士禎所知生平以經世爲志嘗上巡撫湯斌請官收官兌書云松江地丁漕白明朝有北運有收兌有經催 本朝定鼎一革白糧北運再革漕糶收兌均田均役復革銀米經催小民按畝輸官卽各甯家鼓腹此眞生逢堯舜頓離火溺獨漕白二糧不比銀錢輕易況起解條銀扛費水腳不致官爲民代若旗丁由單石數內有正有耗而外船隻有給行月有給五米十銀有給所患層累扣剋病軍卽以病運耳至官爲民收官爲民兌前此里排會議松江



澤國米性潮溼民間倉棧積下旬日不加搨颺即便沍爛故議搨颺風刮量加三升潮無乾縮量加三升恐納戶不能粒粒揀剔以稽開兌以誤淮限也貯米在廩潮水地面土氣上蒸務備蒲包墊草又加一升二合鼠糧三合至華婁兩縣除白糧官廳係屬公占而漕米倉房俱借之民其地基糧白理須給價完課故每石又加五合而修倉房買蘆席簞籩鎖鑰風車笆斗栲栳斗斛簞棒斛單串張油硃及倉夫執單紙張貼旗軍臨兌剝船發挑夫開兌腳價與凡雇募書算雇募斛手工食等項原議七分前此上下分肥斛斛淋尖高至四五指每石加入八升之米變爲官加一私加一而七分<sub>三</sub>之費大戡秤收起籌出串項項勒索誠如今總漕請釐三害等

事疏內收米一石止□七八斗腳價江浙反無額設民間私貼尙止銀三五分米□□斗乃湖北編有折銀三千九百餘兩每石復幫貼至一□□江西已編腳價銀三萬四千五百餘兩每石復徵收水腳銀三錢五分及三錢二錢五錢不等均宜查革部議湖北江西既有額編腳價何得又行分外私徵贈貼等項傳述之頃歎聲雷震獨是我松幸賴廉明知府魯於康熙十五年下車以來怡值華亭知縣南婁縣知縣史兩賢令接踵莅任革去種種陋弊俯准芻蕘荒區另編緩比秋成儘頂十銀爲數適足相當不至蒿萊日甚且詳明督撫官斛之上釘置斛攏形如卜字上下兩銀復將七分之二銀詳減二分八升之米詳減三升此時傳集里排黃髮皤

國朝通志卷之四十一  
三

餉交口稱頌咸謂米色略可通融使民易得上納則此三升之減猶懼不可經久以累官長今華婁上青一槩不收誠恐賠累在官一朝卸擔官何取償變爲區收區兌則向來蘇州之官爲催比民自備廩攢費及至出兌之後纔給印串風雨火盜時刻憂虞陽奉官收官兌之旨實則官雇民收官兌松爲樂土相去霄壤爲此呈具松江官收官兌原議并均編要略均役成書三冊伏乞主裁又爲松江士民陳明浮糧云恭讀 諭旨故明洪武因有仇怨於民或一處錢糧徵收甚重我朝並無仇怨何可踵行爾部詳察具奏旋聞江西瑞州袁州浮糧隨奉豁免則是江西億萬年生靈皆本朝特賜骨而肉之也茲蘇松待澤於 聖天子准予減額惟繼

因軍興旁午未敢比例上瀆今海宇盡歸版籍康熙二十三年  
大駕東巡賜獨賜振二十四年直隸郡邑復免見年錢糧是朝  
廷加意撫綏誠求保赤今以蘇松浮糧上告宸聰必蒙矜閔因  
思兩浙田稅錢氏時畝至三斗宋室耆定遣王方贊均稅方贊以  
爲兩浙旣爲王民豈當復循僞國之法悉令畝出一斗若以松江  
論之宋時特華亭一縣耳屬浙之嘉興明祖取張士誠時田主佃  
入租額責成完賦較九升之科多至四倍雖守令考成纔及六七  
分竣局然三百年來不能無致痛於洪武也況起科米石止二錢  
五分折徵而金花銀一兩一錢準科四石四斗三梭布一匹準科  
一二石五斗名浮實約尙有歷欠纍纍丑年之正供徒糜費於子年

之杖比日復一日仍歸豁免公家本不得百姓之實額而曾不得  
百姓之感恩挂欠之久民脂民膏仍耗於胥吏之谿壑冊籍之游  
移耳今不敢全望減額第願臚陳蘇松情形聞於 聖天子將松  
江口斗六升五合等起科平米比照本郡之四錢五錢一石折徵  
田畝加三斗六升五合除本色米外應折若干槩引四錢或五錢  
一石折算卽是故明初定之額而一轉侈開邀 恩已渥至故明  
初定二錢五分一石之價不敢覬覦也若萬厯以後就事加編量  
行酌免按萬厯年間松江徵糧田四萬三千七百二十頃九畝零  
本色米四十六萬二千三十六石零折色銀四十三萬七千七百  
三十九兩零康熙二十三年會計除去坍荒松江徵糧田四萬七

百四十四頃三十五畝零本色米四十四萬二千二百四十石零  
折色銀六十七萬二千一百七兩零伏乞一一剴切聲明則東南  
民力起死回生也言雖未盡行時論賢之綸著述繁富有芝石堂  
文彙不礙雲山樓橐八峯詩橐石樓臆編諸書行於世

右傳王昶撰

日本書紀卷之二十一

三

楊汝楫

今天子卽位之四年河南撫臣以故隸熙中固始縣知縣楊君汝楫入祀名宦請奉 旨報可惟古者有功德於民與勤事定國捍患禦災同膺祭法而今律嚴名實屬瞻徇符例邀 寵俎豆馨逸尤非常典云君字濟庵奉天蓋平人先世從 龍入關隸旗籍受賜玉田定福莊地九百畝君稟疑姿器深而抱豁幼孤事母孝發篋習經史旁及吏條罔不達尤精農田水利起家靈寶縣丞故事縣大細惟令尉少任事假權丞中廁曹主曹諾幾如無官君振舉綱理值軍興途出函谷以一椽供芻蕘與馬倉猝辦以是得才名邑古宏農地漢唐渠久湮公按圖疏濬德盛清猶永清康民五



十餘渠不期年壞復大吏嘉其能承 聖祖仁皇帝制下所部擇  
賢才吏勝治劇者上君名得 召見賜對授雲南河西令維時逆  
氛初靖農廢田粟罄市焦嗷沸皇不可以日設法招集之具舍宇  
衣糗存散傷無幾時而人忘亡也以憂去服闋補固始固始北距  
淮南仰決西繞滄西北白鷺挾詔虞赴淮西南急流羊行又南子  
安競匯決其他旁支涓流百數十楨織斜穿環國而澤楚相犒敖  
筆樛滄堪厥後王景劉馥鄧艾所續修者也滄桑代變疏淪靡蹟  
明知縣薛良張梯皆以濟民程費而功終不竟君履野而慨然計  
置規度開龍潭口截決而東直達華家岡灌百餘里復清洩清之  
下流北灌四十餘里復勘鑿金龍口障滄水達團林港五十餘里

潘沙溝口分澮水達李家底壩四十餘里於是縣東西汪汪汨汨  
縱溝橫澮壤靡不沃矣而詔虞白鷺急流羊行子安諸巨流小史  
千工串子諸細流最小陂塘湖港凡百餘處莫不隄濫濬淤尺閘  
丈壩嚴啟閉而時灌溉富江淮者固始爲稱首焉君風采元定神  
識超然治固始六年先富後教皆從容施舉縣舊無書院君始勅  
立延名宿主講選生童之秀者肄習其中更建四鄉義學十處自  
是登甲乙科者相屬也以卓薦升知保安州治行舉畿輔第一蓋  
其政施於所至而無不見德也固如此 聖祖知君深將大用以  
知府引 見叩頭乞京職得兵部武選司員外郎未幾引退故所  
學惟著於州縣而飲食必祝烝嘗不倦固之人爲尤誠焉

錢曰吏治西漢爲盛而循吏傳祇文翁朱邑召信臣等六人而已  
趙廣漢之精敏張敞之廉幹尹翁歸之豈弟均不與焉誠以制田  
里廣樹畜敷教化致治之本在良吏不在能吏也楊君之治固始  
庶幾古循吏之流班孟堅曰所居民富所去見思生有榮號死見  
奉祀楊君信足當之而無忝矣祠凡三處在縣治東偏者官祀之  
龍潭集分水亭二處皆民祀之云

右傳蔣湘南撰

靳彞

今夫一代之立法不能無過不及所藉奉法者爲之裁量於其間使聖賢之精微常流行於事物故足以開物成務此非鬼瑣小儒之所能知也吾於太垣靳公見之矣公諱弼字太垣先世爲山左之歷城人明初有名清者以邊功授百戶家於遼以征爾朱山陷陣力戰而死遂世襲千戶中衰失職然而世爲官曾祖知白祖月軒皆贈光祿大夫考魁吾官通政使妣納刺氏繼傅氏贈封一品夫人兄爲大司馬紫垣公生華胄而欲以科舉自奮寒鈔暑講括舊鈞新與孤寒之士爭一日尺寸之長時譽殷然滿場屋會八旗罷制科始以筆帖式起家擢中書舍人轉翰林院侍讀歷

督捕四品員外郎兵部車駕職方二司郎中凡三週京察考功第  
甲乙俱舉卓異第一再奉 覃恩自中憲大夫晉階通議大夫以  
康熙辛酉八月十二日捐資客年四十有四明年葬易州蓮花峯  
之陽 國家新造攻城略地俘累卽爲軍賞斬刈首馘之餘汨沒  
於奴隸單門或以子母沒入姦人或以借勢投身凡此數者皆輕  
生亡命如獸之走曠於是特設督捕一部以主之跡捕之法凡其  
晝頓幕宿所過之處保甲悉皆連坐故跡者一人瓜蔓逮繫者常  
至數十人主者又不時具獄此數十人死者過半而跡者之罰不  
過鞭笞而已公憫其冤溢撰末減條例三上三報 可其所活甯  
止千萬人乎公澄潤明澈案無留牘侍郎嘗考課諸司多堆積未

經背省視公止有數件則日內所署也侍郎以此奇之他司有逃人掠民子爲己子者獄久不決命公理之公謂民曰汝何以證其爲汝子耶民曰吾子生而獨賢衆無知之者尋召逃人問之旣爲汝子亦知汝子之形體有異乎逃人錯愕不能對數年滯獄取定俄頃 國朝做府兵之制畿甸之地粟園 賜八旗勳戚各委莊頭督之平居則廩養坐食租稅遇征調則按園地頃畝僉甲卒如數不崇朝而數十萬畢集赴兵部驗名給行糧事已仍赴部驗放歸旗然充莊頭者類多巧詐猜禍之徒爲能竄圖籍亂疆界桀結不可解其大較也有屬國內附應得園 賜朝議惟遼左餘田可以贍給舉公往覈之履畝之際隱占牢固莫可端倪公爲之丈量數

則譁欺立見勸令自實以免罪戾不踰月而田數已盈歸報稱  
旨公之剖決大事往往類此而迫乎短日止開迹於一篲爲可惜  
也雖然逃人圍地一者爲國家大節目公能潤色三章抽薪於烈  
釜之底解網於前禽之失便已歷駕前修非常舉動矣元配崔氏  
累封淑人子六長治揚陝西鞏昌府同知次治荆欽縣知縣次  
治青國學生次治岐次治克次治邠女一適王謨孫一孫女一欽  
令介子門人孫士講求傳余謂逃人疏目天下並受其福然未知  
其出於公也可不表歟

右傳黃宗羲撰

唐崇勳

唐崇勳字志齋湖南衡山人康熙辛酉舉人歷官興國州學正山西榆社江西靖安知縣擢戶部員外郎有山居詩集嶽蔭堂集

右沅湘耆舊集小傳鄧顯鶴撰

志齋詩出入於高岑王儲之間而時標新穎比年謝政歸里日以文墨自娛讀其山居秋興等作其氣識固已高出尋常矣

右易宗洛撰唐志齋詩序鄧顯鶴錄

衡山唐宗勳由鄉舉知靖安縣歲饑不待報發廩賑民有盜殺寺僧劫其資遺一扇與寺中舊傭工姓字同遂捕繫之獄已具崇勳廉其枉釋之後獲盜於鄰界則遺扇人姓字也一縣稱神官至戶



國朝通志卷之二

三

部員外郎

右述聞謔瑤錄

馮廷樾

馮廷樾山東德州人康熙二十一年進士授內閣中書幼有奇童之目讀書一覽輒記不忘性孤峭而工詩二十六年充湖廣鄉試副考官試畢登黃鶴樓俯江漢之流眺內方大別諸山南望瀟湘洞庭慨然遠想有詩百餘篇識者以爲騷之苗裔也生平深相契者惟趙執信儻直之餘時相過從共探六義之旨其爲詩新妍峭犷神韻冷然隨年編次爲京集晴川集雪林集曹村集身後散佚其孫德培搜輯得五百篇名曰馮舍人遺詩執信爲之序

右 國史館本傳

康熙庚辰馮君大木卒於京邸予哭之過時而悲嗣是數往來安

德望君之廬未嘗不腹悲也昔秦少游死東坡先生歎世無復有如此人大木死世豈復有如此人哉丁亥冬杪其孤炎來告葬期且請書其隧道之石子方病困甚言念平生不忍例辭乃伏枕略述君之梗槩而銘之以代楚些云按狀君諱廷樾大木其字先世萊州卽墨人曾祖仲選祖嘉禎父沛順治辛卯舉人不仕卒君幼號奇童讀書一覽輒誦於口強記不忘十五工爲制科之文五經三史莊騷以下四庫二氏之書無弗瀏覽於是落筆輒詘其輩行亡敢當者康熙戊午舉鄉試第六人壬戌 賜進士出身君文詞贍博又善撫趙承旨書時論以爲鼎望無以險君會有尼之者竟寘二甲及館選以名士薦者五十人復不及君君於是浩然有歸

志矣又三年授內閣中書舍人官閒無事倖直稀少益取古人書  
枕藉讀之足跡踳踳終歲不識貴人之門性孤峭益甚而詩文亦  
益奇丁卯典湖廣鄉試所取多振奇服古之士居然楚之雄風也  
旣撤棘蠟屐筇杖登黃鶴樓俯江漢之流眺內方大別諸山南望  
瀟湘洞庭慨然遠想有詩百餘篇識者以爲騷之苗裔今所傳晴  
川集是也尋以次又掌典籍事宅繼母郭憂泣血三年毀幾滅性  
人稱篤孝居久之強起補舊職量移曹郎有日矣一日以友人會  
飲邸舍歡甚丙夜客皆去君始就寢明日日高不起其僕啟戶視  
之君卒矣君生平嚶嚶然慕古近狂不屑不潔近狷與人少可而  
多怪非其人雖比屋不相往來苟其道誼契合推心置人腹坦然

無機械無町畦而內行純備潔修自好尤爲士君子之所難獨不能突梯閃楡以媚世而詭遇耳語云寶劍不可刈非古鼎不可柱車其所挾持者非也譬輿人造車而方其輪欲以致千里得乎計倪曰有高世之才必有負俗之累於君益信顧人忌之天亦忌之使之願領沒世年甫及艾以死此則太史公所政疑於天道是非者也君之文清迥絕俗歌詩尤超逸似不從人間來予爲刊削存尙數百篇其友人李子田子將謀刻之其必傳於後不疑君卒以康熙三十九年九月十七日年五十有二娶李氏子一人炎今將以康熙四十七年三月三日葬曹村之阡銘曰

雲中白鶴兮警露高翔下視雞鶩兮爭趨稻梁幽蘭空谷兮無人

自芳莠施雜糅分羅生北堂巫咸上天兮天道茫茫孰分莠枯兮孰辨彭殤文冢幽幽兮上燭星芒嗟嗟馮君兮德音不忘

右墓誌銘王士禎撰

馮廷樾字大木德州人康熙壬戌進士甲子授內閣中書舍人十年不調癸酉秋假歸里門便欲作遂初之計嗣爲人事所偏未得堅臥庚辰再入都一夕病卒才浮於位而年不副其名瀕洋公嘗歎息謂近今文士之扈未有如大木者也舍人生平深相契者惟趙秋谷宮贊一人蓋以同鄉同年又在館閣晨夕過從其探六義之旨而詩乃大昌風瀟乎笙磬之同音桴鼓之互應矣朝官或得諸葛銅鼓兩人者各賦長歌七百言光怪陸離發皇耳目諸名

士皆閣筆漁洋公尤心賞不置遂欲哀兩人唱酬之篇爲二妙集  
行世兩人各固謝乃止時城主持文柄風流宏長雅道大興士  
之華鱗附翼霑殘膏而句聯馥者幾於指不勝屈兩人近在鄉井  
不肖作翕翕熱公卽號好賢能得士而以禮爲羅罫未能致之門  
下也舍人詩隨年編次初授官爲京集校士於三楚爲晴川集薄  
遊近畿爲雪林集假歸卜居於厭次之墟爲曹村集身後散佚殆  
盡後四十年里人有畱心風雅者爲之上下求索得五百首總名  
之曰馮舍人遺詩而宮贊尙健在作序以傳述往事感舊遊掩抑  
低徊猶深抱無與爲質之痛焉全詩神韻冷然論者比之斬新花  
葉蓋越軼山左門庭而又不墮辟支小果正與宮贊同其旨趣然

宮贊澄曼而舍人峭犇固不妨分別觀之

右小傳鄭方坤撰

舍人怪孤介不入大僚之門官閒無事枕藉書卷所爲詩清警絕  
俗詠古尤佳

右 國朝詩別裁集小傳沈德潛撰



匡廬詩集卷之二

五

崔甲默

康熙二十有八年己巳予迎養兩大人於京師先太孺人疾作聞  
崔成軒中翰以儒術精岐黃比叩所蘊理精法殊不類方術家言  
且詭甚篤予踵門後不俟頻延輒來視及致不腆辭弗受初以爲  
軒冕中相矜惜久之知於貧賤亦然閱十有一年己卯予再赴補  
而成軒辭人世且四載矣郝中美銓部貽予書謂予頗知成軒者  
令其子丙壁執其狀來乞銘予實固義弗容辭謹案狀而揚其梗  
槩以俟諸將來公姓崔氏諱甲默字認庵成軒其號也自始祖文  
明去小興州遷安平傳至公凡九世矣崗岢嵐學正文進保安令  
俊絳縣主簿承祀嘉靖辛卯舉人是爲公之高祖隱居教授從遊

者眾蓋自是崔氏以科第顯矣會祖瑛萬厯己卯舉人淇縣令尋  
調竹谿祖向思庠生父冕早孤其伯祖向學尹寶應撫之學克就  
以崇禎丙子經魁歷學職遷廬江令卒於官甫下車捐俸振饑民  
命全活者無算蓋累世積德至是且光大矣及公貴 贈父母如  
其官公少趨庭時一桌廬江公訓嗜古博學文淵瀚有奇氣爲蔣  
虎臣學使所識拔置博士弟子辛酉舉於鄉明年壬戌成進士既  
官京師貧窶無異諸生時然志守益定足跡未嘗一及貴要之門  
或有助資勸其別圖進取者拒之不爲意嘗曰堅忍二字是某一  
生得力處也與兄玉階先生訂學不尙口說人問之曰吾學期心  
得甘苦豈人所知講顏子所好何學論聽者悚起率以治六經爲

急而不流於泛濫詞章之習躬行篤實確有古人風先是遭廬江公及韓太孺人之喪啜粥飲水自始殯歷練祥以至禫除肉食未嘗入口未嘗一入私室與宴會其冠履葬祭之儀一以考亭家禮爲準事兄愛敬備至家庭間伯仲自相師友求之近今士大夫家槩不多見亦可以振頹俗勵志士矣至崇聖道倡建兩廡揚節孝表幽微皆盛德事獨疊疊爲之不少衰其他詩古文詞下逮書法亦皆有所宗非苟焉已者其志道而兼游藝者歟是可傳也已公卒於康熙丙子之十二月距生於順治丙戌之三月享年五十有一官內閣中書舍人 覃恩敕授徵仕郎元配段孺人繼配兩馮孺人 贈封如制子男五丙奎增廣生丙壁丙子武科舉人丙墜

丙陞丙壑女三孫男三戊鈐戊鈺姻閥具載吳君玠所撰行  
狀中茲不詳以康熙四十年某月日葬於祖塋之次爰系之銘銘

曰

南山之豹有文斯蔚北海之鵬有翼其翔飽德如公其羽豈不足  
爲儀而衍子孫之光也耶

右墓誌銘寶克勤撰

孫淦

皇清康熙庚辰十一月八日吾友孫擔峯先生卒辛巳春正月得  
凶問時疾作臥榻上不能爲位以哭輒輾轉牀褥聞大號慘怛對  
彼蒼奪我良友既而嗣君用楨以所撰行狀來求予爲文以碣諸  
隧上慟哉予於擔峯以同年訂同志蓋無歲不有尺幅相往來也  
而今安可得哉予於麗澤之助敘締交之先後紀其歲月錄其言  
行彙爲同志譜一書以擔峯爲首蓋不忘吾得力處也而今已矣  
擔峯前以思親假歸色養纔十八日而太公以無病遽逝人以爲  
承顏之日皆天曲成孝思之日今閱七載擔峯以瘡癢微恙經十  
日而逝前後如出一轍擔峯生順沒甯夫復何憾哉予因其孤請

爲表墓之文情辭懇摯而又慟吾道云孤不能起同志於九泉而訂千秋也因以一言鐫諸墓石曰先生姓孫氏諱淦字靜紫號擔峯前孝廉理學徵君之孫歲貢理學癯仙公之子也其先世爲容城人後隨徵君遷共城遂家焉自是游庠鄉貢皆籍中州其籍容城肇科第者實自六世祖運判公諱臣始擔峯稟徵君遺教契志於濂洛之祕旨益有年矣早歲穎悟異常兒習見家庭坐作揖讓之容心竊慕之奉以爲式入小學判穴鼠有青天白日豈汝肆志妄行之語或強之拜佛挺然不屈早識爲邪妄稍長爲水部馬公玉筍所重又爲中丞郝公雪海指爲鳳雛譽大起遭母許孺人喪年方數歲坐臥苦塊中日抱幼弟善摩之人挹其戚容歎爲難得

既而依伯祖五虞公課讀兼治穡事披荆棘歷虎窟中無忤色讀  
書攻苦有日徵君謂舉業德業非判爲兩途指示以本原之學遂  
大窺幽奧因悟天人合一之理而不疑於天道運行之妙益以擔  
荷斯道爲己任因自號曰擔峯蓋肩承徵君之志不欲視一等事  
爲難爲也以濟上事奉徵君北上歷試諸艱積勞致疾比歸三月  
伏榻上覺萬念俱空理境呈露自謂學問長進處每在險阻百折  
中也王子膺鄉薦壬戌成進士官中翰秩雖卑天下仰爲麟鳳而  
敬慕之一時碩老如魏庸齋湯潛庵崔定齋耿逸庵諸先生交相  
引重而海內文人若顧甯人錢飲光輩罔不折節讓席擔峯素志  
恬退未幾假歸得奉椿庭歡及宅憂一循古禮三年屏宿於外大



發先筭悉心警校器田付剗劓以壽世其時五虞克齋兩公督課  
諸子於上擔峯身導於下以故家庭閒肅肅雖奉教維謹凡遠  
近慕其學者爭延爲師至則隨才成就務俾有得其拔取闈士皆  
文行兼懋不類凡品其扶維名教如鹿忠節公會孫泓早逝孀母  
寡妻孤子一一翼之使無失所又爲楊氏畢婚嫁爲賀氏陳氏立  
嗣子諸爲人所倚賴類此更以其學之餘力精通音律謂此道格  
天地感神人勿視爲曲技小藝殆所謂神而明之者歟性喜遊每  
耽志於佳山水累日忘倦從崔宮詹祭告長白過廣甯出御條邊  
抵烏刺過望其地歎爲域外之雄觀是時壬戌試禮闈方竣捷音  
至人促之歸慨然曰吾不以一日浮名易千古壯遊也東登秦嶽

南涉江淮憑弔吳越近循太室而西出函關望華嶽探古蹟如指  
掌其觸之境而會之心者發爲詩歌無非性情名言卒之前數夕  
猶戀戀於四子醒書及徵君近指鹿忠節公說約不能忘云所著  
書有擔峯詩及諸遊記訂徵言祕旨行世擔峯文集醒書選唐詩  
通擔峯眞面目擔峯友聲諸集藏於家卒年六十有一遇 覃恩  
封贈父母如其官配楊孺人壺德著聞子用楨丙子科舉人能世  
其家傳用榦庠生省親京師屢過予論學尋卒士論惜之孫烱郡  
庠生喪其卜葬歲時子姓婚姻具悉行狀茲不載

右墓表寶克勤撰



邊修 施燾 黃天球

邊修字洪撰江蘇無錫人康熙二十三年舉人知奉天海城縣縣  
雜籍旗民帥弁挾勢要有所構率軍勝而民失直修主持法不撓  
民氣大伸在官七年幾至刑措勗他山書院以課士由是甲乙科  
踵起爲遼海望時高安朱軾方尹陪京曰邊海城乃非俗吏進部  
主事監海運倉刷弊如滌老胥目笑之號癡主事後邑人有施燾  
字對揚康熙四十五年進士歷刑部郎中燾號強項有貴人子悅  
一衣工婦數挑之不從陰使僕斃工事露獄具貴人行千金至燾  
所燾笑拒之而當其子罪黃某者倚勢脅人金且數萬人不勝忿  
訴所司諸司皆中其賂獨燾不可竟以獄上立實黃於法歲餘怨

國朝名臣傳卷之十一  
老臣四十二  
者披他事論燕浮躁休致歸黃天球字璋任康熙五十一年進士  
知靖安縣靖民多瘠首豁積逋賦籍開除細戶立飭清釐土田嚴  
革換段偽契及殺人沈命徙屍諸大弊吏胥不敢因緣爲奸有兄  
弟構訟久不決天球曉以天倫大義皆涕泣引罪明蘇州太守况  
鍾故靖安人也特建祠祀之壽擢禮部主事告歸

右傳秦瀛撰

孔尙任

東塘先生工樂府著桃花扇小忽雷傳奇盛行於世嘗作闕里志  
修族譜既成以名其二子

右山左詩鈔張維屏錄

塘得漢銅尺有字曰慮虎銅尺建初六年八月十五日造後又  
得一尺定為司馬文正公布帛尺自作漢銅尺記周尺考周尺辨  
三篇極精覈

右居易錄張維屏錄

按康熙二十三年 聖祖巡幸闕里  
孔公充詩禮堂講書官加 恩授國

子監  
博士

國朝書目考卷之二

三

施何牧

施何牧字贊虞江南崇明人康熙乙丑進士官吏部稽勳司員外郎著有一山詩鈔一山先生中歲歸田守正履道詩學斷斷唐宋之分不肖隨時趨嚮

右 國朝詩別裁集小傳沈德潛撰

崇邑苦蘆課大吏用何牧言除十之八九里人德之著日課藏彙又著明詩去浮韻雅史蟹等書鄂文端爲方伯時造蘆執後學禮

右崇明縣志張維屏錄





黎大觀

黎大觀湖南華容人康熙間舉人知宜黃縣築永豐陂建通津橋  
葺學宮置學田盡罷諸陋規治行一時稱最擢戶部主事

右述聞謀瑤錄

按黎公康熙二十六年舉人



楊國聲

公諱國聲字廣譽西崖其號漢太尉震之後也其先宏農遷延安  
又遷晉之洪洞明成化壬辰進士官翰林洗馬贈戶部侍郎諱傑  
者又遷平定州遞傳至進孝遷宣府萬全衛遂爲直隸萬全人進  
孝公生二子長日龍無嗣次日處士成公考也處士公初艱於息  
撫嗣子芳聲仕至浙江紹興府知府最後乃舉公及公弟英聲方  
是時處士公年已六十餘矣公生有異徵弱不好弄鬢年出塾誦  
習恆兼人方一星終處士公遽捐館舍母劉太恭人茹檠齧冰母  
兼父道公益自刻厲年十五補衛博士弟子員康熙二十六年以  
高等受知於學使者福山李公應薦遂以明經入太學三十一年

補正黃旗教習屢試京兆不遇乃循年例需次選曹康熙五十年除知浙江湯溪縣事縣居兩浙上流民凋俗劫公甫下車問民所疾苦務與爲休息凡利弊興除知無不爲最其大者革閭糧之無藝卻過山諸陋規之巧取其爲德於湯民者甚厚五十六年九月例轉湖廣彝陵州知州彝陵當三峽要衝爲楚蜀門戶難治什伯於湯且自滇逆煽亂人戶流亡田無定賦豪族猾胥因緣爲奸窮民膚剝髓枯甚至鬻子女以償無產之稅呼號之聲家十而九公莅任後悉心鈎稽履畝正額數十年積弊一剷其舊他如革行戶免夫差凡不便於民者務絕厥根不以因仍自貸也長陽縣民不協於令聚眾阻峒幾成不測大府檄公往公單騎入爲開陳大義

民皆涕泣自投立時解散歲丁未江陵大饑令以賑務得舉去公  
往攝篆多設粥以活餓者不侵不漏雁戶帖然前後三月所全活  
者數萬人無何大隄潰決公受委分修晝夜庀度千畝萬鋪雲集  
霧會隄成屹然稱保障焉雍正五年內升京府治中八年轉刑部  
貴州司員外郎 殿廷召對 天語褒嘉十二年升本部湖廣司  
郎中公歷外任久獄情誠偽無不周知又莅職精勤不使吏胥上  
下其手是以廉平之譽雖盛尉之惻怛于公之無冤無以遠譬也  
方公任彝陵荊州守某素與公睦既而請求不遂睚眦於公風動  
草搖百毒齊起賴大府深知危而獲濟然猶鑄公俸者十許年及  
公在西曹守以他事落職方謀湔雪故事廢員開復必由刑部覆

奏可否始聽銓除乃函書謁公陳其冤狀同列知其事者謂公宜  
白之當事以釋宿憾且可因以爲名公慨然曰危人以自利吾不  
爲人窮而更擠之吾不忍吾惟視事理之曲直而已已而守竟得  
賜環人咸目公爲長者乾隆元年以疾引年 予告歸里踰年而  
歿嗚呼公自通籍垂三十年由縣令州牧歷職曹郎俸入之餘脂  
膏不潤家本素封因官而落江陵之賑長隄之役捐墊各數千金  
私囊不給繼以舉息迫解組歸田舊時恆業鮮有存者無身之日  
家無長物室無羨貨故宅一區子若孫棄以予人僅畢喪葬視世  
之囊帛積金笑語秩終者真不可以道里辜計也公子鉉原任廣  
東海豐知縣有循聲孫二文灝雍正己酉舉人文濤乙卯武舉第

一人

論曰嘗讀唐孫樵書何易于益昌事而歎世無知者以視楊公楚越之治何如哉君子遭遇明時位不究用古今人非盡不相及也若夫捐棄徇嫌不乘人以隄此賢者所難庶幾張季直不疑之風懿哉篤行自治之徽烈矣

右傳周天度撰



目錄  
卷之四

五

章欽允

郡屬富陽有章村者今兵部督捕主事章公生長之地其先自閩之建甯徙而家焉公諱欽允字恭克號鱗長行四父集之先生以仲子貴 誥贈通奉大夫及其祖卽公同懷兄斐庵中丞邀錫

寵綸以並起家聲者也公少負經濟才常慷慨太息謂齷齪小儒往往壞人家國事不欲與邊幅餽生較長短每以男子生而志四方弗克建功立名慰父母萬一是自願不成丈夫也漢世以文學詞賦雄藝林如司馬相如居然入貲爲郎而卜式父子皆以助邊拜爵積官至通顯偉績炳然假使相如當時竟袖手以儒冠老所得孰優卜式諫止武帝興利欲罷鹽鐵船算當時東閣石渠文學

未嘗有言及此者以費奮跡豈其玩世蓋救世有足多焉宇宙之大何時何地不可以有爲顧視其人何如耳公生四歲而孤比丁丙艱則年已四十有三歲方其失怙蚤暮哭泣如成童旣長侍慈幃寢膳問視勳依古人必稱心乃已母病不解帶躬湯藥俟母夫人安乃安以禮義行其至性自出就外傳已然逮壯有室復然迄於歷久仕宦罔不然迺至萱堂斂影風木增悲歲時伏臘祭享淚淫淫下終身乃常然兄弟四人伯子叔子俱蚤折獨依依中丞仲兄白首兄弟之情以之沒身不聞有片語齒及析箸體先志也公孝友性成甫弱冠拜母堂下誓欲以七尺軀樹不朽大業遂杖策佐督漕王公幕恢復海州題授都閫是時 本朝定鼎伊始山澤

亡命嘯聚乘墉所在虔劉爲禍未已當事者四顧躊躇幾於撫劍  
無所用威緩頰無所用辯而生平文墨自怡吮弄毛錐千百輩莫  
不縮頸頓足徒作楚囚對泣王公需才甚急非其人穎然見鋒鏑  
莫可任公瞬茲蠢動贊王公草薙而禽獮之眾亂立洗桑弧蓬矢  
庶幾無負追思稟命母夫人策馬離別時母夫人固曰此余未亡  
人志也亡何居母喪服闋棄去舊職入籍宛平朝朔太學中又值  
四方多故念中外蒼生 皇心不忍益賦誠欲戢兵足餉庚癸無  
呼計無若輸委以佐司國計者之經費既拜秩晉兵馬指揮旋授  
樞部督捕所緝六旗逃軍尋根究柢株連冤抑爬梳無遺懲歷事  
八載如一日靡有困憊會公卿薦充會典纂修官公討論掌故絲

髮必理館閣諸先生無不服其校警詳明萬柳堂育嬰勝舉爲柴  
道人初始輦下諸公勇於爲善而苦無任事之人公鳩材庀工規  
模加敞其經緯成章調劑周密乳婦醫師咸有安置每日全活嬰  
孩十數人至今賴之長子絃官淮海勉以恪恭職守使兵民相安  
無曠爾位訓諸子皆似此下逮臧獲鮮不推仁以爲是亦人子也  
做陶公教子家法善待之撫伯氏子無異己子叔氏無子以其子  
嗣叔氏後接三黨恩意斐惻皆可師法友人薛寶之捐館公閱遺  
孤置之東牀余際鴻沒京師亦復爲之經營舍殮不遺鉅細忠孝  
之人必無涼德於公蓋可見矣余觀古人於大經根本之地曰盡  
心盡力曰鞠躬曰乃心罔不在王室曰生死交皆以勤勞不懈任

爲己責而不可辭公於君父兄弟朋友姪戚聞可以無媿矣公生  
天啟丁卯四月十一日卒時爲康熙丁卯三月一日余竊恃葭莩  
之好顧無能自效於公中丞公以傳文見屬弗能辭也遂敘而志  
之以自附於外史氏

右傳趙吉士撰



謝重輝

謝重輝字方山山東德州人官刑部郎中著有杏村詩方山學陶公未極自然而旨趣已高擺脫塵空真樸處殊近儲太祝也

右 國朝詩別裁集小傳沈德潛撰





宋元徵

公諱元徵字式虞號鶴岑廬州廬江人其先繩庵明洪武監察御史敢諫后以齊黃當國歎事不可爲隱廬之冷水關有疏棗鹿園集藏家明末廬被賊行掠至冷水一賊大呼毋掠恩人宋公里里以宋公全萬人宋公者繩庵裔孫儒醇也字衍魯邑諸生以文著而豪俠有方略賊遂圍城衍魯力捍之而退子繡崖貢生繡崖三子公其長也念厥先達家國變境道不躓且亨乘時光前烈其在茲砥身礪名惟學與仕而海內大難初平廬山邑在草昧閒宋氏爲廬望羣蒙賴以啟遂首捐貲鳩眾建學宮訓子弟及邑人廬之文風乃日起以康熙戊辰進士知河南夏津縣廉明蝗來不傷稼

運河淤漕滯待水無日公默禱河神卽躬挽大纜前行羣夫邪許從忽水涌沙分千艘行如駛豆口驛宦僕故殺不知姓名莫敢指公往驗有旋塵引馬首直詣其宅叱曰楊成者誰其人如神遣卽跪服行取歷戶部山西司主事員外郎遷刑部正郎凡疑獄滿漢推公決悉平恕方大用而卒於京歸葬於某鄉某原有文集行世公沒后弟衡以侍讀視學東西蜀名亦震而邑子進士孫維祺顧又出奇文兩人相頡頏然皆公所切劘遂使廬之文風卓然海內故凡言廬者必稱宋桐廬接壤予少時側聞公賢公孫宏塗已酉與予同舉於鄉年尙幼年丈某公長子也攜之入都再往返皆偕予時述公之事且乞爲墓表予因表公之生而繫乎一邑仕而未

盡於天下而繼之者將有在也

右墓表張尹撰

石墓表張尹撰

皇朝詩林卷之十一

全

汪森 曾孫孟鎮

汪氏始析支於姬姓魯成公之仲子生而彙左右手文曰汪爰以命名賜采平陽卒葬潁川城南實晉陳郡陽夏之靖仁里故世牒書潁川侯汪孫誦爰以王父名別爲汪氏誦子錡實載於禮經其裔孫代仕魯周秦漢徙洛又徙長安至三十一世龍驤將軍文和以建安二年南渡江家會稽當吳中郎將賀齊之平山越也開新都郡治始新迺復家始新後五世道獻當晉永昌二年令於歛迺家歛後八世華當唐武德四年籍歛宣杭睦婺饒地以歸於朝授總管六州諸軍事歛州刺史封越國公其勳庸實載於唐史後開徙涇婺源至六十一世接當宋初復繇婺源回嶺徙休甯邑治之

西後四世迪功郎漢生七子胥有聞於世而平陽系望乃彌高西  
 門汪氏柳塘先生莘嘗上書於朱子繇潭赴講筵之時而朱子深  
 器其言定齋先生一龍窩佐淮東李制置幕於德祐時者西門裔  
 也至七十八世憲明天順七年恩貢試第一銓判眉州憲新南昌  
 衛指揮僉事新生應亨贈承德郎應天府通判應亨生麟萊州  
 府經歷 皇朝贈中大夫麟英生可鎮明季游梧溪鳳里愛其風  
 土迺復繇休甯徙澗今嘉興之桐鄉郡延鄉飲大賓行義載嘉興  
 志可鎮生淇行詳嘉興府休甯志兩世胥以碧巢君暨君仲兄紫  
 微貴 贈徵仕郎晉 贈中憲大夫妣金氏 封太孺人晉 贈  
 太蒸人生子四伯高州通府名爾紫微舍人名文桂季司城名文

柏晉以才望顯而碧巢君叔子也蓋繇穎川侯迄君凡八十五世  
矣君名森字晉賢碧巢其號少而警穎尤嗜學偕紫微司城昕夕  
勛礪年十七丁中憲艱慟寢絕而出侍大賓公強爲慰解壬子年  
二十貢入國子監崑山殿學徐公時任祭酒激賞季試卷拔第一  
京輦名籍甚而過歸侍大賓公疾其卒也毀瘠彌甚君嘗承金太  
恭人誨曰學宜精進志宜遠大迺營碧巢書屋築裘杆樓庋書萬  
卷部次校勘不輟出而請益於曹倦圃王邁人曹顧庵三先生胥  
印可時劇論文章源流利弊傾倒無遺繇是君之學日進聲馳響  
附丹霞澹歸大師黃梨洲王玠石朱長孺竹垞潘稼堂暨汪鈍翁  
諸先生月輒緘劄榘藝業朱黃甲乙羸篋玠石先生卒前十日猶



賦詩並劄訣別期以歲寒愈右吉鹿牀犀月徐臞庵周簪谷沈藍  
村浦樗岡率館浮溪去而亟返西江彭躬庵魏冰叔粵屈翁山陳  
元孝閩余澹心趙雙白江南北宗定九鄧孝威百堂賀拓庵王惟  
夏葉星期董蒼水顧迂客俠君張日容何仲雲淞陸冰修毛稚黃  
大可會侯姜西溟黃晦求徐野君吳孟舉欽孫無言吳蘭次畢雨  
稼汪蛟門尤悔庵叔定東山暨海寓諸名宿士詩劄往復歲無曠  
郵其造訪華及堂者趾日疊至清談雅詠牋翰紛綸雖元顧氏玉  
山草堂倪氏蕭閒不是過而桐內帶水檣檝視他壯縣滋盛君且  
斯恢衍於范由黃奉角里之間營小方壺益羅放佚書借紫微君  
暨它雋賞士覈奇鉤奧不少怠曰吾以祇母誨也先是通府君性

爽邁署高州代僚屬償逋數千金丁卯秋卒君挈猶子司馬君耀  
走嶺瀧六千里達高興輒遣司馬君護厥車先歸而獨留粵綜畫  
受代諸務訖迺歸金太恭人哀差解癸酉選注判桂林府司糧兌  
君念紫微君業戀太恭人養不就銓命黃恭人並留養而急裝以  
行秋八月莅任立償興安修廨舍臨桂供器料費坊里始紓是時  
糧廩圯捐貲營葺中建平衡亭立出納規條十二則簡而易曉密  
而難犯糧三萬石輒先期辦院憲才之凡滯贖胥檄訊又檄攝臨  
桂永福陽朔篆三邑胥理永福獯羅扶養出入率以甲士從君畫  
策勦捕迺鼠竄又建聞嘯亭於鳳巢山外示游眺而陰以備斥埃  
烽燧之警氓始安堵陽朔歲歉中丞宛平王公檄啟廣儲倉人賑

斗米一日率發數千石中丞撥銀糴補什之三其餘則君捐貲以  
贏益之而陽朔氓始不飢是時衡靖盜竄於苗 詔楚黔粵會剿  
制府檄隨營監紀君偵渠馬奇三等百餘人繇靖奔北復遁生苗  
楊灣波浪地提士卒兼程進越牛岡丁嶺价竹雞心諸峻隘涉龍  
勝鷺灘灘徑偪龍坪砦督永甯營參將李君桂戰且合圍賊多俘  
而半逸山峒乃息士都乃遣隸密偵至三衝見箐茅中鐙微熒曰  
此賊爪探可用也飭令馳報苗頭而塘報營卒胥備械石以擣巢  
馬三奇勢迫出戰中石斃餘胥就縛君走筆草凱牒並蠻邦盾墨  
以上制撫郊勞曰武弁擁鐵騎千百建功迺屬文士邪已卯又檄  
攝桂林府府轄東江門永濟浮橋稅盡汰耗以惠商全州官道松

互三百里時多緣颶風仆論民補植而運仆松材新橋暨五十三  
橫艘以扞鹽埠例修之困商民胥頌先是桂林多才詰君建義學  
延經師以誨之雋者滋眾是秋佐承宣試遇士尤厚桂林舊無府  
志君延翁山元孝二先生於東粵靳備靖江掌故旣而不果迺輯  
粵西統載一書紀風土人物暨耳目覩記之荒杳瑣雋者以廣驂  
轡錄虞衡志焉庚辰遷判太平府司糧捕君禁苞苴斥耗羨鉅強  
培弱鎮南上石閒風采赫然檄兼攝思明壬午春又攝太平府土  
司承襲舊淹三四期以需賂君飭吏無少稽不贏六旬而茗盈羅  
陽羅白之系牒胥定二月擢知鄭州君官西粵十年前後獲代民  
胥環輪械不聽去比達桂而金太蒸人訃遽至泣血行喪闋起補

刑部山西司員外詳覈讞牘而要之以矜恕監督舊太倉重恤漕  
卒董戶尋擢戶部江西司郎中癸巳恭遇 覃恩獲 贈兩世如  
其官而君以積歲勞神慮浸耗又雅念華及游集諸君子知止知  
足之訓適亟乞身以歸時年六十有一矣君性敦恪誨猶子暨詰  
嗣給事君肅而有節嗜賑施休甯整宗祠首書若干緡以倡迺克  
械工柵鄉歲飲議賑眾皆協復發家困二百石迺克贍當畱高州  
時守王公業摧督豫學而六州縣漻糧萬石有奇君胥代償民幸  
脫追呼守亦以獲代去柵令蜀劉君卒子無以飯母君遺上田三  
十畝省大吏胥義之昭慶戒壇火仗宜潔律師二百緡以護四公  
之學鹿牀先生卒君偕紫微君設位於華及堂哭以詩履走支硎

惟室空訖乃歸嘗鈔穎仲黃君文可大師詩刊之他工誤述而無力以刊者多爲開雕又刊汪氏先賢方壺水雲詞方壺柳塘先生樂府也君手鈔經籍數百卷雅嗜古鏡碣摹帖覈體象尤朗析聞元明書畫暨古器云回歎輒詣藏弄家敬觀而退君嘗輯蟲天志名家詞話又輯粵西詩載文載叢載其偕友銓次者鹿牀唐詩正臞庵 國朝詩風竹垞詞綜而克牢籠而激滌之以扶古作者之興竅故所詣尤邃始刊桐谿三子集澹歸大師梨洲鈍翁序後有華及堂稟長孺冰修序續稟西溟序其它詩稟吟稟外稟日紀胥有序晚而合爲小方壺存稟十五卷竹垞序桐扣詞藎次序今稟存合詩詞十八卷嗚呼昔汪氏文詞尤高烏聊片石至宋顯謨學

士公文定公水雲先生元文節公明則高郵右相弋陽宗伯山陰  
給事欽縣司馬胥以文傳世而國朝南竟東吳望實滋懋至君  
拔起淞右晉而與海寓才士角其詞淳泓演漾不爲歎石窳蕩之  
音而味炙而愈出吾知近日詩緜南海新城樂府緜鹽官荆溪以  
外實克力闢一家言以上躋於浮溪學士大猷司馬之列而彌永  
平陽系望而俎豆之也當君乞身歸不預戶外事築知足軒獨偕  
紫微司城君從容談詠閒對客弈落子聲鏗然比司城卒根觸滋  
感雍正丙午四月得末疾而劇是日軒前風拔木五月三日卒距  
順治癸巳正月二十九日生年七十有四娶居安黃氏上舍贈石  
埭教諭振案女穎仲君妹始上舍僑濡須君就婚市月乃偕歸大

資公歎其賢泊金太恭人之慟中憲也手湯茗侍左右雖日迄下  
存夜迄雞鳴不敢離太恭人苦痰嗽晚彌劇扶掖撫摩尤謹碧巢  
君聞客刺至輒倒屣出恭人立辦醴茗營畫水陸供具移日浹旬  
不少倦而中歲輒長齋終身雅不御綺繡嘗以君艱於嗣勸娶副  
室陳厚遇之又娶劉吳徐慈育所生不翅己出劉生子元焯四歲  
而殤於桂聞之慟甚恭人年二十五卽撫紫微君仲子給事爲子  
慈而善誨丙午碧巢君捐館舍哀慟甚以十一月八日卒距癸巳  
十月二十七日生生卒胥偕君同歲而雍正五年丁未六月二十  
有四日復合葬於海甯縣硤石鎮之紫微山陽君 誥授中憲大  
夫晉三級勳 封監察御史黃恭人膺 誥封勳 封宜人子一



卽給事君名繼燦戊子舉於鄉今任掌河南道監察御史改吏科  
給事中晉三級以清慎著娶張氏 封宜人孫六廷英上堦上堦  
廷蔦上堦上堦胥工文曾孫九錯鈺鈞銀銓銷鈔鈔女四長適  
朱八甥次字吳次字李又次字陳胥望族孫女三胥適士族曾孫  
女五嗚呼昔許文穆公嘗誌指揮公墓宗伯本甯李公傳承德司  
寇王公狀萊州行甯都冰叔先生讓大賓公傳而秀水大宗伯杜  
公實誌其墓且爲之銘吳江南牀先生又嘗傳中憲而贊之今予  
承緒事命誌碧巢君黃蒸人墓而推本於西門世系暨君師友淵  
源所以著平陽之望繇宗彥思明比部二公而起雋科班曹司至  
給事而班臺掖當益振宋明僕射元樞端明冢宰業而碧巢發抒

心學實克流傳海內以焜耀於無窮今孫曾胥秀出目錫羨承休而莫之少艾也銘曰

維梧桐鄉實翔鳳凰巢是叶其鳴鏘鏘出而試政厥聲載揚懿彼意則展鞠琚璜今胥逝矣馳章焯焯詰嗣始雋文山芝芳爰登會省爰失望郎南臺左掖司邦之綱炎徽載巡荒澹水洋聞遠而歸孝思不忘卜壤筮吉紫微山陽天崇黃都水象漸江爰以甯神實闕實藏爰兆幽竈永永克昌以貽休揚系望之光曰維平陽長發厥祥

右墓誌銘儲大文撰

汪孟錫

君之沒二十二年矣予今八十四歲乃爲誌墓人生百年何予之於朋友一倫流涕無盡也傷哉君家故饒至於君獨貧君才早慧讀書最多謂當大有用於世晚甫一第而不壽嗚呼君旁通陰陽術數之學孔子罕言命又曰不知命無以爲君子孟子謂得之有命孔子曰有命孟子謂得之不得有命聖賢輒言命豈有外於君所推之珞璩術邪子於里中君前一輩人哭宋明府沛然陳明經向中祝典籍維詰則君之舅氏而外舅也同君一輩人則哭王比部又曾萬孝廉光泰君弟孝廉仲鈔明經又辰此豈予之命也邪自君身後諸郎科第仕宦皆不若君之身艱難今葬之日子男四孫男十七曾孫男四女三女八女五此固君之命然哉君姓汪氏

諱孟銷字康古號厚石浙江秀水人先世休甯 國初來遷桐鄉  
曾祖考森桂林府通判戶部江西司郎中 誥授中憲大夫有小  
方壺存彙粵西統載若干卷妣黃氏 封恭人本生曾祖考文桂  
內閣中書四舉鄉飲賓 誥封奉直大夫有鷗亭集妣黃氏 封  
宜人祖考繼燦鷗亭次子後於弟森康熙戊子舉人歷官吏科給  
事中巡視臺灣妣張氏考上墳歷官大理府知府妣祝氏皆 誥  
授奉直大夫 封宜人大理四子君其長也大理教子嚴宋儒理  
學書皆自授之雍正乙卯爲娣婦卽祝宜人之女姪蓋大理惟及  
爲冢子娶婦其諸子女皆君於父沒後爲弟昏而嫁其妹者也乾  
隆元年丙辰君年十六侍母從父官盛京入官京師辛酉母沒君

扶柩攜弟歸里卜壤葬母於海鹽山茶花漾之原乙丑大理出守  
遺家歸丙寅大理卒於官君奔迎柩歸合葬於新阡休甯之汪皆  
祖唐越國公華遷桐鄉者至君始以進士起家既官中書謂身已  
食祿所受虛悉以畀兩弟又辰彝銘君之於父母弟妹不能不謂  
其孝友也桂林裴杼樓藏書甚富皆借鈔於江南故家同里則倦  
圃曹氏竹垞朱氏子嘗共君言書且無論其聚見即可矣君之於  
書豈止見也哉壬戌癸亥甲子閒君及弟仲鈔字豐玉同余於小  
方壺萬卷之儲豈止觀其大略丁卯余答京師庚午君與豐玉同  
舉於鄉而豐玉年未三十以癸酉沒嗚呼才與命相妨蘭摧玉折  
其奈之何哉自後君爲瑁操舉子踏蹬名場中閒支離藥餌者且

十年嗚呼讀書之有命也又誰謂不然哉所著古文辭經術金石  
雜彙未整理其已刻者厚石齋詩集十二卷豐玉桐石草堂集萬  
孝廉集君序而刻之嗚呼嘗謂吾黨諸子皆不壽其詩之已刻者  
若王比部丁辛老屋集萬孝廉柘坡集君及弟豐玉集陳明經毓  
恬菀村集雖莫信其必傳然異日采乾隆閒詩不能舍此數家不  
收也則其可傳者信在是已君以乾隆庚午舉人壬午春恭遇  
聖天子三舉南巡趨赴常州恭進迎 鑾詩龍井見聞錄十二卷  
得 旨畱覽 賜緞二匹 召試入選授內閣中書丙戌成進士  
仍官中書轉典籍升吏部文選司主事恭遇 慈壽覃恩 誥授  
奉直大夫後以子如藻官恭遇 萬壽覃恩 誥贈朝議大夫生

康熙六十年九月十四日卒乾隆三十五年閏五月二十八日享年五十君之舌如蓮藥微有痕若將分辦然吾未見有二也其來益有自哉君辦事內閣卽充方略館纂修又御批通鑑輯覽平定準噶爾方略大清一統志皆身兼其事君約身以儉同儕譏其儉不中禮則固兩失於偏矣君之得於天者未嘗不厚然亦未嘗不薄也使不苦加折挫然而稍申之壽則所出入敷布儒者之效豈不遠且大哉元配祝氏秀水內閣典籍候補主事維誥女誥贈宜人晉贈恭人孝於舅姑動識大體祝自明虛齋先生萃歸田講學輩出聞人女子而有舊家風範若恭人者惜其無年耳生康熙五十六年十月十八日卒乾隆九年八月十七日年二十

八繼室金氏仁和乾隆壬戌會狀禮部侍郎姓女 誥封宜人晉  
封太恭人其稱未亡人也二十二年閒成就諸子大有造於家  
生雍正八年四月十三日卒乾隆五十六年八月二十四日享年  
六十有二今以乾隆五十七年十一月七日合葬於桐鄉縣永新  
圩之原子四如藻祝氏出乾隆乙未進士翰林院編修出守撫州  
升興泉永道未赴丁繼母憂如洋金氏出乾隆庚子 恩科會試  
第一名 殿試第一甲第一名 賜進士及第翰林院修撰上書  
房行走爲仲鈞後君先以如澈後仲鈞殤復以如洋也如潮妾范  
氏出直隸武清縣丞范氏生雍正十三年七月初十日卒乾隆二  
十六年七月二十八日年二十七如淵金氏出嘉興府學生其合



國朝書目卷之十一 卷一百四十二  
葬也元配繼室妾祔一穴四兆銘曰

曠野無山兮水流東千秋白日兮長掩封

右墓誌銘錢載撰

康古曾祖晉賢先生讀書好友建裘杆樓以貯圖史有華及堂以  
延賓客故子孫皆好學能文康古與弟仲鈞咸以詩名康古兼精  
術數自謂壽命不過五旬屆時而卒子如藻如洋

右湖海詩傳張維屏錄

張丙厚

君姓張氏諱丙厚字爾載號腹庵河南磁州人也自曾大父司馬公以下世爲名貴人君年二十餘舉甲乙科好射獵飲酒歌舞盛服玩而倜儻有奇氣君父學士樸園公視學江南余與魏忠節曾孫方甸同客使院其後方甸天死父老子幼余通書於君浹月而其父來告公子屬吾鄰郡通判歲給三十金去官乃止吾友崑繩歿子兆符貧無依時君罷官家居余命抵君君曰吾田可分宅可割也立與百金俾迎母妻遠近親故孤嫠聞之多盡室而往君皆館焉充食者百餘人家人苦供億君曰吾平生妄費惟此少近正耳樸園公患君耗用陰命君兄爾牧守臧及爾牧病篤始命君稍

其數而語不可辨其繼室曰吾不知君遂不復問樸園公及爾牧相繼歿爾牧諸子異母或不能平君戒勉而命各以意占田宅之近者腴者而自取遠瘠括餘財悉推予之自是母子兄弟無間言置義田贍族鄉人緩急叩門未嘗以有無爲辭久之無老稚背而皆稱腹庵公始君令交城輦家財代貧民出賦爲刑部郎中凡數家請屬長官力不能支則使君主斷眾皆避之年羹堯總督川陝與君故固請以往盧中丞傳語將委署內地監司君曰吾田宅園林聲伎圖畫足以休老何所不足者徒以少負氣世受 國恩常欲管兵絕塞爲是以來江東方望溪以書責余曰子之西行危若朝露今乃以監司屈邪時巡撫總戎旅見羹堯盡階則膝行以前

而君長揖屹然眾人中如是者三遂自陳願咨部候補尋卒於京師始君與余交余常落落而君暱就余或構曰方君謂子執袴全無知厥後君心賤其人且覺其撼余乃告余以構語及余以南山策牽連被逮至之日冢宰富甯安與司寇維治命閉門毋納諸司君手牒稱急事叩門而入問何急曰急方某事耳因陳古義以勸富公聞者莫不變色易容語具余癸巳結感錄中嗚呼如君者乃古所稱跡弛之士也而不得一試其用以顯功名徒以貴遊豪侈爲眾所譏其知者亦僅目爲任俠故君遇非窮年非促而實齋志以歿惟余知之不可以弗識也君卒以雍正二年某月享年五十有九母成氏相國太傅諱克鞏之子前相國文穆公之孫也妻崔

氏早卒繼室王氏子長壬次坤女一適宦族君之父母及兄余皆有表誌故世系不異以某年月日葬於某鄉某原銘曰  
命於眾爲豐遇於才爲窮行於俗多詫志於古多同吾爲君銘信  
而有徵

右墓誌銘方苞撰

按張公國子監題名碑  
康熙三十三年進士

鄒世任

鄒世任字太沖號宗山湖南鄒縣人康熙甲戌進士由陝西真甯知縣累官吏部稽勳司郎中鄒氏自良巖先生祖希閔父承芬以孝友行義世其家至吏部之子孝廉肇杰凡六世矣而時人罕能言之吏部與湘潭張大令文炳善南麓集中有賀鄒太沖成進士詩所云一代大儒膺上第十年宰相戀神仙者也其傾倒如此居官尤多善政有貽嶽堂集

右沅湘耆舊集小傳鄒顯鶴撰

鄒世任字太沖東安訓導定周子定周以孝友聞刻銘學舍士服其教世任康熙甲戌進士知真甯縣悉革陋規官無徇儲行取吏

國朝文獻通考卷之百一十一

部主事選員外郎亦以廉謹稱

右述聞謔瑤錄

三

譚尚箴 韓楷

譚尚箴字克非湖南衡山人康熙甲戌進士知雞澤縣與民休息  
在任五年如無事然尋內擢士民攀轅號泣車不能前授文選司  
主事晉郎中典試浙江所得多知名士尚箴在銓部久稔吏胥弊  
竇句稽盡致奸無所容大學士李光地甚器之後有韓楷字皆木  
善化人幼穎悟寓目成誦康熙戊戌進士授吏部主事以親老乞  
歸不與當事通謁有勸之仕者曰吾不願以升斗祿違膝下養也

右傳李元虞撰





宋聚業

宋聚業字嘉升江南長洲人康熙丁丑進士官吏部文選司郎中  
著有南園詩藁南園以剛直觸忤年制軍致身亡家破其人足重  
可知矣

右 國朝詩別裁集小傳沈德潛撰



國朝耆獻類徵初編卷百四十二補錄

郎署四

孔尙任 弟尙鉉

尙任字聘之先聖六十四代孫父貞璠康熙二十三年 聖祖仁  
皇帝幸魯尙任以監生同舉人尙鉉充講書官釋奠之後 聖祖  
御詩禮堂尙任進講大學聖經尙鉉進講易繫辭 聖祖諭大學  
士明珠王熙曰孔尙任等陳書講說克副朕懷著不拘例議用又  
命尙任尙鉉同衍聖公毓圻等導 駕徧覽先聖遺蹟 迴鑾授  
尙任等國子監博士明年奉 命從刑部侍郎孫在豐疏濬黃河  
海口後以部議停止仍還 朝三十三年遷戶部主事尋升員外

郎三十八年以事休致回里尙任博學有文名通音律諸祖庭典故嘗患闕里舊志未備廣搜博採別撰新志二十四卷他所著有岸塘文集湖海詩集會心錄節序同風錄行於世尙鉉字立之康熙十一年舉人官至戶部主事世職知縣貞堪子也

右家傳孔繼汾撰

國朝書獻類徵初編卷百四十三目錄

郎署五

王之銳

席啟寓

方登嶧子式濟

王丹林

段昕

許迎年

周邵生

潘麟

郭洛羅君

徐珽

顧陳圻

郭偉

汪鐔

吳麟

黃承祖曾世琮  
李天龍

林佶

秦休

彭朝佐

龔夢熊

田同之

李開葉

曾逢聖

郭元鈺

高不竊

國朝書獻類徵初編卷百四十三郎署五目錄

補錄

補錄

劉青震

高不篤

伍士琪

國朝耆獻類徵初編卷百四十三

通奉大夫前署江西巡撫江西布政使司布政使湘陰李桓

郎署五

王之銳

河間王仲穎先生既歿之十年予里居始得據其生平槩略爲之傳於戲先生純粹篤實好學君子也其居家真孝弟立身真有本未讀書真有見地古所謂獨立之士行不愧影寢不愧衾孔子之所謂善人孟子所謂善信先生真足當之惜乎生無大表見歿無有傳其學者然而風期落落古與徒矣先生諱之銳號退庵仲穎其字也世多知其字故以字傳先生先生幼志聖賢之學年十四



讀書至五十有五章瞿然曰先師成童已志大學吾去成童一年  
耳留小學之未通乎於是苦心焦思深自淬礪愛中庸齊明盛服  
誦書搦臥次夜必整衣端坐或竟夜不寢康熙丁丑學使安溪李  
文貞公按河郡以課講受知屢召之召與語大歎賞曰南方無此  
學質也選貢之使從遊旣攜之直撫幕下每公退輒與講說古先  
微言精義七年盡聞文貞性命河各算數音韻之學文貞入相招  
至京師邸第與景州魏大司空廷珍交河王少宗伯蘭生偕一日  
語三公曰盍從我往迎 駕熱河乎於時 內廷新立東書房集  
文學才技之士先生心知將薦己也不欲以捷途仕辭文貞心重  
之不復強己而魏王入 內廷癸巳魏捷鼎甲辛丑王 賜第皆

入翰林先生恬然安之當是時文貞以道德文章網羅天下登高而呼天下聰明才辨之士雲集響應上者雄奇駿偉敦琢鴻業以經世垂久次猶雍容詞苑鼓吹休明其餘翹首歧足攀援而取仕宦者紛綸不可勝數先生澹然沖默其閒獨與江陰楊文定名時以切劘身心研究經義爲務文貞嘗語人曰從吾遊者不翅數千人然而潛心學問不求聞達南楊北王二人而已其爲文貞推重如此館於恂邸王雅敬禮之一日小疾王遣醫來醫著方必首淺淺出王府先生曰吾疾果非淺弗瘳乎醫曰此故事耳淺出可勿用也先生笑命去之以纂修周易折中敘廣東陽春令至數月不能桔槔獲上改教職歸雍正六年里游饑先生家餒困就依所親

河南確山令適有旨召詣京師將有質豫督不知所緣逮之銀  
錯送刑部至則以固無罪也一訊罷遣除萬全教諭乾隆四年趙  
泰安相國疏薦其學行擢國子助教居國學十二年自大司成下  
遇之皆有加禮年近八旬日與諸生講授不倦己已冬詔舉經  
學之士梅總憲毅成何少司空國宗並以疏舉壬申上詢國子  
耆學祭酒以三人上先生與焉召之見病不能行其一入者皆  
超擢司業而先生竟以明年謝病卒於家年七十有九先生之學  
主於躬行實踐孝弟之氣滿容充體祭必敬喪必哀忌日不樂終  
其身有兄暴於行動遇以非道先生怡然順受事之如嚴君或以  
過先生先生曰世兄弟多貌相承吾兄遇我嚴弟我也吾何憾事

之益謀及官太學兄書至必再拜然後發兄病就訣京師先生躬  
菜餌衣不解帶月餘卒哀慟欲去官遂服以例不可止居恆莊肅  
如對賓客擬而言議而動口不道人過有德於人終身不使知之  
自奉極薄糜祿所入節縮以奉其兄及親戚之乏者未嘗蓄一錢  
其德行醇備自鄉之耆宿及太學士大夫稱道如出一口方望溪  
先生曰仲穎孝友本天性學問法程朱其自命處真有矯矯不羣  
壁立萬仞狀而廉靜之操恐安溪公有不如也與予祖友善予自  
孩時卽聞予祖道其行義及見之京師每侍坐氣不屏自肅嘗過  
其學齋老屋空曠四壁颯颯有風時方冬了無鑪火獨據一案經  
籍鱗次滿前凝然若不知寒者先生涵養堅定然每自視歛然嘗

言被逮時內省無咎乃猶食不能下以爲學問之氣未充其言不  
欺志類如此諸經皆通貫尤邃於詩易自言自康熙丙戌迄雍正  
庚戌玩詩至千周子嘗窺見其手注易冊又聞四子書及詩皆有  
論述今索其家都不可得矣於戲惜哉

右傳文潯撰

按選拔舊制逢卯酉年舉行至乾隆十八年  
始定例逢酉年一舉篇中康熙丁丑公受知

學便安溪李文貞公屢加歎賞至其選  
拔充貢常在康熙三十八年己卯科

席啟寓

君姓席氏先世望安定遠祖武衛將軍溫避黃巢亂渡江徙於吳居洞庭之東山曾祖洙祖攀皆不仕以子本楨貴推恩均贈太僕寺少卿崇禎之季寇賊搆患歲旱蝗人相食本楨饒貲財發其橐白金八千兩糴米於襄樊輓之以舟順流下東賑青兗南散給吳越全活者無算而又請毀家以佐軍儲巡撫應天都御史分宜黃希憲聞於朝特授文華殿中書尋加太僕寺少卿階亞中大夫君本楨之季子諱啟寓字文夏以國子監生援例補工部虞衡清吏司主事 皇朝設六部職掌多準明代獨工部四司每受制於內務府一失其意雖材美工巧不以爲良而虞衡掌山澤之

禁鼓鑄之局驗試之廳盜甲之廠除道捐溝之役事最繁瑣主者  
恆救過不給君遇人以和與物無忤甫莅官兼攝營繕屯田二司  
庶務悉理旋吏議鑄級畱任尋加二級 覃恩敕授文林郎贈厥  
考如其官封母延太孺人既而請假養母以所居僻左獨學無友  
乃徙宅常熟春秋佳日版輿奉母往來題其圃中居曰娛暉之堂  
滋蘭樹蕙周覽湖山之勝歲己卯 御舟渡太湖親幸其圃君拜  
伏階下 天子顧問曰爾年方壯何以不來供職巡撫都御史宋  
公準對曰是以終養其母請回籍者 天子爲之霽容手摘盆中  
蕙蘭花登舟明年延太孺人卒君居喪盡禮終三年未嘗去蓑麻  
齒肥甘也服除甫七月而君卒享年五十有三君家居以孝友敦

陸聞鄉里及在京師遭季父喪解官持服歸修族譜置祭田立義  
學人有稱貸者未嘗權子母質庫不計錙釐人咸樂其寬厚少問  
業於華亭葉生有馨生固幾社名流也予友平湖陸君隴其學以  
躬行爲本既釋褐知嘉定靈壽二縣事循行居天下第一徵入試  
四川道御史以直言放還君夙與訂僑札之分具書幣聘之至家  
教其二子永恂前席陸君沒君厚賻其喪葬申以婚媾集其遺書  
悉爲開雕行世暇又輯唐人詩百家亦鏤版行之 天子幸第時  
何進 乙覽一時言詩者返之正音焉永恂前席俱歲貢生亦從  
子游君之葬也兩生來請銘嗚呼躬行之君子吾見罕矣以言乎  
論學則以正以言乎取友則必端以言乎仕進則知止蓋得夫陸



君講習之益者多也是不可無銘辭曰

古之葬者之用石則書方遣書策後乃納銘于邱阿辭苟達不在  
多席君新阡頂山麓治蘭室封斧屋樂哉斯邱無後艱宜爾子宜  
爾孫孰銘其藏小邾氏匪異人陸君友

右墓誌銘朱彝尊撰

方登嶧 子式濟

方登嶧字冕宗江南桐城人官工部郎著有述古堂詩冕宗以朋  
友負罪牽連謫戍處極危苦之境而能種花賦詩以尋樂意所養  
定也迨奉 詔赦歸已殂謝塞外矣以孫問亭宮保貴 贈如其  
官

右 國朝詩別裁集小傳沈德潛撰

方式濟

方式濟字沃園江南桐城人康熙己丑進士官中書舍人沃園中  
翰考冕宗水部以朋舊負辜牽累戍邊並及中翰既父子並殂塞  
外見無逾此矣而詩格廉悍樂府尤矯然不羣境不足以困之也

國朝詩別裁集小傳沈德潛撰

後以子問亭宮保貴 贈如其官

右 國朝詩別裁集小傳沈德潛撰

王丹林

王丹林字赤抒浙江錢塘人官中書舍人著有野航詩集赤抒詩  
品在牧之飛卿閒羈畱日下諸鉅公交口推重方欲薦揚明廷而  
中道挫折詩之鐫刻者亦少藝林至今想望之

右 國朝詩別裁集小傳沈德潛撰



段昕

滇之段氏自晉天福中建國大理世有其地至元憲宗時始入朝  
其閒若正淳遣使求經籍信苴福條奏地圖又著征行集今浴川  
所撰述殆遠過其先世

皆山堂集序王式丹撰

庚辰秋晤段玉川先生於青城之署因盡睹其由滇入燕之詩先  
生以癯然之軀陟高臨深朝有吟夕有紀古今勝蹟各有憑弔

皆山堂集序魯亮儕撰

余喜游覽性耽苦吟陡壁峙天蛇盤鳥道人所震怖者余敲句未  
成已過之矣危灘怪石天塹奔流人所惕懼者余扣舷而歌又過  
之矣

皆山堂集序昕自撰

國朝元正... 卷一百一十二

右詩人徵略張維屏錄

按段公雲南安甯州人康熙三十  
九年進士官戶部湖廣司主事有

皆山堂

詩集

許迎年

許迎年字穀士江南江都人康熙庚辰進士官中書舍人著有槐  
墅詩鈔穀士詩品如靈和楊柳初日芙蓉晚唐中最近溫岐情韻  
勝也配徐淑則互相酬唱風格略同藝林比之秦嘉夫婦

右 國朝詩別裁集小傳沈德潛撰



國事考原英格考卷

卷四十三

ナ

周邵生

周邵生字自稷一字西昀湖南邵陽人康熙四十一年舉人任德安知縣被劾事白引見以刑部主事用歷試江南貴州司補授左見審司尋乞養歸

寶慶志邵生潛心宋五子書卓然以古賢豪自期許至性純篤事父先意承志官邵曹時以文行見重方侍郎苞謂其能扶植正學善化郭煥嘗致書云束髮受書卽知西昀先生爲當今學行第一煥與其子思仁友善邵生從弟邠生亦有名

右湖南文徵羅汝懷錄

日本書紀卷之三十一

十

潘麟

仁庵既歿之四十二年冢嗣濶始以行狀走千里徵余銘余故不習爲諛墓辭率謝去獨念余未及識君雅知君工文藝自先義門老人嘗推重之故通家也又其遇合有可法者乃與銘君好學常申且不寐得頭暈疾且咯血不少悔其於書癖焉淫焉咋之瘳之厚積之而一發之於文穿穴微徑闢除何術心與夢界手招日出而自占籍海甯久躋諸生中壬午僅乃登賢書年五十餘矣此事故學之一隅而全量孕焉非天不靈非人不宏非師友不明非身依乎聖賢之桀獲則無以知其心聲而比附其神形數者蓋又必齟諸白首而後成成矣輒不利決科而決科若振契者不必盡成

也既再困禮部試旋入中書數年歸著書自娛年七十二卒君胚  
胎前光竹垞太史誌其墓湛菴先生諱開者君考也幼喪母事父  
勤於子職湛菴授經遠道月必往省覲事無纖鉅不告不敢行尤  
善事繼母雖性忤急二十年無觸忤母嘗語人吾生者弗若也撫  
愛諸弟如一身嗚呼君老不得志無偉岸卓絕可驚之事雖然庸  
行愈難耳此君之文所從出也君卒於雍正癸卯四月配于氏有  
賢德後十年卒子二長貢生卽徵余銘者也次鳳翔庠生出爲仲  
弟後孫二人銘曰

維君諱麟字喜會仁庵其號世吳興里名仁孝君其應文雖載道  
聖賢憑九天九地潛與騰萬手布爪誰則能佳城鬱鬱白骨凝有

文先生此下纏吾呼大鳥啄青蠅

右墓誌銘何忠相撰

國朝子集卷之九十四

四

子集卷之九十四

郭洛羅君

君諱某字謙齋世居長白山之沾河祖諱唐柱官建昌城守尉考諱石圖以五品官管顯親王府事督泚墅關生二子君其長子也君少補滿學生員由吏部筆帖式授禮部宣讀官轉戶部四川司主事出理滇黔兵餉以薦升兵部車駕司員外郎加三級復以薦升工部都水司掌印郎中奉命督西新關監理臨清軋廠後以估計護城河工料去職君爲人勤敏廉辦歷官所至有聲其爲戶部也故事刑部及督捕司軍流罪人皆由戶部四川司遣發而吏多畱難有淹繫至經旬者君令到日卽發囹圄爲空各省籍沒家產具冊達部奸胥輒深文咨駁借以牟利君立法禁之宿弊遂革



其理兵餉也由楚之常德水運至偏橋衛復由偏橋衛陸運至平越黃絲驛道遠而險役夫多逃竄大兵屯貴陽飢不能前君以厚直僦蠻苗爲役夫晝夜轉輸十二日達貴陽一軍歡呼士氣遂倍時內閣學士佛公倫侍郎金公鉉以大臣督餉屬酒相勞曰微君幾誤大事其爲兵部也值 駕幸盛京緣途驛騎皆取辦於君無稽遲者佐尙書薩公賧河東饑察覈浮冒經畫有方災黎盡霑實惠其權西新也禁侵漁絕需索商民皆感悅而吏無所容其奸蓋君政績之可紀者如此 天子以君爲才嘗不用部議特用君或已別用人矣復更命君往人皆謂之宜而同官亦莫之忌也君性孝友母歿時年尙少哀毀不欲生父卒亦如之事繼母如親母鄉

黨之貧乏者周之無所吝教諸子嚴而有法子檢討君讀書成名  
奉使不辱皆君之教也君生於天聰八年五月十二日卒於康熙  
四十一年六月六日年六十有九祖考以君貴皆 贈通議大夫  
祖妣妣皆淑人娶塔他刺氏 封淑人子四人長阿金日講官起  
居注翰林院檢討次阿保早卒次德芳次德馨孫男六人女一人  
檢討余辛未所得士也將葬來請銘遂爲之銘曰

維才之宜維用之時不昌其施有後之貽後千斯年視此刻辭

右墓誌銘張玉書撰

按張文貞公集君姓作郭羅絡闕名是編將帥三達爾漢 國史館傳作

郭絡羅氏均系出沽  
河謹依史傳更正



徐珽

光祿徐丈於乾隆戊午歿於其子鍾海鄆城署中越二年庚申葬君於九龍山馬鞍塢之新阡赴到屬爲銘雲錦不敢辭乃追憶君之生平書其大端他無述也君諱珽字子常別號南臺系出魏僕射貞侯後有諱循者仕元爲松江府佐因家於華亭其始遷常州之無錫者君八世祖華六公也諱應龍號敬橋者君祖考也 贈儒林郎諱文珽號竹溪者君考也 贈儒林郎諱文瑞號雲峰者君本生考也君自幼資性過人迨長讀書好古專心爲詩古文詞孜孜不倦無閒寒暑康熙四十二年癸未春 聖祖南巡君於臨清獻賦一篇詩一百二十韻 召賜御舟 命隨駕進京四月十

九日引 見於暢春園奉 旨著在蕉園教習 欽賜國子生兼  
掌吉祥門南府景山三處校對丙戌正月十四日暢春園 賜觀  
燈火君進觀燈恭紀詩二十韻庚寅 敕修西頂廣仁宮告成  
命撰碑文勒石君以布衣遭 聖祖特達之知可謂非常之榮矣  
乃嗣後浮沈里居者至有八年庚子春復蒙 恩召入內廷四  
月扈從熱河至避暑山莊 諭在流杯亭校勘內府祕書 恩遇  
之隆視昔有加乃以丁本生考艱回籍 世宗卽位始以從前議  
敘補授光祿寺署正方喜供職內府圖報 殊恩旋改調外官出知  
湖州德清縣自謂一官一邑差可自效事與願違莅任未幾卽遇  
水災首先辦賑輒多應墊所採購穀石復因雨徵變致虧帑項被

議落職蓋君本寒素且以京員初任未諳逢迎長吏巡道某爲故人子謁時略去拜跪某少年執袴覺藉嫌生借是以揭君遂繫獄幸君子鍾海已成進士選庶常給假來浙設法補償而德清百姓感君平日之慈惠亦爭捐助不少懈重累始釋然繫獄已七年矣世途之險巇君且極嘗之始君入贄來平湖館於陸氏軸寤軒軒爲外祖閣學公故第君元配馬孺人早亡繼娶陸孺人雲錦之從母也因得從外祖母胡太君所以甥禮見君目雲錦曰善讀書異時必能以詩文著名贈斷句二章迨重過當湖鬢髮盡白外祖母時在雲錦家君因寓於寒齋之藝舫酒闌燈施每道兩朝之知遇輒泫然淚下及詢被繫之由又未嘗不勃然怒悵然悲也其題

藝舫詩云有齋名藝舫位置亦寬然渺渺孤蓬至蕭蕭一榻聯生  
從九死後話盡十年前相對曾非夢親情久益堅其自道其心事  
如此丁巳君子鍾海改授鄆城縣知縣迎養於署五月遇 覃恩  
得以原官光祿寺署正 封儒林郎兩孺人並 贈安人九月君  
謁孔林登泰山肩輿不能至輒徒步躡其巔竟以此得疾卒年六  
十有七著有南村詩文集二十卷詞二卷初娶馬氏繼陸氏皆前  
君卒子一卽鍾海名梁棟癸丑進士翰林院庶吉士改授山東曹  
州府鄆城縣知縣馬安人出女四人孫一人銘曰  
所遇所施詎止於斯而竟詘於時天固將以傳其詩文詞夫又奚  
恨而奚悲

右墓誌銘張雲錦撰

國朝重修天潢後乃錄  
卷之四十三 國朝五

七



匡章  
卷四十三

一

顧陳垆

吾友顧行人卒於乾隆十二年六月二十八日其孤文龍以乾隆十有三年十二月十日葬君於菱涇新阡蔗田先生之昭穴以狀乞銘於余按狀君諱陳垆姓顧氏字玉停號寶陽子系出陳黃門侍郎野王十八傳至宋翰林學士蜚蜚三子洽深滔深始遷崑山縣明成化閒析崑山爲太倉州 本朝雍正閒析州爲鎮洋縣今爲太倉州鎮洋人深十一傳至世祿世祿子忠君五世祖也高祖雲從以長子燕詒貴封承德郎刑部主事曾祖翼詒禮部儒士祖慶錫字子餘一字元善父宏沛字天霖號蔗田太倉州學生君貴封文林郎行人司行人封公二子君居長次廷恆癸卯舉人君

年十七補州學生年二十有八乙酉舉於鄉康熙閒以薦入湛凝齋纂修六壬易課律數淵源中和樂府諸書書成議敘補行人雍正閒 聖祖升祔禮成奉使頒 尊號詔於浙江 世宗臨雍奉使行取衍聖公及諸家博士於曲阜差督通倉糶米廠事竣移疾歸卒年七十君資稟超卓少負奇氣大母王氏麟洲先生女孫嘗爲君述風麟兩公逸事君聞輒起舞戍辰浙人爲狀元君時年十一謂塾師曰江南人何遽不如浙耶師舉黃陶庵狀元三年一人吾輩當爲千古一人語語之君大悅曰然則科名不足重人也年十六私與友人王小山時翔約入深山讀書鍊性十年乃出母夫人聞力沮乃止君讀書必詣微多冥契拊獲不主故說爲詩詞數

百言立就逸趣全溢然以爲戲其傑構必窮日晷力追古人而後止談諧跌宕善談言於義理精奧是非疑似以單詞剖春然洞然聞者頓解心折遇所不可持論嶄嶄賁育不能奪砥礪志節堅若金石乙酉計偕入都嘗客相國西田公所以與公次子同榜也公以國士目之癸巳萬壽加科春鄉秋會常熟嚴僕少虞惇典湖北鄉試君故交也邀君往闈事畢而嚴公病劇執君手欲有託君許以送喪歸里嚴額謝而瞑君經紀其喪弔者至爲之拜賓送柩東下中道嚴公長子至或謂嚴公子來君從此入都尙及秋試君曰吾已許嚴公矣可食言乎卒送抵家遂不會試輦下公卿聞之益以是重君安溪李公虞山蔣公爭欲羅致門下君不可其在湛

凝齋也所纂修皆出君手每書上 聖祖必嘉獎屢得 溫旨總裁以是器君禮遇出同館右時總裁館事者皆藩邸也邸貴重館中人惴惴將事承意恐後君氣和而守介非館事邸有所委輒不應廩餼外邸有所贈同館皆受君獨辭某邸有著作必屬君點定一日盡駁其彙邸怒擲彙於地君徐拾起曰王無怒爲去取在王邸復詰畢竟誰是則曰陳垆說較長既退眾爲握汗同館方學士苞曰君奈何捋虎鬚君曰吾所守者是非之正守正無罪阿則罪矣明日邸卒從君說愈推重稱爲顧夫子未幾 聖祖賜京師飭官津送封公來京就養封公至君方在熱河 聖祖遣官護君問京省視諸異數皆邸轉奏之力也然竟不得一第每榜前胥謂

顧玉停作會元乃稱及榜發主試者以不得顧玉停爲恨卽及第者亦憾榜無顧子及就館職議敘以去諸邸咸惜之而君顧不以介意爲行人頌 詔於浙浙撫方監臨鄉試移文欲止 詔書境外以俟撤棘君移覆接 詔重於監臨且非內簾比使臣不敢宿君言於荒郊也撫軍遽出迎 詔人謂君得使臣體通倉監督時號爲美差識者避之君請行自來監督有染通永道通州牧持之漁利君至則洗手從事道與州牧失望百計撓之不可動米高價平糶者踊躍乃愆倉場侍郎以燒鍋有厲禁限買者不得滿石以沮其糶君白倉場廠所糶者紅朽小民固可充飢卽爲酒酒以禦寒亦所必需化無用爲有用猶愈於耗新穀也倉場悟立馳其

禁君通達治體論事洞中機要儻大用際事權必能決大疑定大業然鋒稜錐錐不爲詭隨亦必不偶於時詆諆推抑所必至新之一第行人二載略見節槩或亦造物者適以全之也性至孝先居母喪三年不飲酒食肉不內寢麻衣草履未嘗一日去身末俗居喪衣墨見君衣如雪婦豎嗟歎目爲眞孝廉自行入假歸侍奉封公益謹家故貧閒出負米不踰百里復不踰一旬封公寢疾君知醫酌製方劑輒效封公或不寐君登牀撫摩卽熟寐或疾甚則日視溺色而調治之乾隆元年 詔起官辭弗應尋 詔中外舉博學鴻詞顧公琮巡撫江蘇欲以君應君力辭而王宮詹奕清已以名聞部檄敦迫竟以親老辭不出封公沒君年已六十有三哀毀

一如居母喪余時官河南欲延主大梁書院講席授范文正憂中  
掌學睢陽故事以勸君執象山責呂東萊故事堅謝不赴余爲之  
媿少讀皇極經世書至無口過易無身過難無身過易無心過難  
四語愾然汗下有忽然見天頭頭是道境象後讀參同契首楞嚴  
謂性命之精在此二書實一貫也手自箋注晚讀象山集掩卷歎  
曰先生之學以躬行實踐爲主謂其近禪者妄也從其教而入方  
打得過誠意關自命爲象山後身人有以程朱之學諷之者君亦  
無所迂然所心得所服膺則在是實力體驗制行益密家居士大  
夫吉凶事必就君問禮人有過懼君知質疑問字者至必盡曲折  
引誘後進尤懇懇爲人作誌傳辭不溢美其子孫或不厭求易集



字不可得足跡不入公府事關風化昌言於公無所徇於交遊廣而嚴不矜意氣顏其堂曰淡成以志也蓋主持里中名教者三十年君平生絕學有三曰字學曰算學曰樂律嘗造八矢注字圖說謂字學居六藝之半聲音樂也形體書也而口出耳入手運目存則皆有數焉惠學士士奇孫通政勲得其書長安肆中置酒延君請其說君爲言經聲緯音開發收閉之旨及每矢實義一矢未發則聲不能出字有所避八矢盡而音定字死矣二公歎爲天授胡少司空煦標其書曰此亙古未開寶學也初得徐文定公麻書研求一月遂勑造開方句股諸法陳諭德厚糴精九章見君所造異之遂盡以其學授君及在湛凝齋外廷送算學三百餘員候試主

者令君與試 聖祖親策之得七十二人君爲冠 內廷呼爲算  
狀元君於字學算學迺流窮源遂通樂律嘗與桐城胡司業宗緒  
談則針芥合餘莫能解也兼精醫術往往活人所著有洗桐集九  
卷抱桐集三卷八矢注字圖說一卷鍾律陳數旋宮知義各一卷  
無益之言一卷讀四書偶見三卷讀內則一卷內則音釋一卷合  
注龍虎上經參同契二卷注首楞嚴五卷癸丑治疫記三卷君娶  
陶氏崑山處士陶元嘉女 敕封孺人恭順孝謹先卒子二文龍  
州學生陶孺人出文鏡側室周氏出女三一適州學生王修前卒  
以節孝 旌一適陸光遠前卒皆陶出一幼未字側室沈氏出孫  
二賜略余與君束髮締交嘗以師與兄事君自余再起不相見者

十有二年余有疑雖數千里必馳書質之君每書至極盼余歸余亦已有歸志而君竟不及待傷已其何忍銘君然何敢不銘銘曰流不窮兮君之才介如石兮君之操名途蹇兮門內修口懸河兮躬蹈道覽千古兮探百家眼獨明兮心獨造富著作兮藏名山銘諸幽兮萬世告

右墓誌銘沈起元撰

顧陳埈字玉停太倉人少有文名康熙五十四年舉人以薦入湛凝齋修書書成議敘授行人司行人出使山東浙江所至得大體還督通州倉雍正三年以目疾乞歸陳埈有絕學三字學算學樂律俱極精詣尤敦於內行居喪不飲酒食肉不處內學宗陸九淵

自命爲象山後人性侃直纂修時總裁以文屬點定一日盡駁其  
彙總裁怒擲地陳瑋徐起拾之明日總裁悟卒從其說監倉洗手  
從事官吏經紀不得恣侵牟里居非公不至官府畱心著述教授  
生徒質疑問難者滿座乾隆元年 詔起官以親老不出又時舉  
博學鴻詞詹事王奕清薦之巡撫顧琮亦將論薦而時議當俟巡  
撫偕總督學政考試遂辭不赴時論高之年七十卒

右傳王昶撰

顧陳瑋字玉停太倉人康熙乙酉舉於鄉以薦入湛凝齋纂修律  
數淵源中和樂府諸書議敘補行人司行人二年移疾歸自是屢  
有薦辟終其身不出矣爲人負奇氣自少時而已然康熙戊辰科

龍首浙人也時年十一謂塾師曰江南人何遽不浙若耶塾師舉  
黃陶庵狀元三年一人吾輩當爲千古一人語荅之則大喜曰然  
則科名固不足重人也讀書多冥契搢獲不主故常爲詩詞數百  
言立就逸趣空澗然率以爲戲若鴻篇鉅製必窮日晷險覓狂搜  
力追古人而後已其在湛凝齋也所纂修半出其手書上得温  
旨王大臣雅重之禮遇出諸同館上每試期朝士皆矚目謂得此  
君作第一人乃稱揭曉之夕通衢列炬誼傳顧陳垺得會元者眾  
喙如亂鵝鴨已而寂然如是者不一次書成卒敘官以去士論惜  
之自不以介意也平生絕學有三曰字學曰算學曰樂律嘗造八  
矢注字圖說謂字學居六藝之半聲音樂也形體書也而日出耳

入則皆有數焉初得徐文定公麻書研求一月遂搆造開方向股  
諸法在湛凝齋日各省送算學三百餘員集闕下主者令與試  
聖祖親策之得七十二人君爲冠 內廷呼算狀元云既於字學  
算法溯流窮源遂通樂律亦所謂神解非闇解歟少與同里王小  
山爲性命交其詩名亦相伯仲然顧奧博得之學力者居多王俊  
逸本諸天分者爲勝子雲相如同工異曲婁東人士或不至河漢  
吾言云

右小傳鄭方坤撰

顧行人陳埴博學能文懷祖纂成家業著有七經訓詁異同土風  
錄識字略陳檢討四六補註

右湖海詩傳張維屏錄

按國朝詩別裁集以  
公爲康熙甲午舉人誤

郭偉

郭偉字靖園雲南新興人父上誥以孝行聞親嘗患瘡上誥吮之得愈偉成康熙丙戌進士歷吏部稽勳司員外郎遇事必精覈吏不得售其奸性伉直每抗顏爭於上官前乞罷上官卒從之不欲令其去丁艱歸廬墓三年以哀毀卒人咸稱孝如其父

右述聞謚瑤錄



皇朝通志卷之三十三

三

汪錚

汪錚字鍾如湖北江夏人康熙開成進士孝友誠篤歷官戶部主事典倉儲手自清算積弊一清改吏部黜陟大政引例據典持正不阿

右述問 湛瑤錄



吳麟

滿洲吳麟字子瑞吳查拉氏康熙戊子舉人原任內閣中書舍人與  
修明史禮部左侍郎滿洲徐公所薦與西林相公交好今為明史  
綱目纂修官奏授中書

右 熙朝雅頌集鐵保錄 按吳公一字晚亭乾隆丙辰薦舉博學鴻詞著有黍谷山房集



黃承祖

曾世琮

李天龍

黃承祖字蘭起湖南湘潭人康熙己丑進士授內閣中書時中祕  
諸名宿皆折其才行以繼母年老乞假歸養母壽百歲承祖家居  
與邑人張文炳曾世琮走詩唱和卒年逾八十曾世琮原名用瓚  
字虹受父啟先沒值茶陵寇警舉邑奔竄或勸之避世琮泣不從  
寇至感其義舍去旋偕承祖成己丑進士授中書舍人典試廣東  
所得多宿學旋監北新倉潔己任勞復監督天津水利經畫多成  
效遷刑部主事數平反疑獄博學工詩古文時推重之子鈞以諸  
生舉賢良方正官清水知縣又李天龍字雲階亦湘潭人康熙戊  
戌進士選庶吉士授檢討改兵部郎中性孝友父沒廬墓三年撫

幼弟飛雄友愛無間析產多所推讓家居手不釋卷尤精易理卒年七十

右傳李元度撰

林佶

佶工於楷法文師汪琬詩師陳廷敬王士禎琬之堯峯文鈔廷敬之午亭文編士禎之精華錄皆其手書付雕廷敬士禎之集皆刻於名位烜耀之時而琬集則繕寫於身後故世以是稱之

右 四庫提要張維屏錄

鹿原善篆隸楷法家多藏書徐乾學侵通志堂經解朱彝尊選明詩綜皆就傳鈔

右東越文苑傳張維屏撰

按林公字吉人福建閩縣人康熙五十一年進士官中書著有

樸學齋集



日本書紀卷之三十三

三十三

秦休

秦君諱休字又休號岵瞻更號匪莪其先元至正間自韓城始遷  
邵陽者曰淵居縣東鄉溝洫村淵五傳至和以義俠著和生繼夏  
繼夏生學古學古生王塾授壽官君高祖也曾祖五舉順治戊子  
拔貢生祖錫中順治甲午副榜考汧邑諸生君官翰林遇 恩贈  
祖考兩世皆儒林郎翰林院編修加一級祖妣黨氏 贈安人妣  
甯氏 封太安人太安人方震君夢虎入室驚而寤生君七歲贈  
君授之經已曉大意贈君歿太安人食貧躬紡績縱君於學以從  
祖進士鎬爲師補邑博士弟子康熙戊子舉陝西鄉試壬辰成進  
士改庶吉士散館授編修君在史館以能文章名關以西太安人

壽終京邸君徒步扶藜還崎嶇山谷間哀感行路服闋補原官  
世宗憲皇帝簡幹員覈畿輔倉穀君預行廉辦肅給歸報稱 旨  
時吏部選郎缺人特授文選司郎中君掌銓益刻苦自勵晨入省  
理案牒達暮吏無敢爲欺俄 命往浙江以知府用制府彭城李  
公一見喜曰紹興郡最劇得君莅之吾無憂矣守紹未弔月中  
旨補廣西潯州知府李公奏畱君浙江不允潯多盜土官裔陳邦  
甯者頗爲盜囊橐君開誠招之邦甯誓薙盜自效君用其力悉捕  
獲盜迄君去盜不復發察豪猾苦民者痛繩之建社學捐膏火資  
親與講師弟子之禮潯士競奮攝鬱林州事鹽梟殺捕役尸不獲  
君自詣郊外跡之天雨一老父持雨具前云吾知尸所行里許愈

不見掘地果得尸按殺者愾伏眾以爲神君初監薄稅吏執匿稅者至君令稅如額卽遣之丞讒之布政使改委丞丞後以賄敗愾愾慮報復君閱實引例議減上巡撫乃前布政司也至是見君謝曰守眞長者先己疏還君於朝入補戶部貴州司員外郎升刑部浙江司郎中滿漢尙書侍郎惜君去戶部以雲南司郎中奏雷報可會茶陵彭尙書獄起牽連逮問按驗無所得猶坐發北路臺站效力君空手攜一子一僕詣戍所遇大旱蒙古軍士乏食君亦僵臥絕糧積二十七日肌膚顏色如故蒙古皆驚異總管爲請借帑金一千四百兩給軍食移原籍覈家產以償君乃強起食粥居塞外三年乾隆改元兵部籍上君家產詔予豁免君始還京

師尋得 旨回籍又六年而病歿實乾隆七年壬戌春三月二十  
日距其生康熙十八年己未得年六十有四娶李氏繼娶任氏子  
二煒商煥祖煥祖卜乾隆八年冬十月某日葬君於北嶺之原以  
李孺入耐先事謁余銘余與君同舉進士又同官翰林十餘年知  
君爲深君爲守不苟媚巡撫布政司爲郎官援上耶君故赤貧借  
國帑不能償願行賄媒薦達耶 今上登極茶陵自獄中 召拜  
左都御史適無有爲君言者竟坐廢以終可悲也已君性質直篤  
行義少所師從祖卒君罷朝謁爲位哭甚哀作述恨詩十五章聞  
者爲之雪涕平生知交故人雖久歿語及輒嗚咽與仲弟友愛好  
異書金石古文精篆刻解音律先後分校禮闈所得多知名士晚

年尤屹屹著述探古今詩說折以所自得爲誦詩三十卷文集十  
六卷詩集十二卷其在塞外集錄者雅方八卷君遭憂患余遂不  
復見君其忍不銘銘曰

魄歸於土面陽之阡輕清上升周流乎天卮君一時垂者萬年

右墓誌銘蔣恭棊撰



彭朝佐

公諱朝佐字曰泉號中行曾祖靜涵公前庚辰特恩進士官戶部山東清吏司郎中鼎革後杜門卻軌終於家父大愚公喜交游家日落沒於江州旅舍公號泣走千餘里扶柩歸鍵戶攻制舉業而應童子試輒不利時先大父司空公奉諱里居課諸子姓閱公文器之云是子當一蹴遠到津致游太學登康熙甲午順天鄉榜教習內廷雍正六年選授雲南易門知縣再署大理賓川州所至皆清慎自矢惠愛有聲遷臨安嶠峨令莅任甫數月卽有普洱逆猥之變普洱夷猥藪也其地去省會千里而距嶠峨較近諸猥皆前守苛虐句結爲亂勢猖獗甚與嶠峨連界之新平元江河西石



屏南安等縣同日告警省發兵救援取徑岢峨僻小邑一旦爲六  
路衝繁羽書旁午供應不支公竭蹶辦理上不侵帑下不擾民未  
幾而賊眾轉寇縣治矣公之初至岢也斷獄虛公夷人德之其圍  
普洱攻新平屠戮官吏若草菅然而於岢峨顧先遣飛騎擲木牌  
於城上以好語款公公不爲動亟登陴誓守環顧城內外民居寥  
落夷獫雜處多謀爲內應者舊設鎮兵復調往他所營中止畱幼  
丁十餘名老武弁一員耳眾患之公曰無恐急傳諭士民洩水灌  
壕東扉乘堞毀附近樓觀以防矚望集土練難民以供協守不兩  
日備禦粗具賊已蜂擁四山進攻東關廂甚急祿以仁者裁革土  
官之子家藏甲數百夙爲羣獫歸心邑中紳士讐之變起咸詣公

計先斬祿上憲亦密令抄戮猥種并擒以仁公力排眾議以百口保祿不叛且言妄殺無辜甯死不可遣吏召以仁至開誠待之委以兵事以仁感激泣下曰公活我活我願以母妻質遂移家入城率眾扞禦卒賴其用賊人之焚劫東關廂也時援兵未集危在頃刻合署內外號泣不止公偶自城上歸見而叱曰死於土乃吾職若等從吾死幸也何泣爲命昇火藥三巨桶置室中各焚香一炷於其上曰城破火急舉俄而省中兵至賊稍卻而領兵官郭某不戢士卒橫擾民間婦女公詣郭責以大義略杖數人兵士遂藉口軍需缺少拉公自辦旣而擁入縣署搶掠器物欲壞法堂爲薪公訶之羣謀曰未已也且將割爾知縣頭公大笑云知縣頭不比賊

人頭難割第恐爾等與領兵官頭亦不保耳用是屢與郭忤及事  
急復就公計公念嶧邑城垣僅存東南西三面高不過四尺其向  
北里許久成平地不可守乃謀築土坡於內卽日選壯丁二千人  
限以尺度刻晷告竣眾踊躍赴役歷四晝夜功始畢賊粉粹枯爲  
丸納雞卵中散擲城上如煙霧聞者咸閉目噴嚏公以布障之丸  
皆外墜賊乘夜負草掘城公命煮人矢伴石粉桐子油極熱以鐵  
杓灌之羣焦灼而返相拒二十日公目不交睫賊聲礮然公袍袖  
及鬚眉槍箭穿衣成穴者纍纍公不自知賊計窮且知土坡成守  
益固遂分往鄉鎮剽掠公偵知語郭統大兵居城而自偕祿以仁  
潛師暮夜薄之於桂峯坡後斬獲無算一日官兵逐賊去縣百餘

里受圍糧且絕公急督夫運餉而親率士練齋旗鼓從間道直叩賊營令騎大呼曰我公來降者免死賊眾驚潰乘勝擊之殲其魁一人斬首五十餘級投誠者千數餘皆遁去郭聞之乃歎曰不意書生能辦賊迺爾然終以前憾故掠城守功自居公不見錄或語公曷自白乎公曰吾知濟國事而已他非所計也先是賊寇嶠時搶劫性鹽諸物散給各村寨夷裸偪取其直及賊退官兵緝獲五百七十餘人指爲賊黨欲盡致之死公憫之堅請上官分三等定案量加責罰五百人無一監斃者嶠故有義學自兵興拆毀殆盡公捐俸修葺集能文之士課藝其中面加甲乙復於政治之暇延諸生入署聽講如是歲餘經公指授者先後取科第去其篤於造

士如此又善斷疑獄邑有張大經一案事涉神鬼連年不決公訊  
得其誣爲焚香籲神神不復祟眾謂公卽神也以公事望誤解職  
廷見調湖廣羅田縣治如令滇南時繼因失出免而歸自是始  
無意於仕進矣 今上初御極眷注老成 召江陰楊公名時於  
雲南諮以人才楊公首列公名蓋逆猥蠢動日楊公適罷雲撫任  
閒居滇中知公勞勩弗著而公實未嘗一通私謁也未幾楊公沒  
天子益思其言乾隆十年 特旨內召公 陛見以年老辭乃  
授國子監助教借補學錄越己巳歲卒於官年六十有五公氣度  
冲淡外和內方恆以名節自勵其先後歷官屢躡屢起夷然自若  
廷召時吏捧檄至門詫曰是得毋誤耶比居京師自供職外仍

諫徒給繫不屑一騎馬傍貴人門故雖表節邊陲晚邀異數而官卒不顯亦足見公之梗槩云

論曰嘗覽史載龔遂治渤海虞詡平朝歌寇奇績炳炳輒慨然歎爲難能及閱公所紀守嵎時事古稱儒者知兵猶信公一小臣耳廢且久以前保障功終荷賢公卿薦剡受知 聖主嗚呼此先大父曩日所爲卜其遠到也

右傳彭光斗撰

日本書紀卷之三十一

三十一

龔夢熊

劉大山曰望溪在獄思老監惟各牖於壁間氣可少蘇使圻者計工費同繫者曰居老監者多生獄也吾輩死人也而憂生人氣鬱柰聞者笑何及出獄未兼旬蒙 詔入南書房數日得七十金刑部主事龔君夢熊引爲己任禁卒司獄難之訟言於六堂曰牆有穴大盜重囚逸出咎將孰任龔君曰牖函木格囚何從逸乃具結狀獨任其辜牖乃成望溪事無足異龔君之義則不可沒也

右記事方苞撰

按方公事在康熙五十二年



皇朝通志卷之三十三

三

田同之

田同之字彥威山東德州人康熙庚子舉人官國子監助教彥威爲山蘊之孫而篤信謹守乃在新城王公有攻新城學術者幾欲拌命與爭論詩一篇其宗旨也不直趙秋谷宮贊故大聲疾呼論之

右 國朝詩別裁集小傳沈德潛撰

臣等才庸庸劣  
不勝任事  
伏乞  
聖鑒  
訓示  
謹奏

三

李開葉

康熙辛丑閩士與余同舉進士者十三人而同官翰林者六人乃二十餘年閒亡者大半昨又哭磁林李君於其子河閒官廨俯仰淪落傷已其子河閒縣知縣時憲扶櫬歸里次年將舉君之喪與君夫人合葬於井關外傅築山馳書具狀請銘諸墓余義不敢辭君諱開葉字奕夫號磁林姓李氏福建福州府福清縣人始祖長發自江南入閩居福清平北資窰里傳十餘世祖啟周僑居福州遂家焉父士亮以君貴 贈翰林院庶吉士生三子長開英次開萼君其季贈公慷慨有才識海寇鄭錦作亂攻資窰掠婦女三百餘人要贖贈公鬻產千金請贖四十六人賊義之盡釋所掠而去

鄉閭德之事載閩志君資稟純篤穎慧過人十四喪父泣血三年弗御酒肉初君大父歿葬福州之西園山贈公嘗曰吾死當守父墓君長遵命議耐葬贈公於祖塋時兩兄客吳未歸君與舅氏登西園山疑穴有水探之土溼循脈上三丈許得穴君急議遷舅氏謂此利長次不利三子選葬期需五年乃可且棺敗易棺恐難君泣曰吾父露葬幾及二十年日夕痛心泣血苟利兩兄卽不利甥甥之願也昔賢擇土不及拱血禮士踰月而葬家禮以卒哭甯有待耶至附身附棺必誠必信孫子事也何敢憚焉乃齋戒奠告治棺易之下時日於祖父主前遂遷葬新穴以贈公柩耐焉庀治葬事臥殯側者三月哭泣如新喪閩俗酷信堪輿家言葬父母後稍

不利亟遷以希福或向不合則數十年不葬以爭地訟者有司案  
積如山士大夫家尤甚君較然不徇流俗知安妥先靈而不爲利  
害說奪故當日臨奠者咸感歎以爲難丁酉舉於鄉辛丑成進士  
選翰林院庶吉士 世宗登極詔詞臣上封事公封事稱 旨特  
改吏部員外郎需次銓曹故事庶吉士改部曹爲左遷而 世宗  
意以詞館爲散職將整頓部務非重其選不可也當是時輔政大  
臣隆公領吏部尙書事荷殊寵握大權傾動朝右奔走功名之士  
懼不得出其門下隆公重君名欲羅致之遣介示指且賀君矍然  
曰受爵公朝拜恩私室古人所恥某不爲也遂引疾歸乾隆初廢  
舊盡起或勸之出君笑不應終其身無仕宦志日危坐小亭纂輯

濂洛關閩諸書以授學者集文公家禮司馬溫公雜儀編爲儀禮輯要以授子姪曰此人倫日用之要不可一日離好吟詠嘗曰詩貴自胷襟流出而讀之無易盡之意所著崇雅堂詩鈔十一卷四書文兩冊行世外著儀禮輯要教學纂述教學源流論語論文各若干卷祠堂祭祀條約時祭存略各若干卷皆存於家娶林氏來歸前一日君補博士弟子員太孺人曰娶婦得好音必佳婦也閏月太孺人喜謂君曰新婦賢孝甚得我心明大義可以佐爾矣君常客館他邑孺人內理家政奉親教子身力瘁焉太孺人年高孺人奉侍晨夕弗離丁亥太孺人歿孺人哀痛迫至遂至貞疾君年四十不遇時或歎息孺人曰親在早成名親歿卽再遲未晚其孝

謹知大體如此越一年孺人卒君歿於乾隆癸亥閏四月二十一日年七十有二孺人先卒年四十有一乾隆九年甲子十一月二十九日葬於傅築山之新阡在西園山里銘曰

權門競趨人涉叩否難進易退甯拙毋苟濂洛關閩對此不負君有同心少君左右用成高節厥稱良偶我誌斯銘以垂不朽

右墓誌銘沈起元撰





曾逢聖

余抱痾里居杜門絕客夏六月廿有四日郡太守曾公曰理偕其弟曰珏踵門請曰先府君歿距今將三十年曰理兄弟各以奉職四方未獲求當代大人先生作銘以誌府君生平梗槩用是日夜慚悚今葬有日矣屈指先人舊交知先人行事惟先生一人耳曰理又待罪知郡事郡爲先生珂里敢泥首以請憶余與君訂交時君任直隸吳橋令余每北上畱君署中數日公餘倡和君同里萬宇北學士未第時亦在坐君獨賞予詩謂有漢魏遺意君任俠倖入輒周里黨之貧者受者方懷感而君猶歉然坐是用當誦閱今五十年每歎君之才昭實有過人者而阻於遇限於年之不永不

獲大展抱負長子曰瑛官闕屢以政績被薦爲臺灣郡守有聲尋卒於官今仲子守吾郡清身苦體部民畏威懷德上游咸器重焉曰珏醇謹署令著循績予向以君不永於年爲恨今後人克自振拔且爲君幸矣乃按狀而爲之誌曰

君諱逢聖書自字也又號慎齋姓曾氏宋南豐先生裔遷居撫之宜黃明中葉遠祖學孔公爲甯藩孔目官始居會城邑庠生諱日旭字大臨者祖考也以君貴俱馳 贈中憲大夫諱有典字吉甫者考也 贈奉政大夫加 贈中憲大夫君生而穎敏性孝友稍長博通典籍書詩古文皆經名宿指授重然諾有膽略未弱冠居贈公喪哀毀骨立主家政十餘年遂棄舉子業援例入太學授南

城副指揮理冤除蠹遇徵發期會無累民絲黍時武進趙恭毅公  
爲都御史極賞識之每於公所舉君廉幹以示屬吏方裁薦剡以  
內艱去服闋補直隸吳橋令益勵清節發奸摘伏無所隱蔽以薦  
除順德府同知 世宗憲皇帝知君才能特授順德府知府有妄  
人鄭永書鐙節被酒陡發狂疾作謔語不休爲人首告將劫庫謀  
不軌城門晝局居民震恐時君以公赴保定聞之馳歸捕訊俱屬  
子虛立懲釋之被誣者置不問皆羅拜涕泣而去其遇倉猝決斷  
類如此大吏益重君器局可肩大事屬邑邢臺黃山中有劉彭馬  
等八姓聚族以居持準提齋教鄉人相率持齋者眾奉 密旨誅  
捕君廉知鄉愚惑於二氏教因明末避寇屏居山麓勾福於神祈

免鋒鏑誓世世子孫不茹葷以荅神貺殆百餘年矣每當佛誕之辰山左右近境聯會進香釀金建佛殿供奉佛像幢幡甚盛有類百蓮聞香教者 憲皇帝防微杜漸降 旨捕治君奉檄措置盡善焚其書毀其祠宇甯其室家俾各安生理未而月而大定奏入 上溫旨嘉獎手詔督臣有如此賢員當畱心提拔之之 諭時方改守巡道爲藩臬廷論君與浦君文焯堪膺是寄適督臣奏大名乃直隸財賦之區賦多積逋官吏蠹民因緣爲奸非君不能清理請調報 可先是議改大名巡道爲清河道 敕督臣遴選幹員補授首列君名次浦君文焯次趙君國麟奉 上諭曾逢聖浦文焯另有用處清河道員缺著趙國麟補授尋推升陝汝南道引

見時改授刑部正郎以江南司兼左右見審司事多所平反旋被議解任卒於旅邸 今上御極之初擢滯起廢方欲柄用則君已下世矣惜哉君任事有膽略官箴輔二十餘年有疑難案件多倚君辦理君亦以上游信任就事直陳同事忌君流謗下石者不少君怡然曰是可勿之校以謗受屈命也吾安吾命可耳卒之日家無餘貲惟圖書數卷而已乾隆二十四年某月某日合葬於進賢門外老龍窩之麓銘曰

邦之循良南豐裔化被大陸歷瀛冀由令而守無躡次薦者推轂陳殊異忌者下石工替蔚嗟君奄歿志不遂至今耆民感清惠嗇於其身昌其嗣家傳治譜民所暨佳城鬱鬱樹藹藹吉壤封兮安

匡廬詩集卷之二

四

厥配以妥以侑欽世世

右墓誌銘錢陳羣撰

郭元鈞

郭元鈞字于宮江都人家世業鹽筴饒於貲維揚爲東南都會俗  
尚淫侈而豪商大賈尤以財雄視閭左率鮮衣怒馬選妓徵歌載  
酒平山堂二十四橋爲樂一佩一裘之麗一花一石之奇至耗中  
人而家產說者謂隋煬遺風迄千年猶未熄于宮以富家子獨  
好學深思傲睨一切漱芳潤而傾瀝液邈然與古爲徒可云出水  
芙蓉皜然泥而不滓者也弱冠爲詩二十三而集成猶以學步初  
作爲不足存兩塞鐙施冥心獨坐而殫精畢力於斯所謂手之所  
觸肩之所倚足之所履膝之所踣奏刀騞然莫不中音如是者又  
四年而拔地倚天揮斥八荒大風激海疾雷破山靈怪不可方物



而極乎文章之能事矣宋中丞選刻十五子詩行世以齒次第王樓村年長矣列首卷于宮最少殿焉然樓村耆宿晚成臚唱第一而于宮假蹇場屋其卒也以貲爲郎何福命相懸如是在陸先生纂大家文謂有唐一代始於韓終於孫如虞周大合樂金聲而玉振之今觀殿撰詩渾浩雄博正似韓文于宮銳胃劇腸神施鬼設擬諸孫樵之逐牯鬼文大明宮賦亦復遺貌取神在陸題詞卽以移贈二公可也

右小傳鄭方坤撰

于宮以諸生修佩文韻府等書授中書亦異數也

右江蘇詩檄張維屏錄

君於中州集之外復搜輯金人詩二千餘篇進呈 御覽

右敬業堂詩註張維屏錄

臣等謹將英法各國  
先正臣十一

五

高不騫

翰林院待詔小湖高先生既卒之十四年叔子中書舍人羽翼踵門告曰先君之沒也子之師宮允黃公實爲之傳而墓上之石未刻敢以爲請余往居東郊時曾奉教於先生而舍人又同志於古者也爰不辭而爲之書曰自俗學盛行士皆溺於故習而不知反諸古蓋舉世之通病矣有好古讀書之君子出焉或且以爲駭久之而其說大明其人已逝往往有不可及見之歎恨不朝夕其側而上下其議論也先生幼承太常公之訓長親炙秀水朱檢討而交吳中惠紅豆何義門張匠門諸名士故嗜古最深而痛絕乎流俗自受 仁廟知特奏名出身應奉文字十一年乞假歸優游林

泉者又二十九年始捐館舍齒八十有七矣先生既繩家美又得  
檢討諸公之揚挖故其爲學一本於經史而尤長攷訂其說古今  
典禮皆有据依其爲詩專尙唐賢其商推一集足爲五言程不止  
備郡文獻也先生爲人守正而剛其講學獨宗漢儒其持論堅其  
與人交不阿故其從宦有陰掎之者居鄉亦不滿於庸眾之口也  
吾郡之文苑開於二陸梁陳則陸佐公顧希馮唐則顧逋翁父子  
元則陸宅之曹貞素明則管時敏袁景文陸子淵顧士兼其季也  
幾社陳夏諸公代興號爲極盛 本朝則吳日千王玠石王雲士  
三君子狎主敦槃而金天石田髯淵盧文子三董二周諸先生後  
先推激而春藻大雅發開於時先生出而專以古學教人當其時

雖斷斷不能信從既沒而異論熄大名垂數年以來吾郡之好古者輩出無不躋先生而樂推之所爲聞風而興起也余禱昧近先生之居思欲盡先生之學頻年奔走歸而宰木拱矣然余今日之知從事於古而不迷其所趨者實先生有以啟之先生諱不騫字查客晚自號小湖郡之華亭人葬於乾隆某年某月日墓在某縣某鄉之原其事迹具宮允師傳中特表其有關於吾郡之古學者以諭於後云

右墓表沈大成撰

國朝書牘類名不類  
卷四十三

三

國朝耆獻類徵初編卷百四十三補錄

郎署五

劉青震

劉青震字嘯雲號方來河南襄城人少與其兄太乙齊名爲文才  
思駿發同輩無與抗手中康熙乙酉經元考授內閣中書雍正甲  
辰改知縣將滿選突中風卒以病廢未酬其志著有葵園詩草張  
匠門云嘯雲天性孝友負經濟才自其兄太乙先生沒後無意進  
取不上公車者十餘載惟放情山水以詩酒友朋自娛曾記其遊  
山詩云五岳憑雙屐百年付一鷗述懷云耽酒全同高士癖論文  
甘讓古人名可以想見其風趣矣從子伯吉字六皆太乙公嗣子



生而穎異少讀書目下十行未總角經書皆已熟誦弱冠應童子  
試於許許太守龍眠姚公詫爲奇才榜第一一時名轟許下有狂  
生負聰慧每靡書一過口自矜不忘特造訪六皆偕到書肆各隨  
手抽其架上書兩兩分閱六皆頃刻盡熟誦一字無舛狂生錯愕  
遂下拜不敢仰首視學使潘校文至許補六皆博士弟子員中表  
兄持其文就止江村太史江村翁據几點京六皆適依窗外睨視  
及點竟而六皆悉一一朗誦無一字謬於是人益奇六皆未幾死  
年三十四

右傳張邦伸撰

國朝耆獻類徵初編卷百四十三補錄

郎署五

高不騫

高君不騫字查客世稱小湖先生松江華亭人曾祖承祚翰林院  
檢討祖秉堯贈通政參議父層雲太常寺少卿太常沒後十餘年  
仁皇帝南巡至松 詔求名士可備顧問者提帥張侯雲翼以君對  
以布衣 召試行在稱 旨是日閱射畢 命獻詩及駢體序日  
已晡不剏棄立成經進 大悅詢知雖宦家子素食 賜帑銀百兩  
又命張侯贖其家俾扈從入都既至 賜第西華門供奉 內廷  
偕翰詹諸臣纂書南薰殿累朝祕書多貯皇史宬人莫至 命君

乘殿馬入宸檢書 御衣御書御硯內府珍味賜賚與諸臣班紀

恩詩屢奏未嘗不稱善也如是者九年 上以君效力久欲予翰

林官諭掌院事揆學士敘有見缺以高不騫補授時中允缺官當

補而事關銓曹不下君亦退讓不願躡取通顯遂授翰林院待詔

兼 三朝國史館收掌官纂書如故君乞 旨敕所司引行釋褐

禮 許之人以為榮居官二年所纂方輿考略月令輯要分註御選

唐詩既成因乞假葬母遂 子假歸里不復出初太常未第時不治

生產遊京師入秦蜀君奉母吳家居幼多疾十三始識字十五畢

四書五經通其義及太常通籍君已冠且有室治家有法不屑習

舉子業著述程古作者一摩闕省父旋奉母歸後聞太常疾遊征

入侍中塗訃至兼道奔喪哀痛踰禮太常賫貸人財不能償君羈  
訟詣臺對簿久始解扶柩抵郊郡守以凶事不令入城君謂先人  
仕宦十四年不歸今奉符馳驛歸葬願從閒道行耶請殯市橋俟  
朝命守不能屈葬之日會弔者畢至咸曰知禮而君之力已竭矣  
無何又喪母服除挾詩文遊吳越閒當是時學成而名益盛朱檢  
討彝尊高學士士奇咸推轂君太史何焯張大受輩交莫逆所至  
文壇騷幟傾其座人然不求聞達自署尊鄉釣師以見志是故行  
年將五十而後受知 天子也及其歸也年及耆矣園廬數椽從  
深竹閒入俯臨荷池數畝敗壁頽垣圖史充積左右蕭然自得也  
問字求詩筆書翰者限幾穿肆應留霍蔑不滿志去亦以是給朝

夕與摺紳文學說古今典禮据經援史罪罪不已大吏莅斯土及四方使輶至者恆造廬君必延見精力健王善劇談騶從餓疲徙倚窺賓主方促膝抵掌民事損益邦邑利弊畱連未能別也林下二十九年如是者以爲常娶徐氏生二子俱前卒六十四側室生子羽翼府學生求作傳者也八十生子爲人後八十四生子木李君教子以窮經博古勿專尙舉業羽翼十六始冠行筮日醮客之禮近代未聞也君食椒而壽冬至後無病卒年八十七所著商摧集羅翥草傳天集松珩書屋集晚歲爲詩尤典奧必自注釋來處論曰予始居鄉聞小湖名見其書慕若古人及解后燕市誦所新作九日登高詩始相識順天解首除名之歲也別久之予遷居西

郭小湖居東郭歲時過從數就問朝廟掌故手錄其詩關世教者示紙數十番歸然我郡文獻韓子所謂古之鄉先生沒而可祭於社者也昔吳郡文徵仲官待詔年九十名德重海內小湖何酷似耶至其遭逢隆盛值內廷久因事陳說多裨時政而慎密精審無譴訶彈劾之及或比之東方曼倩云

右傳黃之傳撰

皇朝書目考卷之三

三

陽明書獻類微初編卷百四十三補錄

鄭魯王

伍士琪

伍士琪阿迷州人康熙中知平江縣縣多逋賦士琪不遑追比與之期期至而賦不供召問之皆辭以故又與之期民感愧多輸者既又許民布穀雜物皆得估值充賦官爲變價或贏至分釐以上悉還之民益悅賦大集民有牒訴卽時剖理曲直仍委曲譬喻俟兩造意解然後退縣歲漕竣三萬石士琪度汨水之涯高原爽塏漕運所由上下劫置官庾久之商販集聚寢以成市號曰伍公市以巡撫趙申喬薦擢知桂陽州州素食粵鹽擔負踰嶺價常數倍



士琪請於申喬潯河自桂陽直達連州鹽得水運價頓減商民利賴在任八年以憂去終戶部浙江司員外郎

右傳李元度撰

今上卽位之初年首重祀典 命在廷大臣及封疆吏慎舉鄉賢惟時先大夫以兵曹入祀職三十三年而阿迷鄉賢戶曹伍公士琪復膺休享蓋距公之沒已五十年矣憶昔先大父與公雅相契重知公最深而余又授室於公之門故聞公懿行爲尤悉公天性純篤事繼母以孝聞撫諸弟以友聞披覽六籍必做許子躬行之意登賢書初令湖南平江政肅化洽膺卓異牧桂陽攝巴陵祁陽護衡永二守再牧山西保德所至潔己愛民政績炳炳故於平江

有生祠於岳州入名宦祠公之得民心類如此及以戶曹歸里建宗祠遷學宮立朱子祠剏鄉會田修橋濬渠次第舉行迄今阿迷人士輒嘖嘖道公軼事夫士當伏處抱守一經孤介以高其鄉人迨朱丹其殺又徒潔己養望無濟於天下而世論猶亟稱之如公學術精醇經猷宏遠處則利濟於鄉出則惠及蒼黎宜鄉人重愛之而俎豆輝煌也昔朱文公作近思錄伊洛淵源錄蓋紀濂洛諸先生言行以開後學余故於公敬敘其顛末以爲仰止景行者特標一鑑云

右祀齋

序尹均撰

按伍公康熙五十五年任平江知縣



國朝耆獻類徵初編卷百四十四目錄

郎署六

武紹周

黃施錫 秦旬

周吉士

王文清

蔡德音

符曾

華希閣

劉濤

姚吉保

陳象樞

袁守定

馬樸臣

賈延泰

張鳳孫

程兆彪

桑調元

王洛

趙貴樸

王光國

卓奇圖

葛祖亮

張汝潤

李錯

王藻

國朝耆獻類徵初編卷百四十四郎署六目錄

目錄

長住

補錄

袁守定

馬璞

陳樹萊

國朝耆獻類徵初編卷百四十四

通奉大夫前署江西巡撫江西布政使司布政使湘陰李桓輯  
郎署六

武紹周

偃師武君億以書介宛平王範曾武進陳朱賦懷甯余鵬翀三生  
抵筠乞爲其尊甫先生驗封君撰神道之碑曰伏惟夫子於先人  
非有一日之雅而億又不爲世所知獨敢奔命投誠於前者自惟  
樸鈍幸辱教必不敢自誣其先而俾吾夫子陷於有愧詞之譏幸  
哀而賜之銘其詞文應昔請銘法而 國制自五品以上得於神  
道建碑刻文如式筠謹諾按狀君姓武氏諱紹周字夢卜 國初

自河南之河內遷偃師諱懋德於君爲曾祖 贈奉政大夫吏部驗封司郎中諱於翰於君爲祖 贈文林郎東流縣知縣晉 贈奉政大夫吏部驗封司郎中諱朝龍於君爲父三世以篤義尚 行載在縣志君初入塾不苟與羣兒戲長益精誦弗輟通毛詩左 氏春秋補縣學生父喪服除康熙丁酉舉於鄉雍正癸卯成進士 出興縣孫文定公門文定一見奇之曰若矯矯可試館職也時例 進士引 見改庶吉士必用大臣面薦非是不得充館選禮部侍 郎登封景日昃故知君從容寄語君請以鄉後進禮往見而後薦 之君謝不可以是歸進士班隸選司久之選爲汾西知縣縣故荒 敝而典史某輒侵官事橫縣中前知縣者不能制民頗患苦君聞

到官典史以君書生益易之迎謁請曰長官事不決者幸以屬屬  
吏君曰幸甚卽手引重牘積日月糾錯者推試之兩造爭諠於前  
典史戟手不能何問君徐呼役曰設坐聽事西偏訟者來數語立  
中其旨繁兩造叩頭各解去當是時一縣譁爲神君而典史旁睨  
流汗頓失其橫乃行歷萬山中度地高下宜開石渠以輸甘河引  
水旁溉圃柏諸鄉田百餘頃縣便利焉又問所疾苦凡煤稅供給  
一切減除之抑痛爬癢民乃大蘇初君至行祀及廩神爭獮若厲  
鬼君仰曰此爾雅云旣伯馬祭鄭君所謂馬祖天駟者也狀胡惡  
吏侍色變君怪固問吏曰神禍福如響官勿多言君叱之明日馬  
死者再吏曰奈何君曰神不禍福以駭人偶然耳明日馬又再死



吏人固諫君厲聲曰神與知縣同司 天子驛而乃賊殺驛馬求  
飲食神貪且馮魅罪不赦吏立笞碎之命更像祀焉自是廢無害  
歲間蝗君按禮注入蜡有先嗇及昆蟲之文而詩有田祖毛傳鄭  
箋並云田祖者祭先嗇也乃躬率民築壇用坎以御田祖爇燎坎  
中令民執蝗來內坎斃之君肅立稱詩祝曰田祖有神秉畀炎火  
觀者曰迂哉一夕蝗失若蟄然君治用經術設誠而行往往獲效  
他日比縣賊民挾左道寢欲爲變山西大吏召君密授指往擒之  
君念擒之而功在我知彼縣者禍不測矣則手擘書呼健役一日  
夜投其縣又佯疾作遲遲行比及縣而知縣者已械其魅來君與  
俱入見大吏謝曰微某者紹周以疾幾敗機事大吏怪之博諏得

其狀則歎曰長者長者嘗攝大甯大甯有馮鐵漢者梗吏法候縣  
官至則狂呼請先試官重楚楚之血被地徐起揚揚行有喜色縣  
人顧之擣舌走君至又來呼於門如初君召入諭曰若人邪以若  
父若母之膚與楚校又因以爲人暴若尙人邪縣官楚以楚吾人  
不楚若非人者若去毋恩此鐵漢聞君言則大慚沮出後君再過  
大甯鐵漢從父老來過與前君駭問父老何與若來鐵漢伏哭曰  
某生幸遭公獲名人矣父老皆曰鐵漢今爲善人縣之福公之恩  
也久之以族計報績調知臨晉到官月餘丁母憂大吏以君循吏  
欲以在任守制 聞君泣請行服歸旣除池州之東流君至東流  
故知東流某者當代去負官錢無算時知池州府李嶂強君任之

不聽忤知府意輒引吏文書書小誤苛責君輒逮縣吏去府役日  
日來跳梁誣號於縣庭中君不勝其憤坐正衙杖其役而遣之役  
狂訴於府知府則大恨欲出死力以擠君不可得會吏部行取君  
爲主事知府伺君去摘他過中君被議降級補光祿寺署正遷大  
理寺右寺丞奉差倉場監督再遷吏部驗封員外郎尋爲掌印郎  
中君在京師歷官克舉其職其入吏部且老矣然治牘必手削之  
務覈事實雖老吏皆憚君不敢上下其例在部號爲能事然非公  
事未嘗一謁要人積俸久當擢用爲道及知府矣或曰不謁要人  
卽例有變君笑曰吾老倦於出且歸耳竟休致歸時乾隆二十二  
年也旣歸縣官來請君爲兩程書院之長其教授諸生有法已而

辭去閉戶不出鄉人罕識其面久之縣募民夫種官道柳隸來叩門君出應之隸挾君去爲夫君不能與辨隨行入城市市中識君者曰公不入城久矣何從來此君告以故於是市眾羣詣隸曰若瞽邪不識吾鄉吏部武邪隸叩頭謝君乃罷君在吏部時適李璋者來補官介君鄉人以外有司儀磬折求見君則爲之執故吏禮甚恭既罷未嘗與客言其前怨縣人至今稱君之德與度也君家居五年年七十有四卒君生於康熙戊辰年某月某日卒於乾隆辛巳年五月十七日配孟氏 封宜人側室郭氏子六修俊伸倬億偃女二億以乾隆庚寅本省鄉試獲舉從筠遊以請銘者也君諸子先以甲申冬十一日葬君於北鄉之原不及納石壙中茲乃

重爲之銘於其神道銘曰

稽風俗通宋姓武功河南巨宗遷偃師去高曾榷榘雷主棗桓君  
竟大夫成進士初師文定模玉堂夢隔清吾魂魄非埽門客士逢  
惡尉辭雪沃沸神君明謂甘河距川漚圃柏田石煤疾癘伯祀馮  
厲碎像變置害苗投熾我馬虺隤寮擒賊魁讓謙蓋搗大甯鐵漢  
血楚里悍化君爲善泣行毋服除官池屬遇守不淑入大官尉廷  
平讞書吏部老除故守選謁醜躡蹶故吏不伐亦不諂官將擢  
老焉教授閉關隸烏識面充夫推牽君返自縣德與度美天厚君  
死六丈夫子億也桀桀先大君閱詞乞銘劄邱山之遼古碑臨天  
吾文不愆

右神道碑銘朱筠撰

國朝書林典故初編  
卷一百四十四 郎署上八

乙

世宗憲皇帝御製  
皇朝通志  
卷一百一十四

五

黃施鶚 秦甸

黃施鶚字虞封江蘇無錫人雍正元年進士謁選得登封令鶚條  
奏請開經筵以廣 聖學改淮安府教授十四年自河漕大府以  
及郡守靡不重其人凡興利除弊伸冤鋤強請無不行行無不當  
人意而鶚無毫髮私尋以卓異薦大學士陳世倌請講周易鶚爲  
說泰卦謂內君子外小人爲泰此是今日要著亦是公身上要著  
是冬世倌以體用兼優薦授國子監博士性至孝弱冠時父邁常  
守秦某之禍幾不測鶚除夜肩行囊走二百八十里瀝血顛呈大  
府事始白同邑秦甸字中馭少爲諸生讀書有根柢雍正五年進  
士授濰縣知縣慈祥愛民不施鞭扑民以老佛呼之入爲刑部主



事行橐惟山爾數匹而已從弟蕙田方官侍郎時無迴避之例每  
日上堂呈橐蕙田拱立以俟旬執禮惟謹見者以爲難

右傳秦瀛撰

周吉士

孝潔周先生者名吉士字謫公明儒萊峯先生六世孫也幼穎異  
既冠爲諸生旋居太公憂執喪孝聞里中周氏自萊峯以來家屬  
清素至是益貧困先生刻苦讀書授經奉母自課其兩弟老屋短  
籬門外卽田薄暮學徒散去獨步阡陌日黃欲墜顧影太息皇然  
思紹先世之學行其未達時已然矣雍正癸卯舉於鄉明年成進  
士改庶常 世宗憲皇帝欽恤狂獄選廷臣有清望者爲部曹遂  
授廣西司員外升廣東司郎中兩充丙午丁未外簾官其在刑部  
提牢也嚴束獄卒毋許虐罪囚躬給衣糧周視琴栝爲省其疾苦  
冬月披敝羊裘一隸攜燈夜巡行園土中曉鐘動始返冰索索滿

身也性仁恕所讞爰書當於法而止惻然嘗欲求其生督撫閱實而情有疑者尙書或卽據爲奏則執之甚堅嘗語其僚曰迂吾自知吾守三尺而已其兩爲外簾官也闈吏皆浙人猾賊叢姦在事者尙悉委之先生旣受命晝夜不交睫親督羣吏目營手理心力並至吏出告人曰周公當官明察屹不可搖宜在刑部有聲也先生身雖立朝而時念母久之積勞疾作瞻卬益切明年遂請假蓋自甲辰通籍至戊申歸家居奉親又三年而申太宜人沒先生自是遂不復出矣先生旣歸環堵依然館粥不繼而處之晏如閉門掃軌未嘗一入公府日與子姓門人說經論文以爲娛海上富人之喪持五百金請往護視是時冬盡大雨雪霽甚或勸姑一行

先生笑不應其人持金去迺曉家人曰吾豈不知畱金可佐衣食  
耶然吾守先人遺訓久吾不可一旦辱先人先生修髯高顙成削  
骨陵嶒目炯炯有光交友接物藹而春溫於利與義畫然刀截水  
決母疾露禱北斗下兄弟同居至老彌篤視從子如子子爲諸生  
將授室而殤從子苦學繼殤明年復有吳宜人之戚死喪之感哭  
泣之慟故齒止六十而鬢髮盡白體血枯瘠以至於遽殞焉生平  
手鈔易書詩三經俱有發明族父某隱於山博學君子以是常往  
來山中閒與故中允黃公之雋及里中同志聯吟樂志晚納妾生  
二子曰之潮之澐先生素病瘳庚午轉劇而講誦不廢今夏六月  
三日猶能與客燕語送之出戶夜二更漸覺氣促呼兩弟椿培士

前曰明晨我當別若去矣生死故有數骨肉情深不能不淚墮耳  
端坐至雞鳴奄然怛化夫以先生官翰林不得典文章爲尙書郎  
不得出領郡居薦紳列三十年不得葺一椽置一田飢寒拮据以  
終其身始一子才而天晚幸有二子幼不及見其成立也於乎天  
可問乎系以贊曰

先生嘗官西曹矣不書其官嘗自號漁山矣不書其號而書孝潔  
先生者詩白華孝子潔白也先生天性孝友凡一介不取皎然獨  
善其身懼辱其先人可謂潔矣

右傳沈大成撰

王文清

王文清字廷鑑湖南甯鄉人雍正甲辰進士授九谿衛學正學者稱九谿先生轉岳州府教授丁母憂服闋舉鴻博奉 詔分修三禮次年選寶慶府教授大學士朱軾奏留改中書科中書分修律呂正義遷宗人府主事 詔校勘經史考取御史乞養歸乾隆壬申再舉經學以父喪未赴遂不仕益殫力撰述著書數千萬言桂林陳宏謀撫楚勒碑於所居曰經學之鄉聘主嶽麓書院門下士成就者四百餘人年九十二卒嘉慶十七年附祀屈原祠二十一年祀鄉賢子運樞歲貢亦以學行稱

右傳李元度撰

甯鄉王先生諱文清號九谿進士官宗人府主事讓儀禮分節句讀以句讀為主略有箋注不欲其繁又讓周禮會要六卷亦約括注疏諸說疏通字義而已其凡例經文一字不通亦一字不動然敘官亦經文也而自五官之長外餘官則俱刪之又有考古源流數百卷存於門人某某家久之佚亡無存

右學案唐鑑輯

九谿熟精三通著有考古源流二百餘卷循例當外補兩中堂薦修三禮奏授中書科中書

右詞科掌錄張維屏錄

按考古源流係四百二十八卷

九谿有論詩法十條其門人錄以冠集

右 四庫提要張維屏錄 按王公又著有周易中旨三卷  
 卷樂制考十卷樂律問封四卷校定五代史一卷行己錄  
 諺語省心錄四卷王氏家訓治生要術四卷壽世叢書十  
 卷醫方小錄八卷考古原始六卷考古略八卷考古略補  
 四卷陰符經發微一卷鑄經文略六卷鑄經餘草十六卷  
 鋤經詩略六卷歷代詩匯一百卷典制  
 大文二百卷古今梓玉詩文話八卷





蔡德晉

蔡德晉字宸錫無錫人雍正四年舉人年十五卽覃精三禮至忘寢食合儀禮周禮爲禮經周禮以六官爲序而考工記不冠以冬官儀禮以五禮爲序而闕軍禮又補逸禮八篇爲本義三十九卷戴禮則刪蕪去複博採周秦兩漢之書及先聖格言之有關於禮者爲禮傳本義二十卷又輯通禮五十六卷積四十年十易橐而後成江陰楊名時薦爲國子監學正遷工部司務德晉旣以禮經名世謂橫渠以禮教人最得孔門博約之旨故其立身甚嚴燕居能自檢攝飲酒至醉不亂在工部歲卻常例數百金妻子嗷飢號寒弗恤也其論三禮多發前人所未發與方侍郎苞李學士紱侃

侃辨論悉有据依

右傳秦瀛撰

無錫蔡先生諱德音字宸錫舉人官司務著禮經本義十七卷是前十六卷皆本經第十七卷附吳草廬所輯逸禮八篇皆引宋元明以來諸家之說與注疏互相參考大旨皆不戾於古

右學案唐鑑輯

按蔡公所著禮經本義書名卷數學案與秦傳不符或所見本各異歟謹仍其舊

符曾

先生氏符諱曾字幼魯一字葑林先世爲陳之宛邱人自盧龍節度使存審以將略顯於後唐太師魏王彥卿爲宋貴戚太宗懿德皇后其第六女也南渡扈蹕占籍餘姚累傳至曾祖舜聰愛西湖山水之勝徙家錢塘祖禹相父殷琦皆潛志弗耀先生生而穎異弱冠能詩頗自負一日以所業詣執友陳玉几玉几曰君才美矣然非正音也示之法學大進當是時浙中名士如林海甯查初白老人以耆宿領袖羣英先生謁焉降禮延接目爲遠大之器已而與先君子及沈个庭吳繡谷陳南邨厲樊榭意林六父共成南宋雜事詩七百首初白名之曰七君子爲之序而廣其傳雍正二年

北遊京師六年 世宗憲皇帝思得非常之士不次擢用 命內  
外臣工自大學士以下至知縣各舉所知大理卿汪公澹以名上  
分部學習在戶曹貴州司行走十二年 詔舉博學鴻詞科膺大  
司寇靜海勵公薦會丁內艱不與試服闋仍在本部福建司行走  
乾隆四年 皇上命工部侍郎德公爾敏大理汪公澹往江南興修  
水利奏請先生偕行時總河爲相國渤海高公而相國西林鄂文  
端公出視南河咸契重之江南海門歲久淤水道不通先生上書  
一篇建議疏濬海口淨沙俾暢流東注願役大費重鄂公初善之  
而卒未之能行也六年還 朝補陝西司額外主事九年管江賑  
捐例事十六年補河南司旋升江南司員外郎兼辦八旗見審處

福建司井田科事十七年欽差廣泉局監督十九年升授陝西司  
郎中二十五年正月恭得風疾絲淹四載遽患下痢卒當先生之  
肄業國子監也爲領祭酒興縣孫文定公所知遊譽公卿間其在  
戶部也少司農僉公兆晟稱道之不容口管捐例日分受飯銀千  
金有賊黨某逋負累累追呼迫窘將有生命憂給先生暫往任俄  
而索債者集先生門遂舉所積以償無憾色自甘恬退不事奔競  
慢游那署殆二十年尙不得食真俸今相國忠勇傅公詢知之三  
歲之中由主事游階正郎又督錢局錢局視諸曹務爲劇易於染  
指先生秋毫無取差滿復畱一年天性醇摯女弟嫁陸氏夫早亡  
家貧甚先生慰曰妹第守志勿愛兒女也乃撫三甥女爲己女選

四庫全書卷一百一十四  
十三  
嫁士族孤甥亦爲娶婦嗚呼卽一事可例其餘矣身歷名場者五十年一時才俊之彥或雄拔自張或華瞻見許或博綜羣籍或按羅祕冊而先生爲詩氣清旨微超然物表刻燭拈題瞬息而就皆斂衽避席曰符君詩在唐則摩詰蘇州天隨子在宋則和靖白石元明以來不具論矣閒出豪橫脫手渾成圓徹如琉璃含月則又直入髣蘇之室所著甚夥有貧雨茆屋小槩少作也于役河干集雪泥鴻絮半春唱和集玩易吟大都興會所至與人酬應之作晚剛定爲春兒小槩若干卷精書善校付之剞劂學人爭購之以爲模楷嘗傲屋乏直產主勒錢急大司空無錫嵇公調曰是家詠竹能作吹得葉聲如水流者甯不可須臾緩耶一笑而罷奉養淡泊

客至淪泉煮茗相與雜啖餅餌品評書畫量不能飲然喜蓄酒三爵之後頽然自放不問家人人生計焚香默坐晏如也知交滿天下同輩如吳東璧周穆門吳繡谷金江聲杭蘆浦全謝山吳雲持稍後如張南漪王茨檣汪槐堂皆同社研席交也揚州則友馬秋峪半查天津則友查蓮坡餘指不勝屈就中最親密者惟陳玉几及先君子於其亡也哭之慟每憶及泫然流涕作詩以當招魂篤於故舊如此嗚呼已矣先生歿而先君子小山之友盡矣子貴麟卽代人償債時所生者也

右傳趙一清撰





華希閔

華希閔字文友無錫人涇縣教諭希閔弟九歲而孤雍正七年舉人十三年應聘分校江西鄉試授內閣中書嘗刊邵文莊寶容春堂集行世其他如修學宮葺宗祠諸舉悉希閔爲首倡希閔始喪父時奉遺命事希閔如父希閔自幼以迄成立凡事必請命於希閔而後行方官京師聞希閔病亟馳歸遂不出子繼石阡府經歷亦敦倫誼好施子

右傳秦瀛撰

國朝書目考初編 卷百四十四

十五

劉濤

舍人劉君源溥從余游十餘年爲人恂恂然語訥然如不能出諸口其文則淵懿純粹不以雕刻藻彩爭工余嘗詢其所自蓋得於祖父之彝訓爲多今乾隆五十六年距其祖象山君之卒已二十三年矣舍人父世祿將奉府君暨配林恭人葬於某鄉老雅坑之原而舍人奉其狀以來乞銘按狀君生而聰敏刻苦讀書文章汪洋恣肆皆本經術補縣學生督糧道潘某奇其作令讀書粵秀書院院長編修傅玉露尤愛之未幾以選拔貢入京師 朝考列高等授中書科中書舍人舍人內閣大學士之屬職中外百官封贈誥命直廬在午門外與六科給事中相次故世目爲內府云君素

清介有粵人欲封生母不及於適奉厚貲託當事求君出同鄉印  
結力卻之由是大學士知其名令協理漢本堂事既俸深將擢外  
任時兄某亦爲金華府同知得家書聞父母病遂與兄均以乞養  
歸其後母卒君哀毀盡禮父卒如之故世稱其孝焉久之伯子起  
鯤選授刑部郎中勛之曰明慎用刑哀矜弗喜自古難之必以無  
負於 君者無負於親也嗣以配林恭人歿遂不復出建宗祠於  
邑中取弟姪之貧者撫恤之又表章遠祖隱德於志乘遇邑大事  
輒首出貲身任其役鄉里稱爲善人嘗歸自京師過彭澤舟覆若  
有神掖之以出四僕亦無恙人謂善人之報也君諱濤字鼎文一  
字象山自宋遷於廣東香山縣之谿角鄉曾祖元錫祖某父某皆

不仕生康熙三十九年某月某日卒以乾隆三十三年十一月十二日年六十有九兄弟二人君居其次 敕授內府中書科中書舍人復以子起鯤晉 封中憲大夫刑部山東司郎中配林氏慈厚節儉有士行先 封孺人繼 封恭人子七長卽起鯤次世祿是爲舍人之父三起聖四起鮫俱先卒五起鯨候選州同六琮縣學生亦早卒七起鳴女二俱適士族孫源溥乾隆五十一年順天丙午科舉人卽舍人也源浩工部司務源澹選拔貢生源沼學基源沛倫皆縣學生嗚呼盛矣先是君之喪偶而不出也購宅於縣城南挈子孫延明師以督課之其後皆能覃研學術胚胎前光觀舍人之文行與其餘子姓之蕃衍如此是君雖未大顯於世而遺

澤長而未艾斯可銘矣銘曰

君在 朝著簪筆垂紳敢以苞苴玷此絲綸君居鄉黨散財發粟  
建我衺主用合邦族匪惟卹之又從教之子姓振振蔚其鳳毛雅  
坑之築旣崇旣固刻辭幽宮庶示千古

右墓誌銘王昶撰

按劉公雍正  
己酉拔貢生

姚吉保

尤散而談恬退貧宦而談清高安居無事之時慷慨而談氣誼此夫人之所能也當進取之途而恬退處脂膏之地而清高臨得失利害之交而忠厚存心氣誼自任斯非君子不能矣以余所聞內務府郎中姚公殆庶幾乎公少習文翰抱經濟才初筮仕爲筆帖式雍正丙午 世宗憲皇帝澄清吏治選筆帖式爲知縣公膺首薦旣而念從兄亦與薦當無一家並得理遂以讓兄己酉遷主事辛亥遷員外郎乾隆丙辰遷郎中辛酉遷堂郎中乙丑 命往吉林同將軍理夔務丙寅督理江甯織造兼榷龍江關稅 九重特達之知駸駸嚮用矣而因親老遽乞歸浮沈郎署幾及十年丙子



再命權九江關稅會邁微疾遂不赴竟以銀庫郎中終是皆功名之士所策足先登求之不能必得得之不能遽舍者公獨澹泊甯靜進退從容無所營競繫戀於其間公之品居何等也堂郎中爲上下之樞紐職任綦重似國初六部之啟心郎而六部之事內府皆具尤非啟心郎之專司一曹者比故最號要職卽織造鈔關營造司造辦處銀庫蠶務亦皆度支之藪出納浩繁世之所謂美官也稍得霑溉當不憂貧且公自壯年卽遭匱乏上而供二人之菽水下而捩擋米鹽經營婚嫁左支右絀拮据萬端更非無藉於是者一旦坐銅山金穴之側似難以忘情公乃身履華靡志仍儉素月俸以外一無所求老子曰不見可欲使心不亂公見可欲

而心不亂所守又居何等耶又聞雍正辛亥公官營造司員外郎  
小吏偶不戒於火獲罪且不測公引爲己過吏乃得末減雖幾至  
罷官不少悔夫官政有闕委過胥徒者不知凡幾禍福所關或不  
惜鍛鍊周內以成之此恆情也公於本非己過之事甯失一官以  
全數人之命非仁人君子能如是用心乎世宗憲皇帝綜理幾  
務甄別人才明照如日月矜慎名器尤不欲假借毫釐雍正己  
酉十二月御書福字賜內外廷臣雖卿士或不得與公獨以  
新進末秩邀格外之榮豈非帝心簡在知公之異於眾歟雖公  
天性孤直落落然不合於俗又恆自引退未竟其用然升沈有命  
天所爲也品行則人之自爲也苟立身不愧古人不以富貴有加

不以淹滯有損也公卽不躋卿相亦何憾哉公諱吉保黃鍾其字  
先世襄平人祖諱某順治初從 龍入關因隸籍漢軍考諱某嘗  
監督御倉公生於某年卒於某年年六十有三以其年葬於某原  
嘉慶戊午余扈從灤陽公之子良適官避暑山莊副總管傑直之  
餘爲余縷述其先德請爲墓表以發幽光余雖不及見公然憶尹  
文端公亟稱公與良所言合文端公一朝名德語必不誣因撮其  
大凡表之如右雖多所挂漏亦足見公之生平矣

右墓表紀昀撰

陳象樞

吾家復齋諱象樞字馭南一字復齋江西撫州崇仁縣人世居邑之北耆里乾隆十有八年九月以戶部山西司員外郎卒邸寓得年五十有八復齋自雍正八年成進士起家吏部迄今二十餘年以戶曹終中閒兼翰林銜督學楚蜀凡四五年家居垂十餘年計其在部之日甚少而兩部掾吏憚其神明同官亦共推爲公正精覈如久於其任者復齋之視學四川也院吏循故事迎之境上以五百金爲道里費復齋正色卻之自是且抽棒以助諸吏廩給諸弊肅清蜀人大悅以比其前學使陳公瓚稱二陳夫子其在湖南故事每按一柵諸生出錢少許納之官名曰銖末通所部累銖計

之不下萬金學使者亦藉是以延賓從贍童僕及一切舟車之用  
復齋亦拒不受幕中有爲謀者謂宜上聞請裁則謝曰吾少耐  
勞苦長健於閱文頗有兼人之力故費省而事辦後之人少不及  
吾卽力絀矣故不爲也當聖祖仁皇帝之末天下學政號爲清  
官者曰陳瓚曰高安朱軾仁皇臨御旣久海內殷富而又堯  
天浩蕩緩誅貪邪世宗憲皇帝卽位銳意振刷厥弛乃張凡試  
官犯贓左證明白則執而戮之無畱獄今上仰遵成憲用法尤  
信惟諺有之曰康熙年閒有清官雍正年閒無清官非無清官也  
夫人而能爲清也顧其所謂清者未必卽陳朱之比先帝知之  
而救弊之道不容不加激勸就中往往以剔除陋例超授大官如

復齋之清至今不過五品且下其原銜一等矣得非其平生無異人之爲若嚮者不從幕議之類居多耶嗟乎此乃所以爲復齋也復齋丁內艱旣釋服以湖南任內該收考生被議降二級由是家居傾囊中裝倡修大成殿及其宗祠召還旣析居之昆弟貧乏者仍與同爨庚午北上則分薄田令得自給然後行夫復齋處脂膏不以自潤所節嗇而僅有者度亦無多而用之若惟恐不盡如此則復齋之居官其以爲名乎匪直不爲名而已也其以爲身乎與其子孫乎復齋初成進士高安公時爲相國昌言於朝曰是吾鄉知名士然吾未嘗識其面以是益重其人未幾實授選司主事遷員外郎再遷禮部精膳司郎中出督學政乾隆三年移節湖南歲

十有五年自家起用論者謂蜀人二陳之稱誠然矣顧前陳以清  
故開府福建其位遇差亞於朱而後陳獨不幸中蹶起不久遽死  
矣此亦復齋之命也前此二十年爲選司官時官廨不戒於火焚  
其選冊吏更造新冊復齋知其詐於煨燼中檢得舊檔字未滅者  
過半細校卽所稱旣燬者注籍歷歷可考吏大驚匿其新冊復齋  
亦不復責取有註誤官某某例得開復爲吏所格復齋爲列上其  
名口誦舊例甚悉卒復其官其人踵門謝終不予見前輩謂仕宦  
廉明而入於谿刻弊甚貪庸復齋豈有懲乎此哉乾隆十有六年  
以 覃恩授奉政大夫祖父皆 贈如其官元配劉 封宜人子  
三鼎稷黍孫五人珪璫璠璋球鼎扶柩南旋時句余志其墓數四

聲淚俱下使來知葬有日矣用推闡大略以塞孝子之意

右墓誌陳兆崙撰



匡廬書局藏書  
卷一百一十四

三

袁守定

公諱守定字叔論號易齋江西豐城人也宋祥符間始祖漁隱遷  
零韶里二十三世萬生公生孔冀公兩代皆有遺遺金事稱長者  
生配先卽公考也子三公居季三齡而孤爲妣節婦李氏撫育八  
歲就外塾苦學爲文師異之屢夢見奎宿心志之甲辰入庠丙午  
舉於鄉庚戌成進士爲鄉先生朱文端楊清江所重發湖南與修  
通志分武闈甲寅任會同革除三累曰除牛稅曰革小甲曰免銀  
工月朔遞結洪江多火災公往勘之令贅牆開之自是少殺立義  
學課士鄉人成進士者聯起古州苗叛公設法防禦民恃以安旣  
而協運糧餉照司庫所發銀兩兩年無誤洪江有僧復智攜一姪

一徒同居有城隍廟與通道縣僧借宿向復智以修城隍廟爲詞  
貸金未應卽殺而焚之以報藏其衣與米於小樓公以盜可疑搜  
得衣與米僧始服伏法立洪江義渡蒞芷江多平反協辦運黔兵  
米撤河干舊柵臨期赴縣報冊人以爲便設義學於南寺定條漕  
稅契法於各城門令里甲自投之攝桂陽州事中丞張公藩伯稱  
楚中聲名第一不以屬官禮接也莅桂陽首禁門包但收吏結狀  
一紙釋株連革鹽規商人感之爲減鹽價桂陽產黑鉛貧民每拾  
浮砂易米度日公籌之仍禁取鉛浮砂聽民便拾一日往鄉見古  
井中有煙直起公令人淘之得屍公反覆窮究乃木工行竊投井  
而斃者黔陽游勾羊氏先是與楊乙通後羊氏與楊乙同乞者累

年子與聳禁之一日羊與楊遇憤不得復合約兩人自殺前令以殺之者必子聳重刑誣服公往驗之得情遂活二人他如建普濟堂十方庵沅水驛店房養老堂晃州驛義渡無不爲民利濟蓋至是公年三十又七以終養歸矣公莅任凡事爲民請命下鄉只帶吏役數人無擾民間所過以哀青天呼之丁卯主豫章書院講席得雋者三十餘人公十二年克終養事遂習青烏書得臨川田西里丙子北上爲文誓天曰一家衣食仰給在官外如持一錢歸者當獲天譴委八溝同知辦案出長城二千餘里歷四十八家蒙古十月補曲周令送兵臥車中馬逸自分必死而手中大銅鑪軋碎公身竟無恙又覆舟鄱湖挂石筍不死令曲周辦差不出一票取

穉黠則買之市中取監獄荆棘則嚴更換需車輻則革包莊之弊  
杜指充之病滏陽河漲公爲文告神水爲之退永年盜鞘銀者公  
筮而獲之升禮部縣民號泣者數千人旣到任會西夷內附典禮  
殷繁公兼掌儀制乃爲考諸經史辦理得體同官依賴及會推員  
外堂官某固同年生也曰待袁公自來乞然後與之公笑曰是豎  
子我也卽日請急裝去一柴車徑行有古人去國風味已卯告病  
歸時年五十又五與同里士釀錢營子母修橋路施棺槨荒年辦  
賑鄉恃無飢嘗欲籌李家渡舟子衣食不克如願公顏色粹然年  
六十外如四十許人與物接數十年無忤色公生於康熙乙酉年  
二月二十四日亥時以乾隆四十七年六月二十四日戌時卒享

年七十有八配熊氏子六人濬潛澹浚澁淡孫八人盥棊楠棠校  
櫛櫛榛銘曰

漢循吏兼孝義範人倫傳後世乘白雲公游戲牛斗閒瞻龍氣往  
復來非耶是

右墓誌銘蔣士銓撰

袁守定豐城人乾隆元年設芷江知縣事者自守定始下車首清  
本府積案日讞數事率稱平允勸建普濟堂設立義學月親課士  
徵收許民自封投價常俸外一錢不取先是守定知會同所屬洪  
江船戶多感其德至是搬運黔米需船吏請用往例於龍津橋設  
木柵截留守定日設柵滋胥役利吾揭示招之洪江船必來如言

果千艘糜至巡撫許容薦爲賢良第一尋以養乞歸民祠祀之

右述聞謚瑤錄

馬樸臣

馬樸臣字相如江南桐城人雍正壬子舉人官中書舍人相如以友朋爲性命有過從者必酌以酒明日斷炊弗顧也歿於京師幾無以爲殮聞鬻馬於市始得蓋棺友人作鬻馬行以弔之

右 國朝詩別裁集小傳沈德潛撰



皇朝通志卷之九十四

三

賈延泰

懌堂先生姓賈氏諱延泰字開之先世自萊陽遷故城衣冠蕃衍遂爲望族先生賦質最穎異承藉家學刻志誦讀然恬淡沈靜出於天性視雕華之士以聲譽相馳驟意泊如也雍正壬子舉於鄉無矜色旣連上公車不第亦無抑鬱之色年漸長思以棒檄娛老親乃援例爲中書舍人舍人雖間曹然密邇政府又職司翰墨與詞林氣類最相近文酒譙談易於款洽先生獨落落穆穆公事以外無所預退食以後惟與山人衲子鬪茗敲枰門外幾無車馬跡舊交有邇顯者招往見唯唯不拒亦竟不赴約宦數載以親老乞假歸色養之暇蒔花種竹嘯詠一室恆手自煮茗以爲樂若不知

居城市中者迫養親事畢或勸以補官先生謝曰吾性疏慵卽爲官亦無益於世事況行年六十日就衰頽顯親報國付諸子孫吾不能白髮出山矣自是以後惟杜門訓子姪時時以書史自娛與會所至閒亦賦詩摹帖詩風格多近西崑而能獨得溫厚之意書初倣歐陽信本繼倣松雪能以勁婉驛騎兩家然均不多作奇意而已惟喜鈔書每得善本且誦且錄恆漏下數刻不能止自少至老如一日屬纊之際猶喃喃作誦書聲也平生胸懷蕭散衣食不甚擇美惡亦不問家人生產事似不知馬幾足者願於九章算術推究至精於舊法多所增損往往出古人意想外迺知研桑心計非所不能特性不好耳甲辰正月遵微疾遂奄然逝年七十有

四平時嘗誡諸子曰今之送死者吾惑焉彼勲業文章固足以垂不朽其他往往奔走大人先生之門苟一言以爲光寵試覆而射之則書撰人姓名與所以稱道其親者可付而得也夫親無其實而貌以名與貌他人何以異余老矣異日必無以諛墓之文誣我故諸子於先生之葬不敢乞人爲墓誌卽先生之志趣可想矣論曰明儒學案先生曾祖所刊也先生口不講學而制行不愧古君子是真講學者也平生不屑屑於名利殆所謂能見其大歟嗚呼恆情烏足以測之

右小傳紀昀撰



張鳳孫

少儀父之瑣任貴州印江令以負帑下獄少儀走萬里之京師徧  
貸於所親知卒得論出駢體清麗詩章秀傑屣履所至諸公皆折  
節下之

右詞科掌錄杭世駿撰

按張公江蘇華亭縣人雍正壬子  
副貢乾隆丙辰薦舉博學鴻詞後

薦經學由貴州縣丞歷官至雲南糧  
儲道改刑部郎中著有寶田詩鈔

日本書紀卷之六十四

三

程兆彪

子年三十識君於筍里又十餘年識君子仁於澄江又二十餘年  
識君孫樹於秦淮二十五年君卒於詩溪樹自毫奔喪以死悲夫三世  
之交頓失其二也明年予往弔孤仁捧手哭泣以墓銘請又明年  
銘成而誌之君姓程氏諱兆彪字慰書徽之休甯人曾祖祖以  
贈父以封皆光祿大夫妣皆贈一品夫人封公始卜居松江  
之上海娶洪夫人生二子長兆麟陝西分巡道撫察司僉事次卽  
君也君幼受業於楊中翰嶠其外舅王玠石先生器君不凡命中  
翰以女妻君弱冠入太學遭母喪服除鄉舉不遇因謁選授兵部  
司務擢刑部雲南清吏司主事所至以才著曹長咸器之時年未



三十也念父大耋而兄遠仕陝遂請急省親歸里生養病醫死葬盡其孝當是時相國遂甯張公方督治河請於 朝擇才以佐遂舉君兄弟君自服闋蒞事在河工先後二十餘年淮黃利害多所贊畫每興築與河卒均勞苦暑雨凍雪指麾河壩竣工如期堅緻不壞若高堰石工安東汎土埽工搶護安山宿虹陳灣蔡道口諸險工挑山清口河築柳園范莊諸土埽工隕竹槩石以丈計且逾萬積勞久至手顫耳鳴病歸於吳以老可惜也然自 仁皇帝視河召君傍輦行五六里顧問詳備 賜宸翰寵之以至河督大臣相次奏君功績爲河員最因數增秩不爲不知君矣嘗攝懷慶河防通判不以部曹貴輕倖事曰爲人臣安往不可盡職且吏治吾

好也於是葺學校清巖法整捕務罷供給擾民者修壩牖以利輓  
輪而資灌溉甫三月以大工旋河上民思之若習久安之一旦失  
之者事兄謹終兄身不析箸於河於家事必諮兄兄歿後爲同官  
誣累君命子仁銳身白冤卒得白昔誠親王書孝友二字詒君爲  
不愧云旣宦而貧不能歸寓吳養病受子養以卒雍正十年冬也  
年六十又三距楊安人之歿三十三年矣安人十五歸君賢且孝  
姑疾侍湯藥姑亡視含殮禮哀俱至君宦京師安人念舅老遣姬  
媵隨任而已畱家奉甘旨賓祭以腆潔嫻戚以厚戚獲以慈喪舅  
執禮如喪姑勞於家政年二十八而卒君終身不復娶曰疇若安  
人賢者今年月日諸孤奉君柩歸葬於休甯之先壙安人耐焉而

子誌其仕宦孝弟之大者於石其餘言行詳行狀子八人仁爲長  
女五人孫十人嫁娶咸名族仁試北闈大臣賞其遺卷呈 御覽  
名著都邑少子佩孫樹皆著中能文稱譽校閒樹尤俊拔善詩爲  
子詠小山其卒也甫冠聘婦宋未婚歸夫家守節其教子孫又如  
此君所著治河書十八卷黃運兩河圖二卷皆適於用予旣悲君  
之才而位未顯壽未多又悲孤仁連喪其父子也故不辭銘銘曰  
少登於 朝老未罄其用兮淮黃湯湯工則可頌兮祖之長逝孫則  
送兮鬱鬱其封與婦共兮予差長而銘其幽恍若夢兮他日車過  
腹不其痛兮

右墓誌銘錢陳羣撰

桑調元

先生爲孝子天顯之子少卽博覽強識以文章馳驟一時後乃講學受業於勞餘山尤畱心宋儒之書雍正癸丑 召試通知性理  
欽賜進士授工部屯田司主事乞養歸里有別業在東皋闢餘  
山書屋以友教四方之士論文講道從者雲集比於河汾之盛

右鶴徵後錄李富孫撰

調元詩文縱橫排界擺落蹊徑毅然自爲一家而恃其才學不主  
故常豪而失之怒張博而失之蔓衍者亦時有之作鎮海樓詩七  
言長律至二百韻古人無是格也其所以長卽其所以短乎

右 四庫提要張維屏錄

錢塘桑先生諱調元字敬甫進士官工部主事撰論語說二卷凡五百條分上下二卷又分五子卷所言皆闡集註未盡之義如謂人知有慾不剛而不知無慾尙非剛之類頗爲細密又撰有躬行實踐錄

右學案唐鑑輯

王洛

懷坡係翰編參藩大初曾孫拔貢由欒城令歷河南彰德府知府  
聖之孫歲貢生候選訓導員之子幼失怙家道中落同兄己酉孝  
廉沂銳志讀書事母至孝弟兄同遊泮水丙午鄉捷癸丑成進士  
改官西曹補雲南司主事升山東司員外郎佐理庶獄多所平反  
保送御史記名旋丁內艱服闋赴補原官隨升吏部稽勳司郎中  
兼辦考功司事充甲子丙戌丁亥等十一科文武鄉會試同考官  
得劉躍雲等百餘人後皆顯達人均服其藻鑑病歸主講豫章書  
院十三載課士謹嚴羣相推敬甘立猷項家達周厚轅涂以轉等  
俱受業以成名者妻張氏博通經史詩詞書畫靡不精良著有閩

國朝詩集類名考卷一  
先正四一四

中唱和詩集淪盡文集懷坡詩鈔行世

右安徽通志張維屏錄  
按王公字仲涵一號慕庵安徽桐城縣人

三

趙貴樸

余二十一歲鴻詞報罷居長安大難句容王郎中琬招往與其兒  
子通書未三月王公出守興化挈家行余儻然無歸矣同客王氏  
者趙舍人奮曰子無憂郎中雖去其屋吾賃之其竈吾炊之因共  
臥起出詩文相礪切亡何子受今大宗伯嵇公聘乃別舍人當是  
時無嵇公舍人終余食也無舍人余幾不能待嵇公矣舍人故貧  
士出鄂文端公門下將薦予於文端而爲他客所尼不果薦舍人  
詩文豪健如其人與御史仲永檀同年仲劾九門提督鄂善賊  
天子以爲直超遷副都御史舍人與書以爲薦賢受上賞古有之  
矣劾人罪受美官於古未前聞也此位公宜辭宜薦賢者如薦賢



則吾鄉王次山先生可次山者諱峻嶷嶷有立者也仲覽書頗不可於意不答終以他事敗舍人名貴樸字再白江南常熟人以某年月日卒京師乙卯孝廉官止中書舍人壽四十餘

誅日子之意氣吞一世兮而止於斯時不副其志兮子之文章萬口推兮而止於斯學不盡其才兮雪紛紛兮長安雨瀟瀟兮虞山誰攬子祛兮誰授子餐嗚呼子壽短兮子情則長我不能報兮亦不能忘

右誄袁枚撰

王光國

王光國字文載湖南清泉人雍正乙卯舉人乾隆壬申授國子監學錄主講石鼓書院最久衡湘學者奉爲典型書法端方老重如其人相傳能辟崇疫人爭寶之年八十七卒

石傳李元度撰

皇朝通志卷一百一十一

十一

卓奇圖

卓奇圖字悟庵滿洲人官筆帖式

紀昀灤陽消夏續錄田松巖持畫扇筆墨秀潤似文衡山云其親  
串德君芝麓作上有詩曰野水平沙落日遙半山紅樹影蕭條酒  
樓人倚孤尊坐看我騎驢過板橋風味脩然有塵外之致後題云  
卓悟庵作愛其遙情高韻錄而存之

右 熙朝雅頌集鐵保錄



葛祖亮

程庭祚云聞橋自少力學於書無所不窺長有文名出入鄉校成均凡三十載始成進士官禮部又十三年而引疾以歸性狷介謹於自守雅愛佳山水冥搜幽討不避險艱海內名勝什探其五嘗遊衡山募李長源浩然有卜居之志

右正雅集符棨森錄

按葛公江蘇江甯縣人乾隆丙辰進士官禮部主事著有花安樓詩



張汝澗

張汝澗字栗夫湖南善化人乾隆丙辰進士授刑部主事終吏部郎中栗夫舉雍正乙卯湖南鄉試第一甚有文名昆明錢南園通政禮其受業弟子也通政以直節聞於時其視學湖南也嘗招其子雋思入幕襄校雋思辭不往時論賢之雋思歲貢生亦有文名

右沅湘耆舊集小傳鄧顯鶴撰

善化張汝澗由進士授刑部主事治獄多所平反轉吏部益綜覈名實同曹皆倚重之

右述聞謚瑤錄





李錯

李錯漢軍正黃旗人祖恆忠以侍衛事 太宗文皇帝 賜名宜  
哈納正黃旗副都統父李輝祖湖廣總督自有傳錯娶大學士索  
額圖女家世貴顯其於榮利 泊如也性友愛兄伊山獲譴遠戍錯  
往省纍月乃歸祈山官閤罷 歸無家錯以屋授祈山凡先業之美  
者悉讓兩兄並售己產代償 遭嘗仕爲官庫筆帖式旋棄去乾隆  
元年薦應博學鴻詞科試未中選十五年 詔舉經學大臣交章  
論薦錯以老疾辭妙時雅好山水足跡徧天下客江南艤舟采石  
旣夕江月上鼓櫂中流命琴客彈大雅扣舷以應其節水宿者皆  
起視以爲狂又嘗北遊犯雨雪獨行谿谷中豺虎迹縱橫不顧也

苦嗜茗爲鐵鑄瓦缶使奚負以從錯旣以屋子兄乃築室盤山廡  
青峯下閉戶耽吟旣老歲一至城中一二日卽歸人罕得見居盤  
二十載以歿詩古奧峭削自關門徑所著有睫巢詩文集各十卷  
原易三卷春秋通義十八卷尙史七十卷

右 國史館本傳

李錯字鐵君一字眉山號廡青山人又號焦明子漢軍人乾隆丙  
辰薦試博學鴻詞復舉經學

八旗通志睫巢集六卷後集一卷李錯撰錯卜居盤山優游泉石  
以終故其詩思蕭散挺然拔俗大都有古松奇石之態而刻意求  
高務思擺脫亦往往有劖削骨立斧鑿畱痕較王世貞所謂高叔

嗣詩如空山鼓琴沈思忽往木葉盡脫石氣自青者則猶有一閒之未達蓋可以著力之處精思者得之不容著力之處精思反失之也

雷鉉序云山人寄跡盤山潞水間著有春秋義尚史數十卷足補前古之缺

秦蕙田序云睫集集始讀之淵然以古炳然以則浸淫乎漢魏初盛唐諸家而歸本於少陵其言有物其品亮以潔其志宏以遠其氣廉以平其詣邃以正聲律益筌蹠云爾

杭世駿詞科掌故鐵君先世蜀人故一字眉山原任官庫筆帖式慎郡王兵部左侍郎宗室德公所薦鐵君家世貴顯父輝祖累官

少司寇又大學士索額圖介壻獨耽清寂依祖塋隱盤山廡青峯  
下號廡青山人又號焦明子自爲傳曰焦明子有靜癖喜行無人  
徑嘗犯雨雪歷谿谷中獨遊以爲樂豺虎迹縱橫不顧也苦嗜茗  
爲鐵鑊瓦缶使奚所至負從之每茶煙起水石邊樵采者咸知其  
爲焦明子也涇郡王爲刊其集曰焦明詩文刪稱爲高寒幽官博  
奧崛奇整暇如佩玉鳴琴奔驟如雲車風馬文真秦漢以上手筆  
詩非中晚以下格韻視世之以薦花爲國奴以紅粟爲法物者超  
然遠矣

右 熙朝雅頌集鐵保錄

身青係勳臣後當得大官乃借其配終於盤山既老歲一至城中

然一三日即歸人罕見其面詩古奧峭削自闕門徑高者胎源杜  
陵次亦近孟東野

右 國朝詩別裁集小傳沈德潛撰



王藻

鴻博制科松陵舉者如沈冠雲走耕石吳萬長陸元萼周道夫暨  
梅泖六人或祖述風騷或湛深經術上希潘徐而無其遇殊堪歎

惜羣雅集

曹廷樞云吳文恪公為學士聞梅泖名以賓禮延致之青鞵布鞞  
長揖就坐大為文恪激賞文恪領一統志書局總裁官遂專委梅  
泖以檢閱之任殫精著錄凡七閱寒暑而文恪卒於位

右正雅集符葆森錄

按王公字載揚江蘇吳江縣人監生  
乾隆丙辰薦舉博學鴻詞官園子監

學正著有為  
版湖莊詩集





長住

長住字蘭谷漢軍人薦試博學鴻詞官內務府郎中

杭世駿詞科掌錄長住姓王氏字松儕正白旗包衣漢軍監生任  
景陵八品茶上人慎郡王所薦

右 熙朝雅頌集鐵保錄

1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

三

國朝耆獻類徵初編卷百四十四補錄

郎署六

袁守定

袁守定字叔論江西豐城人雍正庚戌進士任會同縣知縣縣屬  
洪江爲辰沅大鎮商賈輻輳守定至卽革洪江三累一牛稅一小  
甲一銀工按月遞結鎮多火災立火巷以紓之古州苗叛天柱之  
瓦疇徧縣境守定請於上官團練鄉勇於和尙坡設卡壑濠防守  
守定毋迎養在署請暫移省城以避母叱之曰苗果來爾能死我  
獨不能死乎嗣大兵勦戡專辦運餉無少遲誤苗平而民不擾有  
耜穰庵僧復智爲城隍廟二僧謀殺火寺樓及屍而以盜報守定

訊其徒戰慄不言訊二僧皆以爲盜二僧衣亦劫去念僧本貧乏不宜有此察佛龕上有空處令役爬入取二僧衣及米出鞠之乃二僧疑復智有貨與其徒殺之及搜無長物遂縱火指爲盜立置三僧於法調芷江縣署桂陽州事一日往鄉履勘路旁古井有煙值上如縷視之井水沸卽涸其井得屍數段密偵之知屍爲木匠夜宿某店竊主人衣物及覺追而斃之投於井拘店主訊之盡服署黔陽遊勾羊氏攜二子楊大楊二婿李甲往激浦住塘古廟羊氏素與縣民楊乙姦宿甚密旣二子及婿同住一處乙不敢近忽傳相近之大神殿有二屍視之則羊氏楊乙也激浦令某驗屍且潰件作報多傷申於府府疑羊氏之子恚楊乙與其母通併殺之

獄久不決檄守定覆訊守定細驗死所及屍衣俱無血痕而廡外  
樹下地有血漬遺鬚刀一屍頸有刀抹傷偵楊乙業鬚知爲二勾  
偶爾路遇不得復修舊歡彼此刎頸相從爾因是以自刎白上官  
終不能信復委他令覆檢果無傷卒如守定詳結開釋諸勾其決  
獄類如此守定署桂陽卸任後收交代推求不已至羈其家人州  
人數千集城隍廟曰新牧之畱袁公使補葺城垣壇廟耳我輩人  
持一甑一瓦代爲修之會監盤官至亟具結牒而歸其使守定所  
至革陋規立學校課生童設義渡皆垂久遠之法督撫交章薦爲  
全楚賢能第一行取以母老乞終養丁憂服闋補直隸曲周縣知  
縣未一年升禮部主事旋病歸卒著有讀易豹窺雩上詩說圖民

錄藏於家

右傳余肇鈞撰

國朝耆獻類徵初編卷百四十四補錄

郎署六

馬璞

馬授疇名璞長洲人磐莊先生子也磐莊與蔡忠襄金正希從學新安雲莊程子既老屏跡羊山程子墓廬蓋嘗獨居三年者也授疇至性過人年十二負米數百里外自炊飯和羹以養父父歿乃爲萬里遊歌大江頌黃河徒步三千里遊京師過泰山登焉宿日觀峯候日出賦之時方弱冠康熙癸巳歲也其明年復南遊問道山陰泊富春江詠子陵釣臺跨桐廬上龍游環江郎之山度仙霞關入閩浮舟下延平倚天柱峯歷危灘數百里駐甌甯望武夷之



曲道仙遊出晉江梯白翻嶺憩永春縣治食荔枝避暑於大鵬山  
至漳浦俯漳臺鼓棹出廈門觀海而還所至州郡當道者多磐莊  
先生門下士至輒去之所過佳山水則畱詩謂如我意中人也性  
好施於漳見二客資其窮復見於廈門或曰此僞也授疇曰是億  
也母甯受欺眾以僞億人所以愈無告也度嶺老幼擁輿而嗟給  
以錢或曰眾不徧將置授疇曰身有疾痛必救之吾救吾心痛耳  
至武林方飲豔妓來弗狎慰而悲之妓泣以酒酌地曰夙孽也奈  
之何有憐我以欲無憐我以情者況憐我以義乎授疇嘗言獨居  
時每忽忽成感慨見貧苦人淚數嚙意更無聊天壤間有如我癡  
絕人當肝膽贈之魂魄殉之也戊戌秋復北上時方修古今圖書

集成一萬卷當事者薦授疇修闡媛典三百七十六卷廁名者皆得官獨弗及蒲城屈悔翁爲作崑崙嘆雍正壬子冬詔求賢侍郎陳慈田薦之得監督興平倉尋被劾仁和姚侍郎舉授疇應乾隆丙辰鴻博科辭不果授疇與陳散樗相莫逆喜欽州處士朱介三文與屈悔翁詩散樗介三歿於悔翁益繼綵居都下數十年窮益甚年五十未娶昔所聘已死後聘毘陵女將娶以罷官而止一姊名婧赴都就食婧能詩年三十始嫁終爲薄命云

右記史震林撰



國朝耆獻類徵初編卷百四十四補錄

郎署六

陳樹萊

雍正己酉春識散樗於廣陵目余爲國士愧之庚戌曹震亭會試  
散樗求其詩未答乙卯聞散樗卒震亭有詩云蕃釐別院苦吟身  
瓊樹全枯感慨頻能向塵中憐國士竟從天上泣詩人冰霜楚畹  
滋蘭夜風雨夷門執轡春秋色到今悲勝昔寒蕪如錦菊花貧易  
質時屬家客傅振華至江南請余爲墓誌誌云嗚呼此散樗夜臺  
也散樗膏於仕與年功業無所見請誌其言謂余曰名不符實者  
天所成實不副名者天所傾宜憂勤以求實謙退以讓名焉富莫

樂於濟貧乏實莫樂於拔孤寒自損者天所益自屈者天所伸也  
士大夫飾車服炫辭令則奢佞滋樸訥者導人於儉且質也嗚呼  
散樗而壽豈竟無功業者哉散樗官京師雍正辛亥歲以省母歸  
楚壬子病賦悲秋行而卒名樹萊字瑤田長沙湘潭人恪勤公陳  
鵬年第八子母王氏少司農樹萱之胞弟己酉孝廉樹葵刑部郎  
中樹蕃之親弟也年二十有七無子妻江氏守志銘曰  
浩浩兮楚天死爲才鬼亦當勝於頑仙

右記史震林撰

國朝書獻類徵初編卷百四十五目錄

郎署七

峻德

吳爾周日贊

張永祚

祝維誥

馮成修

法坤宏

張本

潘士權

孫夢遠

郭峻

劉世甯

馬寅著

錢在培

唐英

褚寅亮

張模

董達存

尹均

顧鎮

王又曾

邵齊熊

汪棟

戴文鎧

袁名器 黃齊煥

國朝書獻類徵初編卷百四十五目錄

國朝詩林卷之九百四十五

吳泰來

孟超然

廣順

項澗

石鴻壽

補錄

張宗蒼

姜錫嘏

國朝耆獻類徵初編卷百四十五

通奉大夫前署江西巡撫江西布政使司布政使湘陰李桓輯  
郎署七

峻德

納蘭峻德克明歲貢生任戶部七品筆帖式副憲奉天孫公所薦  
與同官保祿在中皆有詩名南城潘安禮序其使秦集云覽其感  
物造端道古吟諷動生千載之思而風俗政治之大端一篇之中  
閒見側出

詞科掌錄

納蘭戶部慎齋嘗寓盤山天城寺與水月庵僧然西以詩往還繫  
於小犬之項云相望一峯隔相呼恐不聞寄詩憑小犬好去度深



雲僧答詩有昔有鴻傳信今憑犬寄詩句犬寄詩則古所未有者  
可爲廖融添一詩奴

稗句

右正雅集符葆森錄

按峻公滿洲人乾隆丙辰薦舉博學鴻詞著有雲窠藏藁

吳鼎 周 日贊

吳鼎字大年江蘇無錫人乾隆元年進士鼎幼而嗜學穿穴宋元明儒之書而沈酣於六經撰三正考以駁胡安國夏時冠周月之謬於易三禮尤深暇與仲弟鼎及蔡德晉秦蕙田龔燦爲經會尚書江陰楊名時以經學薦未授官成進士授虞衡司主事聞父訃歸尋歿同邑周曰贊字上襄乾隆十六年進士旋授庶吉士改戶部主事遷員外郎視學雲南河南性沈毅典試山西秋暑甚曰贊肅衣冠升堂閱卷至夜分房考官列坐不敢平視

右傳楊熙之撰

國朝子史考卷之三

七

張永祚

君諱永祚字景韶號兩湖世爲仁和人籍錢塘者自君始隸郡學爲弟子由錢塘也會祖岐然廩生後出世名載邑志祖元時邑諸生父奏邑廩生自君以上五世皆列膠庠獨君數奇不得一當母徐處士士俊女通曉星學甫離孩抱卽夜從母仰瞻五緯已異凡兒長益究悉占天其宿習也天竺山中農家有女不肖妄許平人得一青衿始可有欲爲君蹇脩者而君年近立猶困童子試謾以博士弟子員應遂委禽入贅從子假襪衫攝盛而往久而察其非也且泣且謝督之攻苦益力交河王學士來典浙學旋被知遇而君儼然真爲諸生破涕始爲一笑無錫嵇公以大學士總制浙閩

求能通知星象者以應乾隆二年二月 明詔試君策立成數千  
言大器之薦於 朝授欽天監博士始棄諸生服一再引 見占  
候悉驗萬大學士公訥親賜園公無子使參三命微諷以修德致  
福而公不能自克君察其不可久居稍稍自遠會 詔刊經史華  
亭張司寇照薦君校勘二十二史天文律曆兩志用君所長也書  
成方俟議敘而君遽乞假歸取平昔所著天象源委足成之凡二  
十卷一卷言象理二卷言象法三卷言象度四卷恆星五卷占時  
六卷至十卷占歲十一卷命法十二卷求地平宮法十三卷月離  
十四卷命理十五卷西法十格十六十七卷選擇十八卷風雨占  
十九二十卷分野而以董仲舒祈禱晴雨附將錄成以呈 乙覽

而君不及待已某年月日卒於竹竿巷萬氏清白堂之寓齋年六十有幾無子族子果葬君於龍井之新阡以孺人李氏祔有女能傳其學嫁諸生沈度其書在度家今度夫婦皆死恐遂湮沒故詳著其例於篇後有通知其意者可以迹也銘曰

屈首經生非所長抑志測驗道乃昌歸而沒命於此藏藏乎此著書滿家君不死

右墓碣杭世駿撰

臣等謹將所請

卷一百一十五

2

祝維誥

秀水祝原堂先生維誥著綠溪詩彙緣所居綠溪莊曰小方壺其

詩清麗芊絲樂府體尤佳 南雅堂筆記

貞臣以奉天府丞之薦部議謂非三品大臣之舉不準試 詞科餘

話

秀水祝原堂維誥作燕臺新樂府如賣漿潑水響蓋太平鼓之類

各有一篇俱可補長安風土記 菊坡詩話

石正雅集符葆森錄 按祝公一字宜臣浙江海甯州人秀水縣籍乾隆丙辰薦舉博學鴻詞戊

午舉人官內閣中書

詞科餘  
七





馮成修

馮成修七齡喪母依世父以養每語及其父遠出事輒涕泗交頤益奮學己未成進士選庶常散館改吏部主事庚午晉禮部郎中己卯命督學貴州揭條約十四則以訓士成修得官後兩次乞假尋親卒無所遇以故一生隱痛年六十一假歸不復出掌教粵秀越華書院受業數百人年八十計其父己百有一齡乃持服三年乙卯重宴鹿鳴卒壽九十有五著有養正要規諸書

右廣東通志張維屏錄

馮潛齋先生成修廣東人幼牧牛夢有持扇爲障日者扇上有貴州學政四字因奮志讀書年三十四始遊庠逾年登賢書聯捷點

庶常改部曹典蜀試又典閩試得藍生彩元作解首先是爲王安  
國尙書典試所賞必欲中元因與正主試不合爭之不得尙書曰  
姑置之此人不中元吾不信也閱二十年果發解尙書喜極而藍  
老矣先生嗣出貴州學差果符夢兆旋罷歸好論文有馮八股之  
目年九十餘始卒乾隆壬寅八秩與夫人同庚康健無恙屆結禱  
周甲之期親友門生駢集稱慶重行花燭交拜之禮自署其門云  
子未必肖孫未必賢屢忝科名只爲老年娛晚景夫豈能剛妻豈  
能順重燒花燭幸邀天眷錫遐齡至乾隆壬子重赴鹿鳴洵美談  
也

右兩般秋雨庵隨筆梁紹壬撰

按馮公字達  
天南海人

法坤宏

迂齋姓法氏名坤宏字直方一字鏡野膠州人膠去濰僅二百里  
余與迂齋相知三十年音問時至去年冬以近文示余余讀之歎  
其老而彌工中有議禮文質以所疑久之無報書余私憂曰迂齋  
其有恙乎未踰時而凶問至嗚呼弱年師友至是盡矣始於應童  
子試方幼齡而迂齋聲振齊魯聞於眾中望見之乾隆十七年秋  
恩科會試將公車北上有款門至者則迂齋也曰我來與君偕余  
與迂齋同郡而年不相及聞於友人間懷庭道其經明言立可追  
古人至此得與訂交懷庭迂齋同年友合志術者也迂齋博通羣  
經尤遠於春秋所著春秋取義測去例明義解傳注之曲鑿九易

案而後成以綱目提要後人傳述或失其初非朱子手訂著綱目  
要刪爲文喜人彈譏每一字屢更不厭余爲序學古編謂其得太  
史公深處吾鄉宋玉叔王文簡未之或先也迂齋報書云言者異  
則人心變矣此序他日出之可也遂易而用之其善下不自足如  
此法氏原籍濟南始祖文質爲膠州學正遂隸膠籍九傳至怡雲  
公實以舉人仕至懷慶府同知 國初死逆鎮海時行之難乾隆  
二十九年奉 旨入昭忠祠是爲迂齋高祖曾祖若眞特薦五經  
異才授中書舍人順治丙戌進士入內翰林院國史院仕至安徽  
布政使祖松康熙乙未進士任大理寺評事考光祖太學生母焦  
氏迂齋初爲學卽厭講師說多特見人咸詫之所爲文閉目不敢

道以故爲諸生三十年無遇合惟督學徐公鐸奇賞之辛酉以第二名舉於鄉徐公語主考萬公年茂曰法君老學鉅文君可謂能得士矣七上公車不第以年老舉人授大理寺評事而歸遂不出先是 詔旨年八十者授翰林銜或謂迂齋曷益年迂齋正色曰事君不可欺迂齋喜談論淋漓動人余嘗過所居海上廬借駕柴車觀少海是日大風寒語輒舌澀迂齋於車中述平生至可喜輒撫掌大笑抵暮買魚市酒歸日與君爲竟夜談是後不復相見而迂齋卒矣生於康熙三十七年十月十四日卒於乾隆五十二年二月十六日年八十有七以是年某月某日葬於某鄉某原妻冷氏子二人嵩齡丙子科舉人九齡州庠生出嗣弟蘄野孫七人夢徵

庠生曾孫六人嵩齡以狀來請銘遂愴然序而銘之銘曰

漢儒治經屹屹以專唐氏祖漢博以繼焉於惟宋儒既精且闡非  
精之爲惟身是益既閒且儀爲後世師迂齋之學殫究聖志筆  
削既彰典禮用植烈烈怡雲捐軀海氛 聖朝褒節忠著 恩綸  
迂齋稽典涕泣建祠繼 皇之仁維祖之徽以率族姓爰訓子孫  
俾式於則罔不有欽海水澹淡勞峯蕭瑟我作斯銘以垂永極

右墓誌銘韓夢周撰

法先生坤宏字鏡野膠州人康熙十七年若真以博學鴻儒薦後  
官安徽布政使先生曾祖也先生性恬靜不諧俗與人言陳義至  
高人以爲迂遂自號迂齋嘗讀諸儒論學書未厭也旣得傳習錄

天喜以爲如己意所出故其學以陽明爲宗以不自欺爲本同時  
國先生循觀韓先生夢周論學皆譏切陽明韓先生嘗歷舉其不  
合程朱者以質先生先生曰此無事口談也君子之學譬之飲食  
得其甘者果其腹飮其精者澤其體徒謀謀然爲他人辨是非所  
謂舍爾靈龜觀我朵頤也先生博通諸經尤達於春秋著取義測  
十二卷白序曰春秋取義測測孔子竊取魯春秋之義也孔子之  
時禮教衰微先王經世大法蕩無復存欲述古以明其義而徒託  
空言無徵也乃博求當代大人有禮教之責諸侯大夫見諸行事  
之實效比義類明是非折衷以立教而諸侯大夫行事備載列國  
諸史子曰我欲觀夏道是故之杞而不足徵也我欲觀殷道是故



之宋而不足徵也我觀周道幽厲傷之吾舍魯何適矣吾猶及史  
之闕文也蓋魯秉周禮文武之舊典禮經載在冊府太史職之是  
是非非無敢失周公之遺法故魯之春秋雖與晉乘楚檣杌並稱  
而辭約義該信以傳信疑以傳疑可以述往聖詔來學孔子獨有  
取焉當是時王室東遷周之子孫日失其序魯國積弱無能自強  
於政治惟承奉伯主之文告而已故曰其事則齊桓晉文而史家  
記事之法自有大例君舉必書諸侯之會其德刑禮義無國不記  
故曰其文則史魯之春秋雖能有懲惡勸善之義而其事其文無  
關教義拘於史例過而存焉者固已多矣孔子於是筆而削之筆  
其事文之足爲法戒者削其事文之無足爲法戒者故曰其義則

巨竊取之矣其義魯之春秋之義春秋本自有義孔子以筆削取之故曰取義蓋春秋之教主於徵信達道據事直書而其義自見而說經者紛紛謂孔子作春秋假魯史以譏貶當世隱閔之薨舊史實書弑孔子諱其事改曰公薨温之會舊史實書召王孔子嫌其文改曰天王狩於河陽又謂例當書爵或黜而稱人例當書名或進而書字是孔子以己意變亂舊章劫作一部春秋取義之旨隱矣或曰若然孔子直鈔魯史耳何以謂之作春秋曰魯史以勸懲舉王法春秋以筆削章聖教取義之旨寓於筆削故曰作魯史舉法而是春秋特筆之以章其是如趙盾與州吁宋督之弑同書許止與商臣蔡般之弑同書孔子竝取之此義明而亂臣賊子之

黨無所逃其誅矣魯史舉法而非春秋特削之以章其非如魯羣公之錫命則書王使召伯廖賜齊侯命王子虎策命晉侯爲侯伯則不書蓋孔子削之此義明而假仁襲義之奸無敢僭其賞矣然則誅賞者法也是非者教也法非天子不敢明教雖庶人亦可明春秋天子之事也筆削之春秋庶人明天子之事也故孔子嘗曰知我者其惟春秋乎罪我者其惟春秋乎記曰屬辭比事春秋教也韓子曰春秋書王法不誅其人身此知孔子者也若紛紛之論皆罪孔子者也坤宏束髮授經卽蓄此疑不揣謏陋爲取義測以爲孔子作春秋一因魯史舊文有筆削而無改易凡所謂筆者筆其舊凡所謂削者削其繁至其義則具見於文事吾之於人也誰

毀誰譽子亦猶行三代之直道而已矣於戲此取義之微旨也夫  
又以春秋之義論通鑑綱目著綱目要略自序曰或謂朱子修綱  
目大書以提要分注以備言發凡起例以正褒貶三者備而後大  
義明爲能得孔子作春秋之意此不知綱目竝不知春秋者也孔  
子作春秋因魯史舊文大書特書義取見事三傳言煩義支至執  
日月名爵曲爲傅會傳例興春秋亂矣司馬溫公憂史事之失實  
奉敕修通鑑正史外博採百氏之書參互攷訂晚年輯舉要歷詞  
簡義該朱子因之作提要以著明其事事具而善惡昭勸懲立孔  
子春秋家法也門人纂分注效傳體而爲之朱子不欲僭作經之  
名兼收竝錄以成綱目凡例後出書之真僞在當時卽有異議綱

國朝通志卷之七 卷之七 十一  
日本以擬春秋春秋不可以傳例求綱目詎可以凡例定乎是故  
得孔子修春秋之意者斯可與知綱目矣閒嘗竊取朱子提要原  
本略加刪訂於其中事關勸懲與春秋義法相應者揭而錄之起  
秦始皇帝二十六年迄五代之季名曰綱目要略彙括凡例用其  
義不用其詞參以愚見分注於各條之下至其他爲凡例所亂如  
攷異攷證之類則槩從削俾學者勿泥褒貶舊說蔽晦大義乃春  
秋之法而朱子修綱目之本意也先生之言如此而韓先生作綱  
目凡例辨據朱子自序云與同志別爲義例增損彙括以就此編  
趙訥齋亦云凡例一冊已鈔在此朱子又有於例中見意之說是  
凡例實出於朱子謂先生若以本書未盡善更加筆削則凡例當

別論若以朱子之書還之朱子則凡例不可不信云先生舉乾隆六年鄉試七上公車以年老舉人授大理評事五十年卒年八十七有七

右傳錢儀吉撰

理堂韓先生作法先生小傳曰法坤宏字鏡野號迂齋膠州人辛酉舉人少爲學卽不冝事章句讀諸儒論學書以爲如己意所欲出行事必準古人與人言陳誼至高世類以爲迂因自號迂齋嘗以春秋者聖人不得已之書一筆一削心法存焉奈沒於經師講說遂使聖人之心不可復見於是發奮究討以折衷至是閱三十年書始成名曰春秋取義測爲文嚴於義法史記入家外又好歸

震川方望溪餘子不屑也所著有學古編若干卷藏於家又序其學古編曰膠西法迂齋先生少治古文學罷舉以來伏處海上不獲躬制作之林文故未大顯於世迂齋今且老同學友彙其文若干首付梓人而以余之與迂齋相知來問序余謂天下言文者歸太史公而明歸熙甫學之爲能神似太史公搜奇探賾上下數千年以爲紀表世家書傳熙甫嘗自言不得當世奇行偉烈書之用以爲恨然熙甫生與王弇州同時弇州取材最博撰述最富其四部棄欲自擬於國史而三百年來獨震川集衣被海內承學之士奉爲科律蓋文章自有真也昔亡友閻君懷庭好迂齋文每日講指畫其所以然去年余刻懷庭西澗集於淮安今迂齋集告竣

復序之屈指壯年交遊惟迂齋與余在陳思王有言誰相知定吾  
文者此所爲執筆而太息也又序其綱目要略曰朱子作綱目草  
橐甫就未及刪修而傳刻又多有譌漏學者執書法字索句求之  
故曲說破義往往不免蓋春秋載夏五非孔子之舊也其脫誤在  
三傳之前矣孔子作春秋筆削舊史何取乎破句而存之且何與  
於春秋天子之事之義也夫以聖人之經流傳脫誤滋異義生鈴  
說筆削之旨爲晦蝕況綱目未經修定加以譌漏強爲之解以文  
害辭辭害義是逞私智而誤前賢也膠西法迂齋先生著綱目要  
略錄取綱維約文申義其於本書之未修及後人淆亂者不復煩  
爲辨論而一裁於義法體愈求嚴義愈求精雖與朱子本意盡合



與否未敢知然固朱子之所待於後者也司馬溫公合累代之史以爲通鑑朱子合數賢之書而成綱目迂齋又緒承朱子意益復精研取歸至是夫以累世賢人君子接應起竭心思智慮折衷義理之歸吾知必有當焉不爲空文而已也迂齋素深於春秋所著取義測解羣說之紛糾以求合聖裁茲書仍以說春秋法說綱目後之讀綱目者苟權衡於此可無憾其淆亂焉臺山羅先生與法先生書曰循復二序破經師之陋發先聖昔賢之蘊使後世學者卽事爲之著求性命之歸微顯一致內外同條誠不必外民生日用空談名理至於雕盤藻繪虛飾輪轅愈無諛焉善學者苟得先生之緒言而講貫之可以知所致力矣雖然本末先後之序亦有

不可強合者聖人作春秋東規西矩南衡北權中繩五則不爽萬物就裁其本在於學易學易之本在於謹彝倫慎言行內之於禮入之彝倫言行壹於禮則性復仁全措之正施之行變化生而經緯天地之事起此聖人所自盡而順天下萬世同歸而無歧者也南宋諸大儒所爲固持堯舜孔孟之道於國事倥偬之會者此春秋之義也謂別無說以易之也道不可以二故也孟子曰不以舜之所以事堯者事君不敬其君者也不以堯之所以治民者治民賊其民者也建三才橫六合一道而已二之則惑反之則亂禮大傳所云不可變革者也亦卽先生所云滄海橫流經常大義硯乎可知者也南宋之君不能勉強信用不專諸大儒之說未嘗一日

得施於行事是以卒成爲南宋也孟子述唐虞三代於戰國擾攘之時朱陸陳誠正義利之辨於南宋南北交訌之日其揆一也先生荅懷庭書謂南宋儒先不識時宜持方柄而內圓鑿乎夫所云時宜者立權度量考文章改正朔易服色異器械殊徽號得與民變革者也聖人鼓舞盡神化裁盡利既竭聰明焉至於天之經地之義人之行非所謂時宜也南宋諸大儒之所諍論天經也地義也人行也烏得而不斤斤也先生其熟思之懷庭云亡吾道益孤每過虎坊橋輒有腹痛之感近公復解組其出處令人敬慕去先生之居未遠可以往復尊著繕寫成務令朋好盡意斟酌歸於至善勿畱遺憾先生立身行己至有可觀惟學偏姚江故理堂懷庭

兩先生集中與先生尺素往復俱有規勸語臺山之說又如此是亦可以想見矣

右學案唐鑑輯



張本

君姓張氏諱本字稼善一字敦源安慶望江人曾祖之禎祖尙恕  
父世琮祖父並以君仕 贈承德郎甯海州州同知妻許 贈安  
人先卒子三人龍見縣學生龍舉龍應並幼君生於康熙癸巳七  
月二十三日卒於乾隆甲午八月十五日年六十有二 敕授承  
德郎西城兵馬司副指揮使乾隆丙子君初官山東登州府甯海  
州州同知時山陰陳球知府事望見君曰斷斷讀書子也何爲在  
此君曰本以辛酉選拔貢生執筆隸館中不獲齒舉於省試以議  
敘來獲侍執事球曰能爲我校閱府中十州縣之文乎應曰諾校  
閱畢榜於府門人人以爲當君乃言於同官及州之人曰學宮州

士所以釋菜於先師當作而新之書院所以立之師俾士相勸學也今州無書院其卜地宜皆曰然於時重修學宮而牟平書院之建自君始君之在官日夜思有利於人為之汲汲州瀕海民或去家登海舶以餬口於盛京所在多有某者聘某氏女而出十年不歸女父母來白曰女茲當改婚君召某兄至曰若弟定死邪曰弟十年斷家書而渡海者或曰見吾弟死未定也君曰某死未定若女待之十年貞矣而忽不待邪吾為若益期以半歲女在側領之未半歲某則捆載而至請娶女女曰非張公妾幾不為君婦於是奉筐承以雞卵酒饗昇躋於堂下男女再拜而還為四方夏君行俗崑崙山中圖經所謂姑餘山也山去州城迴遠有婦人狂走山

中而呼白晝剽者君卽止輿問曰孰剽若婦曰鄰某某君立召  
三人者至問狀僉曰某爲若鄰相負戴以助若而誑我剽若麥若  
男子病臥不出而婦人出官殆可誑邪君曰然然若耕田幾畝得  
麥幾何食幾何三人者具以對君曰若具言誑者敗矣卽下輿入  
三人室召斗筲較之則浮於所對大半君曰若三人口不待麥養  
邪自天降穰穰邪僉曰或餉我也君曰方登麥而孰爲若益之餉  
邪三人者吐舌服請死罪君曰趣負戴反若麥官坐若剽死矣自  
是山中守君法視城中城中故無官署君治久之州人走相告曰  
我公旣覆我而我使公無屋以蔽奈何則迭呼迭築以成之當是  
時知州南豐李湖州同知爲君吏目陳大烈悉不名一錢州人



至今號曰三清居六年壬午君以外艱去壬辰起官授西城副指揮使指揮隸五城御史錯治輦轂之下號難治官與胥吏狎以偏聞者居中爲姦利君宣言曰吾無聞胥吏孰敢參吾事訟者其來吾立判罷之已而果然有宛平人知其妻與縣役李某通俄失其妻三月矣訟之縣李某曰故與通有知失則不知也縣不能決則訟之城御史下君鞫問固對如初君曰人失妻無所蹤跡不酷與之通者而誰酷邪施三木焉李某痛呼曰在卑戾門近所呼之而妻抱一兒至其夫願受之去抵李某罪去報御史御史喜曰能使吾城爭價於縣者公也阜成門外賊每挾翦於路以伺其魁曰趙小定楊老兩人狼狽取行者貲不虛發君固知之而賊與役交通

官莫能致君一日坐聽事決事聞外人叫無辜已而聲漸遠君問  
無有卽怒曰若欺叫者而去之當有情不與俱來吾榜殺若矣叫  
者卽至則山西賣續者也君曰客何叫曰民以續易白金三十兩  
喝而解囊悒於簷間或攫之走遭趙小定者曰助爾索金而分我  
金民疑之叫於官門者嚇焉曰入將榜爾尻民赧赧不敢前惟公  
憐之君卽召小定曰吾耳熟若名久矣今若爲人解紛當知攫爲  
誰曰小定許爲之蹤跡攫者耳實不知誰也君曰若不言吾立斃  
若若言其人而吾或貰若何如於是小定惶恐具言金所在召役  
卽之而并獲楊老君按律竟遠戍老黨數人者阜成挾翦之風頓  
衰君他所治率類此西城人方賴君會中秋日君有公事出宣武

門過其鄉人刑部郎中龍承祖啜茶頃曰吾疾作卽扶上車去及  
署而卒初望江之大雷池水發源自宿松流入縣界東南積而爲  
池曰雷池又東流經縣南百里東入江酈道元水經注所謂青林  
水西南歷潯陽分爲二一水東流通大雷者也君家自縣之華陽  
鎮遷城北十里寺自君之祖父固習知城南險渡有三曰縣步河  
曰韓家觜曰三官殿並大雷水所經流也水涸需橋水溢需船數  
十年以來民病之而未有舉者君贈公常慨然曰何日我及舉之  
及君以贈公艱歸一旦與其兄歲貢生問仁揮家財悉舉此三渡  
者橋船之具悉告備用畢乃父之志望江之人世世利焉君與兄  
問仁相愛如一人問仁之子龍升益侍君之卒歸柩於南而復來

東師爲其叔父乞墓石之銘龍升余壬辰試望江學第一人也爲之銘曰

兩能其職秩不一升利於人人上官無稱疾作乎友家續不屬乎車返乎廨而化古之祭法以死勤事非君也邪非君也邪

右墓碣銘朱筠撰

東師爲其叔父乞墓石之銘龍升余壬辰試望江學第一人也爲之銘曰

七



潘士權

潘士權字龍庵湖南黔陽附貢生少穎異長益肆力於學著有學庸一得尤精象數音律潛洪範九疇大樂元音諸書行世皆能發前人之祕數遊京師尤爲孫文定公所稱許書入四庫存目乾隆六年考補天文生呈請纂修占書委署太常博士十一年以葬親奉旨回籍歿年七十二

右傳易變堯撰

黔陽潘先生諱士權號龍庵官太常博士撰大樂元音七卷前五卷據琴定樂大旨本管子下徵之數一百入下羽之數九十六白虎通絃音離故首徵二說而通之按絃審音以首絃爲下徵二絃

爲下羽三絃爲宮四五六七爲商角徵羽并附以儀禮樂譜十二  
篇圖說頗繁然實本律呂正義琴以首絃爲下徵之說旁爲推演  
其由琴聲而推諸樂與近時慎修江氏律呂新論所見略同但不  
及江書之精密耳六卷附以琴譜曲譜七卷麻學音調類例甚詳

右學案唐鑑輯

孫夢遊

君諱夢遊字中伯姓孫氏江蘇昭文人世居邑東偏鹿阿鎮遂爲  
著姓祖履公四川什邡縣知縣父壽昌太學生並 贈奉直大夫  
君性尚疏簡氣度明豁吃於言辭偉於形貌不矯飾以取名不苟  
同以徇物剛毅木訥禮近仁之姿直諫多聞標益友之目年始舞  
勺能爲文詞達絕意嬉遊究心篇翰有核鞏籍軌涂先正十九歲  
補縣學生三十歲遊京師中雍正十三年順天副榜 今上乾隆  
元年補宋學右翼教習太常卿同邑陶公正靖經術史才儀型後  
進君升堂承訓辨析源流器識日充文體彌上於時四方英俊以  
鴻詞被徵及異等充貢者雲集輦下咸聞聲景附氣類相求君遊



道日廣華譽翁習矜標格以相許恥干謁以自媒故已名傾青槐  
之市迹絕霜戟之門三年中順天鄉舉七年成進士不樂簿書遂  
棄銅墨改秩教授待次家居迺更謝遣聲華屏絕人事研精又繫  
別事筌蹠以爲易蘊至深然理藉詞顯而諸家穿鑿或離析任意  
或附會承譌縱有新意殊非本指於是脫棄九師精求十翼務使  
考辭必順釋理皆從撰讀翼揆方凡十卷十六年 翠華南幸吳  
越今江蘇巡撫太子少保番禺莊公有恭昔與君共事宗學有尹  
班之契時以戶部侍郎督學三吳薦君詞賦蒙 恩召試行在即  
授中書舍人十八年在軍機處行走喉古要津鈞衡重地幹略之  
士是所爭趨君處之以樸誠將之以惴惴允洽物情莫能疑忌

駕幸熱河水蘭 東陵南苑累扈 清蹕勤慎著稱尋除宗人府  
主事以祖母喪去官服滿赴京師屬王師新平準夷有 詔撰集  
方略大學士諸城劉公統勳以軍機處舊人屬以編纂君恪慎載  
筆昕夕不怠自非職事未嘗私謁二十七年復補原官遇 覃恩  
誥授奉直大夫宗人府主事加一級君素懷磊落拙於治生宦遊  
減產有北門終窶之歎靡常生甌口不名錢竟以憂傷損和成疾  
以二十八年三月五日卒官春秋五十有八嗚呼哀哉君本以母  
老將辭歸養徵期已戒大命俄迫遺令二子祕已喪問勿使太夫  
人知之嗚呼悲矣時湖南按察使同邑巖公有禧在京實經紀君  
喪醫藥殮殮泊乎反葬多出其力君凡再娶元配錢氏佐君食貧

辛勤黽勉娶三歲而卒 贈宜人繼配嚴氏卽按察公之姑太僕  
少卿虞惇季女 封宜人生三子二女長子賚祖次子復祖太學  
生幼子培祖生十年隨喪南還將至道天卽以其年十二月十二  
日其孤以君之喪與錢宜人合耐宅東先塋之次乞余志其幽宮  
嗟夫余與君交歲踰二紀遷舉比牒之舊秦晉牽連之戚性情疏  
放之同文章旨趣之合風期篤密有踰等倫出處後先互成睽阻  
豈料奄值殲良長乖執手秣陵之書無因遠蒼山陽之夢空期動  
輪漣然攬筆敢辭蕪淺乃爲銘曰

鹿阿濱海孫宗居再世蘊文君擴諸名甄甲科踐天衢不樂銅墨  
歸著書疏明象繫闢榛蕪得三聖意遺羣儒 乘輿南巡蒐瑾瑜

鳳池戀開影華裾逝將養母還故廬沈瘵忽侵悲隙駒平生口吃  
勇有餘行不詭隨言不諛根本肫固節目疏交賢友直滿八區要  
津高門絕越起任實去浮君子徒我誌其埏涕漣如嗟哉斯人今  
則無刻詞紀實則泉塗茫茫千年名不渝

右墓誌銘邵齊燾撰



郭焯

羅洋山人姓郭氏名焯字昆甫別字壺莊善化人幼孤露侶一稚弟依外氏讀書性奇穎備出比長瀏覽經子百氏橫豎鉤貫名譽日隆隆起願其用志獨在不朽文章學行必躋攀古人而從之其視人世聲色貨利毀譽得喪無一足介其意者歸安吳侍讀大受拔其文於童子隊伍中以爲今之陶庵尤大旋選貢成均時江陰楊文定名時主國子祭酒數示焯以平生得力處且嘗謂彝倫堂同學者曰此生必爲天下有數人物而皖桐胡司業襲參暇則召焯坐國子槐樹下與之深論古今人物道義文章氣節數大事旁及天官河渠兵防經世大略其將歸老也又薦焯於桐城方侍郎

苞稱此生人文俱妙後來之望當屬斯人峻自謂生平腳根堅定  
得力於楊文定而授業解惑傳詩古文之道則聞之司業緒論者  
最多乾隆甲子以第一人領鄉解王申有薦峻者得官國子助教  
時方連舉禮部試挾策者侈談抉利病峻若罔聞知惟與其友彭  
晉函何忠相顧備九數人約爲文酒會月必一再集集則拈題角  
藝務各極其筆墨之性以漸進於古然竟不獲一第無何峻忽嬰  
疾自度不可起每手持其文力疾炯炯坐牀頭計較去取於毫釐  
分寸以訂名山之業時或與同學諸子往復爭論至於廢食廢寢  
必商定而後罷蓋其重文字而輕死生如此年四十二以乾隆乙  
亥二月卒於京邸爲人篤友愛喜交遊急病扶危則切於肌膚性

命當其一室歌呼日營指畫胸臆中如有無限條件急欲設施於  
世者然手定羅洋文草二帙鐫鏡造化刻露情狀要自具絕世  
神與元氣相往來呼吸已山王太史步青選其文入所見集八  
不古今體詩才力雄獨每沈鬱頓挫中忽奮句怒發追幽豔險破  
荒而出必得從來所未有文集若干卷尙待整齊校定其存者如  
此其他著述多隨手散去及門最得意者爲長沙諸生楊和春文  
秀韻仙骨天然以二十四歲死煖哭之詩甚哀有遺文一束嘗  
序而刻之不果自謂每念和春輒心怛怛痛不可抑按朱紱爲  
中表亦受業於煖得詩古文之傳紱爲關中楊子安鸞作逸雲  
編詩序傳頌人口其奇氣疎宕直神似子長也



論曰山人嘗自題其墓碣云有商以非義者雖三公之賈萬金之利弗顧諒矣哉方清江楊勤懋錫紱位都御史總風憲時焯疾正作勤懋亟重焯學行數數回車視焯疾某某者與焯爲文字交知其官冷病劇不名一錢又知勤懋心獨重焯一日齋金夥頤至屬焯居勤懋間囑獄馭法冀活其鄉人某死罪而以千金爲焯壽焯不覺頓足起立拍案自責曰斯言何爲至於我也我愧目不識子子乃以是糞土要我我卽死無恨恨今日始得割席自明不及早耳願我死子必益無所忌必身名俱敗喪投地不可復振起立叱之出某某固謝罪不出乃愈益誚讓訶斥聲徹牆屋洩江陳太史夢元寓焯賓館聞而往參之其人方內慚面赤涕洟潄落乃得太

史解脫辭去煖死未一年其人果陷於法夫世有有文而無行者矣則亦有藉其文以巧自附會其行更若有文卽無不可爲無不可得矣荀子所謂齋盜糧借賊兵其不信然乎其不信然乎如燧之毅然不惑於死較然不欺其所學不獨可爲貪墨者息黥補劓將使鶚立朝堂披肝瀝膽亦必有招之不可來麾之不可去而能以天下之重自任者春卿食材白日橫棄遂一病沈痾不獲大曜於世惜哉惜哉顧其人其文之可傳者自在天壤不可掩蝕也廷燦乃撮而傳之以俟後來采擇者

右傳余廷燦撰

一士子雪中過蘆溝橋憩小茶肆見壁間小軸題詩云驟網對對

響馱鈴侵曉衝寒過驛亭我欲停鞭玩殘雪馬蹏躡碎亂山青款  
識羅洋山人士子疑焉忽空際有人語云羅洋尙不識耶一日舉  
以告人或曰此近日湖南名士郭昆甫別號也君未讀羅洋草乎  
右灤陽消夏錄紀昀撰

郭峻博極羣書爲文雄深雅健卓然名家乙卯膺選拔每試成均  
輒首選宗伯方靈皋雅意藻鑑欲致之一見峻曰使我枉節謁顯  
達卽博一官甚易如人品何竟不往

右湖南通志符棨森錄

劉世甯

公諱世甯字匡宇號幹齋新淦人曾祖鎮隆祖鼎邑庠生父學淵  
康熙癸巳 恩科舉人山東高密縣知縣兩世以公貴 贈如其  
官公以諸生中乾隆甲子科舉人乙丑成進士初任浙江淳安縣  
知縣調繁黃巖縣海疆期滿內擢工部營繕司主事丁母憂服闋  
補虞衡司主事晉都水司員外郎郎中監督寶源局管街道廳授  
山西道監察御史巡西城會 上加意民事思得練習材 敕部  
取京職中由知縣者十四人引 見以公爲廣東惠潮嘉兵備道  
旋以父老終養歸既卒事再補惠潮嘉道大吏以不勝任告以同  
知用自請改京員授吏部文選司主事晉稽勳司員外郎戶部山

西司郎中與乾隆五十年干叟宴五十五年公年七十一乃告歸  
歸十年以嘉慶五年九月二十日卒明年某月某日葬於某山首  
某趾某子七人佳珩邑庠生佳琦四川遼州知州加知府銜佳璿  
佳琛俱太學生佳琪佳珮佳珍邑庠生女四人孫男七人女四人  
曾孫男三人女三人公令涪安縣民潘景霞妾姜氏方姪以嫡姪  
出爲錢正公妻七月而生子九高付徐乾亨妻乳之四歲正公無  
子以爲繼而遇之虐九高漸長姜氏以告遂竄依景霞正公控以  
誘逃且謂所繼乃乾亨子姜氏袒後夫詞翻異官莫能理公履任  
集鄉民於城隍廟禱而瀝血先之以乾亨九高不凝繼以景霞姜  
氏九高則凝事迺白及令黃巖有王世璣者聘其姑之女符氏其

母與姑鬩亟悔婚姑之夫賜履諸生也鳴之學使者以女終身不  
嫁立狀而罷既而私以字趙氏世璣鳴之公引符氏置對臧錐自  
刺公私度曰終身不嫁非人情然女實屬王氏矣自刺爲父解也  
令遣歸而陰命舁之王氏女固王出也賜履以世璣奪女走告公  
笑曰徐之逾年符氏生子而世璣亦爲諸生公屢任善政甚夥此  
二事兩縣到今傳之高密公之舉於鄉也與先光祿公同年公與  
先仲兄同爲浙江知縣又與予同仕於朝幾二十年其歸也詩以  
送之有曰兩世知交分袂遠卅年仕宦典衣歸嗚呼可以知公矣  
佳琦來請銘不獲辭銘曰

氓之蚩蚩情如棼絲疇爲之父母而一不知我得其情彼不得盡

恒... 卷... 三

三

其辭胡神於治縣而詘於監司抑大吏實尸之撮事瘞詞以為吏

師

右墓誌銘彭元瑞撰

馬寅著

馬君諱寅著字協恭內府人其尊人以事成遼左卒時君年纔十五徒跣奔喪艱苦備嘗負骸歸葬養母以孝聞依姊丈貴禹恭讀書成立爲人伉爽好義在官不避嫌怨因轉邀薦拔爲上所知由郎中歷蘇杭織造監權淮關卒於官

右詩序國柱撰





錢在培

乾隆丁卯之夏 天子居圓明園命選翰林十人中書十人校錄  
唐李善所注昭明文選以備清燕之覽因卽張相國園而開館焉  
麗景者園之軒名也厥構宏敞通流環繞匯於軒前而成池池多  
植荷時方花架木爲橋通南北道橋之南山徑迴復樹木蒼雜園  
故名也園康熙時明相國之所築也後獻諸 朝 賜文學近臣  
退直居之園之勝尙未能徧觀也所選二十人者校書軒中 上  
命大官具食尙方給筆札頻遣中貴人攜瓜果及荷囊香佩諸物  
分賜諸臣 上所賜唯瓜果爲非常賜非大臣及親近者不易得  
而今咸以小臣拜 賜且訖事月餘 賜凡四五斯亦遇之至榮者

已前輩錢赤岸先生性慎密而多聞識。褒然爲中書領袖。選與茲事。文昭時亦從諸君子後移席。近先生先生校勘精審。孜孜不倦。然諸人或各行其意。先是中使宣上旨云爾等俱是有學人。若書內誤處皆當改正。而大臣恐或蹈妄改之咎。又私相戒約。非灼知其誤。萬不可輕改。以故明達之人多務更正。慎重之士憚於改爲。予因知事無大小。總其成者爲要也。大官年高事繁。必不能復究心於文墨之事。安得如先生者合眾長而折衷之。歟。書成又錄考證二冊進呈。上命分置各卷之後。並書校寫者銜名。其冬又召諸臣入乾清門。至懋勤殿。令各鈐小印識之。上自爲之序。其書已裝潢成帙矣。書之前貌。聖容焉。先是進呈之日。又人賜

紗葛各二端文昭欲爲文記之尙未成也今先生榮 君恩寫之  
爲圖以文昭之亦與其事也屬爲記嘗考古者有寫書之官校讐  
之司其事曠而弗舉於今乃復見之禮意加優渥焉先生適當其  
盛將之以勤恪譎則正疑則闕不牽於異同之論可不謂賢乎自  
是役後有謂細事不足煩 聖慮者於是凡有校寫皆開局於武  
英殿大臣監理之外夔供其食書成請 旨賞賚而已文昭亦一  
再與焉回思昔日與先生在軒中散衣帶時水風清暑花氣襲人  
珍賜頻仍中使絡繹此景何可多得況四五年來此二十人中已  
有化爲異物者其仕於四方及歸其鄉者又有之今先生又將歸  
矣撫卷之下不勝悵然他日從先生於明湖之濱縱談舊事再出

此圖其感歎又將若何也因具錄其姓名於左翰林十人王錦改

外王居正休致朱佩蓮丁憂湯大紳休致王際華丁憂歐陽正煥

蔣元益徐開厚故許玟改外馮秉彝告假後又益一人曰溫敏中

書十人張敬業劉大佑故祝維誥睦朝棟程燾龐廷驥告假金燾

毛永燮先生名在培與文昭共為十人收掌則待詔吳自高也

右校書圖記盧文弢撰

唐英

唐英字俊公一字叔子晚號蝸寄老人漢軍人官粵海關監督

八旗通志陶人心語五卷續選十四卷補遺一卷唐英撰其曰陶

人心語者以久司官箴於江西而吟詠則直舒胸臆故立是名云

季絨序云俊公權兩淮復權九江珠山昌水見之筆墨者為多讀

起蛟行見愛 國愛民之心 起蛟行云起蛟起蛟天茫然好生好殺

若此避蛟不及民可憐江都谿堡深淵填蛟生於天何功德民死於蛟何冤愆將欲殄惡彰天討洪濤窟宅淵其淵或謂民孽應浩劫狂蛟司命天無權蒼頭黔首蚩蚩子骨肉漂流一時死豈追捉月水仙遊懷沙慘葬魚腹裏攀流觸浪命懸絲呼救號天望百里縱使萬死漏一生廬舍田園空逝水今宵新鬼昨宵人昨日富室今孤貧一草一木天生意忍驅赤子飽彼窮淵鱗天高聽渺渺水浩波無津安得周虛當年劍馭神靈海搜窮濱盡斬蛟頭掃孽種安瀾永靖千萬春

因內言狀讀改分編 卷百四十五 鄧署七

右 熙朝雅頌集鐵保錄

褚寅亮

褚寅亮字摺升號鶴侶一字宗鄭長洲人也乾隆十六年 召試  
舉人內閣中書官至刑部員外郎與錢宮詹大昕爲同年友深於  
經學從事禮經幾三十年嘗謂宋人說經好爲新說棄古注如土  
直惟儀禮一書爲樸學空談義理者不能措辭而晦庵勉齋信齋  
又崇信之故鄭氏之學未爲異義所汨至元吳興敖繼公撰集說  
雖云采先儒之言其實自注疏而外皆自逞私意專攻鄭氏學者  
苦注疏之難讀而喜其平易乃盛行於世蓋君善之意不在解經  
而有意與康成立異特其巧於立言含而不露若無意於排擊者  
是以入其元中而不悟至於說有不通甚且改竄經文曲就其義



不幾於無所忌憚乎善儀禮管見四卷其說之最精者如鄉飲酒  
記北面者東上敖改東爲西駁之曰注明言統於門門在東則不  
得以西爲上也鄉射記勝者之弟子洗觶升酌南面坐奠於豐上  
降袒執弓反位敖以袒執弓句爲衍駁之曰勝者之弟子卽射賓  
中年少者以是勝黨故袒執弓非衍文也燕禮勝觶於賓敖改觶  
爲觶駁之曰凡獻以爵者酬以觶燕禮宰夫主獻旣不以爵則酬  
亦不以觶矣安可破觶爲觶乎大射儀以耦左還上射于左敖依  
鄉射改爲于右駁之曰上射位在北下射位在南鄉射大射所同  
但鄉射位在楅西從楅向西則北爲右大射次在楅東從楅向東  
則北爲左敖比而同之昧於東西之別矣喪服記公子爲其妻縗

冠敖改纁爲練駮之曰練冠之紕亦飾以纁故閒傳云練冠纁緣就其質言之曰練冠就其紕言之曰纁冠母重故言其質妻輕故言其紕非有二也士虞禮明齊醲酒敖以醲酒爲衍文駮之曰注明言有酒無醲據下文普薦醲酒亦專言酒不及醲豈得妄解明齊爲醲輒刪經文乎特性饋食禮三拜眾賓眾賓荅再拜敖改再爲一駮之曰鄉飲酒眾賓荅一拜者大夫爲主人也有司徹之荅一拜者大夫爲祭主也此士禮安得以彼相例乎寅亮精天文廡算之術尤長於句股和較相求諸法作句股廣問三卷錢少詹著三統術衍寅亮校正刊本誤字如月相求六劫之數句六劫當作七劫推閏餘所在加十得一句加十當作加七少詹服其精審早

年爲公羊何休之學撰公羊釋例三十卷謂三傳惟公羊爲漢學孔子作春秋本爲後王制作訾議公羊者實違經旨又因何邵公言禮有殷制有時王之制與周禮不同作周禮公羊異義二卷又著十三經筆記十卷諸史筆記八卷諸子筆記二卷名家文集筆記七卷藏於家乾隆四十年以病告歸五十五年卒

右漢學師承記江藩撰

張模

今年二月初張君元禮來就予語別去未半月君喪其仲婦又喪其弟榮中旬九日予自西園下直趨弔君君泣然曰舉室遵時疾惟我獨身支持若何予爲排解語良久出君送之門珍重而別越下旬五日而君以疾卒何其迫也比葬有日其孤泣請予銘嗚呼珪何忍銘君君諱模字元禮號晴溪順天宛平人其先自江南宜興遷益州衛軍籍當明洪武初至正統四年入衛京師曰旺熹宗朝有太僕寺少卿曰邦經疏救楊左罷職爲君五世祖考冲之薦舉起家官河南南汝光道妣柴恭人君有弟曰桓曰榮君少穎敏九歲南汝公以工部郎謫居通州君獨侍讀書自勵年十八入學

乾隆壬申春舉於鄉秋成進士改庶吉士甲戌散館授刑部主事  
遇事侃侃不阿丙子主湖南鄉試己卯升員外郎主廣東鄉試壬  
午充順天鄉試同考官奉 命督學廣東時南汝公駐信陽君乘  
傳謁二親於官所明年銓升吏部稽勳司郎中君之督學也力以  
振士氣爲己任凡士民交訟事不肖媵阿隨有畸輕重或親鞫平  
反之曰我法司也粵人頗以使者爲能直我而有司則疑其侵官  
曰使者將與我爲難訴之大吏於是君遂被劾鐫秩去而南汝公  
亦以事罷效力軍臺君念父齒力衰乃傾貲爲父贖罪得 旨免  
歸其後雖捐復原官而以父母皆老不就選君兼通陰陽家言自  
喜能奇中又博覽古法書名畫辨器物真贗不爽家食二十年養

葬盡禮赴戚友之急若忘其貧葬族之殯撫孤弱者教子及弟之  
子讀書皆成植甲辰十月君六十初度作述懷詩六首明年正月  
與千叟宴 賜 御製詩箴杖朝珠如意皮幣十六件君風神不  
減少壯騎控自豪曰吾叟矣初珪年十二識君君娶於寶坻王氏  
於子兄竹君爲妻之姑歲乙酉君來訪子見子次子錫緯方七齡  
能背誦爾雅周禮成帙大喜欲爲壻乃忘其輩行結婚媼焉然錫  
緯年二十有二竟夭折先是君爲兩老人擇地於城南蕭家邨築  
室營壙皆秩秩曰他日則耐我於左君生雍正乙巳年十月五日  
寅時卒於乾隆乙巳年二月二十五日戌時年六十有一子二中  
正乾隆庚子科舉人議敘八品京官娶井氏中達府學生娶楊氏

孫一以仁女五長嫁乙酉科舉人獻縣紀汝信次嫁獻縣學生鹽課大使紀汝仲次嫁癸卯科舉人寶坻王振緒次嫁珪次子附生朱錫緯次未字孫女四葬於是年五月十一日己未銘曰

七日不見魂何之千秋吉藏君自爲負丙面壬食坎離從厥考妣  
茆本枝

右墓誌銘朱珪撰

董達存

吾郡有道君子董君旣沒之十有一年其子培將葬君於黃塘鄉廟灣先塋乞銘於予予與君爲忘年交二十餘載知其品槩不敢以不文辭按狀君諱達存字華星號丙齋先世自教授公博古官於毘陵因家焉十二世祖聖臣官浙江布政使曾祖質明季郡廩生值國變不食七日死祖廷授父位中皆以儒行聞母謝太孺人生二子長卽君也君幼而穎異七歲就外塾矢口成文師奇之長遊同邑蔣濟航先生門先生故以古文名於世者也君盡得其學家故貧且體羸多病而刻苦自厲不閒寒暑爲文肆力於蘇長公旁及聲歌駢偶之作罔不操觚立就旋補博士弟子員中乾隆庚



國朝通志卷之四十五  
三十一  
午科舉人登壬申科進士授國子監學正君澹於仕進以太孺人齒高遂請終養歸里晨夕奉侍衽席膳飲恆自躬親太孺人壽九十六而卒君哀慕如嬰兒焉君學問該博家傳青囊書少卽有神解後出遊復獲異人授凡形家日者星角壬遁諸術無不洞達其奧然頗自祕惟以相宅墓請者率應之所至爲人審決衰王更易向背克期輒有神驗以此名日隆東南自大府以下每營廡宇必得君一臨相度爲幸所聘遺亦不貲而君受之灑然行橐及家未嘗自潤購吉壤爲先人改葬建宗祠置田百畝以供歲時祭饗族黨有貧不克葬不克嫁娶者咸傾囊助之所居數椽僅蔽風雨冬夏衣故裘葛屨垢色黣弗厭也會郡東郊欲建普濟堂贍老疾之

無依者久未經始君慨然獨捐千金倡之乃得集事樹屋四十楹  
儲給廩餼至今全活者無算嗟乎素封之家出所餘以利人躋躋  
多寡猶有難色君乃以勤勞所積輸中人之產如鴻毛好行其德  
非天性然哉君藹易近人而遇所不可夷然弗屑里居爲當道所  
傾重然非公不至絕無請託嘗有淮陰離賈具重幣延君中道忽  
不就單騎徑走二千里外爲故人卜兆域以踐宿諾飄然而返其  
孤介蓋如此夫趨吉避凶以前民用亦聖人之道也古之擅藝術  
者如郭璞顧歡徐伯珍柳世隆諸人事見傳記宋儒若邵子精先  
天數朱子通曉堪輿然諸賢皆不得列之方技良以人品有重輕  
未可表偏長而晦全行也故予所知君之軼事靈奇頗多槩不書

君生於康熙四十二年卒於乾隆四十八年壽八十有一原配張孺人次配高孺人皆早沒次配今謝孺人君無子以族子培嗣娶楊氏孫一得桂女一適太學生汪文耀銘曰

庚泥得泉論始管子乘勝居隩五行至理術以道著上符陰陽凡所幹旋逢吉康彊廣廈鱗鱗哀榮延景仁被於鄉戶祝宜永佳城蔚然千載宅魄縣澤後人以報爾德

右墓誌銘錢維喬撰

尹均

乾隆五十年正月 天子詔舉 聖祖仁皇帝宴千叟故事集王  
大臣官員士民年六十以上者 錫宴 乾清宮於時 誥封榮  
祿大夫前內閣典籍蒙自尹公以就養京邸 特準入宴與一品  
大臣列坐丹墀東 天顏咫尺仰瞻 溫霽禮畢捧所 賜杯盤  
以出復 賜靈壽杖如意數珠貂皮文綺諸物異數優渥朝野歎  
羨公籍隸滇南距京師萬里又久辭朝簿得與嘉會洵千載一時  
也越二年九月乙丑朔終於京邸春秋七十有三長子內閣學士  
壯圖扶櫬南歸纒經踵門述公遺言屬予文其誌石嗚呼公子同  
年友也俯仰三十餘年升沈零落觸緒增感公與予皆寡交而獨

以行誼相取予歸田十載朋舊多不通尺牘惟公與曹宗丞慕堂緘問不絕自公云亡慕堂繼逝而予益無賴矣秉德之詞其何敢辭公諱均字佐平先世河南懷慶人明兵科給事中革以言事謫雲南太和縣丞因占籍蒙自曾大父若時明季諸生大父文熾康熙丁卯舉人兵部主事父宗梁康熙丁酉舉人廣西桂林府同知兩世皆 誥贈榮祿大夫妣皆一品夫人公幼入小學卽不逐童兒嬉戲每家慶徵歌演劇常挾冊獨坐一室中年十九補縣學生歲科試輒冠其偶癸酉秋鄉試主司於遺卷中得公卷大奇之遂與鄉薦明年成進士選翰林院庶吉士又三年散館仍歸進士班乃援河工例改選內閣中書未及補而丁內艱服闋入都又久之

始得缺在職九載執事勤恪以俸次轉典籍記名以主事用丁酉歲京察以年老去職時閣學已官御史就養子舍灑然自得初封朝議大夫江南道御史加二級再封通議大夫太僕寺少卿加二級三封榮祿大夫內閣學士加二級公之初登第也向例釋褐進士先由王大臣揀選以備館職是科雲南入選僅建水倪君高甲一人及引見上顧閣臣曰尹某勝於倪多矣何以不在選中遂得與館選旣而倪君由吏部擢監司公尙蹭蹬仕路人咸以爲數奇及晚年階封一品康強逢吉乃信聖天子鑒賞自有真也公事親孝父殯松泉去城六七里公結廬殯側三載晝歸侍太夫人暮則返倚廬雖寒暑雨雪無間因自號松泉居士及

奉太夫人合葬適大雷雨匠役皆走避公撫棺危立不移寸步羣從子弟亦罔敢離次踰時雨止遂克成禮昆弟五人門無異財視昆弟之子如己出節縮俸入以葺宗祠經畫井井可垂永久生平最惜物力自奉極淡泊而篤於故舊慷慨無少吝爲諸生時應秋試中途遇故人物故卽解囊爲治殯斂畱一日乃行官京師日鄉前輩通政楊公如松病革適其子以事被逮其子婦扣門告以急難公亟偕醫往楊已不起卽爲理喪具並轉屬刑部保釋其子俾就苦次楚雄王貢生鎬臥病逆旅已劇公往視之泣以後事相託公令移至己寓延醫治之數月而痊鎬感泣請受業爲弟子鄉人落魄無所依及旅櫬未返者輒爲區畫得生還歸葬者甚多好飲

豆湯每月必命數設呼子若孫其啖曰此吾鄉味若曹卽富貴慎勿忘也公與閣學同官京師父子入直常共載一車諸城劉文正公聞而歎曰尹舍人可謂以清白遺子孫矣夫人伍氏戶部員外郎士祺之孫女貢生正期之女淑慎明達白首相敬累封一品夫人子五人壯圖乾隆丙戌進士今爲內閣學士兼禮部侍郎會圖增廣生全圖廩貢生慶圖健圖皆國學生女二人壻曰楊雲官曰伍東垣孫男十四人孫女九人銘曰

易稱積善家慶有餘黃金盈籛不如詩書於維榮祿如漢萬石不言躬行德隅抑抑文章派別一家所師科第拾芥爲國羽儀清華之選世重館閣公皆履之依然窳蕪南山有橋本固枝繁過庭貽



訓爰大其門承歡廿載就養左右熙熙怡怡齊眉皓首紫泥申錫  
一品班崇考甫是則三命滋恭 帝有恩言錫宴千叟公與其間  
稽首拜手手捧上尊徐步 天衢又何錫之鳩杖數珠矍鑠斯翁  
觀者屬目何以致之義方之勛人生三寶曰儉與慈不爲物先公  
實兼持易簣之辰神明未昧屈指舊游尙及吾輩素車萬里歸於  
松楸諸孤攀號泣血紛流深谷有違令聞難沫同心之言俾勒幽

室

右墓誌銘錢大昕撰

顧鎮

乾隆十五年 天子詔舉窮經之士公卿大夫知膺此選者之難也舉海內士僅五十餘而大學士蔣文恪公首以虞東先生薦先生姓顧名鎮字佩九居蘇州昭文縣縣有虞山學者因號爲虞東先生乾隆戊午舉人甲戌進士補國子監助教遷宗人府主事充玉牒館纂修年老乞休以原官卒於家先是虞山陳見復先生以遂學清望設教紫陽先生往執弟子禮惟敬一切經解史義往復辨難穿穴詣微得古人所未有見復先生死先生駕其說而恢張之以經師名天下先設教金臺書院再設教游文書院白鹿書院而終之以鍾山書院先生惇良介樸善誨人每閱文數百卷旁

乙橫抹蒿目龜手一字不安必精思而代易之至燭燼落數升血  
咯咯然全涌而蠶眠細書猶握管不止余嘗勸其少休諾而不輟  
然學者領其意旨往往速飛以故遙企塵躅踟膝跪足而至者如  
望日光聽建鼓而趨 本朝庶孫爲祖庶母服功令無明文崑山  
徐氏通考言人人殊先生爲定三年服引禮經曰父之所不降子  
亦不降也作兩議千餘言詞甚辨羣儒無以難也貌端厚有腹尺  
豐下而髯恩從子寡嫂甚摯嘗夜坐有鄰人子窺其垣先生麾使  
去不以告人其人慙卒爲善士所著虞東學詩十二卷三禮劄記  
十帙古文詩若干其先爲吳丞相醴陵侯之後妻吳氏 誥封恭  
人長子言遠次詢銘曰

年之不如而京兆同舉才之不如而臨終推許曰以吾生平累汝  
嗚呼先生抱經而處無失於今有得於古壽七十三葬正月五門  
生書碑門童負土支村之西露字之塢

右墓誌銘袁枚撰

常熟顧先生諱鎮字備九號古湫又號虞東進士官宗人府主事  
撰虞東學詩十二卷大旨以講學諸家尊集傳而抑小序博古諸  
家又申小序而疑集傳因調停兩家之說以解其紛所徵引凡數  
十家而歐陽修蘇轍呂祖謙嚴粲四家所取爲多雖鎔鑄羣言自  
爲疏解而義本某人必於句下注其所出又於名物訓詁聲音之  
學一一考證具有根柢蓋於漢宋之間能斟酌而得其平於讀詩

者不為無裨也

右學案唐鑑輯

王又會

王穀原極爲陳文勤公汪文端公稱許釋褐後皆以爲當得上第  
既入三甲人猶以朱檢討爲比 湖海詩傳

王穀原又曾以橋外餞簫寒食路柳邊蠡殼酒船窗等句見稱時  
宰近日錢籜石侍郎載刪訂其詩畢秋帆制府序之讀其辭居然  
籜石齋中詩也 梧門詩話

右正雅集符葆森錄 按王公字受銘浙江秀水縣人乾隆  
甲戌進士官刑部主事著有丁辛老  
集



邵齊熊

常熟邵氏當 高宗朝昆弟四人先後入館閣並以才名傾動日  
下論者比諸唐京兆竇氏宋鄱陽洪氏明吳郡皇甫氏焉而子姓  
相繼登科文采勿替較之昔賢殆有過之君諱齊熊初名炳字方  
虎號耐亭晚歲又自號松阿 誥封奉直大夫 晉贈朝議大夫  
鞞之子 贈奉直大夫 晉贈朝議大夫甲臨之孫 封儒林郎  
可佳之曾孫君幼有識鑒弱冠喜從鄉先生游尤爲陶太常晚聞  
汪贊善杜林所器重贊善遂以孫女妻焉年十九入縣庠乾隆十  
二年中江南鄉試是時兩兄妃園叔山皆先入翰林明年弟闈谷  
亦館選君三試禮部不見售十九年 御試內閣中書君名入選



所賦紅藥當階翻詩傳誦都下君長身玉立儀觀秀偉而志趣高  
簡入直之暇研窮經史鍵戶如儒生所與往還皆一時名宿以文  
章氣節相砥礪貴游夸毗子弟或慕與交竟日不交一語也在綸  
閣時 朝廷大典禮例得進呈詩冊君所製歌頌博大淵雅尤得  
頌揚之體丁外艱旋里尋遇生母時太恭人憂執喪累年哀戚如  
禮服闋後以程太恭人年高樂與昆弟奉侍遂不入都供職趨承  
晨昏者幾二十年君昆弟皆治古文而君好之尤專謂文必本於  
學與行然後爲有物之言古人立言皆有益於人心風俗否則譎  
言長語祇足以長浮華用以阿世則可用以經世則未也嘗選唐  
宋以來古文十八家名曰文繫於唐得三家退之子厚習之於宋

取七家永叔明允子瞻子由子固同甫晦庵於元取一家伯生於  
明取四家景濂正學伯安熙甫而以 國朝汪茗文方靈皋陶晚  
聞三家繼焉獨惡王安石之文謂其意主爭勝言涉矜夸觀其文  
知其人之悖可戒不可法也所著隱几山房稟十六卷禮記考義  
十六卷隱几山房七錄若干卷生平敦孝友以型家明義利以正  
俗一言一動必依於法度春秋七十有七終於里第實嘉慶五年  
八月十有七日配汪孺人左春坊左贊善應銓孫女雍正己酉副  
貢某之女明慧有婦道前卒子聖珪乾隆戊子舉人女適同邑張  
培俱早卒嗣孫廣融乾隆乙卯舉人曾孫淵耀淵獻淵穎銘曰  
邵望出歆乃遷海虞四傳而後枝葉紛敷君與昆季式大其間木

天薇省棟萼聯趨青紫匪戀循陔孔愉年周甲子猶奉板輿品以  
行邃文與道符著書滿家質而不夸疇昔定交冊載有餘我神久  
粹君顏尙腴今春訪我攜曾孫俱詫其蚤慧可慰桑榆玉棺俄降  
執紼在途納銘幽室終古弗渝

右墓誌銘錢大昕撰

汪棣

汪對琴工詩文與雅兩為詩友虹橋之會凡業齋者不得與惟對琴與焉多蓄異書性好賓客尊酒不空

揚州畫舫錄

沈文愨云對琴詩體源於陶謝舍筏於王韋

右正雅集符葆森錄

按汪公字韓懷一號碧溪江蘇儀徵縣人廩監生官刑部員外郎著有持

雅堂集

國朝書目總目初編

卷百四十五

七

戴文鐙

董邦達云甲子分校京兆試得戴子匏齋卷冠本房知其夙擅詩名辛未延至邸課子誥等讀其粵遊諸集兼綜眾有不名一家其登臨懷古之作沈鬱頓挫幾欲前無古人

右正雅集符葆森錄

按戴公諱文鐙字經農浙江歸安縣人乾隆丁丑進士官禮部員外郎著

有靜退齋詩集

皇朝通志卷一百一十五

吳

袁名器 黃齊煥

袁名器字大受湖南甯鄉人乾隆己卯舉人署豐順徐聞普甯新會諸縣補河源皆有循聲擢儋州母艱服闋改耀州值旱步禱烈日中雨立霑歲獲有秋耀久無科第爲修復尊經閣敬一亭月課諸生自是縣人疊舉鄉試建監獄新倉廩書院演武廳及諸祠廟以最遷奉天府治中復修學宮文昌閣瀋陽書院集士會課一如在耀時歲饑設振親歷諸廠驗粥立箸不仆然後散給委鞠獄多所平反轉刑部員外郎嘉慶元年與干叟宴 賜詩章壽字藤杖繡蟒文綺致仕卒年七十二後有黃齊煥字采臣湘鄉人乾隆庚戌進士知懷安縣居心慈惠未嘗輕笞一人地當孔道雖差務終



釋而嚴禁胥役不以苛派擾民邑舊有山崇每見則多冰雹禱於神崇遂不見會大旱禱雨郭外忽元壇廟側有泉涌出而雨亦隨注眾以愛民所感改官內閣中書充文淵閣檢校以勤慎著卒於官

右傳李元度撰

吳泰來

吳竹嶼爲吳中七子之一意致蕭閒才情明秀作詩一本漁洋秋  
帆尙書爲河南巡撫延爲大梁書院山長余時亦在幕中與洪稚  
存方子雲徐朗齋輩飲酒賦詩殆無虛日未幾卒

右履園叢話符葆森錄

吳君企晉名泰來號竹嶼長洲人也少由副榜選校官襟期蕭曠  
愛松滋山水句畱竟歲尋病免歸大父吉安太守銓歸築遂初園  
於木瀆饒水石之勝父用儀購書數萬卷藏其中君寢饋其間凡  
十餘年乾隆庚辰成進士 召試 賜內閣中書而君自少無宦  
情壯益甚遂不赴補同年生畢中丞沅招主關中書院攜家往後

又借至開封年六十餘卒著有淨名軒集

右事略李元度撰按吳公尚著有硯山堂集

孟超然

孟超然字朝舉一字瓶庵先世山東金鄉人遷祖德明初官浙東始卜居閩中孟氏族所稱金牌元帥者也超然幼舉止端重年十七補閩縣諸生受知於山長會稽傅王露魯曾煜選拔貢太學尋中副舉人巡撫陳宏謀惜之語學使馮鈐欲連章奏舉鈐不可曰孟生才必達苟應例就職不過一縣令耳乃寢踰數歲乾隆二十四年己卯果舉於鄉第一明年成進士選庶吉士改兵部武選主事調吏部文選遷考功郎中京察一等三十年主廣西鄉試三十年分校京闈尋視學四川廉正不苛遇士有禮蜀人爲立去思碑三十七年使還以親老請急歸時超然年甫四十二遂不出久

之巡撫徐嗣曾請主教鼇峰書院書院初自康熙中巡撫張伯行而故太傅蔡世遠爲山長相與宏獎氣類倡明正學其後繼之者獨通政林枝春編修張甄陶嚴憚有法嗣曾善待士設都講厚廩餼崇體貌士屬集橫舍不能容則數人共一室超然鉅人長德重於鄉則解棄一切束縛勵以誠人人自奮於學材俊輩作論者謂不啻世遠主講時也超然內行瀟備侍父疾必躬扶掖執廁牕退於家名刺不入公府賙戚族攜孤弱助嫁娶殯葬雖空乏必應賞嘆服徐陵我猶有車可賣之言有謗誣者僞券者久逋者輒置勿問接人無疾言遠色非禮弗言家事治師巫不至門携捕不入座故人皆飲其醕而憚其方其學以懲忿窒慾遷善改過爲修身立

命之門異於章句小師嘗曰變化氣質當學呂成公刻意自責當學吳聘君又曰談性命則前儒之書已詳不如歸諸踐履博見聞則將衰之年無及不如返諸身心又曰自甲午哀痛之後覺萬境皆空自戊戌病困之後覺萬緣皆澹今思之空空澹澹如何可了吾事直須刻意補過努力爲善乃得耳論楊時曰龜山得伊洛之正傳開道南之先聲然爲人身後文如温州陳君李子約許德占張進孫龍圖諸墓誌往往述及釋氏之學而贊之曰安曰定靜毋惑乎後之學者援儒入墨紛紛不止也論明學曰明講學家宗旨最繇王文成曰致良知其徒羅近溪易之曰赤子良心聶雙江曰歸寂季彭山曰主宰黃綰曰艮止王心齋曰百姓日用耿天臺曰

常知李見羅曰止修耿楚侗曰不容已唐一庵曰討真心胡廬山曰無念湛甘泉曰隨處體認天理諸家各有語錄不可勝紀要之陳白沙靜中養出端倪爲王氏之先驅而焦竑李贄之佛學卽聖學亦王氏之極流弊也論湛若水曰甘泉講學當時以爲儒宗又享眉壽然觀其晚年序嚴分宜文集云知天之所以爲天文王之所以爲文則知鈐山之文矣以八十歲老尙書獻媚同年宰輔至於此極哉余讀嘉靖十一年馮子仁恩上疏備指大臣邪正中言左侍郎湛若水聚徒講學素行未合人心則知當時已不免人訾議矣甘泉以隨處體認天理言學吾不知其所言是何天理也其嚴於辨學不苟阿如此居喪時採士喪禮戴記荀子及司馬光程

子朱子說正閩俗喪葬之失爲喪禮輯略二卷傷不葬其親者惑  
形家言以速禍取孟子掩之誠是之語輯自唐以來言葬爲誠是  
錄一卷記檢身實踐之要爲焚香錄一卷取周易復卦之義歸之  
損益二象採先儒格言比類爲求復錄四卷輯朱子與友朋弟子  
問答以資規誨爲晚聞錄一卷輯古今殺誠爲廣愛錄一卷訓子  
孫爲家誠錄二卷雜考經史識遺佚爲避暑錄一卷又使粵日記  
一卷使蜀日記一卷文詩集若干卷晚年喪二子疾劇去講席嘉  
慶二年卒年六十有七學者祠祀之

右傳陳壽祺撰



醫學博士 林美名 不考

名 氏 氏 名

三

廣順

君姓伍堯氏諱廣順字熙若號秀峯蒙古正黃旗人世居察哈爾  
文皇帝時有代通者從入關隸內務府會祖夢成官內管領祖  
六格官郎中考平安官員外郎君爲從叔父監生長安後長安父  
監生烏達器管領之子也幼岐嶷七歲始肉食九歲卽能詩及長  
風氣日上年十七爲生員中乾隆二十五年舉人初充內務府筆  
帖式久之借補 御園織染局司庫生平泊於榮利方舉人需次  
可得部寺司務及筆帖式資深亦可游權廛仕皆以貧告豫工例  
開戚友饒於財者許爲入貲作縣令君以富貴有命且民社至重  
不宜輕試堅謝之庚子以後遂罷禮部試織染局近玉泉山水木

明瑟可以游憩暇輒放舟湖濱或泊舟選幽處坐臥與村氓言耕  
牧事日夕忘倦披襟戴笠人亦忘其爲居官也不佞佛而深於禪  
嘗游萬壽山寺有五百應真像徘徊移時若有所悟夜半忽起索  
筆疾書得偈五百首語多出於思議好讀資治通鑑尤遂於易占  
人吉凶或數年或數十年皆奇驗天性不飲無聲色狗馬之好雖  
疾病不求醫藥自奉簡約子旣貴每進一衣具一膳必瞿然以爲  
過當晚猶習勞瑣屑之事未嘗假手童奴曰天下事有日游其中  
而叩之茫然者不躬親則精神弗屬耳樂道人善亦往往面折人  
非施德於人過乃不復省記故知與不知咸願與之游以爲泯絕  
畦畛脩然塵外如君者非特宦中難其人也以乾隆五十九年



匡廬先生集卷之三

三

右家傳趙懷玉撰

項澹

聖人之道無日不旁流於天下而無動盪之者則靡焉而不揚聖人之行無日不蘊結於人心而無引觸之者則鬱焉而不發夫聖人者百世之師也今雖聖人往矣然而人人仰之人人宜私淑之何以天下之人瞶瞶者多而聞風興起於百世下者不少槩見夫子之文章未嘗不可得聞也而俗儒口耳之學轉相授受義不本於躬行心得則亦精粕秕糠而已矣故載籍極博而口講指畫者之非其人大者微言小者碎義將孰從而聞之是故識大識小焉所不學惟聖人然後可以無常師春秋之時孔子以大聖人爲之師而後七十子皆學焉而得其性之所近卽三千之徒湮沒無所

表見天下至今稱之說者以爲聖教之所成莫乎尙已孔子歿二  
三子心喪三年其禮至隆其情至篤蓋師之於弟子實有以裨益  
於其身心然後弟子之於師心說誠服尊之而至於沒世不忘也  
夫孔子之聖不可以槩凡師而師弟子之情之禮則天下之公義  
也是故斯禮也行之聖門宜其達之天下後世乃由今觀之不少  
槩見者何也蓋弟子之不能嚴師也久矣夫先不自嚴也而欲人  
嚴之豈可得乎項君任田先生先世父女壻也吾家城居方學使  
者按試吾郡輒來主吾家時余方有志於學往往聞其言論心契  
之以爲非徒說經鏗鏗已也察其行己不同流俗人之所爲其居  
家也鄉黨宗族咸稱焉庚午舉於鄉辛巳成進士官京師歷任部

郎有聲然不察察以才能見當是時都門盛稱三君子者先生與  
焉在朝九年余往京時先生已歸田三年矣自歸田後益力學崇  
德尤兢兢焉以樂育英才成就髦士爲己任望城面邑不入不遊  
而生徒信從者日益盛余自辛卯後七上公車已乃司教嘉定辛  
亥解組歸其明年乃與先生相見蓋睽違者廿又二年讀先生一  
幅集皆與門弟子講學說經之文精之爲盡性至命之旨顯之爲  
明物察倫之道通乎禮樂制度之本原而不遺乎百家羣言之記  
覽於此知先生之學之所由成而因以知先生之教之所由興也  
先生講學於其鄉之青士居從遊者畧其自遠方來者皆藏修息  
游於其地以爲得所依歸也無何而先生歿矣山頽木壞之感門



弟子能不悲乎於是相向飲泣以言於其孤嶠曰青士居者先生之所朝夕安焉者也今雖逝矣神甯忘此乎廟先生於此而立之主以憑依之庶幾事死亡如生存凡吾門弟子覩其居以致其心喪儻亦不失嚴師之意與自先生之歿於今年矣請新其門牆榜之曰項先生祠先生生於三月卒於七月卽以春秋生諱日爲歲祀之期門弟子咸來拜先生之主而釋奠焉置田收其所入立祠規以垂永久嶠曰諾如諸子言嗚呼弟子之於師沒世不忘如此則先生之於弟子皆本之躬行心得以爲教而不同乎流俗人之爲者於今乃見之繼自今其必有聞風而興起者是先生之教思無窮吾又將於是乎覩君子之澤矣余不文不足盡先生之蘊

徇及門諸子之請乃揚推言之而係之詩曰

瞻彼巖溪水清氣厚鍾秀毓賢望道肩負厥道何在日有內心眾  
庶同賦息之深深以人治人以己治己聲應氣求千里一軌根極  
性道積美含光以時出之是謂文章科名榮斯功業行此進取何  
私退歸誰毀莫前奚彰莫後奚傳仰守俯待乾坤新鮮天生忠信  
十室必有疇能爲師多術善誘疊疊項君荅問如鐘叩小叩大待  
其從容有來不拒有誨不倦人塞我憂人通我忭統義獲心徐幹  
有言舉謂學者要指不繁心通先生志合前哲教必盡材施不陵  
節明明廟堂肅肅粟主釋奠釋菜交階交戶嚴師尊道謂篤不忘  
後生小子視此爲坊

國朝諸廟考得本朝  
名目四十五

右祠堂碑記程瑤田撰

三

石鴻翥

石鴻翥字石泉湖南湘潭人乾隆壬午舉人歷官內閣中書與兄華亭知縣鵬翥弟工部屯田主事鵬翥皆有文名

右沅湘耆舊集小傳鄧顯鶴撰

鴻翥年十二試童子科莊學使存與出其卷示十二屬廣文稱爲奇作吳學使鴻尤異之待以國士乾隆壬午湖南主試爲錢竹汀先生大昕王文端公杰三場畢舉子呈闈作於吳獨賞鴻翥及丁姓丁正心張德安陳聖清五人且曰陳句山太常以書來賀稱今科楚南必得人以錢王二公能知文也此五卷不中今而後吾不復論文矣揭曉日招鴻翥等五人飲使人走探俄而鈔榜至自第

六至末僅陳聖清一人吳旁皇莫釋少頃五魁報至則鴻翥等四  
人各冠其經如聯珠然吳乃大喜賦詩以贈有喜極轉添知己淚  
望深還慰樹人心之句輦下諸公如陳句山齊次風輩皆有和章  
佳話遂徧一時

右湘潭縣志鄧顯鶴錄

國朝耆獻類徵初編卷百四十五補錄

郎署七

張宗蒼

如意館在啟祥宮南館室數楹凡繪工文史及彫琢玉器蒔藉帖  
軸之諸匠皆在焉乾隆中 純皇萬機之暇嘗幸院中看繪士作  
畫有用筆草率者輒手教之時以爲榮有繪士張宗蒼以山水擅  
長倣北宋諸家無不畢肖 上嘉其藝 特賜戶部主事實爲一  
時之盛其他如陳孝泳徐洋輩皆以文學優長或 賜舉人一體  
會試或以外郡佐雜升用亦各視其才具也

右錄宗室昭榘撰

張宗蒼字默存一字墨存號篁村吳縣人善山水出黃筌古之門  
用筆沈著山石皴法多以乾筆積累林木閒亦用淡墨乾擦湊合  
神氣頗覺蔥蔚可觀以主簿銜理河工事乾隆十六年恭遇 聖  
駕南巡宗蒼以畫冊進呈蒙 恩賞錄卽 命入都祇候 內廷  
十九年特授戶部主事時年將七十以老告歸卒於家

右畫徵續錄張庚撰

吳人張宗蒼工繪事乾隆十六年 南巡以吳十六景畫冊進呈  
每一幅 御題詩一首十六景者萬笏朝天寒山晚鐘支硎翠岫  
千尺飛泉法螺曲徑華山鳥道天池石壁石湖霽景靈巖積翠海  
涌一峯鄧尉香雪光福山橋穹窿仙觀包山奇石莫釐縹緲蘇臺

春景 楚叟養病閒記

右 國朝畫識馮金伯錄

因月畫法頁改切扁 卷五十四 郎署七補錄

二



正德古原表行承者四角百四十三

國朝耆獻類徵初編卷百四十五補錄

郎署七

姜錫嘏

姜錫嘏字爾常號松亭內江人乾隆庚辰進士改翰林院庶吉士  
官至禮部員外郎先生以理學名著有皇華詩鈔四卷多可誦之  
作

右 國朝全蜀詩鈔小傳孫桐生撰

151-748

151-748

國朝耆獻類徵初編卷百四十六目錄

郎署八

嚴長明

姚備

周發春

吳鉞

邱永

閻循觀

金兆燕

李師白

吳震生

張塤

鮑之鍾

吳元念



國朝耆獻類徵初編卷百四十六

通奉大夫前署江西巡撫江西布政使司布政使湘陰李桓輯

郎署八

嚴長明

冬友江甯嚴氏諱長明一字道甫乾隆二十七年車駕南巡君以生員獻賦召試賜舉人內閣中書就職旋入軍機辦事君在軍機凡七年通古今多智又工於奏牘諸城劉文正公最奇其才戶部奏天下雜項錢糧名目繁多請去其名而以其數併入地丁徵收君曰今之雜項古正供也今法折徵銀若去其名他日吏忘之謂其物官所需民當供且舉再徵之是使民重困也文正曰

善乃奏已之大金川之爲逆也大學士溫福往督師欲君從行君固辭退有咎君柰何違宰相意者君曰是將敗沒吾若何從之人頗甚君言旣而溫公卒致軍潰以死隨往者皆盡辛卯 恩科會試劉文正公爲考官值軍機事有當關白君過鼓入闈得見旣而出同考官朱學士筠曰甚哉冬友不自就試而屑屑治吏事爲文正曰士亦視有益於世否耳卽試成進士何足貴當是時軍機有數大案賴君在直任其勞戕成議而雲南糧道以分貽屬員虧銀不完將死去限期十日君具牘入請文正奏寬之乃生其年遂擢侍讀君治事眾中獨勤辦然以是頗見疾其後連遭父母喪服終遂請疾不復入闈遊秦中大梁居畢中丞所爲定奏辭還主廬陽

書院乾隆五十二年八月某日卒於合肥年五十七君於書無不  
讀或舉問無不能對爲詩文用思周密和易而當於情嘗爲平定  
準噶爾方略通鑑輯覽一統志熱河志四纂修官其自爲之書曰  
歸求草堂詩文集及論辨經史書算文藝金石文字者凡二十餘  
部百餘卷祖諱馨父諱自新俱以奉直大夫內閣侍讀爲 贈封  
官夫人南昌耆士葉用章之女生男女各二男曰觀晉余在都時  
君時與相從見君朝趨省禁暮入文酒之會若甚暇者然或以事  
就君謀必得其當君嘗語人曰異日先去官者必姚君也後數年  
余請告歸過江甯君見迎笑曰吾固料君之來也余居皖中君一  
來會後余再至江甯而君喪矣乾隆某某年某月某日葬君及葉



國朝文獻卷之九十一 卷百四十一  
夫人於某所君之子請銘銘曰

偉猗冬友當時羣士智孰與醜既筭事樞振物之首才非不見知  
而其仕之登不究得年非天而亦不爲壽天命若是夫孰可多有  
伐石鏡詞瘞貽弗朽

右墓誌銘姚鼐撰

嚴長明字冬友號道甫江南人幼讀書十行並下年十一臨川李  
閣學紱典試江南聞其早慧欲見之因介熊編修本往謁李隨舉  
子夏二字令對卽應聲曰亥唐李大奇之謂方侍郎苞楊編修繩  
武曰此將來國器也公等善視之遂執經二人之門及補縣學生  
學使夢侍郎以國士目之侍郎知其貧問所需長明日貧乃士之

常聞廣陵馬氏多藏書願得一席爲讀書計耳因薦之盧運使見  
會立延致之是時東南名士多假館馬氏齋長明虛心質難相與  
上下其議論遂博極羣書乾隆二十七年天子巡幸江南長明  
以獻賦召試特賜舉人授內閣中書甫任事卽奏充方略館  
纂修官以書局在內廷許懸數珠中書在書局得懸數珠自此  
始也一日戶部奏賦役全書所載雜項錢糧名目繁多請併入地  
丁項下內閣已稟擬依議矣長明言於劉文正公統勳曰雜項旣  
經折色卽爲正供若並去其名目異日如薪紅茶葉之類更有需  
用必復加徵是重困民也劉公曰不圖後生有此議論卽令駁止  
之因薦入軍機處行走傅文忠公恆亦器重之樞廷有重難事輒

委決焉嘗扈 蹕木蘭大雪中失橐駝並所裝物求之不獲越一  
日一人牽駝而至且謝罪問之乃故軍機蘇拉緣事遣配者問何  
以知爲吾物曰軍機官披羊裘者獨公一人今篋無它裘非公而  
誰問既竊何以復還曰恐公寒耳勞以錢而遣之 上嘗問軍機  
章京中人才可用者傅公對曰人才可用者多若有守有爲可繼  
胡寶琨者嚴長明一人耳長明內直日久諳悉典故尤務持平允  
雲南糧儲道羅源浩虧銅廠銀萬一千兩又分賠屬員汪大鏞銀  
一千兩有 旨加罰十倍以一年爲限逾限卽正法羅已納正項  
十有一萬矣仍有分賠六萬未完而限垂滿羅呈乞展限 詔下  
軍機大臣與刑部查辦時劉文正公掌刑部方主會試入闈諸公

相視莫能決適有 行在宣諭軍機大臣事長明卽詣貢院搥鼓  
求見劉公宣 諭畢因從容曰羅觀察之限已迫俟公出闈恐無  
及矣其所欠者分賠屬員之項昨見吏部檔汪大鏞捐復赴補直  
隸屬員旣邀寬釋且得官而上司乃坐極刑可乎卽於袖中出請  
寬限彙求畫押劉公義而許之長明出以示諸公列銜會奏果奉  
俞旨令汪大鏞分繳欠項而羅得出獄矣擢內閣侍讀歷充通  
鑑輯覽一統志熱河志纂修官長明於蒙古托忒唐古特文字一  
見便能通曉嘗奉 命直經呪館更正繙譯名義蒙古源流諸書書  
成輒晉秩焉以父憂去官尋丁母憂哀毀過禮免喪後引疾不出  
築室三楹顏曰歸求草堂藏書三萬卷金石文字三千卷日吟詠

其中海內求詩文者踵相接從容應之無倦色嘗語學者曰士不  
周覽古今載籍不徧交海內賢俊不通知當代典章遽欲握筆撰  
述縱使信今亦難傳後其自命如此畢中丞沅巡撫陝西招至官  
齋爲文字交因得游太華終南之勝詩文益奇縱所得金石刻益  
富在秦中十載撰次西安府志八十卷漢中府志四十卷皆詳贍  
有法晚歲爲廬江書院院長卒年五十七生平著述有歸求草堂  
詩文集西清備對毛詩地理疏證五經算術補正三經答問三史  
答問淮南天文太陰解文選課讀文選聲類尊聞錄獻徵餘錄知  
白齋金石類籤金石文字跋尾石經攷異漢金石例五嶽貞珉攷  
五陵金石志平原石蹟表吳興石蹟表素靈發伏巒緣小錄南宋

文鑑奇觚類聚八表停雲錄養生家言懷袖集吳譜志凡二十餘  
種子觀晉皆以讀書世其家

論曰子友曹學士仁虎有言政事可以文飾惟文學不可假借風  
節或激於一時而成惟文學非積久不能致予與侍讀交廿餘年  
聽其議論經緯古今混混不竭可謂閱覽博物文學之宗矣同歲  
召試得官者歛程晉芳魚門上海趙文哲損之長洲吳泰來企  
晉上海陸錫熊健男彬彬爾雅皆述作之選盛矣哉

右傅錢大昕撰

冬友自言九歲時侍先大父過淮舟中人限吞字韻爲詩多未穩  
余有句云橫橋風定帆全卸小艇潮來勢欲吞大父曰此子將來

必無患苦或問其故曰凡詩押啞韻而能響者其人必貴押險韻而能穩者其人必安生平以此衡人百不失一大父諱馨字星標

右隨園詩話袁枚撰

姚鼐

姚鼐安徽桐城人乾隆二十八年進士改翰林院庶吉士三十一年散館以主事用分兵部選授禮部主事三十三年充山東鄉試副考官三十五年充湖南鄉試副考官三十六年充會試同考官所得多知名士累遷至刑部郎中 記名御史四庫全書館啟以大臣薦徵爲纂修官年餘乞病歸鼐工爲古文方康熙年間侍郎方苞名重一時同邑劉大櫨繼之鼐世父範與大櫨友善鼐本所聞於家庭師友間者益以自得所爲文高簡深古尤近司馬遷韓愈其論文根極於性命而探原於經訓至其淺深之際有古人所未嘗言鼐獨抉其微而發其蘊論者以爲辭邁於方氏而理深於



劉氏焉蓋藉爲學博集漢儒之長而折衷於宋嘗與人書云秦漢以來諸儒說經者合與離固非一途程朱出多得古人精深之旨而其生平修己立德又實足踐行其言爲後世之所嚮慕故元明皆以其學取士自利祿之塗開爲其學者以爲進趨富貴而已其言有失奉而不敢稍違其得亦不知所以爲得斯固數百年來之陋習今世學者乃思一切矯之專宗漢學以攻駁程朱爲能倡於一二專己好名之人而相率而效者遂大爲學術之害夫漢人之爲言非無有善於宋而當從者也博聞強識以助宋君子所遺可也以將跨越宋君子則不可也又送錢坫序略云孔子沒而大道微漢儒承秦滅學後始立專門各矜師授久之通儒漸出貫穿羣

經擇其長說其敝也雜以讖緯亂以怪僻猥碎魏晉之間空虛之  
談興以清言爲高以章句爲塵垢自是南北乖分學術異尚五百  
餘年唐一天下兼採眾長定爲義疏而所取或是或非未有折衷  
宋之時眞儒乃得聖人之旨羣經略有定說元明守之著爲功令  
明末至今學者頗厭功令所載爲習聞又惡陋儒不考古而蔽於  
近於是專求古人名物制度訓詁書數以博爲量以窺隙攻難爲  
功其考欲盡舍程朱而宗漢枝之獵而去其根細之蒐而遺其鉅  
夫豈非蔽與又曰說經古今自有眞是非勿徇一時人之好尙如  
近年海內諸賢所持漢學與明以來講章諸君何以大相過哉夫  
漢儒之學非不佳也而今之爲漢學乃不佳徇徇而不論理之是

非瑣碎而不識事之大小曉曉聒聒道聽塗說正使人厭惡耳且  
讀書者欲有益於身心也程子以記史書爲玩物喪志若今之爲  
漢學者以搜殘舉碎人所少見者爲功其爲玩物不彌甚耶孺色  
怡而氣清接人極和藹無貴賤皆樂與盡懽而義所不可則確乎  
不易其所守世言學品兼備推孺無異詞詩從明七子入而以融  
會唐宋之體爲宗旨嘗倣王士禎五七言古體詩選爲今體詩選  
論者皆以爲精當云自告歸後主講於江南紫陽鍾山各書院者  
四十餘年諄諄以誨迪後進爲事嘉慶十五年重赴鹿鳴宴 恩  
加四品銜二十年卒年八十有五所著有九經說十七卷文集二  
十卷詩集二十卷三傳補注三卷法帖題跋二卷筆記四卷

右 國史館本傳

先主桐城姚氏諱弼字姬傳又字惜抱元末遷自餘姚始仕顯者  
曰明右參政公旭伉直敢言嘗上書訟于忠肅公冤數傳爲 國  
初刑部尙書端恪公文然數論事利害盡蠲煩苛表定律令是爲  
先生高祖曾祖士基湖北羅田縣知縣有惠政卒官民立祠祀祖  
孔鏜 贈編修晉朝議大夫考淑 贈禮部員外郎皆砥節貞確  
妣陳氏 封恭人先生德器簡亮勤學閱邃甫冠才行已焯乾隆  
十五年舉於鄉久之成進士選庶吉士散館改主事分兵部尋補  
禮部儀制司再遷至刑部廣東司郎中先後充山東湖南副考官  
又一充會試同考官既乞歸用重赴鹿鳴宴加四品銜先生官刑

部平反重辟爲考官多得氣節通經士四庫館啟諸城劉文正公  
大興朱學士筠薦以所守官充纂修時太夫人年益高先生亟歸  
養而于文襄敏中當國欲先生一出其門不可遽引疾去書成多  
改遷官者先生先已舉御史中選大臣亦屬所親諷之出卒辭謝  
以學教授東南逾四十年嘉慶二十年九月十三日卒於江甯鍾  
山書院春秋八十五越四年十一月某日葬桐城南鄉大楊樹灣  
鐵門先生之學不務表襮根極性命窮於道奧昔儒碩究明德業  
末流舛岐迺益煩妄闢鄙學者厭薄闕隙培擊援據浩博日譁眾  
道詬先生怒然引爲己憂綜貫奧蹟隱摧角距體履誠篤守危導  
微爲文章深醇精潔達於古今通變用舍務黜險詖釅亂正人心

學術先生既歿其道益昌幾過絕浸盛功孰與井然當論述蠡起  
自天文輿地書數訓詁雜家博鉅毛髮罔弗窮殫智奪義屈匪惑  
而尊而獨不說不撓行軌言闕抑亦偉己性仁愛雖貧乏樂贍嫻  
族邑兩大禮既書列荒政緩急又出資以倡賓接後進色怡氣凝  
教弟子必先行誼故士出輒端慤有文所著經說詩文三傳補注  
老莊章義古文辭類纂書錄題跋雜記詩鈔共百五十二卷俱刊  
再娶皆張氏側室梁氏子女六人長景衡舉人江蘇泰興縣知縣  
次師古執雉監生執雉後從兄女適望族孫三誦實同潢曾孫聲  
前夫人生一女側室生執雉後夫人不合耐別葬長嶺先塋先生  
世父編修君範問學沈淹善攷覈傳記爲世經師又多聞師友賢

國朝書畫類傳初編 卷一百一十一  
者說文章要指先生幼習其傳用日恢耀先生從孫瑩編修君曾  
孫也才智瓌異克纂序官江東與嶽生善嶽生又學於先生麤識  
儀則始葬僅志歲月瑩曰是不可無文詞乃追刻銘藏於廟辭曰  
維德有勇孔聖所臧既紹而開形闕奚亡匪虛是擴匪蹟是崇性  
爲之防學爲之埔爰結爰濟勿坎勿陂已窆鑽石式麗牲詞

右墓誌銘毛嶽生撰

德旋年二十餘慕古人爲文而不知所以爲之之法側聞今天下  
爲古文者惟桐城姚惜抱先生學有原本而得其正然無由一置  
身其側親承指授以爲恨後得先生古文辭類纂讀之而憬然悟  
謂今而後治古文者可以不迷於向往矣陽湖惲子居好持高論

於辭賦古文必曰周秦兩漢至其論學未嘗不推先生爲海內一人也先生諱霽字姬傳號夢穀一號惜抱世桐城人曾祖諱士基羅田縣知縣祖諱孔鏌以子範貴 贈翰林院編修考諱淑以先生貴 贈刑部廣東司郎中妣陳氏 封宜人先生少學文於同邑劉才甫才甫爲序贈之期以王文成公之學由是知名於時乾隆十五年庚午本省鄉試中式舉人二十八年癸未會試中式進士改翰林院庶吉士三十一年丙戌散館以主事用分兵部尋補禮部儀制司三十三年戊子充山東鄉試副考官遷禮部祠祭司員外郎三十五年庚寅充湖南鄉試副考官三十六年辛卯充會試同考官遷刑部廣東司郎中充四庫全書館纂修官 記名御



史年餘乞病歸自是歷主講梅花敬敷紫陽鍾山各書院凡四十餘年嘉慶十五年庚午重赴鹿鳴宴 欽加四品頂帶二十年九

月十三日卒春秋八十有五羣弟子祀之鍾山書院道光十二年

十月崇祀鄉賢祠配張氏某官某之女繼配張氏某官某之女並

封宜人子三人景衡師古雒孫四人曾孫二人先生外和而內

介義所不可確然不易其所守官刑部時廣東巡撫某擬一重辟

案不實堂官與同列無異議先生覈其情獨爭執平反之乾隆嘉

慶之際天下爭尚漢學詆程朱爲空疎無用先生毅然起而正其

非嘗以爲論繼孔孟之統後世君子必歸程朱士之欲與程朱立

異者縱於學有所得焉猶不免爲賢知之過其下則肆然爲邪說

以自飾其不肖者而已於戲若先生者謂非獨立不懼之君子也哉先生於學無所遺而尤工爲文其文高潔深古出自司馬子長韓退之而才敏於法氣蘊於味斷然自成一家之文也詩從明七子入卒之兼體唐宋模寫之迹不存焉書偏董元宰蒼逸時欲過之所著有九經說十七卷三傳補注三卷文集二十卷詩集二十卷筆記四卷法帖題跋二卷尺牘十卷並刊行於世德旋旣讀先生古文辭類纂稍知爲文之法其後獲見先生於鍾山而請益焉先生以禪喻文謂須得法外意德旋聞之而若有證也而先生亦深許德旋爲可與言文然今德旋年且老矣業不加進慙負先生尙何言哉尙何言哉嘗竊以謂立言之士自元明以來才學兼擅

未有盛於先生也雖然吾能言之疇克聽之先生將有待也耶抑  
無待也耶固無待也而仍若不能無待嗟乎其又可慨也已先生  
以某年月日葬某所時未有爲之銘者今先生之從孫瑩以先生  
行狀及崇祀鄉賢錄視德旋乃擇其尤要者次爲文刻之外碑先  
生旣歿而言立足以垂世行遠無所藉於德旋之文夫亦用是以  
誌仰止之忱而已矣

右墓表吳德旋撰

惜抱先生諱霨字姬傳薑塢先生弟淑之子乾隆二十八年進士  
以庶常散禮部儀制司主事三十三年充山東副考官三十五年  
充湖南副考官明年會試同考官升刑部廣東司郎中充四庫全

書館纂修官尋乞病歸主講席於鍾山敬敷紫陽梅花各書院四十餘年嘉慶二十年九月十三日卒年八十五桐城當康熙雍正間方學士苞力講求古文義法天下始知宗尙歸氏熙甫以上追司馬子長韓退之卓然爲古文導師而劉上舍大樹復繼起相應和天下以爲古文之傳在桐城藍塢先生與大樹善盡得學士緒論先生本所聞於家庭師友間者而益充以浩博無涖之學養之以從容中道之氣遂以自成一派爲後進典型病時俗舍程朱而宗漢以爲枝之獵而去其根細之蒐而遺其鉅時時爲學者重言之故其修道據德實允迪之品詣敦峻無纖毫類亦其文之所以粹美也所著九經說十七卷文集二十卷詩集二十卷三傳補注

三卷法帖題跋三卷筆記四卷學者循是以求亦可以見先生體用之一焉

右傳李兆洛撰

先生諱需字姬傳一字夢穀嘗顏其所居曰惜抱軒學者稱之曰惜抱先生先世自餘姚遷桐城遂世爲桐城人自明以來代有明德入國朝刑部尙書端恪公文然先生之高祖也先生以乾隆庚午舉於鄉癸未成進士改庶吉士丁父憂歸服闋散館改兵部主事年餘移補禮部儀制司戊子爲山東鄉試副考官還擢儀制司員外記名御史庚寅爲湖南鄉試副考官辛卯爲會試同考官擢刑部廣東司郎中四庫全書館啟以大臣薦徵爲纂修官年

餘乞病歸自是主講於江南爲梅花紫陽敬敷鍾山書院山長者四十餘年嘉慶庚午以督撫奏重赴鹿鳴宴 詔加四品銜乙亥九月十三日以疾卒於鍾山書院距生於雍正九年十二月二十日享年八十有五自康熙年間方侍郎以經學古文名天下同邑劉海峯繼之天下言古文者咸稱桐城矣先生世父蘆塢編修與海峯故友善也先生涵採見聞益以自得刊落枝葉獨見本根其論學以程朱爲宗其爲文與司馬韓歐諸君子有相遇以天者自其官京師時有所作必歸於扶樹道教講明正學若集中贈錢獻之序是也及旣歸益務治經所著經說發揮義理輔以攷證而一行以古文法居揚州時與欽吳殿麟定同居梅花書院嘗以所作

視殿麟殿麟以爲不可卽竄易至數四必得當乃止殿麟海峯弟子也殿麟嘗語用光曰先生虛懷善取雖才不己若者苟其言當必從之於爲文尙如是於爲學可知也故退居四十餘年學日以盛望日以重其初學者尙未知信從及旣老而依慕之者彌眾咸以爲詞邁於望溪而理深於海峯蓋天下之公言非從遊者阿好之私言也先生色夷而氣清接人極和藹無貴賤皆樂與盡懽而義所不可則確乎不能易其所守當纂修四庫書時于文襄聞先生名欲招致之門下卒謝不往及旣歸猶使人諷起之終不行集中復張君書是也當居鍾山書院時袁簡齋以詩號召後進先生與異趨而往來無閒簡齋嘗以其門人某屬先生爲許以執贄居

門下先生堅辭之及簡齋歿人多毀之者或且規先生謂不當爲作誌先生曰設余康熙間爲朱錫鬯毛大可作誌君許之乎曰是固宜也先生曰隨園正朱毛一例耳其文采風流有可取亦何害於作誌乎蓋先生存心之厚多如此先生旣歿主講書院所得束脩及門生羔雁故舊贈遺以資宗族知交之貧者隨手輒盡毫髮不爲私蓄計及晚歲始以千金購田於江浦蓋欲爲移居江甯計也然終亦斥去迨旣卒乃無以爲歸資也先生當疾革時遺書示兒子云人生必死吾年八十有五死何憾哉吾棺不得過七十金絲不得過十六斤凡親友來助喪事者便飯而已不得用鼓樂諸事稱此汝兄弟不得以財帛之事而生芥蒂毋忘孝友嗚呼觀先



生此書其不數鄭康成之戒子益恩矣先生論學既兼治漢宋而  
一以程朱爲宗其誨示學者懇切周至不憚繁舉嘗謂說經古今  
自有真是非勿循一時人之好尚如近年海內諸賢所持漢學與  
明以來講章諸君何以大相過哉夫漢儒之學非不佳也而今之  
爲漢學乃不佳徧徧而不論理之是非瑣碎而不識事之大小曉  
曉聒聒道聽塗說正使人厭惡耳且讀書者欲有益於吾身心也  
程子以記史書爲玩物喪志若今之爲漢學者以搜殘舉碎人所  
少見者爲功其爲玩物不彌甚耶又曰凡爲經學者所貴此心闕  
通明澈不受障蔽爲漢學者不深則不能入深則障蔽生矣嗚呼  
以先生之論合觀於先生之制行其於義理之辨可謂審之明而

守之爲矣先生論文舉海峯之說而更詳著之當編次論說爲古  
文辭類纂其類十三曰論辨類序跋類奏疏類書說類贈序類詔  
令類傳狀類碑誌類雜記類箴銘類頌贊類辭賦類哀祭類一類  
內而爲用不同者別之爲上下編曰凡文之體類十三而所以爲  
文者入神理氣味格律聲色神理氣味者文之精也格律聲色者  
文之粗也然苟舍其粗則精者亦胡以寓焉學者之於古人必始  
而遇其粗中而遇其精終則御其精而遺其粗文士之效法古人  
莫善於退之盡變古人形貌雖有摹擬不可尋而得其跡其他雖  
工於學古而跡不能忘揚子雲柳子厚於斯尤甚焉以其形貌之  
過於似古人也而遽擯之謂不足於文章之事則過矣然遂謂非

學者之一病則不可也其論詩以爲如漁洋之詩鈔可謂當人心之公者也然其論止古體而不及今體至今日而爲今體者紛紜歧出多趨僞謬風雅之道日衰因取唐以來詩人之作迄於南宋采錄用之爲五七言今體詩鈔二集十八卷已刊行其古文辭類纂卷帙多尙未刊行然自明以來言古文者莫詳於先生云先生始娶張孺人前卒生一女適張元輯前卒繼娶張宜人生子二景衡王子舉人戊辰大挑知縣今補秦興縣師古監生女二長適張通理次適潘玉側室梁氏生子一雉業儒孫四晟芳賜景衡出誦師古出楮雉出女孫三曾孫一聲曾女孫一俱幼用光自庚戌歲謁先生於鍾山書院及癸丑受業於鍾山者八閱月自後以書問

請業辱先生所以期望之者甚至而迄今無所成就今聞先生之喪蓋失所依歸有甚於他門弟子者矣先生居家孝友睦嫻任恤之詳用光所不及知者致書與景衡兄弟俟其詳列而編次之茲先以先生平日爲學爲文之大旨所昔聞而略知之者論次之如右以待 國史之采擇

右行狀陳用光撰

嘉慶二十年九月惜抱先生卒於江甯鍾山書院從孫瑩在京師聞之哀愴涕泣戚友咸唁乃卜日設奠於都城之西爲之主而哭之越日先生之門人前江南道監察御史翰林院編修陳君用光語瑩曰吾師以德行文章爲後學師表者四十餘年所當上之史

館其生平出處言行之大綱而狀之弟子之責也子於先生屬最親曷條其略瑩無似不能有所撰述以表先生副侍御之屬謹以所知對先生名簡字姬傳世爲桐城姚氏先刑部尙書端恪公之元孫也先生少時家貧體弱多病而嗜學澹榮利有超然之志先曾祖編修葺塢府君先生世父也博聞強識誦法先儒與同里方亭川葉華南劉海峯諸先生友善諸子中獨愛先生每談必令侍方先生論學宗朱子先生少受業焉尤喜親海峯客退輒肖其衣冠談笑爲戲編修公嘗問其志曰義理考證文章殆闕一不可編修公大悅卒以經學授先生而別受古文法於海峯乾隆十五年舉於鄉會試罷歸學益力疏食或不給意泊如也二十五年丁贈

朝議公艱越三年中禮部試 殿試二甲進士授庶吉士散館改  
禮部儀制司主事三十三年充山東副考官還擢員外郎逾年再  
充湖南副考官明年充 恩科會試同考官改擢刑部廣東司郎  
中四庫館啟選一時翰林宿學爲纂修官諸城劉文正公大興朱  
竹君學士咸薦先生以所守官入局時非翰林爲纂修者八人先  
生及程魚門任幼植尤稱善金壇于文襄公雅重先生欲一出其  
門竟不往書竣當議遷官文正公以御史薦已 記名矣未授而  
公薨先生乃決意去遂乞養歸乾隆三十九年也先是館局之啟  
由大興朱竹君學士見翰林院貯永樂大典中多古書爲世所未  
見告之于文襄奏請開局重修欲嘉惠學者既而奉 旨搜求天

下藏書畢出於是築修者競尙新奇厭薄宋元以來儒者以爲空  
疏掎擊訕笑之不遺餘力先生往復辨論諸公雖無以難而莫能  
助也將歸大興翁覃溪學士爲敘送之亦知先生不再出矣臨行  
乞言先生曰諸君皆欲讀人未見之書某則願讀人所常見書耳  
梁階平相國屬所親語先生曰若出吾當得薦先生婉謝之集中  
所爲復張君書也先生以爲 國家方盛時書籍之富遠軼前代  
而先儒洛閩以來義理之學尤爲維持世道人心之大不可誣也  
顧學不博不可以述古言無文不足以行遠世之孤生徒抱俗儒  
講說舉漢唐以來傳注屏棄不觀斯固可厭陋而矯之者乃專以  
考訂訓詁制度爲實學於身心性命之說則斥爲空疏無據其文

章之士又喜逞才氣放蕩禮法以講學爲迂拙是皆不免於偏蔽  
思所以正之則必破門戶敦實踐倡明道義維持雅正乃著九經  
說以通義理考訂之郵撰古文辭類纂以盡古今文體之變選五  
七言詩以明振雅祛邪之旨嘉定錢獻之以考證名尤精小學先  
生贈之序曰孔子沒而大道微漢儒承秦滅學之後始立專門各  
抱一經師弟傳受儕偶怨怒嫉妬不相通曉其於聖人之道猶築  
牆垣而塞門巷也久之通儒漸出貫穿羣經左右證明擇其長說  
及其敝也雜之以讖緯亂之以怪僻猥碎世又譏之蓋魏晉之間  
空虛之談興以清言爲高以章句爲塵垢放誕頽壞迄亡天下然  
世或愛其說辭不忍廢也自是南北乖分學術異尚五百餘年唐



一天下兼采南北之長定爲義疏明示統貫而所取或是或非未  
有折衷宋之時真儒乃得聖人之旨羣經略有定說元明守之著  
爲功令當明佚君亂政屢作士大夫維持綱紀明守節義使明久  
而後亡其宋儒論學之效哉且夫天地之運久則必變是故夏尙  
忠商尙質周尙文學者之變也有大儒操其本而齊其弊則所尙  
也賢於其故否則不及其故自漢以來皆然已明末至今日學者  
頗厭功令所載爲習聞又惡陋儒不考古而蔽於近於是專求古  
人名物制度訓詁書數以博爲量以闕隙攻難爲功其甚者欲盡  
舍程朱而宗漢之士枝之獵而去其根細之蒐而遺其鉅夫甯非  
蔽歟又與魯賓之論文曰易曰吉人之辭寡夫內充而後發者其

言理得而情當理得而情當千萬言不可厭猶之其寡矣氣充而  
靜者其聲聞而不蕩志章以檢者其色耀而不浮邃以通者義理  
也雜以辨者典章名物凡天地之所有也閔閔乎聚之於錙銖夷  
憚以善虛志若嬰兒之柔若雞伏卵其專以一內候其節而時發  
焉夫天地之間莫非文也故文之至者通於造化之自然然而驟  
以幾乎合之則愈離今足下爲學之要在於涵養而已聲華榮利  
之事曾不得以奸乎其中而寬以期乎歲月之久其必有以異乎  
今而達乎古也既還江南遼東朱子穎爲兩淮運使延先生主講  
梅花書院久之書紱庭尙書總督兩江延主鍾山書院自是揚州  
則梅花徽州則紫陽安慶則敬敷主講席者四十年所至士以受

業先生爲幸或越千里從學四方賢僞自達官以至學人士過先生所在必求見焉錢唐袁子才詞章盛一時晚居江甯先生故有舊數與往還子才好毀宋儒先生與之書曰儒者生程朱之後得程朱而明孔孟之旨程朱猶吾父師也然程朱言或有失吾豈必曲從之哉程朱亦豈不欲後人爲論而正之哉正之可也正之而詆毀之訕笑之是詆毀父師也且其人生平不能爲程朱之所行而其意乃欲與程朱爭名安得不爲天之所惡乎先生貌清而癯而神采秀越風儀閒遠與人言終日不忤而不可以鄙私干自少及耄未嘗廢學雖宴處常靜坐終日無情容有來問則竭意告之喜導人善汲引才僞如恐不及以是人益樂就而悅服雖學術與

先生異趣者見之必親南康謝蘊山方伯見先生退而嘆曰姚先生如醴泉芝草使人見之塵俗都盡青浦王蘭泉侍郎晚歲家居集海內人詩至先生曰姬傳藹然孝弟踐履醇篤有儒者氣象其見重如此禮恭親王薨遺教必得姚某爲家傳德化陳東浦方伯未卒前一歲屬先生曰某死必得先生文以誌吾墓新城魯絜非以文章名江右始學於閩中朱梅崖先生梅崖於當世文少所推許獨心折先生以爲不及魯乃渡江就訪使諸甥受業自康熙朝方望溪侍郎以文章稱海內上接震川爲文章正軌劉海峯繼之益振天下無異詞矣先生親問法於海峯海峯贈序盛許之然先生自以所得爲文又不盡用海峯法故世謂望溪文質恆以理勝

海峯以才盛學或不及先生乃理文兼至方劉皆桐城人也故世  
言文章者稱桐城云嘉慶十一年復主鍾山書院十五年值鄉試  
與陽湖趙甌北兵備重赴鹿鳴宴 詔加四品銜先生年八十矣  
神明如五六十時行不撰杖兵備年亦八十二觀者以爲盛先是  
先生居江甯久喜登攝山嘗有卜居意未決遷延不果歸二十年  
七月微疾九月一夕卒於院中年八十五門人共治其喪生平所  
修四庫書及廬州府志江甯府志六安州志官書別刻外自著九  
經說十九卷三傳補注三卷老子章義一卷莊子章義十卷惜抱  
軒文集十六卷文後集十二卷詩集十卷書錄四卷法帖題跋一  
卷筆記十卷古文辭類纂四十八卷五七言今體詩鈔十六卷門

人爲鏤版行世先生兩主鄉試一爲會試同考官所得士爲多涪州周興岱昆明錢御史禮曲阜孔檢討廣森其最也門人守其經學爲詩古文者十數輩皆知名尤愛潔行潛志之士上元汪兆虹志高而行芳學必以程朱爲法年二十六卒先生深惜之爲誌其墓謂真能希古賢人而異乎世之學者生也先生之受經學於編修趙塢府君也編修之學以博爲量而取義必精於書無所不窺論辨條記甚多而不肯譏述編修公已沒先生欲修輯遺說編纂成書而不就做日知錄例成經史各一卷曰援鶉堂筆記以授瑩使卒其業且戒之曰纂輯筆記此卽著書不可苟作大約欲少而精不欲多而蕪近人著書以多爲貴此但取欺俗人耳吾聞之乃

無有也望受教未及成書而先生沒矣先生元配張宜人故黃州府同知諱某公女生一女而卒繼娶宜人之從妹故四川屏山縣知縣諱曾敏公女生二子二女長景衡乾隆五十七年舉人江蘇秦興縣知縣次師古長女嫁張元輯次嫁張通理三適潘玉側室梁氏生一子執雉以執雉後從兄義輪乾隆十八年舉人廣西南甯府同知編修仲子也

右行狀姚瑩撰

按各篇紀所著書卷數多不符茲仍其舊

桐城姚先生諱鼎字姬傳進士官禮部郎中學以研經為主而並及於史子集一字之不諧於心者必思之深辨之審以求其詞之何以治義之何以完聖賢之旨何以不至湮暗而不彰故其成也

廣博而無所不該精詳而無所不實平正而無所不適而所憂者  
惟學者之厭薄程朱不知玩味其書以上求孔孟之道爲學術人  
心之害其贈錢獻之序曰孔子沒而大道微漢儒承秦滅學之後  
始立專門各抱一經師弟傳受儕偶怨怒嫉妒不相通曉其於聖  
人之道猶築牆垣而塞門巷也久之通儒潛出貫穿羣經左右證  
明擇其長說及其敝也雜之以識緯亂之以怪僻猥碎世又譏之  
蓋魏晉之閒空虛之談興以清言爲高以章句爲塵垢放誕頹壞  
迄亡天下然世猶愛其說辭不忍廢也自是南北乖分學術異尙  
五百餘年唐一天下兼采南北之長定爲義疏明示統貫而所取  
或是或非未有折衷宋之時眞儒乃得聖人之旨羣經略有定說



元明守之著爲功令當明佚君亂政屢作士大夫維持綱紀明守節義使明久而後亡其宋儒論學之效哉且夫天地之運久則必變是故夏尙忠商尙質周尙文學者之變也有大儒操其本而齊其弊則所尙也賢於其故否則不及其故自漢以來皆然已明末至今日學者頗厭功令所載爲習聞又惡陋儒不考古而蔽於近於是專求古人名物制度訓詁書數以博爲量以闕隙攻難爲功其甚者欲盡舍程朱而宗漢之士枝之獵而去其根細之蒐而遺其鉅夫甯非蔽與嘉定錢君獻之強識而精思爲今士之魁傑余嘗以余意告之而不吾斥也雖然是猶居京師龐涓之閒也錢君將歸江南而適嶺表行數千里旁無朋友獨見高山大川喬木聞

鳥獸之異鳴四顧天地之內寥乎茫乎於以俯思古聖人垂訓教  
世先其大者之意其於余論將益有合也哉其復蔣松如書曰爾  
與先生雖未及相見而蒙知愛之誼如此得不附於左右而自謂  
草木臭味之不遠者乎心乎愛矣遐不謂矣尙有所欲陳於前者  
願卒盡其愚焉自秦漢以來諸儒說經者多矣其合與離固非一  
途逮宋程朱出實於古人精微之旨所得爲多而其審求文字往  
復之情亦更爲曲當非如古儒者之拙滯而不協於情也而其生  
平修己立德又實足以踐行其所言而爲後世之嚮慕故元明以  
來皆以其學取士利祿之途一開爲其學者以爲進趨富貴而已  
其言有失猶奉而不敢稍違之其得亦不知其所以爲得也斯固

數百年以來學者之陋習也然今世學者乃思一切矯之以專宗漢學爲至以攻駁程朱爲能倡於一二專己好名之人而相率而效者遂大爲學術之害夫漢人之爲言非無有善於宋而當從者也然苟大小之不分精麤之弗別是則今之爲學者之陋且有勝於往者爲時文之士守一先生之說而失於隘者矣博聞強識以助宋君子之所遺則可也以將跨越宋君子則不可也邇往昔在都中與戴東原輩往復嘗論此事作送錢獻之序發明此旨非不自度其力小而孤而義不可以默焉爾先生胸中似猶有漢學之意存焉而未能豁然決去之者故復爲極論之木鐸之義蘇氏說集注固取之矣然不以爲正解者以其對何患於喪意少遠也至

益成見殺之集注義甚精當先生曷爲駭之哉朱子說誠亦有誤者而此條恐未誤也望更思之其程縣莊文集序曰爾往昔在京師聞江甯有程縣莊先生今世一學者也乾隆庚戌余來主鍾山書院則縣莊已死求所著書亦不得見今歲楊存齋令君乃持縣莊集見示遂獲卒讀乃究論曰孔子之道一而已孔子沒而門弟子各以性之所近爲師傳之真有舛異交爭者矣況後世不及孔子之門而求遺言以自奮於聖緒墜絕之後者與其互相是非固亦其理然而天下之學必有所宗論繼孔孟之統後世君子必歸於程朱者非謂 朝廷之功令不敢違也以程朱生平立身行己固無愧聖門而其論說所闡發上當聖人之旨下合乎天下之公

心者爲大且多使後賢果能篤信而遵守之爲無病也若其他欲與程朱立異說者縱於學者有所得焉而亦不免賢智者之過其下則肆然爲邪說以自飾其不肖者而已今觀縣莊之立言可謂好學深思博聞強識者矣而顧惜其好非議程朱蓋其始厭惡科舉之學而疑世之尊程朱者皆束於功令未必果當於道及其久意見益偏不復能深思熟玩於程朱之言而其辭遂流於蔽陷之過而不自知近世如休甯戴東原其才本超越乎流俗而及其爲論之僻則過有甚於流俗者縣莊所見大抵有似東原東原晚以修四庫書得官禁林其書亦皆刻行於世而縣莊再應徵車卒不用而歸老死其所撰者僅有畱本不傳於世將憂泯沒斯則所遭

或幸或不幸也。縣莊書中所論周禮爲東周人書及解六宗辨古文尙書之僞皆與鄙說不謀而合。若其他如解易詩所論則余未敢以爲是其文辭明辨可喜。固亦近世之傑而爲人代作應酬文字則不足存錄。後有得縣莊書而觀之必有能取其所當取者。先生當開四庫書局時入局修書後乞假歸里主講揚州書院尋移主鍾山教育人才成就者眾人之見之也。如坐春風然不飲而和不薰而潔其德輝之所及固如是也。古文名天下嘉慶後言古文者必以先生爲歸。著有惜抱軒文集經說筆記等書。

右學案唐鑑輯

姚鼐曰唐時凡入史館者必令作名臣傳所以覘史才。今史館大

臣傳率鈔錄 上諭吏牘謂以避黨仇譽毀之嫌而名臣行績遂於傳中不可得見然則私傳安可廢乎

右惜抱軒文後集張維屏錄

姬傳豈弟慈祥而襟期蕭曠有山澤閒儀有松石閒意簿書刀筆雅非所好也詩旨清雋晚學玉局翁尤多見道之語既歸屢主安徽敬敷江甯鍾山揚州安定三書院以讀書學道教多士古文消古簡淨紆徐往復亦多不盡之味

右湖海詩傳張維屏錄

惜抱軒集前三卷亦多攷訂家言自記序以後文始誓絕朱竹君一傳尤有史筆

右淵雅堂集張維屏錄

國朝詩林卷之八

三



四庫全書

五

周發春

乾隆三十年春 高宗純皇帝南巡浙江合江南士之獻進賦頌者 召試於江甯自十六年南巡至是三 召試士矣是年定爲糊名閱卷取中尤嚴而江甯周君以廩膳拔貢生入試 欽定爲一等 賜舉人授內閣中書舍人君之名乃大著於天下君入都供職旋入軍機處辦事一夕內直 上偶問得君名歎曰此吾南巡時所得江南才子也時大臣無不欽重君者君兩會試未第候註吏議君時年才逾三十耳而意沮喪無仕進之志君故通曉天下利病又善爲文奏旣退閒於是四方督撫多請君入其署爲章奏而君亦藉以遨遊徧天下當君之得過以人有來探事者君對

不知後其人得罪引君及同直軍機者皆未泄密也吏有與軍機  
官相惡者卽以不嚴斥探者傅重比鑄級其後與君同罪者復進  
用至卿貳而君獨遠迹都門雖其居幕府爲奏之善多爲天下稱  
誦而身一見枉終放廢以至於老此天下所共慨惜也君諱發春  
字卉含其號曰青原人皆呼之故青原之稱尤著余初於京師見  
之其文章書法之美交遊中所希見而議論和平與人接恂恂温  
良人也余歸里主皖中書院君時來皖得再見甚歡余後至江甯  
而君尙依君子之桂於皖遂不見而之桂今以君柩歸矣君夫人  
沈氏賢而早沒生二子之桂安徽候補知縣之桐先喪嘉慶十六  
年十月十日君卒年七十四次年某月某日葬於江甯南吉山之

麓夫人沈氏先葬於是今以君合焉爲之銘者桐城姚鼐也銘曰  
才高不盡其能名著不究其升智可逮遠而身失其憑惟其君子  
長者也卜其後之式承

右墓誌銘姚鼐撰

日本書紀卷之二十一

三

吳鉞

吳鉞字愛棠安徽全椒人由貢生入貲爲知州借補無錫令愛民如子煦煦嫗嫗人皆忘其爲令也邑之龍潭岸向有神軸懸村民家奔走男女如市賽會極盛時適患盜鉞至其處與神約期以二十日得盜首則許供奉如故如不得則當撤屆期不得竟撤之越數日盜亦得調吳縣升順天府治中

右傳秦瀛撰

乾隆乙酉春 天子四幸江浙省方察吏制府大中丞尹公開府大中丞莊公台詞列吳侯治績奏 行在所 命侯以知州銜攝吳縣事簡書將至城野疑慮悵悵問訊其信其誤若迷若失罔識

所措則相與謀顧諸憲司留之不可復請借一年如寇恂故事不可乃愬於金匱韓大令曰惟吾侯克惠吾民惟公夙與侯親惟錫與金鄰凡錫民利弊疾苦吾侯勤勤然舉之皆明公所習知而飭覩也今侯將舍吾民而去其有達依戀之私殷挽萬一於上聞乎大令曰無難也雖然汝曹將使我稱侯何語哉曰亦舉其愷悌寬仁所優優久孚於吾民者告之而已矣吾錫俗好爭勃谿誶諍屢促於縣庭侯集兩造而探其情孰妍孰醜如鑑之照形故錫人誦侯之明錫爲澤國洪濤浸灌阡謫而陌亂侯按籍以稽履畝而算各正其畔疆者以無竄故錫人誦侯之斷 翠華重莅行殿嗟我率作除道不激不阿鑿開中河不咎一夫三日而通波故錫人誦

侯之和妖巫左道以神啓利男肩女臂夜鐙來會侯突至而擒其魁紛紛而鳥獸避故錫人誦侯之智士有一藝獎之成名其不率者恥之使自懲如皓月之輝童豎共欣其朗徹如春風之煦卉木因之而敷榮秋奮登而輸將恐後夜柝響而寇盜不驚此侯之所以康綏吾邑政通而化成也侯爲父母我乳我翼侯爲師保我訓我飭茲兩大中丞以侯他適亦何不稽令甲之所垂於循吏則錫以車服寵以高職而必奪怙冒於窮檐而使之去錫哉大令曰嘻汝愛侯之言可謂專且辨爾愛侯之心亦何其愚而褊矣聖人之視天下也南粵西秦猶一郡一縣之分其不可此澆而彼淳也大

臣之視一方也一郡一縣猶一家一室之善其不可兄頑而弟彥



也今中丞奏調侯吳門也其謂吳門當都會之衝舟車相接吏習於期會微發鹿鹿逐逐晨飢夕渴對賓客而神疲覽簿書而力竭必得如侯者簡古恭儉以振蕩之而蠲潔之也其謂吳門多訟獄積月踰時裹糗糧以待鞫懼汗溼背而憂輪轉腹必得如侯者風馳而電速釐剖之而威服之也其謂吳門管絃妖冶嗜利紛囂華衣美食將貧而益驕必得如侯者日與之敦孝弟力田以號召之而泳陶之也其謂侯宰汝錫譽聞洽於眾將投以艱鉅而薦剡之以大用也凡大中丞所知侯者皆汝曹所未知者也若汝曹之知侯而誦侯者則大中丞固已知之矣汝曹誠念侯不忍使侯去無甯使人陰毀侯於大中丞之前謂侯治錫而錫不克治又奚可遷

於他所則不之信又無甯使人謂侯治錫尙或有數大工未竟請  
畱侯始之終之以遲其行而錫又無其事也於錫則嘉侯之績於  
吳則資侯之才夫豈膠進賢於十格而泥成命之難回乎曰然則  
畱之不得而歌以聲之歌之不已而碑以貞之其可乎大令曰可  
哉於是眾乃作歌歌曰九龍山兮聳百仞野田平兮泉源潤侯之  
去兮何迅數政七年兮曾不能以一瞬九龍山兮讓王都東連滄  
海兮西具區侯之去兮何遽憶侯之來兮歡聲載塗銅章兮朱綬  
侯之來兮眾之母朝聽政兮莫放衙樹有鳴禽兮軒窗有花花馥  
馥兮煙霏霏侯教吾民兮無詐以欺農耕女織兮無或作非如何  
可言兮侯其知之侯迎春兮東門郊芄芃夏麥兮鬱鬱秋苗侯禱

雨兮邑之社轉災爲祥兮綠徧野年穀熟兮雞犬馴聽侯笑語兮  
福吾民侯毋遠行兮蓉湖濱攀轅弗遂兮憂心如焚大令曰善哉  
吾其和之和歌曰惠水清兮惠風披侯惟吾友兮政則吾師侯將  
去汝兮豈惟汝思索莫離羣兮奚度奚諾汝送侯於江皋兮忍而  
不能舍刷石爲碑兮龍山之野我思侯兮愁莫寫文汝之碑兮諗  
於來者夏五月望後十日碑成書以爲記

右去思碑記韓錫胙撰

邱永

吾黨多魁奇英時之士而邱生星河寬中篤厚慎言語謹步趨終身無子弟之過從余遊二十年學不泛濫而文清樸無懦響見其進未見其止不謂其竟止於是也生名永星河其字又字雲涇邱氏遠有代序宋高宗時有名乾者官左正言扈蹕來杭至十世有名懋功者居青沙鎮業紙劄鉛粉明成祖定鼎北平句取天下都匠實京師例當北行季弟懋才代兄往懋功植雙槐於門江西湯毛九亂保定侯南討有司慮妨軍行將伐去懋功子禮以先人遺澤不從執以白侯侯云樹固不必盡伐此人亦可稱強項遽釋之鄉里稱其賢以雙槐顏其堂云又十餘傳爲永曾祖文遇祖名宗

契父名峻仁和諸生貢太學例得儒官生生而穎慧三四歲授以唐律數百首琅琅成誦弱冠爲諸生文名藉甚靈根日美朋牖漸閉從余學爲無韻之文又從沈廉使萩林學爲有韻之文生平所受知者金壇于大司農拔生於童年甯化雷副憲餼生於郡庠諸城賈京兆舉生於優行長洲彭司馬賓生於賢書之數公者皆余講道論德之友所謂臭味不差池而針芥自投合也其足跡所至一遊邵武應秦使君之招再遊三山應八閩通志之聘家貧友教四方之會稽之江南武進之江西瑞金所成就者不可僕數歲丙戌禮闈報罷 上以國子監六堂課士官之人 命大臣選下第舉子有文望者充之於午門外 命題嚴試得卷十五君名 欽定第

一明年補學正派率性堂日程月試壹以清真雅正爲則士風丕振 皇朝修太學志董其事者司成司業六堂學正助教等官爲分修派生爲總修擬門十有五曰諭章曰建置曰臨詣曰祀典曰禮儀曰樂律曰官師曰生徒曰選舉曰人物曰經籍曰藝文曰古蹟曰經費曰雜識先以凡例及第一門奏進 聖諭有體例都好之衰時屆鄉試生晝則趨堂課士夜則扃戶校書積勞成疾遂以不起時乾隆戊子七月二十二日也年僅四十有六生天性誠摯言不忤物行不慚影律己以正不干人以私潔白之養旁貸孤寡著述甚夥有曰邱宗信譜者紀其先世勲業高行也有曰雲涇雜錄者紀前修之嘉言懿行也其他箴銘詩賦記序之在人耳目者

及雜志四卷皆其二十年來嘔出心血之作也娶劉氏事舅姑言所不及輒先意承之卒於壬申之歲先君二十年生二子曰慶筠曰中閻一女適王文河適以某氏生三子曰中瀛曰中聯曰中喬族兄振藩爲大宗年暮無嗣中閻易名文元爲其後歲己丑十月十有一日合葬於棲真嶺之原祝予之慟非夫人而誰爲銘曰語有云爲文傷命胡不卹死而造物競因汝子請銘君獨行

右墓誌銘杭世駿撰

閻循覲

乾隆三十一年余需次都下得來安令將行閻君懷庭送至郊執手流涕別去是歲君成進士補吏部考功司主事踰歲書至言部務殷繁至不暇寢食且曰將告歸余心憂之知君有夙疾恐以勤勞增劇也戊子秋余供事闈中九月回來安而君之訃至嗚呼其可哀也已君少孤未諳葬事墓地卑隱水齧冢既長以爲大戚陰雨輒號泣不食繞墓走達夜後墓雖遷終以此致羸疾浸淫至於無救在考功日汲汲於國計民生之大者議有不合侃侃與上官爭又規畫多遠略時益以爲迂闊不得行其意遂告歸先是齊魯之士文學質行相尚而道學鮮傳人君德器渾成本於天植又深



習先儒得其所以用力之方其大要以忠恕爲根本以倫常爲實際毅然絕學爲己任後生晚進被其教化皆知聖賢可學而至既壽不得長所蘊未及一施然識者以君德業成就無愧古人君學無所不統而好爲精思著有尙書讀記毛詩讀記春秋一得困勉齋私記西澗草堂集名人小傳見聞隨筆共若干卷藏於家方君之告歸也距支俸期三日友人謂曷少遲可爲資斧君曰吾懼貪位懷利以事君故告若爾是懷利也友人歎息而去君平居溫溫若無以異於人至遇事人所糾結艱苦不可爲者君處之暇豫不惑不阻蓋其中之所養如此君諱循觀號伊蒿先世太原人諱均大者始遷昌樂曾祖諱世繩官至詹事府左春坊左諭德祖諱瑜

以翰林出知長興縣行取主事父諱廷倩太學生母吳孺人生子一卽君也卒於乾隆三十三年六月二十九日得年四十有五娶姜氏繼娶郭氏子四人學夏學高學志學游女三人將以某年某月某日葬於營邱黎家村先人墓側從子學賜學朱以余知君爲切來請銘義不敢辭銘曰

植其德聖賢師年雖未永稱不衰吾質旣亡將安歸

右墓誌銘韓夢周撰

閻先生循觀字伊蒿又字懷庭青州昌樂人與法先生同舉於鄉登張書勳榜進士官吏部考功司主事在官直心而行有不可撓之力又規畫多遠略時以爲迂闊不得行其意踰年遂歸七歲喪

父葬墓地卑下爲水齧長以爲大戚陰雨輒號慟不食繞墓走達  
夜後墓雖遷終以此致羸疾歸一年卒年四十有五私諡孝簡著  
有尙書讀記毛詩讀記春秋一得困勉齋私記西澗草堂集名人  
小傳見聞隨筆凡若干卷先生嘗自言其爲學大旨曰觀二十後  
有意於克己之學始求其惡以爲喜攻異氏爲邪僻之說於是取  
聖賢之書伏讀而繹之究其明達正直之旨志念稍稍就實然於  
吾道階級尙罔然不識其安放久之知心竇多欲以多欲之心求  
道是狼羊同牧也於是強制吾欲省之念慮察之行事然時復橫  
決其決也或旋能自制或不能制復自念曰欲之所起由於爲善  
不誠不誠則不知爲己而欲潛伏因從事於謹微念必勿欺事必

忠信自是私僞之萌頗少萌亦易除然終不能禁其萌也每念發憤獨坐嗟咨涕洟或終夜不寐困極橫甚忽若有誘其中者乃知吾之惡曰情要在去情而已情於實踐故終不能釋然於異說情於矯其所便安故力不能繼情於去僞故恆心不堅乃名其堂曰去情且臚爲三目以自詔曰存省勿忘躬行勿怠常業勿廢云又嘗自言讀書程符山中杪秋薄暮行飯偶出落木有聲微雨霑袂意淒惻久之歸讀史記屈賈傳憂思無窮累欷流涕忽自省曰此非情之正君子憂德不戚年修身不垢俗豈以外至累其心哉更取儀禮讀之已天宇漸晶月明左扉澹然見古人素位之意其造次弗違密於內省如此程符山者在濰之西南先生考山下淇福

寺金大定年碑有云寺北望浮煙山以爲程符者浮煙也曰吾夜  
居山中見東麓有白氣自南而北長數十里非雲非霧儻所謂浮  
煙非與先生與韓先生俱師其邑人滕先生綱同學相善也數至  
濰偕韓先生居山中勃縣好學者多從之游兩先生論學皆宗程  
朱斥陽明而先生之論爲持平曰王氏之書其發明知行合一之  
旨最爲有味然由其說終任心而廢講習言雖高而非貞則也聖  
人之教人也使人賓賓焉於博文好古言行禮樂之間至性命一  
貫非其時則弗語蓋多爲之方以服擾其聰明思慮之用及其久  
也內外馴習欲棄之而有不可得故能強立而不返其機之欲達  
然後發其本原使知夫道之極焉今義理未明持行不諳而驟使

專事其心一念一時之至非不適適然如自得也然過焉而易忘震焉而易變無所以馴習之故也吾聞聖人之道愚夫與能其事不異其說不高孔孟及程朱是也王氏不然故竊以爲非貞則矣先生說經明白簡易先儒疑有誤者多依經本文釋之不欲改字顧於儀禮喪服謂母妻同服婦人爲舅期而爲長子三年妾爲其子期而庶子之後父者爲母總大夫爲庶母無服而服其貴妾義皆可疑又謂繼父同居者期夫人無二本母有繼也父不可繼也宗殊而氏別何得以父名而爲之期蓋漢初諸儒所竄入爾而法先生辨其非詳所著迂齋學古編滕元生綱宇建三歲貢生隱居窮經不稱人過失雖貧甚一錢之餽苟無處所甚親暱不能強之

受母疾嘗一日夜行五百里求藥療母良已乾隆二十三年卒年七十私謚安節滕先生云

右傳錢儀吉撰

閻懷庭名循觀山東昌樂人性穎敏讀書過目不忘年十八舉於鄉其學初好佛氏既讀宋儒書乃一奉程朱爲宗省身克己唯曰不足治經不主一家言而要本於自得少而孤及長每承祭哀慕累日其父母墓卑溼值淫霖取水交匯每當夏秋交天將雨輒不食繞墓哭以是致羸疾議從墓旁濬渠洩其流數年而事不集久之卒遷葬焉益都李文藻之言曰當懷庭之遷葬也甫啟壙時恐水之敗其親之棺也恐敗其棺遂及其親之體膚也窅窅乎其若

欲以生殉親也若欲以身代親之體膚也既見棺無恙依依乎若親之再生也若孺慕乎其側也及遷葬封穴皇皇乎如弗克見也如親之初歿也一二戚友持掖之始克終事焉乾隆三十一年成進士授考功主事當官議事務持大體厥功舉意所不可持之甚力衙中會食率用四五簋懷庭獨自買麪餅食之一同年以爲外官遺之金不受曰忝居議吏之地何敢辱君惠且不可以貧故累君也居二年引疾告歸歸一月而卒年四十五有西澗文集及尙書春秋說行乎世

右述彭紹升撰

循觀字懷庭年十八舉於鄉初喜讀西方書後覽朱子大全集乃



專志洛閩之學少孤及長春秋家祭哀慕泣下乾隆三十一年成  
進士授考功司主事持大體不阿附上官衙中會食必四五簋循  
觀獨懷餅食之同僚哂其儉曰性能粗糲非矯強也一同年友爲  
外官遺之金不受曰忝居此職不敢受且不可以貧累君也未幾  
引疾歸卒於家

右宋學淵源記江藩撰

昌樂閩先生諱循觀字懷庭居平去妄念除閒思一言不敢欺一  
步不敢苟事親則孝事君則忠交朋友則信循循然醇儒也其困  
勉齋私記曰居敬窮理是一事靜坐覺有閒念卽是不敬正念相  
發卽是窮理又曰寢後將一日言語行事存心思其是非善惡而

內自賞罰之日日如此必有進益又曰不真知則勉持之而不能  
久真知而行之如飢渴之於飲食矣故知止而能得也又曰存心  
處事當與古人較得失不可與今人較得失恐臨深爲高小善自  
足又曰謹小慎微非迂也大小巨細總是一理些小不在理上便  
是欲小事苟則大事必苟矣理欲大小之分一故也故一事不慊  
他事作來都覺費力致曲之功可不務哉又曰譽有益於名無益  
於實毀有損於名無損於實故君子務實而已不以毀譽動於中  
也又曰有人待我以橫逆便當思聖賢處橫逆是如何有人愛我  
敬我便當思聖賢處人愛敬是如何推之凡接物應事皆然隨處  
精察而處之務當於理則近道矣又曰林氏逋曰涉世應務有以

橫逆加我者譬猶行草莽中荆棘之在衣徐行緩步而已此最爲處橫逆之善法又坐密室如通衢馭寸心如六馬又勉強爲善勝於因循爲惡又耳不聞人之非目不視人之短口不言人之過又以責人之心責己則寡過以恕己之心恕人則全交又不自滿者受益不自是者博聞又子不可待父慈而後孝弟不可待兄友而後恭又兄愛而訓弟恭而勞夫和睦而莊婦守正而順又寡言擇友可以無悔吝憂辱又檢身以正交際以誠又語人之短不曰直濟人之惡不曰義皆名言也又曰程朱只是教人主敬所謂主敬非迫促束縛之謂但要時時提醒此心在這裏便能照管許多道理詩云於緝熙敬止只常明處便是敬不敬則中無主而昏書曰

顧諟天之明命亦緝熙之義也又曰隨其所處須想見前是甚境地古人必有以詔我矣又曰聖門爲學只是從事物樸實頭力行去一貫之旨性道之奧聖人罕言學者亦未嘗妄意今爲學多是躐等欲不禪得乎又曰聖門高弟顏曾爲最三省之語四勿之箴抑何親切平實也學者可以知所用力矣又曰上蔡云去卻不合作的事則於用敬有功予補其意云存得常不散的心則於集義得力程子所謂敬義夾持又曰學者於此理既知之矣更反覆思之體驗既久涵養既熟自然中心悅豫若方稍稍知得卽置之而他求如有所迫而然者心氣勞耗所必然矣又曰數刻之言不終日之事有初能自立而漸失其本心者氣易勝而志易奪乃如此

又曰凡人作一事能全然不用權術者鮮矣明道謂人之患在用智也一用權術雖是好事皆爲不誠無物又曰言語行事一一反之於心此善邪惡邪誠邪詐邪又曰忿欲不能不過懲窒之道未盡也於不當忿之忿猶或知所遏抑至事之當忿則遂過矣於不當欲之欲猶或知所裁制至欲之可求則遂過矣須於氣已動時更持其志又曰教民之道在躬行以率之自處於貪不能責民之廉自處於肆不能責民之恭自處於僞不能責民之信又曰明不可學而可學寡欲窮理習事明之方也又曰血氣之勇非必不正也何以異於義理之勇此幾微之界須自精察蓋先生工夫纖悉俱到於義理毫釐不差有如此者其去情堂記曰善醫者必察知

病之所在度其虛實審其緩急而後可治疑而試以藥未有能去者也既察知病之所在矣又期於力攻而必去之夫風寒暑溼且而感午而發者易攻也至於極虛勞憊其本由於情欲飲食之不度近者數年遠者數十年而後發其積之也久則其中之也深而藥之也難幸而治之得其道且攻之力矣則又必謹其所養而後幸其不復不然則發不旋踵且加厲焉何則氣血澆薄而不支也爲學者何以異於是觀二十後乃有意於克己之學始而求其惡以爲喜攻異氏爲邪僻之說於是取聖人賢人之書伏讀而繹之究其明達正直之旨志念稍稍就實然於吾道階級尙罔然不識其安放久之知心實多欲以多欲之心求道是狼羊同牧而莠禾

並裁也於是強制吾欲省之念慮察之行事庶幾效法於克伐怨  
欲之不行焉者然時復橫決其決也或旋能自制或久之不能制  
復自念曰欲之所起由於爲善不誠不誠則不知爲己而欲潛伏  
因從事於謹微而求誠一念也必勉以勿欺一事也必要諸忠信  
自是私僞之萌頗少於前萌亦易除然終不能禁其萌也年來屢  
興屢躋德不加進業不加修每一念及輒獨坐嗟咨發憤流涕或  
夜未半而耿耿不寢以至曙困極橫極忽若有誘其中者乃知吾  
之惡曰情要在去情而已矣情於實踐故終不能釋然於異說情  
於矯其所便安故力不能繼情於去僞故恆心不堅夫不力警其  
情而第浮游從事於三者譬治病者昧其本而姑試之於標其不

至劇則幸矣雖然情之爲惡陰弱而難扶其中於吾心者三十年矣是皆平日頽放恣佚之所積不任譙訶督責之所致如勞憊然非終身克治以藥之未易變非戒謹恐懼培其根本以養之未易強且恐年力日衰心神彌耗中道而廢將一蹶不可復振其終流於小人之歸則大可哀也乃名其堂曰去情且臚爲三目以自詔云其目曰存省勿忘躬行勿怠常業勿廢其醉醒語序曰醉醒語者安邱文超劉子之所著也其言多辨流俗之惑而於闢浮屠也尤力可謂自信者也浮屠之說足以怵天下愚夫愚婦而使之必從而先王之禮多因之以壞士大夫雖知其非而往往效之非獨牽於俗亦其無以自信而動於禍福故也觀劉子之書不惑於此



豈非難哉佛入中國幾二千年矣唐以前其患猶在於禮俗至宋乃並爲學術之害自程門高第弟子已浸淫其中朱子所以力辨也有明王氏更倡異說以掊擊朱子後學師之其失彌甚由嘉靖以及崇禎門戶繁興各標宗旨大半支離於無善無惡而已夫所謂無善無惡者卽金剛經之離一切相維摩詰之法無好醜圓覺之性自平等無平等皆是物也故達摩慧可輩以爲覓心了不可得覓罪了不可得覓心了不可得則無善矣覓罪了不可得則無惡矣無善無惡則妄行而任智矣近世士大夫多好其說至或昌言訶章句詆集注尤可駭嘆昔陽明王氏見門人非朱輒怒止之蓋平日之掊擊特欲以伸己說而終不欲自絕故摘取緒言以竊

附焉今則橫議無忌矣陽明所快一時之論而詎知禍之至此與  
劉子所闢佛之粗者也有能本聖賢以來之旨明中正以黜邪淫  
以正人心如劉子之不惑者豈非劉子所待於後者哉其文士詆  
程朱論曰予觀近代文士以著述自命者往往傳會經義以立言  
然於程朱之學則或者尋豐索疵而深寓其不好之意予惑焉夫  
程朱之言卽六經也學者苟近思而求之則有見其理之一而本  
末之無殊致矣然而攻之惟恐不勝者則是未嘗致思於其閒也  
夫未嘗致思於其閒宜若六經之言皆有所不好焉然而崇之惟  
恐其不至者則是劫於勢而不敢犯也夫人雖甚愚闖有非毀聖  
人者則怒斥之矣眾人皆以爲嚴而一人以爲侮而不之顧將如

大惡大罪之犯眾誅焉至於程朱去今未遠無聖人之號稍有異議亦不甚怪於是以其宿怒積忤於六經之義盡發舒於程朱而不能復忍者其勢也又有說焉文士所愛者辭也六經之辭古雅深奧利於引据增文章之光悅故雖棄其實而猶取其華程朱之言直陳事理或雜以方言無彫琢之觀華實兩無取焉而其言又顯切近今情事足以刺譏吾之所爲而大有所不利則安得不攻也哉然不敢攻其大者何也其大者君臣父子之經修身治人之理皆燦著於經詆之則爲詆經詆經則犯眾誅故不敢乃摭其訓詁字義考論故實之異於他說者窮極其辨至刺刺累幅不已或詆之爲愚爲悞嗚呼六經程朱之所傳者非字義故實而已也其

道在於君臣父子之經修身治人之理人道之所以經緯天地之  
所以貞固鬼神之所以昭明者皆在焉如以字義故實而已則古  
之善是者宜莫如記醜而博之少正卯而見棄於聖人何也況其  
所據以攻程朱之說又多程朱所辨而廢之者而非其博聞之有  
不及也然且呶呶焉不知止多見其鬼瑣陋劣而不智也甚矣秦  
人有敬其老師而慢其師者或問之曰老師衣紫師衣褐或曰然  
則子非敬其老師也敬紫也今之尊六經以辭華而侮程朱者是  
敬紫之類也其與法鏡野書曰今之陽尊程朱者多出於爲科舉  
之俗儒稍知講學未嘗不惟王氏之從王氏之書僕皆讀之矣其  
發明知行合一之旨最爲有味然由其說終任心而廢講習言雖

高而非貞則也聖人之教人也使人賓賓焉於博文好古言行禮樂之間至性命一貫非其時則弗語蓋多爲之方以服擾其聰明思慮之間及其久也內外馴習欲棄之而有不可得故能強立而不返其機之欲達然後發其本原使知夫道之極焉今義理未明持行不諳而驟使之專事其一念一時之至非不適適然如有自得之樂也然過焉而易忘震焉而易變無所以馴習之故也僕嘗有志於學取先正矩矱而淺求卑行者數年雖無得亦庶幾免於大惡及得王氏之書遽悅而從之盡舍其一切課程而求之於精微數月之後乃頽然喪其所守然後知其學或上哲者有取焉中人以下如僕者殆不宜究心也吾聞聖人之道愚夫與能其事不

異其說不高孔孟及程朱是也王氏不然故竊以爲非貞則矣今  
之爲王氏者得毋悅其言而未見其害乎或上哲之取精能融通  
陶冶而不拘其方非愚者所能測耳以上二說私心所願進於足  
下者然半年以來所新知亦竭於此幸教而誨之先生與濰縣韓  
公復講學於程符山篤守程朱身體力行壁立千仞不囿於俗學  
不惑於心宗一本規矩準繩內直外方不詭不激釋褐爲工部主  
政事有不可以去就爭卒以此退居山林著有西澗草堂古文詩  
集

右學案唐鑑輯

懷庭學行醇篤時目爲真儒官考功一秉直道事或齟齬輒不畫

相同列或強之荅曰吾學何事豈至是變耶吏或舞文亦不遽責  
取陳文恭公所刻在官法戒錄為講說曰存其廉恥俾知悔改安  
見吏不可教也在部三年以病請假歸未幾卒年四十有五著有  
論語譜西澗隨筆諸書

右 國朝山左詩續鈔張維屏錄

金兆燕

棕亭遊黃山諸作奇崛可喜又工院本在揚州作旗亭畫壁記盧雅雨遲使刻之生平不耐靜坐愛跳躍多言笑故時人目為喜鵲

右湖海詩傳張維屏錄

吳錫麒云余丙申遊揚州始得交棕亭先生時物力殷饒先生以廣文一官開設壇坫號召名士問字之酒束脩之羊資用咸給每風月佳夕聯舫於紅橋白塔閒擊鉢分箋互相角勝獨先生騁其速藻落筆如飛余瞠辭追之不能及也

右正雅集符葆森錄

按金公一字鍾越安徽全椒縣人乾隆丙戌進士官揚州府教授國子監

博士著有  
棕亭詩鈔



四庫全書

卷

李師白

公之弟原任湖廣安化縣知縣與盛兒女媿姪兩家相距百二十里往來無閒故知公學行政事最悉而豕君通判池州轉知泗州盛任江藩者四年深知其廉能益因以知公之生平與其家法足以傳世不替也乾隆己未冬泗州君聞訃以匍匐歸卜葬有日泣請誌公墓而爲之銘且曰公之行非盛莫能詳也不獲辭按狀公姓李諱師白字欲仙號恕亭江西臨江之峽江人曾祖植鄉飲俱寶祖時耀庠生肄業南雍父廷任孝友樂善歲甲申游饑出粟給賑鄉族全活者甚眾 敕贈承德郎待贈奉直大夫公生而穎異好古力學孝友端嚴睦嫻任恤好施予鄉人多蒙其惠弱冠補博

士弟子員食餼貢於廷丙戌授萬安教諭未赴任丁內艱服除補  
南安崇義縣教諭月課所拔識皆成進士風教丕振擢山東歷城  
縣知縣精明仁厚罪者服觀者感不期月訟簡刑清賢聲大著時  
澤旺阿喇蒲坦侵藏地 朝廷方勤青海之役 詔近畿牧令中  
拔其尤者轉餉入藏公與東昌守楊公文乾曹州牧宋君國柱霑  
化令沈君文崧蒲臺令朱君成元並舉行就道觀者色沮公毅然  
一往無幾微卻願往返三萬餘里閱期有六月積雪凝嵐殊絕人  
境夫役駝馬疲斃殆盡隻身而東還視吏民俱如再生矣先是由  
西甯至木魯烏蘇清餉畢事撫遠大將軍問解官有肩運米至藏  
者各自書願字否亦無強時眾皆畏謝公語霑化曹州二君曰東

省同事五人楊公病歸朱君不能去吾三人亦中道而返無以仰副 詔旨且負上憲揀任意其謂之何率先竟填願字露化曹州二君從之遂長運深入得與凱旋復 命上憲各惠人蓑狐裘等物慰勞備至沿途所經山川城郭之異風土人物之殊與夫聖賢古蹟仙佛奇蹤日逐筆記顏曰進藏錄且曰此臣子分內事非敢誇步武張騫傅介子立功塞外聊以示吾子孫知特膺 簡命當竭力殫心不可愛惜頂踵云爾復任益恪其厥職愛民重士遇童子試一秉至公邑稱得士復謀建立義學旋以署陽信事未暇爰於陽信拔俊士五十餘人延名士三人師之諸生翕然鼓舞後入賢宮者多半出於義學癸卯秋若惶窘各邑窮於捕滅公請除雇

國朝通志卷之六十一  
募撲打外令百姓自捕準所捕皆給與官米稱蝗石斗入倉隨到  
隨給於是爭先恐後捕蝗盈廩且齋戒疏禱於城隍廟明日蝗捕  
未盡者皆赴水死又歷邑歲額米麥若干癸卯麥不有秋糴貴徵  
期屆民顆粒難輸吏胥持簿促徵謂關軍需不應期考程所繫甚  
大刻不可緩公惻然曰此際責民輸麥無米難炊其曷忍此爰請  
暫停麥徵權以見貯米石散給俟秋成令民納米補麥事行民甚  
便之今著爲例遇賑貸必單騎親檢戶口實給毫不假手窮鄉僻  
壤不使遺漏嘗曰一絲一粒皆 朝廷恩關百姓軀命胥役稍有  
侵漁誤國陷民司牧者咎將誰諉又邑有二里壩延袤數十里阡  
陌相連爲一方利賴數遭水衝良田化爲巨浸公請築隄橫截水

道隄成果無復泛濫至今荷鍤不驚他如嚴寒給貧民衣死亡施  
貧民棺以及買義冢掩埋枯骨有利民生疾苦者措理皆不遺餘  
力甲辰以輸輓佐軍功 特擢行人司行人尋以年力就衰辭歸  
里名山招提登探遊歷久而不倦晚復築室江嶺念進藏時海涯  
危險閒彷彿見雲端鮮衣玉色如大士像命工繪懸壁閒時與戚  
友爲蓮社遊蓋夷猶曠淡如白雲之舒卷層霄矣然而忠敬血誠  
息存不懈病篤之日猶呼長孫天緒語曰聞泗州蝗害甚正在蠲  
恤汝可星馳告汝父當效汝祖治歷時散賑必躬必親毋飽奸胥  
稍剋絲毫上負 朝廷予心滋戚促行蓋再三云公生乾隆己未  
年十一月初十日卯時卒年七十有五以某年月日葬某山元配

宋氏次配宋氏俱先公卒次配劉氏子四孫九銘曰

隴西之望江右之英葉葉奕奕有偉其生橫水木鐸惟人之作平  
陵眾父惟民之託卓哉西行履險如平餉師靖遠忠摩蒼青敘功  
晉秩既闕既闕超然遐思雲山披拂澤厚世昌日譽髦之煌煌迹  
逝神留視江天其悠悠

右墓誌銘晏斯盛撰

吳震生

比部吳君葬其元配程恭人於資口復於其左築生壙自爲誌銘述其生平之志與其曠遠之懷以及媼連氏族甚悉乾隆歲在己丑君年七十五矣末疾不慎遂至不起屬其子封英曰表吾墓者宜莫如杭君嗚呼余文之不異於人人審矣君臨沒墜言鄭重誣諉何哉武林自西湖八社而後風雅衰息幾二百年余被放歸田於南屏開設壇坵金江聲觀察丁鈍丁隱君周辛老厲樊榭兩斂士牽連入社與君爲文章性命之友皆以前沒衰遲偃蹇獨有余在肩後死之責君不余屬而誰屬也乃按其狀而系之曰君諱震生字長公可堂其號也姓吳氏吳氏望出延陵其遷歛者以唐左



臺御史少微爲始祖九傳至元公遷於豐溪之陽歷二十七世爲君曾祖諱茂吉國子監生祖諱豹然仁和諸生以君貴馳贈朝議大夫如其官父諱之驂明經鄉飲大賓封朝議大夫母羅基人縣令玉受公女生君而早卒君才氣全涌千言立就從武進秦孝廉官壁學爲制舉文紆餘卓犖遠有家法弱冠受知江夏胡公潤鬱爲選首五踰省門薦而未售遂棄去入貲爲刑部貴州司主事奇請它比獄無冤濫以獄吏少和氣白雲司不可久居乞歸不復出營葬高曾祖父竭誠盡慎無忝所生樂湖山之勝買宅太平橋側濱河築樓三楹顏曰舟庵贈公所自號曰吾公魂魄應戀此也性耽吟詠詩不下千百餘篇尤工金元樂府熟諳南北宮調分

刊節度凡古今可喜可愕之事悉寓之倚聲竟入酸甜之室行世者凡一十二種嘗與厲徵士丁隱君買舟同遊山陰盡覽越中之勝而還倡和詩朝傳夕徧一時紙貴少嬰疾博綜醫術王宇泰張景岳兩家之書橫豎貫串洞垣一方青烏家言人各異說獨以仰止道宗爲準的著葬書或問數篇發明斯旨垂示子孫勿爲他歧所惑又著吳氏先塋志自芳田祖墓以迄資口新塋繪圖立說刊刻成書讀莊有摘莊一書別有性學私談太上吟金箱壁言豐南人事考已行世晚年徧覽竺乾之書著大藏摘髓余與君初未識面君割新宅之西偏成邱伯之讓自歛道杭每接言論輒移晷不忍舍去語所謂白頭如新傾蓋如故余與君兩無負焉君卒以

九月五日越日余往哭之肅然風開帷堂英爽猶顯顯在吾胸臆  
聞欷歔乎哉君初娶率溪程氏生一子慶貽旋殤繼以無錫秦氏  
一子卽封英也翰林院待詔一女名蕙詒側室虞氏出適布政司  
理問程璧孫三揚宗和宗翕宗卜以乾隆三十五年某月日反葬  
於休甯余未及臨其穴也亂以銘曰

預爲壽藏始漢趙岐圖畫賓主四賢是師自爲誌銘始唐王績青  
山白雲寫所素歷以今方古豈有不逮長達死相破除貪愛衣足  
斂形棺足飾身譬以巨室而偃歸人狐死謂仁首邱焉依況公久  
客云胡不歸魚躍拂池流蘇振動轎車卽塗山迎水送率川如帶  
距墓七里異椁同牢九原伊邇高壟四尺美櫃十尋旣安且固樵

牧不侵

右墓表杭世駿撰

國朝詩林卷之二

卷之二

三

張埴

商言生平與翁覃溪孔蕙谷諸君友善故考證金石及書畫題跋

殊為詳贍

右蒲褐山房詩話符葆森錄

按張公號瘦銅江蘇吳縣人乾隆己丑進士官內閣中書

著有竹葉庵集

正德... 卷之... 七

七

鮑之鍾

戶部少負雋才文采秀逸在都門與洪稚存吳穀人趙味辛唱酬

最密法梧門稱為詩龕四友

潤故

農部以初月賦為劉文清公所知 召試第一人望之若瓊枝玉

樹後浮沈郎署流連詩酒每以汲引寒峻為己任

京江耆舊集

右正雅集符葆森錄

按鮑公字雅堂一字論山江蘇丹徒縣人乾隆己丑進士官戶部郎中著

有論山  
詩鈔





吳元念

君諱元念字在宮桐城吳氏曾祖諱子雲順治乙未進士河南提學按察司副使祖諱祖祐浙江安吉州知州父諱文炳候選州同知母馬太恭人生六子而君爲長年二十餘而孤君撫諸弟成室治家有法不貪而殖君始仕得雲南建水州知州有善政有土官亡有子而其弟欲奪其襲位構訟弟以金置酒饗饋君召兩造升堂開甕出金罰使修橋而斷以子襲鄰州有盜越境至爲君獲君以與其州官而不居其功數年擢戶部四川司員外郎二年告歸里居凡三十三年嘉慶八年正月乙未卒年八十君爲人長者兩言而和易里人多愛君其生平無妾媵居京師時以妻子事母於

573306

文科教師研究生阅览室

里與姚爾同賃一宅而分居之朝夕談無閒爾後君四年乃歸爾  
 自歸里多居書院不復與君長聚然時念君及君喪而爾故人盡  
 矣夫人左氏懷來知縣世壽女能佐君以成其志生子二候選訓  
 道金榮監生承露女三孫九夫人卒於乾隆五十三年某月某日  
 嘉慶九年三月某日合葬於縣治東南十里方莊之原爾為銘曰  
 質素寡競以簡居政民樂以幸懸車既定優游多慶年耄身竟其  
 族方盛繩繩子姓有配維稱永偕幽奠

右墓誌銘姚爾撰

151-860



21101000158003